

Juãw

Juãw kot tanhmã Jesus kot amnhĩ nhĩpêx to ho pa hã kagà

Juãw na pre kagàja nhĩpêx. Na pre mãânên Wam Juãw nê Sikũn Juãw nê Hapuhã Juãw nê Apokarip nhĩpêx. Juãw Paxis kêt axtem Juãw õ. Nê Jesus kôt mẽ pa ho mẽ pa xwýnhjê hõ na pre. Nê ý hã mẽ ahkre ho pa xwýnhjê hõ na pre. Nom kormã ã amnhĩ nhĩpêx anhÿr o pa hkêt ri na pre kêp tep kanhêr xwýnh. Nê kêp Jesus kràmnhwý mex na pre. Jakamã na pre kagàja nhĩpêx nê kamã Jesus kot tanhmã amnhĩ nhĩpêx hã harê nê hã kagà. Nê tanhmã kapêr to hã kagà.

Na pre Jesus kêp Tĩrtũm Kra hã harê nê hã kagà. Nê ãm pix kukwak ri Tĩrtũm wa kuri mẽ pahtĩr tũm nê mẽ papa ho mẽ papa hã harê nê hã kagà. ã na pre Juãwja mẽ pamã Jesus jarê nê hã kagà anê.

Jesus te kot Tĩrtũm pyræk ã harênh

Matêwre 1.23; Juãw 8.12, 8.58, 10.30, 20.28; mãânên Atre 10.36; Sikũn Korĩt 4.4; Piripos 2.6-11; Korosê 1.13-17, 2.9; Xitre 2.13; Eprêw 1.1-4; Wam Juãw 1.1-4, 5.20; Apokarip 1.17-18

¹ Amnepê mã kormã mẽmoj kêt ri nhũm kot Tĩrtũm kapêr o amnhĩrĩt xwýnhja Tĩrtũm kôt pa ho pa. Te kêp uræk nê pa. Wa kot amnhĩ nhĩpêxja ãm tipxi. Nê wa àhpumunh ãm tipxi. Nê wa hkarõ mãânên ãm tipxi. ãm wa tipxi rãhã nê pa ho pa.

² Kormã mẽmoj kêt ri na pre Tĩrtũm kapêr o amnhĩrĩt xwỳnhta Tĩrtũm kôt ri pa ho pa.

³ Nê Tĩrtũm nhỹ hã na pre mẽmoj piitã hã apê nê ho kato. Jao pyka ho kato nê kaxkwa ho kato nê gô xujanãr o kato. Nê kamã mẽmoj piitã Tĩrtũm nhỹ hã ho kator pa. Kop apu mẽmoj to kator kêt ronhỹx mẽmoj amrakati kumrêx.

⁴ Nê Tĩrtũm o amnhĩrĩt xwỳnhta pix kukwak ri na hte mẽmoj piitã htĩr nê pa. Nê ãm pix kukwak ri na htem Tĩrtũm ri htĩr tũm nê pa ho pa. Nê te myyti kot mẽ pamã mẽmoj piitã hirã ho pa pu mẽ kukwak ri mẽmoj piitã omunh mexja pyrã nê na pre hte mẽ pahpiitã mẽ pamã mẽ pahte amnhĩ nhĩpêx nyw nê mẽ pajamaxpêr nyw o amnhĩrĩt pu mẽ pahprĩ hã mar mex nê.

⁵ Ja kaxyw na pre wrỳ nê ri mẽ kãm Tĩrtũm kapêr jarênh o ri mẽ hkôt pa. Jao mẽ kot amnhĩ nhĩpêx nyw jarê nhũm mẽ kot amnhĩ tomnuj xwỳnhjaja tee ri kuma nê kãm mar prãm kêt nê. Nê tee ri kãm kapêr o hapêx prãm kaprỳ.

Juãw Paxis kumrêx kot tanhmã Jejus jarênh to hã harênh

Matêwre 3.1-3; Makre 1.1-4; Rukre 3.2-6

⁶ Tã nhũm kormã Jejus mẽ kãm kapêr o pa hkêt ri nhũm Juãw Paxis kumrêx mỗ nê hkukamã Tĩrtũm nhỹ hã mẽ kãm tanhmã harênh to ho pa.

⁷ Mẽ kãm mẽ kot amnhĩ nhĩpêx nyw nhõr xwỳnh pê Jejus Kris kukamã mẽ kãm harênh o ri mẽ hkôt pa. Mẽ kot mar nê amnhĩ kaxyw Jejus kôt hamaxpêr kaxyw.

⁸ No Juãw Paxisja na pre hte mẽ kãm mẽ kot amnhĩ nhĩpêx nyw nhõr o pa hkêt nê. Na pre ãm

kot mẽ kãm òr xwỳnhta kukamã mẽ kãm harẽnh o pa.

⁹ Jakamã na pre hte mẽ kãm harẽnh o ri pa nẽ mẽ kãm harẽnh o:

—E ot pa mẽ amã mẽhõ jarẽnh o ri ixpa. Kot mẽ pamã mẽ pahte amnhĩ nhĩpêx nyw nhõr xwỳnhta. Koja tokyx mẽ pakamã pøj pu mẽ omu. Koja pøj nẽ mẽ piitã mẽ kãm Tĩrtũm kapêr jarẽnh o ri pa. Mẽ pahte pahprĩ hã mar mex kaxyw. Anẽ.

*Tĩrtũm kot mẽ ho hkra hprãm xwỳnhjê jarẽnh
Rômãn 8.14; Karatas 3.26; Epes 1.5*

¹⁰ Tã nhũm Jejus man kot mẽmoj piitã ho kator xwỳnhta wỳr wrỳ nẽ mẽ hkõt ri pa. No nhũm mẽ kot kêp mẽmoj piitã ho kator xwỳnh ã omunh kêt jakamã na prem kapêr ma nẽ ãm kuma nẽ amnhĩ kaxyw hkõt hamaxpêr kêt nẽ.

¹¹ Na pre wrỳ nẽ mẽ pakamã ì ho kato. Kêp mẽ pahpiitã mẽ pahto kator xwỳnh tã nhũm mẽ ohtô nẽ omu nẽ ãm omu nẽ hkõt amnhĩ nhĩpêx kêt nẽ.

¹² Na prem ãm grêre nẽ kuma nẽ amnhĩ kaxyw hkõt hamaxpêr nẽ hkõt amnhĩ xunhwỳ. Hãmri nhũm amnhĩ tã mẽ omu nẽ mẽ kãm:

—E nà ãm hãmri. Ra mẽ ate amnhĩ kaxyw ixkõt ajamaxpêr nẽ ixkõt amnhĩ xunhwỳr jakamã na ka mẽ ixkukwak ri apê Tĩrtũm kraa. Anẽ.

¹³ Na htem ã kêp Tĩrtũm kra hprãm xàj Jejus kõt amnhĩ xunhwỳr anẽ. No na htem mẽ katorxà nhõxà hkre rùm hapôx kõt kêp Tĩrtũm kra hkêt nẽ. Rỳ amnhĩ krã hkõt tanhmã amnhĩ nhĩpêx to kukwak ri kêp hkra hkêt nẽ. ãm Tĩrtũm tãm kot mẽ ho hkra pix kukwak ri na htem kêp hkra.

Jejus wryk nẽ ĩ ho kator ã harẽnh

Matêwre 1.20; mããnẽn Rõmãn 1.2-4; Piripos 2.6-7; Eprẽw 2.9, 4.15; Wam Juãw 4.2

¹⁴ Jakamã na pre Tĩrtũm o amnhĩrĩt xwỳnhhta mẽ pahwỳr wry nẽ mẽ pakamã ĩ ho kato nẽ mẽ pakamã pa. Kêp Tĩrtũm Kra hã pixi mex na pre. Nẽ kot amnhĩ nhĩpêxja te Tĩrtũm kot amnhĩ nhĩpêx pyrãk. Urãk nẽ mex o mex. Nẽ urãk nẽ mẽ pakutã nojarêt xwỳnh. Na pre hte katàt kôt Tĩrtũm kapêr jarẽnh o ri mẽ hkôt pa. Pa prem kuma nẽ mex o mex ã omu.

¹⁵ Nhũm Juãw Paxis na pre hkukamã mẽ kãm harẽnh o ri pa nẽ mẽ kãm:

—E ra ixte mẽ amã harẽnh o ri ixpa xwỳnhhta na ra pøj. Te pa ixte wa nẽ ixkator pyrãk nom amnepê mã kormã ixkêr ri nhũm htĩr rãhã nẽ pa ho pa. Ham ĩ ho kator tã kêp Tĩrtũm Kra jakamã urãk nẽ rãhã ho rãhã hã pa xwỳnh na. Jakamã kot amnhĩ to rax o kot ijakrenh par. Anẽ.

¹⁶ Nẽ kêp mẽ pakutã nojarêr rãhã nẽ pa ho pa xwỳnh jakamã na hte mẽ pahto mex rãhã pu mẽ kukwak ri pamex nẽ ri papa ho papa.

¹⁷ Na pre finat Mojesja mẽ panhĩgêjtê mã Tĩrtũm kapêr jarẽnh o ri mẽ hkôt pa nẽ mẽ kãm:

—Na pre Tĩrtũm mẽ pahte tãm amnhĩ nhĩpêx o papa hã mẽ pamã karõ. Jakamã kot puj mẽ kot mẽ pamã mẽmoj tã karõ xà hkôt ã amnhĩ nhĩpêx anhỳr o papa nẽ ra tãm amnhĩ nhĩpêx o papa. Anẽ.

Nhũm pre Mojesja ã mẽ kãm kapêr o pa anẽ. Hãmri nhũm mẽ kuma no ãm tee ri kãm Tĩrtũm kôt tãm amnhĩ nhĩpêx o pa hprãm kaprỳ. Jakamã nhũm hpãnhã Jejus Krisja wry nẽ mẽ mẽ pamã kapêr õ ho kapêr o pa nẽ mẽ mẽ pamã:

—E mẽ ate Tĩrtũm kôt amnhĩ nhĩpêx o apa hkêt tâ nhũm arĩ kãm mẽ ajapê nẽ. Nẽ kãm mẽ ato mex prãm. Jakamã kot kaj mẽ amnhĩ to awỳ nhũm tanhmã mẽ akrã hto ka mẽ ra tãm ri amnhĩ nhĩpêx o apa. Ām hãmri na pa ã mẽ amã ja jarẽnh anẽ.

Anhỹr o mẽ pamã Tĩrtũm kapêr jarẽnh o pa. Tĩrtũm kapêr na mex o mex.

¹⁸ Nẽ aa mẽ pahtõ mẽ pahte pano ho Tĩrtũm pumunh kêt. Ām Kraja pix na kot no ho omunh. Kaxkwa kamã kuri ri pa ho pa jakamã kot omunh mex. Nẽ te kot Hipêxàja pyræk jakamã na pre wrỳ nẽ hprĩ hã tanhmã kute hã mẽ pamã harẽnh o pa. Jakamã na pu mẽ ra pahpiitã Tĩrtũm kot amnhĩ nhĩpêx ã omu nẽ mar mex nẽ.

Juāw Paxis kot mẽ kãm Jejus jarẽnh o pa hã harẽnh

Matêwre 3.1-12; Makre 1.1-8; Rukre 3.15-17; mǎānēn Atre 19.4

¹⁹⁻²⁸ Na pre Juāw Paxis ma hkwỳjê hkôt mẽ kãm Jejus jarẽnh o pa nhũm mẽ hkwỳjaja kuma nẽ amnhĩ kaxyw Jejus kôt hamaxpêr nẽ hkôt amnhĩ xunhwỳ. Hãmri nhũm Juāw Paxis ja hã mẽ omu nẽ Tĩrtũm mã mẽ hkrã kumrã. Pyhti pẽ Jotāw nhĩkjê hã krĩ pẽ Petān tâ ri mẽ hkrã kumrār o pa. Hãmri nhũm krĩ pẽ Jerujarẽ kamã Ijaew krãhtũmjaja harẽnh ma nẽ ma hwỳr hkwỳjê rẽ. Mẽ kot tanhmã hkukjêr to nhũm kot mẽ kãm tanhmã amnhĩ jarẽnh to kaxyw. Jakamã nhũm mẽõ patre hkwỳjê mẽ Tĩrtũm mã amnhĩ jarẽnh xà hã ixkre kamã mẽ ho ajuta xwỳnh kwỳjê mẽ Parijew nhõ xwỳnh kwỳjê mẽ nhũm mẽ ma hwỳr mra. Juāw Paxis wỳr mra nẽ omu nẽ kãm:

—Pa. E ot pa mẽ awỳr mra. Kwa mẽ inhmã amnhĩ jarẽ. Apê mẽ atõ na ka we? Xà ka na apê Tĩrtũm kot mẽ ixkaxyw axãm mã xwỳnhta na ka nà? Xà ka na pa htem amnhĩ wỳr akamã ijamak o ixpa? Anẽ.

Hãmri nhũm mẽ kuma nẽ mẽ kãm: “Nà pa hkêt.”
Anẽ hãmri nhũm mẽ kãm:

—Tô mãn xep apê amnepê mã Tĩrtũm nhỹ hã kapẽr jarẽnh xwỳnh pê finat Erisja. Hã na ka tanhmã amnhĩ to nẽ akupỹm atĩr nẽ mẽ ixkõt apa nà? Anẽ.

Hãmri nhũm mẽ kãm:

—Nà ixpê Eris kêt. Anẽ.

Hãmri nhũm mẽ kãm:

—Tô mãn xep apê finat Mojes kot mẽ kãm harẽnh o pa xwỳnhta na ka nà? Anẽ.

Hãmri nhũm mẽ kuma nẽ kê axte mẽ kãm:

—Nà ixpê tãm kêt. Anẽ.

Hãmri nhũm mẽ tee ri kot ã amnhĩ tã aprār anhỳrja ma nẽ kãm:

—Kwa apê jajê hõ hkêt tã na ka hte mẽ hkrã kumrãr o ri apa. Kwa nà akatàt kõt mẽ inhmã amnhĩ jarẽ. Pa mẽ ama nẽ ma akupỹm mra nẽ mẽ kot awỳr mẽ ixrẽnh xwỳnhjê mã tanhmã ajarẽnh to. Tanhmã na ka hte mẽ kãm amnhĩ jarẽnh to ho ri apa? E kwa mẽ inhmã amnhĩ jarẽ pa mẽ ama. Anẽ.

Hãmri nhũm tã hprĩ hã mẽ kãm amnhĩ jarẽ. Amnepê mã mẽ hkukamã Tĩrtũm nhỹ hã kapẽr jarẽnh xwỳnh pê finat Ijais kot hkukamã tanhmã harẽnh to nẽ hã kagà xà hkõt nhũm mẽ kãm amnhĩ jarẽ nẽ mẽ kãm:

—Tôe. Nà kot paj ixprĩ hã mẽ amã amnhĩ jarẽ ka mẽ inhma. Amnepêm Tĩrtũm kapẽr jarẽnh

xwýnhjê hõ pê finat Ijaisja na pre hte mẽ kãm mēhõ hkukamã harēnh o ri pa. Mēhõ kot mẽ panhõ Pahihti hkukamã htēm nē kapôt ã kutêp mẽ kãm harēnh o pa xwýnhhta nhũm pre hkukamã harēnh o ri pa. Nē mẽ kãm harēnh o:

Koja nhỹrmã mēhõja kapôt ã mõn pôj nē mẽ kãm tanhmã ujarēnh to ho ri pa. Nē mẽ kãm ujarēnh o: “E mẽ inhma. Koja Tĩrtũm tokyx mẽ pahwỳr mẽ panhõ Pahihti mẽ nhũm wrỳ nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o ri apa. Te ho mẽ kot mēhõ kutêp pry ho mex pyrak o amnhĩ nhĩpêx o ri pa. Jao amnhĩ nhĩ ho tãm amnhĩ nhĩpêx nē tãm axpēn nhĩpêx o ri apa. Pahihtita kutêp.”

—Anhỹr o na pre hte finat Ijaisja kot Pahihti hkukamã harēnh o ri pa xwýnhhta kukamã harēnh anē. Tã paa. Pa na pre Ijaisja ã ixkukamã ijarēnh anhỹr o pa. Pa na pa hte ã Pahihti kutêp mẽ kãm harēnh o ri ixpa anē. Tã ã ixte harēnh anhỹr xwýnhhta na ra mẽ pakamã pa ka mẽ kormã ja hã omunh kêt nē. Kukamã na pa hte mẽ piitã mẽ kot hkôt amnhĩ xunhwỳr ã mẽ omunh kaxyw gô pix o mẽ hkrã kumrār o ri mẽ hkôt ixpa. Nom na pre ra mẽ pahwỳr Tĩrtũm kot mẽ pakaxyw ãm xwýnhhta tãm mẽ pahwỳr wrỳ. Àhpumunh tỳx o kot ijakrenh jakamã na pa hte ãm kukwak ri ixpa nē amnhĩ tã hã ixpijaàm o ri ixpa. Anē.

*Juāw Paxis kot mẽ kãm Jejus jahkre hã harēnh
Matêwre 3.11; Makre 1.10; Rukre 3.22*

29 Tã nhũm apkati nhũm Juāw Paxis amnhĩ wỳr Jejus pumu nẽ mẽ kot mar o kuhê xwỳnhjê mã ìhkra ho ahkre nẽ mẽ kãm:

–E. Oněj Tĩrtũm kot mẽ pakaxyw ãm xwỳnhhta tẽ. Mẽ pahpê Ijaew na pu htem xatã pahte amnhĩ tomnuj pãnhã amnhĩrer kaxyw Tĩrtũm mã pahkrit ôwêhti hkra nyw kwỳ hpa nẽ ho amnhĩ pãnhã kãm amnhĩrer o papa. No kêt htẽm něj koja nhỹrmã kãm mẽ pahpiitã mẽ pahte amnhĩ tomnuj pãnhã amnhĩrer pa.

30 Na pa pre ra mẽ amã harẽnh o: “Te pa ixte wa nẽ ixkator nẽ ixtĩr nẽ ixpa pyrãk. Nom amnepẽm kormã ixkêt ri na pre htĩr rãhã nẽ pa ho pa. Nẽ ì ho wrỳk nẽ jar kator tã kêp Tĩrtũm Kra jakamã urãk nẽ rãhã nẽ pa ho pa xwỳnh na. Jakamã kot amnhĩ to rax o kot ijakrenh par.” Anhỹr o pa pre mẽ amã harẽnh o ri ixpa ka prem inhma.

31 –Ixte mẽ amã ã harẽnh anhỹr tã ijaxwỳja kormã ixte kêp Tĩrtũm Kra hã omunh kêt nẽ ãm hkukamã Tĩrtũm nhỹ hã mẽ amã ã harẽnh anhỹr o ri ixpa. Nẽ hkukamã Tĩrtũm mã mẽ akrã kumrãr o ri ixpa. Tã na pa kêp Tĩrtũm Kra hã omu nẽ ã mẽ amã ahkre anẽ ka mẽ omu. Anẽ.

32-33 Nhũm pre ã Juāw Paxis mẽ kãm Jejus jahkre anẽ nẽ mẽ kãm:

–Nà Tĩrtũm na pre ixte mẽ akrã kumrãr o ixpa kaxyw inhmã hã karõ. Tã na inhmã kot mẽ pakaxyw ãm xwỳnhhta o amnhĩrit nẽ inhmã harẽnh o: “Koja nhỹrmã Ixkarõja mẽhõ hwỳr wrỳ nẽ kuri arĩk. Ka ja hã omu nẽ kêp Ixkra hã omunh kurê kumrẽx. Koja amnhĩ xô ri amnhĩ pyrã nẽ mẽ kãm Ixkarõ nhõr o pa nhũm mẽ hkarõ mã agjê.” Anhỹr o inhmã harẽ. Tã na pa ra omu. Na pre Tĩrtũm

Karõ kaxkwa rũm te tuuti pyrà nẽ hwỳr wryk o tẽ nẽ ìkre hã xa.

³⁴ Pa ã kot hipêx anhỳr ã omu nẽ kêp Tĩrtũm Kra hã omunh kurê kumrêx. Jakamã na pa ã mẽ amã ahkre nẽ mẽ amã harênh anẽ. Anẽ.

Juãw Paxis kôt pa xwỳnh wa kot Jejus kôt pa hã wa harênh

Atre 19.4

³⁵ Tã nhũm apkati nhũm Juãw Paxis axte Jejus pumu. Kot hkôt ri pa ho pa xwỳnh mẽ wa nhỹri xa nẽ omunh o xa.

³⁶ Nhũm ra mẽ hãnh tẽ nhũm Juãw Paxis omu nẽ hkôt ri pa xwỳnh wa kãm:

—E oněj Tĩrtũm kot mẽ pakaxyw ãm xwỳnhhta tẽ. Něj koja mẽ pahte amnhĩ tomnuj pãnhã amnhĩre. Anẽ.

³⁷ Hãmri nhũm wa kuma nẽ omu nẽ ma hkôt tẽ nẽ hã ajêt.

³⁸ Nhũm wa omu nẽ wa kãm: “Pa mo na?” Anẽ nhũm wa kot kêp mẽ ahkre xwỳnh ã omunh jakamã kãm:

—Nà wa ixte ma akôt ixtẽm nẽ nhỹri anhõrkwỹ pumunh mã na pa wa akôt tẽ. Anẽ.

³⁹ Hãmri nhũm wa kãm:

—Tõe. Nà wa kam nẽ rĩ ma ixkôt tẽ. Anẽ.

Hãmri nhũm wa kuma nẽ ma hkôt wa tẽ nẽ õrkwỹ hwỳr pøj nhũm ra amỹkry nhũm wa hkôt axà nẽ kuri ỳr o kamàt hãmri nẽ kato nẽ ma akupỹm tẽ.

⁴⁰ Kôt htẽm xwỳnhjê hõta na pre kêp Andre. Simãw Pêtre htõ na pre. Nẽ kaxyw hõja. Wa kumã na pre Juãw Paxis Jejus jahkre nẽ harê nhũm wa ma hkôt tẽ. Tã wa ra akupỹm wa tẽ.

⁴¹ Hãmri nhũm Andreja htõ Simãw wỳr tẽ nẽ kãm:

—Kwa na pa wa jarāhã Tĩrtũm kot mẽ pakaxyw ãm xwỳnh̃ta pumu. Ma pu hwỳr ka wa ixwar ano ho omu nà. Anẽ.

Ijaew kapẽr kãm “Tĩrtũm kot mẽ pakaxyw ãm xwỳnh̃” anhỹrja te kot Gres kapẽr kãm “Kris” anhỹr jarẽnh̃ pyrāk. Ijaew na prem ã Jejus jarẽnh̃ anẽ nẽ harẽnh̃ o: “Tĩrtũm kot mẽ pakaxyw ãm xwỳnh̃.” Anhỹr o harẽ.

⁴² Jakamã nhũm ã Andreja htõ mã harẽnh̃ anẽ nẽ ma akupỹm hwỳr o tẽ. Nẽ wa hwỳr pøj nhũm wa omu. Wa kęp Juāw kra hã wa omu hãmri nẽ Simāw mã kapẽr nẽ kãm:

—Pa Simāw. Nà apê Simāw tã kot paj axte atã anhĩxi hõ mẽ. Kot kaj mããnẽn apê Septi. Anẽ.

Mẽ pakapẽr kãm Septija te kęp “kẽn” jarẽnh̃ pyrāk. No Gres kapẽr kãm te kęp “Pêtre” jarẽnh̃ pyrāk. No Ijaew kapẽr kãm kęp “Septi.” Jakamã nhũm pre Jejus ã Simāw Pêtre hã hixi mẽnh̃ anẽ.

Jejus kot amnhĩ kôt Firipti mẽ Natãnaew wa hwỳr ã harẽnh̃

⁴³⁻⁴⁴ Tã nhũm apkati nhũm ra Jejus pyka pê Garirej wỳr nojarêt nẽ nhỹri Firipti pumu. Firiptija Andre mẽ Simāw Pêtre wa urāk nẽ krĩ pê Pesêj nhõ xwỳnh̃ na pre. Jakamã nhũm Jejus nhỹri omu nẽ amnhĩ kôt kuwỳ nẽ kãm:

—E kwa ma ri ixkôt apa ho apa. Anẽ.

⁴⁵ Hãmri nhũm kuma nẽ ma tẽ nẽ nhỹri Natãnaew pumu nhũm nhỹri pĩ hpār parpê nhỹ nhũm omu nẽ kãm:

—Kwa na pa jarāhã finat Mojes kot amnepêm mẽhõ hã kagà xwỳnh̃ta pumu. Tĩrtũm kot mẽ pakaxyw ãm xwỳnh̃ta na. Tĩrtũm nhỹ hã kapẽr jarẽnh̃ o mẽ pa xwỳnh̃jaja kot hkukamã harẽnh̃

nē hã kagà xwỳnhta. Kêp Najare nhõ xwỳnh nē mǎñnēn kêp finat Juje hkra. E kwa tokyx pu hwỳr ka ixkuxwar ano ho omu. Anē.

⁴⁶ Hāmri nhũm tee ri kot tanhmã harēnh toja ma nē kām:

—Tk. Kokỹ. Najare nhõ xwỳnh piitã kot amnhĩ to mexti hã kot kêt we hõ kêp Tĩrtũm kot mẽ pakaxyw ãm xwỳnh. Anē.

Hāmri nhũm kām:

—Kwa nà ã akapēr anhỹr kêt nē. Ma ixkõt tē nē ixpyrà nē ano ho omu mǎn. Nē rĩ ã ri akapēr anē. Anē.

Hāmri nhũm kuma nē ma hkõt tē.

⁴⁷ Hāmri nhũm Jejus amnhĩ wỳr wa omu nē kuri mẽ kuhê xwỳnhjê mã Natãnaew jarēnh kurê kumrẽx nē harēnh o:

—E oněj Ijaew õja mẽ pahwỳr hpôx o tē. ãm hāmri na hte tãm amnhĩ nhĩpêx o pa. Na hte higêt finat Jako kurom hêx rom ri tanhmã mẽ kām amnhĩ to hêx to ho pa hkêt nē. Na hte ãm kapēr mex pix o ri kapēr o pa. Anē.

⁴⁸ Hāmri nhũm tee ri amnhĩ tã kuma nē kām:

—Kwa mẽhõ na pre ã amã ijarēnh anē? Aa ixte nhỹri apumunh kêt kumrẽx tã ka ri ãm hāmri ã ijarēnh anē. Anē.

Hāmri nhũm kām:

—Nà mẽhõ kot tanhmã inhmã ajarēnh to hkêt. ãm pa na pa hte inhno ho apumunh o ixpa. Kormã Firipti kot awỳr htēm nē amã ijarēnh kêt ri pa ra ixprĩ hã inhno ho apumu. Na ka kormã pĩta parpê nhỹ pa apumu. Anē.

⁴⁹ Hāmri nhũm tee ri kot hprĩ hã harēnh ã amnhĩ tã kuma nē kām:

—Kwa mẽ ijahkre xwỳnh. Pěr ãm hãmri apê Tĩrtũm Kra kumrẽx jakamã na ka ã ijarẽnh anẽ. Xep ka na mẽ ixte amnhĩ wỳr akãm ijamak o ixpa xwỳnhhta na ka. Nà ka na apê mẽ ixpê Ijaew nhõ Pahihti. Anẽ.

⁵⁰ Hãmri nhũm Jejus kuma nẽ kãm:

—Nà ãm hãmri na ka ixte pĩ hpar pê apumunh ã ajarẽnhja ma nẽ hkõt pix mã ixpê Tĩrtũm Kra hã ixpumu. Tã kot kaj ja nhĩrô pê axte mẽmoj mex o kot ja jakrenh pumu.

⁵¹ Koja nhỹrmã kaxkwa axkjê nhũm Tĩrtũm kapêr o mẽ wrỳk xwỳnhjaja kurũm axpẽn japa ka mẽ omu. Finat Jako pyrà nẽ mẽ omu. Ixte Tĩrtũm kot mẽ akaxyw ixãm xwỳnh wỳr koja mẽ ã wrỳk nẽ amnhĩ nhĩpêx anẽ ka ja hã mẽ omu. Kwa jam ajamaxpêr tỳx rãhã ho apa. Anẽ.

2

Jejus kot gô ho mẽ kãm wĩhti nhĩpêx ã harẽnh

¹ Tã nhũm apkati axkrut nẽ hapêx nhũm Jejus arĩ Garirej kamã pa. Nhũm krĩ pê Kanã kamã axpẽn mã wahõj wa rer kaxyw nhũm Jejus katorxà ma mẽ hwỳr mỗ.

² Hãmri nhũm mẽ amnhĩ wỳr Jejus mẽ hkõt ri mẽ ixpa xwỳnhjê wỳ pa mẽ ijaxwỳja ma mẽ hwỳr mỗ nẽ ra mẽ hwỳr pôj.

³ Hãmri nẽ mẽ hkõt wa hã ixkĩnh nẽ apku nẽ wĩhti hkwỳ ho ixkõm o ixkrĩ. Tã nhũm ra wĩhti mẽ kêp hapêx nhũm Jejus katorxàja harẽnh ma nẽ Jejus mã harẽ nẽ kãm:

—Xê Jejus. Na xep ra mẽ kêp wĩhti hapêx pa. Xàt ka tanhmã mẽ ho ajuta hto mê? Anẽ.

⁴ HãMRI nhũM kãm:

—Tôe. Kwa tee ri ajamaxpêr kêt nê. Kot paj tanhmã mẽ kãm ho. Nom kot paj kormã ixpê Tĩrtũm kot mẽ akaxyw ixãm xwýnh ã pa kormã amnhĩ to amnhĩrit kêt nê. Anê.

⁵ HãMRI nhũM katorxà kuma nê mẽ kãm mẽ àpênh xwýnhjê hwýr tẽ nê mẽ kãm:

—An koja JeJus mẽ awýr tẽ nê tanhmã mẽ amã mẽmoj tâ karõ hto ka mẽ ama nê kãm ho anhýr kurê kumrêx. Anê.

⁶ NhũM mẽ kuri kên o poti kêp 6 nê kuhê. Piitã umpým rũnh kumrêx. Kojã hõ pyxi nê nýt nê kamã gô kêp 80 rit nê hkwy kamã kêp 100 rit. Ijaew na htem apkur kaxyw nê amnhĩ nhĩkra kuhõnh japjê rũnh nê kormã apku. Nê apkur pa nê axte amnhĩ nhĩkra kuhõ. ã mẽ kot xatã amnhĩ nhĩkra kuhõnh jakamã nhũM pre htem amnhĩ ri ã poti rũnh kwý xunhwýr anê. No nhũM ra hkapyr nê kuhê.

⁷ HãMRI nhũM JeJus tẽ nê omu mẽ àpênh xwýnhjê mã kãm:

—E mẽ ma mra nê gô ru nê ho poti kuhê mũj piitã ho nýt pa. Anê.

NhũM mẽ kuma nê ma mra nê ho nýt pa.

⁸ HãMRI nhũM mẽ kãm:

—Nà hãMRI. Pãnhã hõ kamã gô hkwy janhi nê o tẽ nê mẽ anhõ patrãw mã agõ kê hkwy ho ixkõ nê kamã ama. Anê.

HãMRI nhũM mẽ mar xà hkôt kãm hkwy janhi nê hwýr o tẽ nê kãm kugõ.

⁹⁻¹⁰ Nom nhũM gôja arĩ kêp gô kumrêx kêt nê. JeJus kot tanhmã ho jakamã nhũM ra hpãnhã kêp wĩhti. Jakamã nhũM mẽõ patrãw wýr hkwy ho tẽ nê kãm kugõ nhũM hkaki nê kamã ama. Nom

Jejus kot gô ho hipêx ã omunh kêt nê. ãm htỳx ho wĩhti kumrêx ã hkamnhĩx nê mex kumrêx ã hkaki. Hãmri nê amnhĩ wỳr mjên nyw xwỳnh mã hpa ho apê nhũm hwỳr tễ nhũm kãm:

—Kwa na htem wĩhti mex o wa nê mẽ kãm kugõ hãmri nhũm mẽ hpenh pa nhũm mẽ rĩ kormã hkôt omnu ho hapu nê mẽ kãm kugõ. Tã ka pễr mẽ axtem nê wam mẽ kãm omnu nhõr pa hãmri nê kormã mex kumrêxja o hapu nê mẽ kãm agõ. Kêt wĩhti ja na mex kumrêx. ãm mex o mex. Anê.

Jejus kot gô ho hipêx ã omunh kêt jakamã nhũm ã kãm kapễr anê. ãm mẽ àpênh xwỳnh pixjaja na prem ja hã omu.

¹¹ Nhũm Jejus kormã mẽ kãm aa mẽ kot mẽmoj pumunh kêt õ ho anhỳr kêt tã krĩ pê Kanã kamã ã mẽ kãm amnhĩ nhĩpêx anhỳr o hkrax. Jao amnhĩ to rax o amnhĩ to rax ã mẽ inhmã amnhĩ to amnhĩrĩt. Pa mẽ ixpê hkôt ri ixpa xwỳnhjaja ã kot amnhĩ nhĩpêx anhỳr ã omu hãmri nê kêp Tĩrtũm kot mẽ pakaxyw ãm xwỳnh ã omunh kurê kumrêx.

¹² Tã nhũm Jejus hpãnhã ma krĩ pê Kapanaũ hwỳr mỗ. Pa mẽ hkôt ri ixpa xwỳnhjaja nê katorxà nê htõjaja pa mẽ ma ixpiõtã hkôt mỗ. Hãmri nê hwỳr pỏj nê kamã mẽ hkôt ixpa hã ixtã apkati grêre nê ma hpãnhã krĩ hõ hwỳr ixpa.

Jejus kot Tĩrtũm nhõrkwỹ hwỳr àr ã harênh

Matêwre 21.12-13; Makre 11.15-19; Rukre 19.45-

46

¹³ Tã nhũm ra arĩgro pê Pas ahtêp o mỗ. Pasja ã mẽ ixpê Ijaew na pa htem amnepêm Tĩrtũm kot pika pê Ejit rũm mẽ inhĩgêjtê kator mã ijamaxpễr kaxyw axpên wỳr akuprõ nê hã ixkĩnh. Jakamã nhũm Jejus ma hkwỳjê hkôt krĩ pê Jerujarê hwỳr

mō. Pa mẽ ixpê hkôt ri ixpa xwỳnhjaja pa mẽ ma hkôt ixpa. Hāmri nẽ hwỳr pōj

¹⁴ nẽ Tĩrtũm mã amnhĩ jarẽnh xà hã ixkre hwỳr mra nẽ ixkre puhã kahêja wỳr agjê. Nhũm mẽ kamã axtem nẽ mẽmoj to wẽnê ho kuhê. Mōx o wẽnê nẽ ôwêhti ho wẽnê nẽ tutre ho wẽnê ho kuhê. Mẽ kot haprôr nẽ ho Tĩrtũm mã hkĩnh xà kaxyw mẽ kãm ho wẽnê. Nẽ kàxpore ho pinhpanh xwỳnhjaja haxwỳja mẽ kuri hkrĩ.

¹⁵ Hāmri pa mẽ Jejus kôt mẽ hwỳr agjê nẽ ja hã mẽ omu hāmri nhũm Jejus pê ja omnuj tỳx nẽ. Jakamã nhũm tee ri mẽ omu hāmri nẽ amnhĩm mry hkà ho mẽ htak xà nhĩpêx nẽ ho ixkreja nê mẽ piitã mẽ kator pa. Nẽ mōx nẽ ôwêhti nẽ mẽmoj piitã kator pa. Nẽ kàxpore ho pinhĩpanh xwỳnhjaja nhũm mẽ kêp mẽ ô mēsti rēnh pa nhũm mẽ hikàxpore pykap rôrôk pa nẽ angrà nẽ hikwỹ.

¹⁶ Hāmri nhũm Jejus tutre ho wẽnê xwỳnhjê mã kãm:

—Kwa mẽ anhō tutre jamỳ nẽ tokyx ma mra. Na htem Inhĩpêêxà nhõrkwỹ kamã mẽmoj to wẽnê hkêt nẽ. Kêp mẽ ujaaprôr xà hã ixkre hkêt. E kwa mẽ tokyx ma mra. Anẽ.

Nhũm pre ã mẽ kãm kapêr anẽ nhũm mẽ tee ri kuma hāmri nẽ ma mrrar kurê kumrêx.

¹⁷ Pa mẽ hkôt mẽ ixpa ho ixpa xwỳnhjaja ã kot mẽ hipêx anhỳr ã omu hāmri nẽ ra Tĩrtũm kapêr ã kagà htũm kot ã amnhĩ nhĩpêx anhỳrja kukamã hã kagàta mã ijamaxpêr kurê kumrêx. Kagà kot amnepêm Jejus kukamã te ra ã kapêr anhỳr pyràk o harēnh. Nẽ harēnh kot:

Na pa hte Tĩrtũm nhõrkwỹ ho mex rãhã ho ixpa.

Nhũm mẽmoj punuj hwỳr axà pa omu nhũm

ja inhmã mex kêt nê.
 Anhÿr o kot hkukamã harênh jakamã na pa mẽ
 ã Jejus kot mẽ hipêx anhÿrja ã omu hãmri nê ra
 hkukamã hã kagãta mã ijamaxpêr kurê kumrêx.

Ijaew krãhtũmjaja kot Jejus kukjêr ã mẽ harênh

¹⁸ Tã nhũm Ijaew krãhtũmjaja tee ri Jejus kot
 ixkreja nê mẽ kator ã omu hãmri nê hwÿr mra nê
 kãm:

—Pa. Kwa mon ka ri ã Tirtũm mã amnhĩ jarênh
 xà hã ixkreja nê mẽ kator anê? Mêhõ na we mẽ
 ixwÿr amê ka ÿ hã ã mẽ hipêx anêhti? Nà xà Tirtũm
 na mẽ ixwÿr amê? E mẽ inhmã aa mẽ ixte mẽmoj
 pumunh kêt õ ho anê. Pa mẽ ja hã apumu hãmri
 nê Tirtũm kot mẽ ixwÿr amênh xwÿnh ã apumunh
 kurê kumrêx. E kwa tokyx mẽ inhmã ho anê. Anê.

¹⁹ Hãmri nhũm mẽ kuma nê mẽ kãm amnhĩ jarê.
 Nom amnhĩ tã kuxi nê mẽ kãm awjarê nê mẽ kãm:

—Nà kot paj aa mẽ ate mẽmoj pumunh kêt õ
 ho pixi nê mẽ amã ho anê ka mẽ omu. Tirtũm
 nhõrkwÿ jaa. Kot kaj mẽ agrà pa ixtã apkati
 axkrunêpxi nê akupÿm hipêx ka mẽ ja hã ixpumu.

²⁰⁻²² Anhÿr o mẽ kãm kapêr. No ãm ixkreja jarênh
 kêt nê. Na pre ãm amnhĩ tã kuxi nê ã mẽ kãm kapêr
 anê. Mẽ kot hpîr nhũm htyk ã apkati axkrunêpxi
 nê akupÿm htîr ã mẽ kãm ã amnhĩ jarênh anê.
 Te mẽ kot Tirtũm mã amnhĩ jarênh xà hã ixkreta
 grãnh nhũm hã apkati axkrunêpxi nê akupÿm kot
 hipêx parta pyrãk ã hã kuxi nê ã mẽ kãm amnhĩ
 jarênh anê. Jakamã nhũm mẽhprî hã mar mex kêt
 nê. ãm tee ri kuma nê kãm:

—Tk. Kwa ixkre ja na prem hipêx kaxyw nê hã
 amgrà xohtô rax nê hipêx. Hã amgrà pê 46 nê

hipêx par kênã kot ka kêt atã apkati axkrunêpxi pix nê akupỹm hipêx. Anê.

Mê kot hprĩ hã mar kêt jakamã na prem ã kãm kapêr anê. Pa mẽ hkôt mẽ ixpa ho ixpa xwýnhjaja ã mẽ kãm kapêr anhỹrja ã kuma nê hã inhnohtýx rãhã ho ri ixpa. Tã nhũm mẽ kot Jejus pĩr nhũm hã apkati axkrunêpxi nê akupỹm htĩr nhõ arĩgrota ã pa mẽ kot ã amnhĩ jarênh anhỹrja mã ijamaxpêr kurê kumrêx. Nê axpên mã:

—Hêxta waa nê. Xep ãm hãmri na pre Pahihti amnhĩ kukamã ã amnhĩ jarênh anê. Mê kot hpĩr nhũm htyk ã apkati axkrunêpxi nê akupỹm htĩr ã amnhĩ kukamã amnhĩ jarênh mex nê. Te mẽ kot Tĩrtũm nhõrkwy grãnh par nhũm hã apkati axkrunêpxi nê akupỹm hipêx ã amnhĩ jarênh pyræk. ãm hãmri na pre amnhĩ kukamã ã amnhĩ jarênh anê. Anê.

Jejus kot mẽ pajamaxpêr kôt mẽ pahpumunh ã harênh

²³ Tã nhũm Jejus mẽ hkôt mẽ ixpa ho ixpa xwýnhjaja arĩ Jerujarê kamã ri ixpa ho ixpa. Nhũm ra arĩgro pê Pasja kato nhũm mẽ piitã hkĩnh kaxyw axpên wýr akuprõ. Nhũm Jejus mẽ kãm aa mẽ kot mẽmoj pumunh kêt kwý ho anhỹr o ri mẽ hkôt pa. Nhũm mẽ omu nhũm mẽ hkwyjaja Tĩrtũm kot mẽ pakaxyw ãm xwýnh ã hkôt hamaxpêr tã no ãm hkôt hamaxpêr týt kêt nê.

²⁴ Jakamã nhũm Jejus amnhĩ tã mẽ hamaxpêr ã mẽ omu nê hamaxpêr o:

—Nà mẽ kot ixkôt hamaxpêr kryre xwýnhjaja koja mẽ hã apkati grêre nê ixto hamakêtkati nê htýt ri pa. Anê.

²⁵ Jejus kot mẽ pahte pahtỳx ri amnhĩ tomnuj o papa hã mẽ pahpumunh par. Nẽ pahtỳx ri pajamaxpẽr punuj o papa hã mẽ pahpumunh par. Jakamã na pre ã mẽ harẽnh anẽ.

3

Jejus mẽ Nĩkotẽ wa kot axpẽn mã kapẽr ã wa harẽnh

Juãw 1.12-13; mããnẽn Wam Pẽtre 1.23

¹ Tã nhũm Parijew nhõ xwỳnhjê õ pẽ Nĩkotẽ. Mããnẽn kęp Ijaew krãhtũmjê hõ.

² Jakamã na pre Jejus jarẽnh ma nẽ kãm omunh prãm nẽ. Hãmri nẽ hkwỹ pymaj kamàt kãm hwỳr tẽ nẽ omu nẽ kãm:

—Pa mẽ ijahkre xwỳnh. E ot pa awỳr tẽ. Ra mẽ ixte apumunh mex. Tĩrtũm na pre ate mẽ ijahkre ho apa kaxyw mẽ ixwỳr amẽ ka mẽ ixwỳr wrỳ. Mẽhõ koja apyrà nẽ aa mẽ inhmã mẽ kot mẽmoj pumunh kêt kwỳ ho anhỳr o pa? Nà amrakati kumrẽx. Kop apu Tĩrtũm kot mẽ ixwỳr amẽnh kêt ronhỳx ka ã amnhĩ nhĩpêx anhỳr kêt nẽ. Anẽ.

³ Hãmri nhũm kuma nẽ tanhmã kãm kapẽr to. No ãm amnhĩ tã kuxi nẽ kãm awjarẽ nẽ kãm:

—Na htem piitã mẽ katorxà nhõxà hkre rũm hapôj. Tã Tĩrtũm kãm mẽ piitã axte mẽ hapôx prãm. Jakamã kot kaj mẽ akator o axkrut kêt nẽ hãmri nẽ nhỹrmã Tĩrtũm ri atĩr tũm nẽ apa ho apa hkêt nẽ. ãm hkrajê pix na htem kuri htĩr tũm nẽ pa ho pa. Jakamã kwa jam ajamaxpẽr tỳx nẽ ri ho apa. Anẽ.

⁴ Hãmri nhũm Nĩkotẽja kuma nẽ tee ri ã kot kãm kapẽr anhỳrja kukamã hamaxpẽr nẽ kãm:

—Kwa ra ixàptàr kênã kot pa kêt tanhmã amnhĩ to nê akupỹm ixkatorxà nhõxà hkre hwỳr axà nê axte kurũm ixkato. Anẽ.

⁵⁻⁷ Hãmri nhũm Jejus kãm:

—Nà na hte mẽ hkrarejaja mẽ katorxà nhõxà hkre rũm kagô hkôt hapôj hãmri nê kêp katorxà mẽ hipêêxà wa hkwỳy. Jao wa kot amnhĩ nhĩpêx kôt amnhĩ nhĩpêx o pa. Ja pyrà nê ka mẽ atõ amã apê Tĩrtũm kra hprãm hã kot kaj amnhĩ to awỳ nhũm wa Ixkarõja akarõ mã axà hãmri ka ra apê hkraa. Te ra axte akator pyræk o amnhĩ nhĩpêx. Nê te mẽ hkra kot katorxà nê hipêêxà wa kot amnhĩ nhĩpêx kôt amnhĩ nhĩpêx o pata pyrà nê apãm Tĩrtũm kot amnhĩ nhĩpêx kôt amnhĩ nhĩpêx o ri apa. Nom koja Tĩrtũm mẽ wa Ixkarõja akarõ mã àr kêt nê ka apê hkra hkêt nê. Jao te axte akator kêt pyræk o amnhĩ nhĩpêx. Jakamã na pa amã te ate akator pijakrut o amnhĩ nhĩpêx pyræk o amã ã ja jarẽnh anẽ. Kwa jam ajamaxpêr tỳx rãhã ho ri apa. No ama nê tee ri amnhĩ kukamã ajamaxpêr kêt nê.

⁸ —E pa ixprĩ hã amã ja jarẽ ka inhma. Na hte kôk kãm nhỹhỹm àpêr prãm xà hkôt àpêr o pa. Pu mẽ kamã ama no ãm pano ho nhỹhỹnh mõi xà hkôt omunh kêt nê. Nê nhỹhỹm ma mõi xà hkôt omunh kêt nê. Ja pyrà nê na hte Tĩrtũm mẽ wa Ixkarõja mẽ hkaxwỳnh mã agjê nê mẽ ho Tĩrtũm kra nom nhũm mẽhprĩ hã kot tanhmã mẽ ho hã amnhĩ tã omunh kêt nê. Anẽ.

⁹ Hãmri nhũm Nĩkotẽ ã Jejus kot kãm kapêr anhỹr ã kuma nê tee ri hamaxpêr nê kãm:

—Kwa na pa ixprĩ hã amar kêt nê. Anẽ.

¹⁰ Hãmri nhũm kãm:

—Kwa mon ka hte Tirtūm kapēr tūm o Ijaew jahkre ho apa tā aprī hã ixkapēr mar kêt nē?

¹¹ Ixte mẽmoj pumunh xà hkôt ixte mẽ amã harēnh o ixpa htã ka mẽ apê Ijaew krãhtūmjaja mẽ amã ixkapēr mar prãm kêt nē. ã mẽ ate anhÿr kumrēx. Kwa jam ajamaxpēr tÿx nē.

¹² Na pa ra Tirtūm kot jar tanhmã amnhĩ nhĩpêx to hã harēnh o ixpa htã ka mẽ ãm ama nē ixkôt ajamaxpēr kêt nē. Jakamã xà kot pa hpãnhã mẽ amã kaxkwa kamã tanhmã kot amnhĩ nhĩpêx to hã harē ka mẽ ama nē mar tÿx nē? Nà kot ka mẽ ama nē ãm ama nē hkôt ajamaxpēr kêt nē.

¹³ Mēhō na we ra ma kaxkwa hwÿr api nē kamã mẽmoj mex pumu nē man akupÿn mẽ awÿr wrÿ nē mẽ amã tanhmã harēnh to? Nà amrakati kumrēx. ãm paxipix ixpê Tirtūm kot mẽ akaxyw ixãm xwÿnh na pa pre amnē kurūm mẽ awÿr wrÿ hãmri nē ixprī hã mẽ amã tanhmã harēnh to ho ri ixpa.

¹⁴ —Amnepê m finat Mojesja kormã kapôt ã mẽ o pa ri na pre mẽ kãm kàx o kagã karōja nhĩpêx nē kÿxpê mẽ kãm kunhō. Kagã kot mẽ hkamnhar xwÿnhjaja kot hwÿr rīt nē omunh nē akupÿm mex kaxyw mẽ kãm kunhō. Tã ixpê Tirtūm kot mẽ akaxyw ixãm xwÿnh kot paj nhÿrmã kagã karōta pyrã nē kÿx pē pĩ kahpa hã ajêt.

¹⁵ Ka mẽ te mẽ kot kagã karō pumunh nē akupÿm mexta pyrã nē amnhĩ kaxyw inhmã ajamaxpēr nē ixkôt amnhĩ xunhwÿ hãmri nē nhÿrmã Tirtūm mẽ wa ixri atır tūm nē amex rãhã nē apa ho apa.

¹⁶ —Tirtūm kãm pika piitã hkôt mẽ apiitã mẽ ajapê htÿx. Nē mẽ ajapê xàj na pre ixpê Kra hã ix-

pyxi hã mẽ awỳr inhmẽ. Ka mẽ atõ amnhĩ kaxyw ixkõt ajamaxpêr nẽ ixkõt amnhĩ xãm. Hãmri nẽ nhỹrmã atyk tã nhũm Tĩrtũm akupỹm ato atĩr ka wa ixkuri atĩr tũm nẽ amex rãhã nẽ apa ho apa. Hãmri nhũm Tĩrtũm aa amnhĩ nẽ nhỹhỹm amẽnh kêt kumrẽx.

¹⁷ No mẽ ate amnhĩ tomnuj mỳrapê tanhmã ixte mẽ anhĩpêx to kaxyw na pre mẽ awỳr inhmẽnh kêt nẽ. ãm ixkukwak ri mẽ atĩr tũm nẽ mẽ amex rãhã apa ho apa hprãm xaj na pre mẽ awỳr inhmẽ pa mẽ awỳr wrỳ.

¹⁸ Jakamã kot ka mẽ atõ amnhĩ kaxyw ixpê Tĩrtũm Kra hã ixkõt ajamaxpêr nẽ ixkõt amnhĩ xãm nhũm Tĩrtũm ixtã apumu nẽ ate amnhĩ tomnuj mỳrapê tanhmã anhĩpêx to hkêt nẽ. No kêt mẽ kot ixkõt amnhĩ xunhwỳr kêt xwỳnhjaja na Tĩrtũm ma mẽ kot amnhĩ xà htỳx kamã hamak tũm xà hwỳr mẽ pa mã xwỳnhjê hã mẽ harẽ. Mẽ kot ixkõt amnhĩ xunhwỳr kêt mỳrapê. Anẽ.

Mẽ kot amnhĩ tomnuj o hpimxur prãm kaprỳ ã mẽ harẽnh

¹⁹ Nhũm Jejus arĩ Nĩkotẽ mã kapêr nẽ kãm:

—Na pre Tĩrtũm amnẽ pika hwỳr mẽ awỳr inhmẽ. Mẽ ate amnhĩ tomnuj xwỳnh ã amnhĩ pumunh kaxyw mẽ awỳr inhmẽ. Tã nhũm mẽ ohtõ nẽ amnhĩ tomnuj gryk ã kãm kapêr mar prãm kêt nẽ. Jao ixkaga nẽ kãm ixkapêr mar prãm kêt nẽ.

²⁰ Ra ixprĩ hã ixte mẽ kot tanhmã amnhĩ tomnuj to ho pa hã mẽ omunh mex jakamã mẽ kãm ixkapêr mar prãm kêt. Nẽ ixte mẽ kot tanhmã amnhĩ tomnuj to ho pa hã mẽ harẽnh pymaj ixkõt kãm pa hprãm hkêt nẽ.

21 No kêt mẽ kot ixkôt amnhĩ xunhwỳr xwỳnhjaja na mẽ kot amnhĩ nhĩpêx o pa hã hpijaàm kêt. Na htem àmnhĩx ixkôt amnhĩ nhĩpêx o pa. Jakamã koja mẽ piitã ja hã mẽ omu nê Tĩrtũm kot tanhmã mẽ hkrã hto nhũm mẽ ra kãm hkôt pix mã amnhĩ nhĩpêx ho pa hprãm ã mẽ omunh kurê kumrêx. Anê.

Nhũm pre ã Jejus Nĩkotêja mã kapêr anê.

*Juãw Paxis kot Jejus jarênh o pa hã harênh
Juãw 1.19-28*

22 Tã pa mẽ ixpê Jejus kôt ri ixpa ho ixpa xwỳnhjaja Jejus kôt Jerujarê rũm ijapôj nê pika pê Jutej kwỳ kamã ixpa. Jejus nhỹ hã Tĩrtũm mã mẽ hkrã kumrãr o ri mẽ hkôt ixpa.

23 Nhũm finat Juãw Paxis haxwỳja mẽ ixpyrà nê mẽ hkrã kumrãr o pa. Krĩ pê Sarĩ htã krĩ pê Enõ mỳri pyhti rax jakamã nhũm pre htem hwỳr mra nhũm kamã mẽ hkrã kumrã.

24 Kormã mẽ kot haxàr kêt ri nhũm kamã mẽ hkrã kumrãr o pa.

25 Rôm nhũm Ijaew hõja Juãw Paxis kôt mẽ pa ho mẽ pa xwỳnhjê hwỳr tẽ nê Juãw Paxis kot mẽ hkrã kumrãr ã tanhmã mẽ hkukjêr to nhũm mẽ kuma nê tee ri hã axpên kukjêr o kuhê.

26 Hãmri nê akupỹm Juãw Paxis wỳr tẽ nê kãm:

—Kwa mẽ ijahkre xwỳnh. Pyhti pê Jotãw nhĩkjê hã ate mễhõ pumunh nê tanhmã mẽ inhmã harênh to xwỳnhhta kôt mẽ pa ho mẽ pa xwỳnhjaja na xep htem apyrà nê mẽ hkrã kumrãr o pa nhũm xep mẽ ra ohtô nê mẽ pahkaga nê mẽ hkôt pa. Kwa xà ja amã mex nà? Anê.

27 Hãmri nhũm mẽ kuma nê mẽ kãm:

—Tỳ ja mex kênã. Tĩrtũm kãm hprãm xà hkôt na htem mẽ hwỳr mra nhũm mẽ ixpãnhã mẽ hkrã kumrã. Nà ja mex.

²⁸ Ixpê Tĩrtũm kot mẽ pakaxyw ãm xwỳnh kêt. Na pa pre ra mẽ amã ja hã amnhĩ jarẽ ka prem inhma. ãm hkukamã na pre Tĩrtũm amnẽ inhmẽ pa mō nẽ ã jar ri ixpa anẽ.

²⁹ —Te ixte mẽ umre kot amnhĩ nhĩpêx pyrãk. Na htem axpẽn mã mẽ rer kaxyw nhũm mẽ umreja myta wỳr tẽ nẽ hpa hã kupy nẽ ma ni hwỳr o tẽ nẽ axpẽn mã wa kure. Hãmri nhũm hpãnhã mẽhõja axpẽn tã wa hakre. Nhũm umreja wa kuri hkĩnh nẽ mar o xa. Tã te ixte mẽ umre kot amnhĩ nhĩpêx pyrãk jakamã koja mẽ ma Tĩrtũm kot mẽ pakaxyw ãm xwỳnhhta wỳr mra nẽ kapêr ma pa mẽ harẽnh ma nẽ ixkĩnh nẽ.

³⁰ Na htem mẽ umre hã hkĩnh kêt nẽ. Mjên nyw xwỳnhja ã na htem hkĩnh. Tã ja pyrã nẽ koja mẽ axte ixte mẽ kãm Jejus jarẽnh mar kaxyw ixwỳr mrar kêt nẽ. ãm hwỳr koja mẽ hpãnhã mra nẽ tãm mar o kuhê. Ja mex kumrẽx.

³¹ Jejus kêp kaxkwa rũm amnẽ mẽ pahwỳr wrỳk xwỳnh jakamã kot amnhĩ to rax o kot mẽ pahpiitã mẽ pajakrenh par. Mẽ papajaja mẽ pahpê pika nhõ xwỳnh jakamã Jejus kĩnhã mẽ pahte mẽmoj piitã omunh tohtuj anhỹr. Nẽ pika nhõ xwỳnhjê jamaxpêr pix o pajamaxpêr o ri papa.

³² —Na hte Jejus mẽ kãm kaxkwa kamã kot mẽmoj pumunh xwỳnh kwỳjê jarẽnh o pa. Nẽ kamã kot mẽmoj mar xwỳnh kwỳ jarẽnh tã nhũm mẽ ohtô nẽ kuma nẽ ãm kuma.

³³ No mẽ kot mar nẽ amnhĩ kaxyw hkôt hamaxpêr xwỳnhjaja na htem kuma nẽ axpẽn

mã harēnh o: “Nà ãm hãmri na ã Tirtũm kapēr jarēnh anē. Nà Tirtũm kapēr mex kumrēx.” Anhÿr o axpēn mã harē.

³⁴ –Tirtũm na pre mẽ pahwÿr Jejus mẽ nhũm amnē mẽ pahwÿr wrÿ nē Tirtũm Karõ nhÿ hã mẽ pamã kapēr jarēnh o ri mẽ pahkõt pa.

³⁵ Tirtũm kãm Krata japê htÿx kumrēx jakamã na pre ãhkram mẽmoj piitã haxâr pa nhũm urak nē hihtÿx o hihtÿx nē mẽmoj piitã ho amnhĩptâr o pa.

³⁶ Jakamã mẽ kot amnhĩ kaxyw hkõt hamaxpēr nē hkõt amnhĩ xunhwÿr xwÿnhjaja koja mẽ nhÿrmã wa kuri htir tũm nē mex rãhã nē pa ho pa. No mẽ kot hkaga xwÿnhjaja koja mẽ ã amnhĩ nhĩpêx anhÿr kêt nē. Koja Tirtũm mẽ kot amnhĩ xà htÿx kamã hamak tũm xàta wÿr mẽ rēnh pa. Anē.

4

¹ Tã nhũm Parijew nhõ xwÿnhjaja Jejus jarēnh ma. Nē hkõt mẽ pa xwÿnhjaja ohtô rax o Juāw Paxis kõt mẽ pa xwÿnhjê jakrenh ã mẽ harēnh ma. Nē Jejus kot mẽ hkrã kumrâr rax o Juāw Paxis jakrenh ã harēnh ma.

² Nom Jejus na pre mẽ hkrã kumrâr kêt nē. ãm mẽ ixte hkõt ri mẽ ixpa ho mẽ ixpa xwÿnhjaja na pa prem kãm mẽ hkrã kumrâr o ri ixpa.

³ Jakamã nhũm Jejus amnhĩ tã Parijew nhõ xwÿnhjê jarēnh ma hãmri nē mẽ kêp kato nē hpãnhã ma akupÿm Garirej wÿr mō pa mẽ ma hkõt ixpa.

Mêhõ ni kot amnhĩ nhĩpêx nyw o amnhĩ nhĩpêx ã harēnh

Juāw 7.37-39; mããnēn Apokarip 22.1, 22.17

4 Tã pa mẽ mỗ nễ kormã pyka pê Samar mã axà nễ hkôt ixpa.

5 Hãmri nễ krĩ pê Sika hwỳr ixpôx o mỗ. Amnepê m finat Jako kot hkra Juje mã pyka nhõr xwỳnh tã krĩa xa pa mẽ ra hwỳr ixpôx o mỗ.

6 Nễ amnepê m Jako kot gôm kakwỳnh ta wỳr pøj. Nhũm ra kaxkwa nhĩpôk ri myt nhỹr mẽ nhũm Jejus ra mrar ryy kuré hkēngrà nễ. Hãmri nễ gôm kakwỳnh mỳ ri tēm nễ hkôkôt o nhỹ.

7-8 Hãmri pa mẽ kure nễ mẽ ixàpkur xà japrôr kaxyw ma krĩm ijapêx.

Rôm nhũm Samar nhõ xwỳnh nija amnhĩm gô runh mã tē nhũm Jejus omu nễ kãm:

—Kwa inhmã anhõ gôta kwỳ pa ho ixkô. Anễ.

9 Nhũm amnhĩ jaêr pê amnhĩ tã kuma. Ijaew na pre htem Samar nhõ xwỳnhjê kutã apkur rỳ mẽ hkôt ri pa rỳ mẽ ho mjên kêt nễ. Rỳ mẽ kutã hkôm kêt nễ. Tã nhũm Jejus ã gô hã nija wỳr anễ nhũm tee ri amnhĩ tã kuma nễ kãm:

—Xê pêr apê Ijaew tã axtem nễ ri gô hã ixwỳ. Xà ate ixpê Samar nhõ xwỳnh ã ixpumunh kêt? Hãn ka ri hã ixwỳ. Anễ.

10 Hãmri nhũm kuma nễ kãm amnhĩ jarê. No ãm amnhĩ tã kuxi nễ kãm kapêr nễ kãm:

—Nà aprĩ hã ate ixpumunh ro nhỹx ka kam gô hã ixwỳ pa amã hkwy. Inhõ gô na axte mã. Tĩrtũm kãm amarĩ mẽ amã ôr prãm. Na htem ho ixkô hãmri nễ mex nễ htĩr tũm nễ pa ho pa. Anễ.

11 Hãmri nhũm tee ri kot ã õ gô jarēnh anhỹrja ã kuma nễ htỳx ho gôm kakwỳnh kamã gô hã hkamnhĩx nễ tee ri hkukamã hamaxpêr nễ kãm:

—Xê tanhmã kot ka kêt amnhĩ to nễ inhmã gôta kwỳ janhi? Mo kaxyw anhõ gô janhir xà?

Gôm kakwÿnhhta upÿm rax kênã kot ka kêt tanhmã amnhĩ to nẽ hkwy janhi. Nhÿhÿnh kot ka anhõ gô jarẽnh xwÿnhhta kwÿ janhi pa ho ixkõ hãmri nẽ ixtÿr tÿm nẽ ixpa ho ixpa?

¹² Mẽ inhõ gôm kakwÿnhja amnepê mã mẽ panhÿgêt finat Jako nhõ gôm kakwÿnh na pre. Jako hkwyjaja na prem hkakwy nhÿm kamã gô kato nhÿm pre htem hanhi nẽ ho hkõm o pa. Nẽ hkrajaja nẽ hkrit piitã ho hkõm o pa. Jakamã na pre mẽ ixpê hkanrêhã htãmnhwÿjê mã hkaga. Tã xep axtem anhõ gô. Mẽ kot ho hkõm nẽ htÿr tÿm kaxyw na xep. Jakamã xê xà ate amnhĩ to rax o mẽ panhÿgêt Jako jakrenh mê? Anẽ.

¹³ Hãmri nhÿm Jejus kãm:

—Nà mẽ anhõ gôta na htem ho ixkõ nẽ arĩ kãm kôr o pa.

¹⁴ No ixte amã gô jarẽnh xwÿnhhta kot ka hkwy ho ixkõ hãmri nẽ axte amã kôr kêt kumrêx nẽ apa. Nhÿm te akaxwÿnh kãm hinore hprôt pyrãk o ka amnhĩ nhÿpêx. Hãmri nẽ te hinore kamã gôja aa grã hkêt pyrã nẽ aa ajapêx kêt kumrêx. Nhÿrmã atyk tã akupÿm atÿr nẽ atÿr tÿm nẽ amex rãhã apa ho apa. Anẽ.

¹⁵ Nhÿm nija kuma hãmri nẽ kãm:

—Xõwehe? Xê tô tokyx inhmã anhõ gôta kwÿ. Pa ho ixkõ nẽ axte inhmã kôr kêt nẽ ixpa. Nẽ axte amnẽ amnhĩm gô janhir mã inhmrar kêt nẽ. Xê tokyx inhmã hkwy mê? Anẽ.

Tÿx gô kumrêx ã hkamnhÿx nẽ ã hã àhwÿr anẽ.

¹⁶ Hãmri nhÿm kãm:

—Tô ma akupÿm krÿm tẽ nẽ amjên japrô nẽ man akupÿn ixwÿr wa tẽ. Anẽ.

¹⁷ Hãmri nhÿm tee ri kuma nẽ kãm:

—Ma mo inhmjên? Inhmjên kêt na pa hte ri ixpa. Anê.

Hãmri nhũm kãm:

—Tỳ. Nà ãm hãmri na ka ã amnhĩ jarênh anê.

¹⁸ Na ka pre ra amjên kêp 5. Nê my mẽ ri war apa xwỳnh ata te kêp amjên pyràk nom kêp amjên kumrêx kêt. Anê.

¹⁹ Hãmri nhũm amnhĩ jaêr pê kot ã kãm kapêr anhỹrja ma hãmri nê kãm:

—Xê pêr aprĩ hã ate ixpumunh par pyràk. Mãn apê Tĩrtũm nhỹ hã kapêr jarênh o mẽ pa xwỳnhjê hõ mãn ka mê?

²⁰ Xê inhmã mẽmoj jarê. Nhỹhỹm kot paj wem axpên kôt mra nê Tĩrtũm mã mex o mex ã harê? Amnepê mã mẽ panhĩgêjtaja na prem hixêr mũj nhĩmõk ã api nê hã kãm amnhĩ jarê nê kãm mex o mex ã harê. No mẽ apê Ijaew na ka htem krĩ pê Jerujarê pix kãm mẽ ixte axpên kôt mrar nê ã amnhĩ nhĩpêx anhỹr ã mẽ inhmã karõ. Xà hixêr nhĩmõk ã mẽ ixte kãm amnhĩ jarênhja xà apê omnuj mê? Ma xà apê omnuj kêt? Anê.

²¹ Hãmri nhũm Jejus kãm:

—Nà kot kaj mẽ nhỹrmã ãm Jerujarê pix kãm rỳ hixêr mũj nhĩmõk pix ã axpên wỳr akuprõ nê Tĩrtũm mã amnhĩ jarênh kêt nê.

²² Mẽ apê Samar nhõ xwỳnhjaja mẽ ate Tĩrtũm mã mex o mex ã harênh o apa htã aprĩ hã kot amnhĩ nhĩpêx ã omunh kêt. Nê tanhmã hamaxpêr to ho pa hã omunh kêt. No mẽ ixpê Ijaew na pa mẽ arom kot tanhmã amnhĩ nhĩpêx to nê tanhmã hamaxpêr to hã omunh mex. Mẽ inhĩõ kukwak ri koja Tĩrtũm mẽ kot hkôt amnhĩ xunhwỳr xwỳnh piitã nê mẽ kot amnhĩ tomnuj rênh pa.

²³ Tã koja mẽ piitã Měpahpãm Tĩrtũm mã mex o mex ã harěnh kaxyw nhỹhỹm pa hkêť ně. Koja mẽ nhỹri pa xà kamã mẽ õpinh xà kaxwỳnh kãm ã kãm amnhĩ jarěnh anhỹr o pa. Ja na Tĩrtũm kãm hprãm. No nhỹhỹm mrar ně nhỹri kuhê xà pix kamã kãm amnhĩ jarěnhja nhũm kãm hprãm kêt ně.

²⁴ —Ně Tĩrtũmja mẽ pahpyrà ně ĩ hkêť jakamã na te kaxkwa ně pika piitã hkôť pa ho pa. Jakamã na htem nhỹri pa ně õpinh xà kaxwỳnh kãm amnhĩ kaxyw kãm hamaxpěr ně kãm mex o mex ã harě nhũm ra amnhĩ tã mẽ kuma. ã mẽ kot amnhĩ nhĩpêx anhỹrja na kãm hprãm. Aně.

²⁵ Nhũm pre ã Jejus nija mã kapěr aně nhũm kuma ně kãm:

—Ma koja xep nhỹrmã Tĩrtũm kot mẽ pakaxyw ãm mã xwỳnh pê Krisja mẽ pahwỳr wrỳ hãmri ně hprĩ hã mẽ pamã měmoj piitã ho amnhĩrĩť pu mẽ kuma. Aně.

²⁶ Hãmri nhũm kãm:

—Kwa nhũm paa. Ixte amã ixkapěr xwỳnhja ixpê Kris na pa. Jakamã na pa ixprĩ hã amã ã ixkapěr aně. Aně.

²⁷ Nhũm pre ã kãm amnhĩ jarěnh anhỹrja rôm pa mẽ ixte hkôť ri mẽ ixpa ho ixpa xwỳnhjaja ra ixujaprôr pa ně akupỹn hwỳr ixpôx o mra. Hãmri ně amnhĩ jaěr pê kot Samar nhõ xwỳnh nita mã kapěr ã omu ně tee ri hkukamã ijamaxpěr nom tanhmã hã hkukjêť to hkêť ně. Nija kệp Samar nhõ xwỳnh tã nhũm àmnhĩx kãm kapěr o nhỹ. Pa mẽ omu ně ãm omu ně tanhmã hã kãm ně hkêť ně.

²⁸ Hãmri nhũm nita gôm kakwỳnh mỳr ri õ poti re ně ma akupỹm krĩm tẽ ně hkwỳjê mã awjarẽ.

²⁹ Ně mẽ kãm:

—Xê mẽ tokyx ma ixkôt gôm kakwỳnh wỳr mra nễ mỳ ri mẽhỗ my mữj pumu. Tirtũm kot mẽ pahwỳr mẽnh mã xwỳnhta na. Aa kot nhữri ixpumunh kêt tâ kot hprĩ hã ixpumunh par. Ixte tanhmã amnhĩ nhĩpêx to hã ixpumunh par. Xê mẽ ma ixkôt mra nễ ixpyrà nễ kapêr ã ama. Anễ.

³⁰ Hãmri nhũm mẽ kuma nễ ma hkôt Jesus wỳr mrar kurê kumrêx.

³¹ Rôm pa mẽ ixte Jesus kôt ri ixpa ho ixpa xwỳnhjaja tee ri mẽ ixàpkur xà ho Jesus ma nễ kãm:

—E ota mẽ panhõta. Kwa mẽmoj py nễ aku măn.

³² Anhữr tâ nhũm mẽ inhma nễ tanhmã mẽ inhmã amnhĩ jarênh to. Nom amnhĩ tâ kuxi nễ amnhĩ jarê nễ mẽ inhmã:

—Nà kormã. Inhõja axtem na. Mễ ate inhõja pumunh kêt. Anễ.

³³ Hãmri pa mẽ kuma nễ tee ri hã axpên kukja nễ axpên mã:

—Kwa măn ra mẽhỗ mẽ paxwakre kamã kãm mẽmoj to tễ nhũm kukrê nà? Anễ.

³⁴ Hãmri nhũm mẽ inhma nễ mẽ inhmã:

—Nà mẽhỗ kot kêt ri inhmã mẽmoj to mra pa kuku? Kot paj kot mẽ awỳr inhmênh xwỳnhta mã tanhmã amnhĩ nhĩpêx to hãmri nễ te ra ixàpkur mex nễ hã ixihtỳx mex pyràk o amnhĩ nhĩpêx. Tã kot paj ã kãm amnhĩ nhĩpêx anhữr o ri ixpa rãhã ho ijapêx pa. Jao te ixàpkur rax pyràk.

³⁵ Anhữr o mẽ inhmã amnhĩ jarê. Hãmri nễ ra Samar nhõ xwỳnhjaja mẽ ixwỳr mrar ã mẽ omu nễ mẽ inhmã tanhmã mẽ harênh to nom mẽ hã kuxi nễ mẽ harê nễ mẽ harênh o:

—Kot kaj mẽ axte mẽ atã mytwrỳ kêp 4 hãmri nhũm ra mẽ apur kãm mẽ anhõja hamỳnh mã

tām nē. Nom kormã. E ka mẽ pahwỳr mẽ mrrar xwỳnh něj pumu. Ra mẽ kot amnhĩ kaxyw ixkôt hamaxpěr nē ixkôt amnhĩ xunhwỳr mã tãm jakamã te mẽ apur kãm ra mẽ anhõ jamỳnh mã tãm pyràk. Jakamã ka mẽ atõ ma mẽ hwỳr mō nē mẽ kot amnhĩ kaxyw ixkôt hamaxpěr nē ixkôt amnhĩ xunhwỳr kaxyw mẽ kãm ijarẽ. Hãmri nē te ate ixpur kãm inhmã inhõ jamỳnh xwỳnh pyràk o amnhĩ nhĩpêx.

³⁶ –Jakamã koja mẽhõ kumrêx mẽ hwỳr tē nē mẽ kãm Tĩrtũm kapěr jarẽ hãmri nē te kệp õ pahi mã hpur kãm ahkre ho pa pyràk. Nhũm mẽ kot mar xwỳnhjaja kuma nom kormã hprĩ hã mar tỳx kêt nē. Tã kot kaj mẽ atõ wamta kôt mẽ hwỳr tē nē mẽ kot ixkôt amnhĩ xunhwỳr kaxyw aprĩ hã mẽ kãm ijarēnh o mẽ hkôt apa hãmri nē te apê mẽ anhõ pahi mã hpur kãm axujamỳnh xwỳnh pyràk. Hãmri nhũm mẽ hkwỳjaja mẽ ama nē ixkôt amnhĩ xunhwỳ nē ixkôt ri amnhĩ nhĩpêx o pa. Hã koja nhỹrmã mẽ apyrà nē Tĩrtũm mẽ wa ixri mex rãhã nē htĩr tũm nē pa ho pa. Ka mẽ amnhĩ tã mẽ omu nē akĩnh nē apa. Te mẽ kot mẽ hpur kãm ahkre xwỳnhjaja nē mẽ kot hamỳnh xwỳnhjaja mẽõ rũnh pumunh nē hkĩnhta pyràk.

³⁷ –Na htem tõhã ã mẽ pur kãm mẽ àpēnh xwỳnhjê jarēnh anē nē mẽ harēnh o: “Axtem mẽ ahkre xwỳnhjaja nē axtem mẽ kot hamỳnh xwỳnhjaja.” Anē. Tã te mẽ ate mẽ ujarēnh ja pyràk.

³⁸ Na pa pre ra ma mẽ hwỳr mẽ arẽ. Mẽ ate aprĩ hã mẽ kãm ijarēnh nhũm mẽ kot mẽ amar nē amnhĩ kaxyw ixkôt hamaxpěr nē ixkôt amnhĩ xunhwỳr kaxyw. Nom mẽ kajaja na ka prem

akumrêx mẽ hwỳr amrar nê mẽ kãm ijarênh kêt nê. Tĩrtũm kapêr jarênh o mẽ pa xwỳnhjaja na prem kumrêx mẽ hwỳr mra nê ixkukamã mẽ kãm ijarênh o ri mẽ hkôt pa. Te mẽ kot hpur kãm ahkre ho pata pyræk. Tã kot kaj mẽ hpãnhã mẽ kot amnhĩ kaxyw ixkôt amnhĩ xunhwỳr kaxyw aprĩ hã mẽ kãm ijarênh o apa. Jakamã te mẽ ate mẽ hpur kãm mẽõ jamỳnh xwỳnh kot amnhĩ nhĩpêxta pyræk. Anê.

Mẽ hkwỳ kot amnhĩ nhĩpêx nyw o amnhĩ nhĩpêx ã mẽ harênh

Sikũn Korĩt 5.17; Wam Juãw 4.14

³⁹ Rôm nhũm Samar nhõ xwỳnh kwỳjaja nija kot mẽ kãm amnhĩ jarênh ma hãmri nê uræk nê amnhĩ kaxyw Jejus kôt hamaxpêr. Na pre ra amnhĩ tã tanhmã mẽ kãm Jejus jarênh to nê mẽ kãm harênh o:

—Ma aa kot nhỹri ixpumunh kêt tã ra kot hprĩ hã ixpumunh par. Ixte tanhmã amnhĩ nhĩpêx to hã ixpumunh par.

Anhỹr jakamã nhũm mẽ kuma nê uræk nê amnhĩ kaxyw hkôt hamaxpêr kurê kumrêx.

⁴⁰ Hãmri nê man mẽ ixwỳr mra nê Jejus pumu nê amnhĩ wỳr kuwỳ nê kãm:

—Pa. E kwa mẽ tokyx anojarêt kêt nê. Mẽ ma mẽ ixkôt mẽ inhõ krĩ hwỳr mō nê mẽ ixkôt ri apa grire nê arĩ ma mō. Anê.

Hãmri nhũm mẽ kuma nê mẽ kãm:

—Tôe. Nà kot paj mẽ anê. Anê.

Hãmri pa mẽ ma mẽ hkôt mō nê mẽ õ krĩ kamã mẽ hkôt ri ixpa hã apkati axkrut.

41 Nhũm Jejus mẽ kãm Tĩrtũm kapẽr jarẽnh o ri mẽ hkõt pa nhũm mẽ axte ohtô nẽ kuma nẽ nita pyrà nẽ hkõt amnhĩ xunhwỳ.

42 Hãmri nẽ nita wỳr mra nẽ kãm:

—E nà ãm hãmri. Akumrẽx na ka mẽ inhmã Jejus o amnhĩrĩt. Pa mẽ akõt ma hwỳr mra nẽ mẽ pam omu nẽ kapẽr ã kuma. Jao apyrà nẽ amnhĩ kaxyw hkõt ijamaxpẽr nẽ hkõt amnhĩ xunhwỳ. Pẽr ãm hãmri kệp pyka piitã hkõt mẽ pahte amnhĩ tomnuj pãnhã amnhĩrer mã xwỳnhta na. Anẽ.

Garirej nhõ xwỳnhjaja kot Jejus pumunh ã mẽ harẽnh

Matêwre 13.57

43 Tã pa mẽ Jejus kõt Samar rũm ixkato nẽ ma pika pẽ Garirej wỳr mō. Kamã Jejus nhõ krĩ pẽ Najare htã pa mẽ hwỳr inhmōr kêt nẽ.

44 Na pre ra Jejus mẽ inhmã tanhmã õ krĩ nhõ xwỳnhjẽ jarẽnh to nẽ mẽ harẽnh o:

—Tĩrtũm nhỹ hã kapẽr jarẽnh o mẽ pa xwỳnhjaja na htem amnhĩ nhõ krĩ kamã mẽ kãm Tĩrtũm kapẽr jarẽnh o pa nhũm mẽ kuma nẽ ãm kuma. Jakamã kot paj Najare hwỳr inhmōr kêt nẽ. Mẽ kãm ixkapẽr mar prãmre hã.

45 Anhỹr jakamã na pa prem hwỳr inhmōr kêt nẽ. Pãnhã nhãm krĩ hõ hwỳr mō nẽ hwỳr pøj hãmri nhũm mẽ amnhĩ wỳr Jejus pumu nẽ hkĩnh nẽ. Na prem ra krĩ pẽ Jerujarẽ kamã arĩgro pẽ Pas ã mẽ hkĩnh kãm tanhmã kot amnhĩ nhĩpêx to ho pa hã omu. Jakamã amnhĩ wỳr omu nẽ hkĩnh nẽ.

Jejus kot mẽhõ hkra ho mex ã harẽnh

46 Tã pa mẽ kormã Garirej kamã ixpa nẽ akupỹm krĩ pẽ Kanã hwỳr mō. Kamã na pre Jejus mẽ kãm

gô ho wĩhti nhĩpêx. Jakamã pa mẽ akupỹm mẽ hwỳr mō. Nhũm mẽõ pahi nhõ kôwenatôjê hõ hkra myja kêp à htỳx nẽ nõ. Nom Kanã kamã hkêt axtem krĩ hõ pè Kapanaũ kamã.

⁴⁷ Jakamã nhũm hipêêxàja tee ri hkra pumu hãmri nẽ ra Jejus kot Jutej rũm Kanã hwỳr hpôx ã harênh ma nẽ hkra kaxyw kãm hamaxpêr nẽ ma hwỳr mōr kurê kumrêx. Hãmri nẽ nhỹri omu nẽ hwỳr tẽ nẽ kãm kapêr kãm hihtỳx nẽ kãm:

—Pa. E ot pa awỳr tẽ. Na ra ixkra ixpê htyk kaxyw. Kwa ixkamã axukapřĩ nẽ ma ixkôt mō nẽ akupỹm inhmã ho mex. Anẽ.

⁴⁸ Hãmri nhũm kuma nẽ kãm:

—Kwa pêr ãm ixte mẽ amã aa mẽ ate mẽmoj pumunh kêt kwỳ ho anhỹr ã ixpumunh kêt pix mã na ka htem amnhĩ kaxyw ixkôt ajamaxpêr. Nom amarĩ amnhĩ kaxyw ixkôt ajamaxpêr kêt nẽ. Anẽ.

⁴⁹ Hãmri nhũm tee ri kuma nẽ kãm:

—Kwa tokyx. Kot kaj tokyx ixkôt amōr kêt koja ixpê ty. Anẽ.

⁵⁰ Hãmri nhũm kãm:

—Nà koja apê htyk kêt nẽ. Ra ixte akupỹm amã ho mex kênã. Mãmri ma akupỹm mō nẽ tokyx omu. Na ra akupỹm amã mex. Anẽ.

Hãmri nhũm kuma nẽ kaxyw hkôt hamaxpêr kurê kumrêx nẽ ma akupỹm hwỳr mō. Nẽ mōr o apkati.

⁵¹ Nẽ kormã õ krĩ hwỳr hpôx o mōr ri nhũm ra kãm mẽ àpênh xwỳnhjaja kutã mra nẽ nhỹri pry hã hkaxpa nẽ kãm:

—Pa. Kwa na ra akra hkà hakry nẽ akupỹm amã mex. Anẽ.

52 Hãmri nhũm mẽ kuma nẽ hkĩnh tỳx nẽ. Nẽ mẽ kãm:

—Kwa xô wehe? Mẽmo ore hã na pre we ra hkà hakry? Anẽ.

Nhũm mẽ kãm:

—Nà jãã na pre kaxkwa nhĩpôk ri myt nhỹ nhũm hkà hakry nẽ akupỹm amã mex kurê kumrẽx. Anẽ.

53 Hãmri nhũm mẽ kuma nẽ mẽ kãm:

—Hêxta waa nẽ. Kwa pẽr ãm hãmri Jejus kot inhmã akupỹm mex ã harẽnh xà hã ore kamã na pre akupỹm inhmã mex. Nà ãm hãmri. Anẽ.

Hãmri nẽ amnhĩ kaxyw Jejus kôt hamaxpẽr kurê kumrẽx. Nhũm ôrkwỹ kamã ri mẽ pa xwỹnhjaja uràk nẽ amnhĩ kaxyw hkôt hamaxpẽr.

54 Nhũm Jejus ã kãm hkra ho mex anẽ. Na pre ra pika pê Garirej kamã mẽ kot mẽmoj pumunh kêt ô ho anhỹr o tipxi nẽ mẽ kãm gô pix o wĩhti nhĩpêx. Tã ra pyka pê Jutej rũm akupỹm mẽ hwỳr mō nẽ ã akupỹm mẽ hkrata o mex anẽ.

5

Jejus kot himô mỳ ri akupỹm mẽhõ ho mex ã harẽnh

Juãw 7.23, 10.30-33

¹ Tã mẽ ixpê Ijaew mẽ ixte Tĩrtũm ã ixkĩnh kaxyw Jerujarẽ hwỳr akuprõ nhũm Jejus haxwỳja ma hwỳr mō. Pa mẽ hkôt mẽ ixpa ho mẽ ixpa xwỹnhjaja ma hkôt mō.

² Jerujarẽ kamã na himôja hikwỹ. Nhỹhỹnh mẽ kot krĩ hwỳr ôwêhti ho gjêx xà htã hikwỹ. Himôja nhĩxi pê na Petes. Nẽ pu hã mẽ à xwỹnhjê nhĩkwỹ xà hã ixkre kêp 5.

³ Piitā kamā na pre hte tanhmā mẽ à kute xwỳnhjaja hikwỹ. Mẽ nohkre xwỳnhjaja nẽ mẽ hyk o mẽ pa xwỳnhjaja nẽ mẽ ĩ kamā mẽ htyk xwỳnhjaja. Ām ahpỳnhã tanhmā mẽ à kute xwỳnhjaja ixkre hkwỳja kamā akupỹm mex prām xàj hikwỹ.

⁴ Na pre hte Tĩrtũm kapēr o mẽ wrỳk xwỳnhja tōhã himô hwỳr wrỳ nẽ gô xok. Hāmri nhũm mẽ à xwỳnhjê hō kot amnhĩ to wa nẽ kumrẽx hwỳr wrỳk nẽ kamā mrōr xwỳnhja akupỹm mex. Kwỳjê rom akupỹm mex kurê kumrẽx. Jakamā nhũm pre hte mẽ à xwỳnhjaja akupỹm mex prām xàj gô xok jamār o hikwỹ.

⁵ Jakamā nhũm mēhō myja ixkre hō kamā hikwỹ. Te omnuj nẽ arĩ hikwỹ hã amgrà xohtô rax nẽ. Ra hã amgrà kệp 38.

⁶ Jakamā nhũm Jejus mẽ hwỳr tẽ nẽ omu. Nẽ hprĩ hã omu nẽ hamaxpēr o:

—Kwa mũj na hte omnuj nẽ ri pa hkêt ã amgrà xohtô rax nẽ. E pa akupỹm ho mex.

Anhỹr o hamaxpēr hāmri nẽ kãm:

—Pa. E kwa inhmã amnhĩ jarẽ. Xà amã akupỹm amex prām? Anẽ.

⁷ Hāmri nhũm kuma nẽ kãm:

—Ku nhũm. Inhmã tokyx akupỹm inhmex prām tỳx kumrẽx kênã. No mēhō kot tokyx inhmỳ nẽ mẽ kệp ixto wa nẽ ixkumrẽx gô xok kamā inhmrōr? Na pa tee ri ixkumrẽx hwỳr ixtēm nẽ inhmã inhmrōr prām nhũm mẽ xatã ixpê amnhĩ to wa nẽ mra nẽ kamã mrō. Anẽ.

⁸ Hāmri nhũm Jejus kãm:

—Tỳ? Tõe. E na ka akupỹm amex. E kànhmã xa nẽ akupĩp py nẽ ma akupỹm anhōrkwỹ hwỳr tẽ. Anẽ.

9 Hãmri nhũm kuma nẽ ra akupỹm mex nẽ kànhmã xa nẽ ri mra. Nẽ hkĩnh tỳx nẽ hikupĩp py nẽ ma akupỹm òrkwỹ hwỳr tẽ. Ijaew nhõ arĩgromnu pê sap ã nhũm Jejus kot akupỹm ho mex

10 nhũm ma akupỹm pry hã hikupĩp py nẽ o tẽ. Nhũm Ijaew nhõ pahi hkwỳja nhỹhỹnh mra nẽ tee ri kot sap ã hpyr nẽ o htẽm ã omu nẽ kãm:

—Tk. Kwa mẽ pahpê Ijaew na pu htem mẽ panhõ arĩgromnu hã paxàpênh kêt nẽ. Finat Mojes kot ja nẽ mẽ pahkurê htã ka axtem nẽ akupĩpta py nẽ nhỹhỹm o tẽ. Anẽ.

11 Hãmri nhũm mẽ kuma nẽ mẽ kãm:

—Tỳ. Kot anhỹr tã kot ixto mex xwỳnhta na ã inhmã kapêr anẽ pa mar xà hkôt kupy nẽ akupỹm inhõrkwỹ hwỳr tẽ. Anẽ.

12 Hãmri nhũm mẽ tee ri kuma nẽ kãm:

—Kwa mẽhõ na we ã ri amã karõ anẽ? Anẽ.

13 Nhũm kormã kot Jejus nhĩxi mar kêt jakamã kot mẽ kãm ahkre kaxyw hakẽx nẽ tee ri hkwỳjê kaêx ã hapêr rĩt o xa. Nom nhũm mẽ ohtô nẽ pry hã mrar jakamã nhũm tee ri hapêr nhũm Jejus ra ma nhỹhỹm tẽ.

14 Tã nhũm hã ahtũmre nhũm Jejus Tĩrtũm mã amnhĩ jarênh xà hã ixkre hwỳr tẽ nẽ axà nẽ kot ho mex xwỳnhta pumu nẽ kãm:

—Pa. E na ka ra akupỹm amex. Nom kwa kêr ka axte tanhmã amnhĩ tomnuj to ho ri apa hkêt nẽ. Kot kaj axte ã amnhĩ nhĩpêx anẽ hãmri nẽ apunuj tỳx o wam ate apunujta jakre kãm ga. Anẽ.

15 Hãmri nhũm kuma nẽ ma tẽ nẽ kato. Nẽ ma mẽ õ pahjê hwỳr tẽ nẽ mẽ kãm:

—E na pa ra kot ixto mex xwỳnhta nhĩxi ma. Xep kêp Jejus. Anẽ.

¹⁶ Hãmri nhũm mẽ hixi ma nẽ hã tanhmã axpẽn mã ho kapẽr punuj to. Mẽ õ arĩgromnu hã kot mẽ ho mex o pa jakamã nhũm mẽ axpẽn jakwa kamã ri hixi ho rê nẽ nhỹri omu nẽ tanhmã hã kãm àkjêr to.

¹⁷ Hãmri nhũm amnhĩ tã mẽ kuma nẽ mẽ kãm:
—Ku nhũm. Inhĩpêêxà Tĩrtũm na hte apkati mẽ tanhmã mẽ pahto mex to ho pa. Jakamã pa hte uràk nẽ ã mẽ ho mex rãhã ho ri ixpa anẽ nẽ aa mẽmo arĩgro hã ja ho anhỹr kaga hkêt nẽ.

¹⁸ Anhỹr o mẽ kãm amnhĩ jarẽ nhũm mẽ kuma nẽ kamã gryk tỳx nẽ. Nom mẽ õ arĩgromnu hã kot mẽ ho mexja pix mỳrapê kamã gryk kêt. Mããnẽn Tĩrtũm kêp hipêêxà hã harênhja mỳrapê nhũm prem kamã gryk tỳx kumrêx nẽ axpẽn mã:

—Tk. Kwa na ã amnhĩ jarênh anhỹr jao te kêp Tĩrtũm pyràk ã amnhĩ jarẽ. E kwa pu mẽ kupĩ ri. Anẽ.

Tĩrtũm Kra kot Hipêêxà nhỹ hã amnhĩ nhĩpêx ã harênh

Juãw 14.10-13

¹⁹ Hãmri nhũm Jejus axte mẽ kêp Ijaew nhõ pahijê mã kapẽr nẽ mẽ kãm:

—Na pa hte amnhĩ krã hkôt tanhmã amnhĩ nhĩpêx to ho ri ixpa hkêt nẽ. Na pa hte Inhĩpêêxà kot tanhmã amnhĩ nhĩpêx to hã omunh xà hkôt uràk nẽ mẽ ho mex o ri ixpa. Kwa mẽ amnhĩ krã him ja jaxà nẽ kãm ajamaxpêr tỳx nẽ ho apa.

²⁰ —Inhĩpêêxàja kãm ijapêê. Na hte inhmã kot tanhmã mẽ ho mex to piitã ho amnhĩrit. Ixte omunh nẽ uràk nẽ ÿ hã tanhmã mẽ ho mex to ho ri ixpa kaxyw. Jakamã kot paj ãm akupỹm mẽ à xwỳnhjê ho mex pix o ri ixpa hkêt nẽ. Kot paj

māānēn mē kām mēmoj mex o ja jakrenh o anhÿr o ri ixpa ka mē hā ixpumu nē ixkamā ano puma ho apa.

²¹ —Nē Inhīpêêxà kot akupÿm mē htyk xwÿnhjê ho htīr jakamā kot paj uràk nē akupÿm mē htyk xwÿnhjê ho htīr o ri ixpa. Anē.

Mē htīr tūm nē mē pa mā xwÿnhjê jarēnh

Juāw 3.16-17, 3.36, 6.27, 6.40, 6.60, 10.28, 17.2-3; Rōmān 6.23; Karatas 6.8; Xitre 1.2; Wam Juāw 2.25, 5.11-13

²² Nhūm Jejus arī mē kēp Ijaew nhō pahijê mā kapēr nē mē kām:

—Koja nhÿrmā Inhīpêêxàja mē htīr tūm nē mē pa ho mē pa mā xwÿnhjê jarēnh kêt nē. Ja kaxyw na pre pa ixām.

²³ Tā mē piitā mē kot ja hā ixpumunh nē ixtā hpijaàm o ri pa kaxyw na pre mē kaxyw ixām. Te mē kot Inhīpêêxà hā hpijaàmta pyrà nē pa ixtā hpijaàm o pa kaxyw. Jakamā koja mēhō ixtā hpijaàm kêt nē hāmri nē māānēn Inhīpêêxà hā hpijaàm kêt ā amnhī to amnhīrīt. Tām kot mē awÿr inhmēnh kēnā.

²⁴ Jakamā koja mēhō ixkapēr ma nē amnhī kaxyw kot mē awÿr inhmēnh xwÿnhhta kôt hamaxpēr nē ixkôt amnhī xām. Hā koja nhÿrmā htyk tā ma mē kot amnhī xà htÿx kamā hamak o pa htūm xàta wÿr mōr kêt nē. Koja Inhīpêêxà akupÿm ho htīr nhūm wa ixri htīr tūm nē mex kumrēx nē pa ho pa. Jakamā koja mēhō ixkôt amnhī xām hāmri nē ra kēp wa ixri htīr tūm nē pa ho pa mā xwÿnh. Kwa mē jam ajamaxpēr tÿx rāhā ho apa.

25 —No mẽ kām ixkapēr mar prām kêt xwỳnhjaja kệp Inhĩpêêxà mẽ wa ixri mẽ htĩr tũm nẽ mẽ pa mã xwỳnh kêt. Tã ixpê Tĩrtũm Kra jakamã koja mẽ ixkapēr ma nẽ ixkôt amnhĩ xunhwỳ. Hã kot paj amnhĩ tã mẽ omu nẽ mẽ htĩr tũm nẽ mẽ pa mã xwỳnh ã mẽ harẽ nhũm mẽ àmnhĩx ri hkĩnh nẽ pa ho pa. Kwa mẽ jam ajamaxpēr tỳx rãhã ho pa.

26 —Nẽ Inhĩpêêxà tãm kệp mẽ ho mẽ htĩr xwỳnh. Tã ixpê Kra jakamã na pre amnhĩ pyrà nẽ ja kaxyw ixãm.

27 —Ra kot mẽ akaxyw ixãm jakamã na pre mãănẽn ixte tanhmã mẽ ajarẽnh to kaxyw ixãm. Wa ixri mẽ atĩr tũm nẽ apa ho apa mã xwỳnhjê hã mẽ ajarẽnh rỳ wa ixri mẽ atĩr tũm nẽ apa hkêt mã xwỳnhjê hã mẽ ajarẽnh kaxyw.

28-30 Jakamã kot paj nhỹrmã ra mẽ htyk nẽ mẽ hikwỹ xwỳnh piitã mẽ kām ixkapēr nhũm mẽ inhma. Koja mẽ ixkapēr ma hãmri nẽ akupỹm htĩr nẽ pika rũm hapôx pa. Hãmri nhũm mẽ kot kormã htĩr ri Tĩrtũm kapēr kôt amnhĩ nhĩpêx hkêt xwỳnhjaja mẽ kot amnhĩ tomnuj mỳrapê ma mẽ kot amnhĩ xà htỳx kamã hamak tũm xàta wỳr ma hapêx pa. Nom nhũm mẽ kot amnhĩ to mex xwỳnhjaja. Ra mẽ kot Tĩrtũm kôt amnhĩ nhĩpêx jakamã koja mẽ ma Tĩrtũm mẽ wa ixwỳr api nẽ wa ixri mex nẽ hkĩnh rãhã htĩr tũm nẽ pa ho pa.

—Kot paj ja kaxyw tanhmã mẽ apiitã mẽ ajarẽnh to. Nom kot paj amnhĩ krã hkôt inhmã hprãm xà hkôt tanhmã mẽ ajarẽnh to hkêt nẽ. Kot paj Inhĩpêêxà kot mẽ awỳr inhmẽn h xwỳnhhta nhỹ hã àhpumunh tỳx xà hkôt tanhmã mẽ ajarẽnh to. Jao ãm hãmri mẽ ajarẽ. Kwa mẽ jam ajamaxpēr tỳx nẽ.

No ã ixte mẽ amã amnhĩ jarẽnh anhỹrja ma nẽ tee ri ajamaxpẽr kêt nẽ. Anẽ.

Mẽ kot Jejus kêp Tĩrtũm Kra hã harẽnh xwỳnhjê jarẽnh

Juãw 8.18; Wam Juãw 5.6-8

³¹ Nhũm Jejus arĩ mẽ kêp Ijaew nhõ pahijê mã kapẽr nẽ mẽ kãm:

—E na pa ra tanhmã mẽ amã amnhĩ jarẽnh to. Nom kop ãm papxipix ixte ã amnhĩ jarẽnh anhỹr ronhỹx ka mẽ inhma nẽ ajamaxpẽr o: “Ko. Na apu ãm hãmri ã mẽ inhmã amnhĩ jarẽnh anẽ rỳ apu ãm amnhĩ to hêx.” Anhỹr o ajamaxpẽr.

³² Nom papxipix na pa hte ã amnhĩ jarẽnh anhỹr kêt nẽ. Inhĩpêxà haxwỳja na hte ã ijarẽnh anẽ. Nẽ ãm hãmri na hte tanhmã ijarẽnh to ho pa. Tĩrtũmja hêx kêt.

³³ No mẽ amã pika nhõ xwỳnhjê pix kapẽr mar prãm jakamã na ka prem finat Juãw Paxisja wỳr akwỳjê rẽ nhũm mẽ ma hwỳr mra nẽ ixtã hkukja nhũm mẽ kãm tanhmã ijarẽnh to. Nẽ hprĩ hã mẽ kãm ijarẽ.

³⁴ No mẽ apê pika nhõ xwỳnhjaja mẽ ate axpẽn mã tanhmã ijarẽnh toja na ixpê tanhmã kute hkêt. Koja mẽhõ tanhmã ixto kapẽr punuj to rỳ tanhmã ijarẽnh mex to pa amnhĩ jarẽnh ma nẽ tee ri amnhĩ kukamã ijamaxpẽr o ixkaprĩ hkêt nẽ. Tã nom Juãw Paxis kapẽrja mẽ amã mex jakamã na pa ã mẽ amã harẽnh anẽ. Ka mẽ ra kot tanhmã ijarẽnh toja ma nẽ amnhĩ kaxyw ixkôt ajamaxpẽr nẽ ixkôt amnhĩ xunhwỳ nẽ nhỹrmã ty nẽ ma mẽ kot amnhĩ xà htỳx kamã hamak tũm xàta wỳr apa hkêt nẽ.

³⁵ —Juãw Paxis na pre te kanê hpòk mex nê mẽmoj to amnhĩrĩt mex pyrà nê mẽ amã Tĩrtũm kapêr o amnhĩrĩt mex o pa. Ka prem te maripôtre kot kanê hã htu pyrà nê hwÿr akuprô nê mar o akuhê. Nom hkôt ajamaxpêr tÿx kêt nê.

³⁶ Na pre hprĩ hã mẽ amã ijarênh o ri pa.

—Tã pa pam mẽ awÿr wrÿ nê Inhĩpêêxà nhÿ hã mẽ akamã aa mẽ ate mẽmoj pumunh kêt kwÿ ho anhÿr o ri ixpa. Mẽ ate ja hã ixpumunh nê Inhĩpêêxà tãm kot mẽ awÿr inhmênh kôt ixpumunh kaxyw.

³⁷ —Nê Inhĩpêêxàja mãânên ixpê Kra hã mẽ amã ixto amnhĩrĩt. Ra mẽ anhõpinh xà kaxwÿnh kãm kot mẽ amã ixto amnhĩrĩt tã ka mẽ ama nê ãm ama nê ixkôt ajamaxpêr kêt nê.

³⁸ Mẽ amã mẽ ate hkôt amnhĩ nhĩpêx o apa hprãm kêt. Mẽ ate kapêr mar tÿx ronhÿx ka mẽ ixkapêr ma nê amnhĩ kaxyw ixkôt ajamaxpêr kurê kumrêx. Ixpê Tĩrtũm kot mẽ awÿr inhmênh xwÿnh kênã.

³⁹ —Nê Tĩrtũm kapêr ã kagà htũm haxwÿja kot tanhmã ijarênh to. Ka htem wa ixri atĩr tũm nê apa ho apa hprãm xàj kamã harênh rãhã ho ri apa. Nê kot tanhmã pa ijarênh to htã ka mẽ ixkapêr ma nê amnhĩ kaxyw ixkôt ajamaxpêr kêt nê. Anê.

Ijaew nhõ pahijaja kot Jejus kaga hã mẽ harênh

⁴⁰ Nhũm Jejus arĩ mẽ kêp Ijaew nhõ pahijê mã kapêr nê mẽ kãm:

—Nê pa na ixte Inhĩpêêxà mẽ wa ixri ixte mẽ ho mẽ htĩr tũm nê mẽ pa mã xwÿnh ã mẽ harênh tã ka mẽ amnhĩ kaxyw ixkôt ajamaxpêr kêt nê.

⁴¹ Nom mẽ ate inhmex ã ijarēnh kêt tâ ja ixpê tanhmã kute hkêt. ãm Inhĩpêêxà pix kot inhmex ã ijarēnhja na inhmã hprãm.

⁴² Ra ixte mẽ apumunh mex. Mẽ amã Tĩrtũm kĩnh kêt.

⁴³ Tãm kot mẽ awỳr inhmēnh tâ ka mẽ ixpumu nẽ ixkaga nẽ ixkôt amnhĩ nhĩpêx kêt nẽ. Nom koja mēhõ amnhĩ krã hkôt mẽ awỳr tẽ nẽ tanhmã mẽ ajahkre hto ka mẽ ama nẽ hkôt amnhĩ nhĩpêx kurê kumrêx.

⁴⁴ – ãm pika nhõ xwỳnh pixjaja kot mẽ amex ã mẽ ajarēnhja na mẽ amã hprãm. No Tĩrtũm kot amnhĩm mẽ amex ã mẽ ajarēnhja mẽ amã hprãm ã mẽ ate amnhĩ jarēnh tâ mẽ amã ja prãm kêt. Jakamã na ka htem ixkaga kumrêx.

⁴⁵⁻⁴⁶ Tã nom kot paj pam nhỹrmã Tĩrtũm mã mẽ apê ixkwỳ hkêt ã mẽ ajarēnh kêt nẽ. Mo kaxyw kot pa kêt ri ã kãm mẽ ajarēnh anê? Finat Mojes tãm koja ja hã kãm mẽ ajarê. Na ka htem tanhmã ajamxpêr to nẽ ajamxpêr o: “Kot paj finat Mojes kot mẽ inhmã tanhmã kapêr to hkôt amnhĩ nhĩpêx o ri ixpa hãmri nẽ nhỹrmã Tĩrtũm ri ixtĩr tũm nẽ inhmex nẽ ixpa ho ixpa.” Anhỹr o ajamxpêr nom hkôt amnhĩ nhĩpêx kêt nẽ. Mojes na pre hte pa ijarēnh o pa. Tã mẽ ate kapêr kôt amnhĩ nhĩpêx ronhỹx ka mẽ amnhĩ kaxyw ixkôt ajamxpêr nẽ ixkôt amnhĩ xunhwỳ. No mẽ ate ixkaga jakamã koja Mojes tãm Tĩrtũm mã mẽ apê ixkwỳ hkêt ã mẽ ajarê.

⁴⁷ Mẽ ate Mojes kapêr kôt amnhĩ nhĩpêx kêt jakamã kot kaj mẽ mããnēn ixkôt amnhĩ nhĩpêx hkêt nẽ. Anẽ.

Nhũm pre ã Jejus Ijaew nhõ pahijê mã kapêr

anẽ.

6

*Jejus kot mẽ ho 5.000 nẽ mẽ kãm mẽ õ hã harẽnh
Matêwre 14.13-21; Makre 6.30-44; Rukre 9.10-17*

¹⁻⁴ Tã nhũm ra arĩgro pẽ Pas ahtêp o mõ. Pasja ã mẽ ixpẽ Ijaewjaja na pa htem axpẽn wýr akuprõ nẽ hã ôwêhti hkra nyw kwý pa nẽ ã hkur o ixkrĩ. Amnepêm Tĩrtũm kot pika pẽ Ejit rũm mẽ inhĩgêjtê kator kaxyw nhũm prem nojarêt nẽ ã hkwy hpar nẽ ã hkur anẽ. Tã arĩ mẽ ixpẽ mẽ hkanrêhã mẽ htãmnhwýjaja jam ijamaxpêr pẽ ixkĩnh kaxyw ã amnhĩ nhĩpêx anẽ. Jakamã nhũm Jejus pàr krem axà nẽ ma himô pẽ Garirej ã rêr kaxyw ma xarmã mõ nẽ rê. Himôja nhĩxi hõ pẽ na Tipe nhũm hã xarmã mõ nẽ rê. Pa mẽ hkôt ixpa ho ixpa xwýnhjaja ma hkôt ixpa.

Hãmri nhũm pika nhõ xwýnh kwýjaja Jejus ma mõr kãm omu hãmri nẽ ma gô kape hã pikap mẽ inhĩhkrep mra. Na pre ra Jejus mẽ kamã mẽ à xwýnhjê ohtô nẽ akupým mẽ ho mex nhũm mẽ axte omu hãmri nẽ ma mẽ inhĩhkrep gô mý ri hpar o pa.

Tã pa mẽ xarmã rê nẽ pàr rũm ijabôj nẽ gô mý ri kýxpê ixkrĩ hpa.

⁵ Hãmri nhũm mẽ inhĩhkrep mẽ mrar xwýnhjaja mẽ ixwýr hpõx o mra nhũm Jejus amnhĩ wýr mẽ omu nẽ mẽ inhĩõ pẽ Firipti mã kapêr nẽ kãm:

—Kwa Firip. Mẽmoj kot puj mẽ pahwýr mẽ mõr nẽjjê mã ho anẽ nhũm mẽ kuku? Tanhmã kot puj mẽ amnhĩ to nẽ nhýri mẽ kãm mẽmoj japrô nhũm mẽ kuku? Anẽ.

⁶ Ra tām kot tanhmã mẽ kãm õ hto hã amnhĩ pumunh mex tã ã mẽ hã Firipti kamã hamak kaxyw mẽ hã hkukjêr anê.

⁷ Hãmri nhũm kuma nê tee ri mẽ hkukamã hamaxpêr nê kãm:

—Konên. Mẽ ohtô rax kumrêx kênã. Mo mẽ kaxyw mẽ pakàxpore rax? Kot pu mẽ pakàxpore ho 200 nê ho mẽ kãm mẽmoj japrôr tã nhũm mẽ ãm ho hkryre nê kuku nê ho ôhy htu hkêt nê. Mẽ ohtô rax o mẽ ohtô rax kênã. Anê.

⁸⁻⁹ Hãmri nhũm mẽ inhĩõja kuma nê Jejus wýr tẽ nê kãm kapêr. Simãw Pêtre htõ Andreja hwýr tẽ nê kãm:

—E ota mēhõ hkrata amnhĩ kôt õ hkwȳ ho mõ. No ãm grire. Na pãwti kêp 5 nê kaxyw õ tep axkrutre. No mẽ ohtô gri ã kot kêt mẽ hipêx pa. Anê.

¹⁰ Hãmri nhũm kuma nê hkôt mẽ ixpa ho mẽ ixpa xwýnhjê mã kapêr nê mẽ inhmã:

—Tõe. Nà hãmri. E mẽ kãm anê kê mẽ hkrĩ pa. Anê.

Hãmri pa mẽ kãm anê nhũm mẽ põ kamã hkrĩ hpa. Na prem ohtô kumrêx. Měmyjê pixjaja kêp 5.000. Nê kaxyw mẽ hprõ nê mẽ hkrajaja. Na prem ohtô ho ohtô. Tã piitã hkrĩ pa.

¹¹⁻¹² Hãmri nhũm Jejus mēhõ hkrata pê õ pãwti jamý nê o xa nê Tirtũm mã harê nê kãm:

—Pa Papaj. Na ka hte mẽ inhmã mẽ inhõ ho apa. ãm kapxipix amex o amex. Anê.

Hãmri nê mẽ inhmã pãwtija gõ pa mẽ ô ri mẽ hkrĩ xwýnhjê mã ôr o mra nê ho mẽ piitã mẽ hipêx pa. Pãwtija ãm hkryre htã nhũm Jejus tanhmã ho nhũm ra ohtô rax kumrêx. Jakamã pa mẽ ô ri mẽ kãm ôr o mra nê ho mẽ piitã mẽ hipêx pa. Nhũm Jejus

hpānhã tep axkrutreta py nê mã ho anê nê Tĩrtũm mã harê hãmri nê amnhĩ xô ri mẽ inhmã kugõ pa mẽ mã ho anê nê. Te ho pãwti nhĩpêx pyrà nê ho mẽ piitã mẽ hipêx. Hãmri pa mẽ ixpiitã apku nê inhõhy htu nhũm arĩ mẽõ jakrêx kwý hprã. Hãmri nhũm Jejus mẽ inhmã:

—E kwa mẽ hkôt mra nê mẽõ jakrêx o akuprõ kê omnu hkêt nê. Anê.

¹³ Hãmri pa mẽ kuma nê ho akuprõ nê kawà o 12 nê ho nýt. Pãwti hkryreja âm kêp 5 pix tã nhũm Jejus tanhmã ho nhũm rũnh kumrêx. Jakamã pa mẽ hakrêx prãr o kawà ho 12 nê ho nýt pa.

¹⁴ Hãmri nhũm mẽ inhĩhkrep mẽ mõr xwýnhjaja amnhĩ jaêr pê Jejus kot mẽ kãm mẽõ ho rax ã omu nê ri axpên mã harênh o:

—Kokỹỹ. Tãm mãn pre finat Mojesja amnepêm mẽ panhĩgêjtê mã harênh o ri pa. Tã ra mẽ pahwýr wrý nà?

¹⁵ Kwa pu mẽ kãm pakapêr kãm paxihtýx nê ma akupým amnhĩ kôt o mõ nê amnhĩ kaxyw âm kê mẽ pahto amnhĩptàr o pa. Anê.

Hãmri nhũm Jejus amnhĩ tã mẽ kapêr ma nhũm ja kêp omnuj nê. Jakamã nhũm mẽ kêp kato nê ma hpānhã ahte nhỹri hixêt õ hwýr tẽ.

Jejus kot gô krāhkà hã htēm ã harênh

Matêwre 14.22-27; Makre 6.45-52

¹⁶ Tã nhũm ra kamàtre pa mẽ Jejus kôt ri ixpa ho ixpa xwýnhjaja ma akupým himô hwýr mra.

¹⁷ Nhũm kormã Jejus mẽ ixwýr akupýn htēm kêt jakamã pa mẽ tee ri kamã ama hãmri nê akupým pàr mã axà nê ma akupým Kapanau hwýr xarmã ixrêr o mõ.

18 Pu nhũm ra kôk àpêr tỳx nhũm gô xatã kànhmã harĩ nê axpên wỳr mra nê axpên tak tỳx nê.

19 Pa mẽ kormã gô nhĩpôk ri mō. Nê tee ri rrēmti ho gô rēnh nhĩpêx kaprỳ nom kormã ixrêr kêt nê. Nê kormã inhmōr o ixtã 5 kirôm pix nê. Hãmri nhũm ra Jejus gô krãhkà hã hpar o mẽ ixkôt tẽ. Pa mẽ ixprĩ hã amnhĩ wỳr omunh mex kêt nê ixtỳx mẽkarō hã hkamnhĩx nê mẽ inhmã uma htỳx kumrêx.

20 Tã nhũm mẽ inhmã ixkapêr nê mẽ inhmã:

—Tk. Kwa mẽ amã ma hkêt nê. Pa na pa mẽ akôt tẽ. Anê.

21 Hãmri pa mẽ kapêr ma nê ixkĩnh nê. Nê amnhĩ wỳr pàr kre hwỳr ho api nhũm axà pa mẽ xarmã ixrêr kurê kumrêx nê pàr kre rũm ijapôx pa.

Mẽ kot Jejus japêr mrar ã mẽ harēnh

22 Tã nhũm apkati nhũm xarpê mẽ kot Jejus wỳr mrar nhũm kot mẽ kãm ò xwỳnhjaja tee ri hapêr o pa nê axpên mã:

—Kwa nhỹhỹm măn pre we tẽẽ? Na pre hkôt ri mẽ pa xwỳnhjaja pix mẽ ò pàr kãm ma akupỹm xarmã mō nom nhũm Jejusja mẽ hkôt htēm kêt nê. Nà măn kormã jar nhỹhỹm ri mrar jakamã pu mẽ kormã omunh kêt nê. Anê.

23 Rôm nhũm Tipe rũm pàr kwỳja mẽ hwỳr pôj. Jejus kot mẽ apkur xà ho Tĩrtũm wỳr nê mẽ kãm ho rax xà hã pikata wỳr nhũm mōn pôj.

24 Hãmri nhũm mẽ amnhĩ wỳr omu nê tee ri pàr kãm Jejus mẽ hkôt mẽ ixpa ho mẽ ixpa xwỳnhjê japêr hãmri nê axpên mã:

—E kwa pu mẽ ma mẽ hkôt xarmã mō nê Kapanau kamã mẽ hapêr. Anê.

Hāmri nē mē kām amnhĩ jarē nē mē ò pàr kwỳ hwỳr agjê nē ma mē hkôt xarmã mōn rē.

²⁵ Hāmri nē ra mē ixwỳr rē nē mē ixkôt pōj nē mē ixkaêx ã Jejus pumu nē hwỳr mra nē kām:

—Pa mē ijahkre xwỳnh. Kwa na pa prem tee ri xarpê ajapêr hāmri nē man akôt mōn rē. Kwa tanhmã na ka pre we amnhĩ to nē man tēn rē? Anē.

²⁶ Hāmri nhũm mē kām:

—Nà mẽmo kaxyw na ka wem ri ijapêr o ri ixkôt apa? ãm jãã mē ate ixkutã axàpkur nē anhōhy htu jakamã na ka mē axte ixkutã axàpkur pix kaxyw ijapêr o ri apa. No ixte ã mē amã amnhĩ nhĩpêx anhỹr ã ixpumu nē ixpê Tĩrtũm Kra hã ixkôt ajamaxpêr kêt nē. Kwa mē ixpê Kra hã inhmã ajamaxpêr tỳx nē kêt wehe. Anē.

Jejus te kêp kaxkwa rũm mē paxàpkur xà maati pyræk ã kot amnhĩ jarēnh

²⁷ Nhũm Jejus arĩ hwỳr mē mrar xwỳnhjê mã kapêr nē mē kām:

—Kwa kêr ka mē ri axàpkur xà pix kukamã ajamaxpêr o ri apa hkêt nē. Na htem mē apkur xà kukwak ri Tĩrtũm mē wa ixri htĩr tũm nē pa ho pa hkêt nē. No kot kaj mē amnhĩ kaxyw pa ixkôt ajamaxpêr nē ixkôt amnhĩ xunhwỳ. Hã kot kaj mē ixkukwak ri nhỹrmã atĩr tũm nē wa ixri amex nē apa ho apa. Te ixpê mē kot mē apkur xà hkur nē ý hã htĩr tũm nē pa ho pa xwỳnh pyræk. Ja kaxyw na pre Inhĩpêêxà Tĩrtũm mē awỳr papxpix inhmē pa mē awỳr wrỳ. Anē.

²⁸ Hāmri nhũm mē kuma nē kām:

—Kwa tanhmã kot paj wem amnhĩ nhĩpêx to nhũm Tĩrtũm hã mẽ ixpumu nẽ mẽ ixto mex nẽ? Anẽ.

²⁹ Hãmri nhũm mẽ kuma nẽ axte mẽ kãm amnhĩ jarẽ nẽ mẽ kãm:

—Nà kot kaj mẽ amnhĩ kaxyw pa Tĩrtũm kot mẽ awỳr inhmẽnh xwỳnh kôt ajamaxpêr hãmri nhũm ixtã mẽ apumu nẽ tanhmã mẽ akrã hto ka mẽ ajamakêtkati nẽ axàmnhĩx akĩnh nẽ tanhmã amnhĩ nhĩpêx to ho ri apa. Anẽ.

³⁰ Hãmri nhũm mẽ kuma nẽ kãm:

—Tôe. Kwa axte mẽ inhmã aa mẽ ixte mẽmoj pumunh kêt õ ho anẽ. Pa mẽ ja hã apumu nẽ amnhĩ kaxyw akôt ijamaxpêr kurê kumrêx. E mẽmo kot ka mẽ inhmã ho anẽ? Kwa tokyx mẽ inhmã axte mẽmoj tanhmã ho pa mẽ omu.

³¹ Amnepêm finat Mojes pyrã kot kapôt ã mẽ panhĩgêtjê ho pa ri na pre hte apkati mẽ mẽ kãm mẽõ mẽ kot kãm “manã” anhỹr xwỳnhhta gõ nhũm pre htem hkur o pa. Tĩrtũm kapêr ã kagà htũm kot ja jarênh kot:

Na pre kaxkwa rũm mẽ hwỳr mẽ apkur xà rẽ nhũm mẽ hkur o pa.

Anhỹr o kot harênh. Tã kot kaj Mojes nẽ apkati mẽ mẽ inhmã mẽ inhõ ho ri apa pa mẽ ja hã apumu nẽ rĩ kormã amnhĩ kaxyw akôt ijamaxpêr japêr. Anẽ.

³² Hãmri nhũm mẽ kãm:

—Xà Mojes na pre hte mẽ kãm kaxkwa rũm mẽ apkur xà rênh o pa? Nà tãm kêt. Inhĩpêxà na pre hte mẽ hwỳr kurê nhũm mẽ hkawrà nẽ kuku nẽ kukwak ri hihtỳx nẽ htĩr nẽ pa. Tã nhũm ra mẽ awỳr hpãnhã pa ixpê Kra hã inhmẽ. Kwa mẽ ixkapêr ma nẽ amnhĩ krãm haxàr tỳx nẽ.

³³ Na pre Tīrtūm inhīpêx o te amnepêm kot mẽ hwỳr kaxkwa rŭm mẽ apkur xà rēnh̄ta pyrà nē amnē pika hwỳr inhmē. Jakamã te ixpê kaxkwa rŭm mẽ apkur xà maati wrỳk xwỳnh̄ta pyràk. Mē ate amnhĩ kaxyw ixkôt ajamaxpēr nē ixkôt amnhĩ xunhwỳr hāmri nē ixkukwak ri wa ixri atīr tŭm nē apa ho apa kaxyw. Anē.

³⁴ Nhŭm pre ã Jejus mẽ kãm amnhĩ jarēnh anē nhŭm mẽ kuma nom hprĩ hã mar mex kêt nē. Ām htỳx ho axtem mẽ apkur xà mex pix ã harēnh ã hkamnhĩx nē kãm:

—Kwa tô mẽ inhmã mẽ apkur xà maatita kwỳgõ pa mẽ apkati mẽ hkur o ri ixpa. Anē.

³⁵ Hāmri nhŭm mẽ kuma nē amnhĩ tã mẽ kãm:

—Nà mẽ apkur xà kumrēxja ãm paa. Te ixpê mẽ apkur xà maati pyràk. Jakamã kot kaj mẽ atõ amnhĩ kaxyw ixkôt ajamaxpēr nē ixkôt amnhĩ nhīpêx o apa hã kot kaj mẽ akĩnh nē apa. Te ra axàpkur nē anhõhy htu nē akĩnh o ri apa pyràk. Jao amnhĩ tã ixpumu nē akĩnh nē ajamakêtkati nē ri apa.

³⁶ —Ra mẽ ate ixpumunh mex tã kormã amnhĩ kaxyw ixkôt ajamaxpēr kêt nē. Kwa mẽ ixkapēr ma nē amnhĩ krãm haxàr tỳx nē.

³⁷ Tīrtūm kot inhmã mẽ òr mã xwỳnh̄jaja koja mẽ ixpumu nē amnhĩ kaxyw ixkôt hamaxpēr mex kurê kumrēx. Ā mẽ kot amnhĩ nhīpêx anhỳr xwỳnh̄jaja kot paj aa amnhĩ nē mẽ hanor kêt nē.

³⁸ —Nē ixte amnhĩ krã hkôt kaxkwa rŭm ixwrỳk nē inhmã hprãm xà hkôt tanhmã amnhĩ nhīpêx to ho ixpa kaxyw na pa pre ixwrỳk kêt nē. Inhīpêxà kot mẽ awỳr inhmēnh jakamã kãm hprãm xà hkôt

pix mã na pa hte tanhmã amnhĩ nhĩpêx to ho ri
ixpa.

39 —Tã mo na hte Inhiĩpêêxà kãm hprãm? Nà kot
inhmã mẽ õr mã xwỳnh piitã nhỹrmã wa ixkuri
htĩr tũm nẽ mex nẽ pa ho paja na kãm hprãm.
Jakamã nhỹrmã akupỹm mẽ htĩr ã arĩgrota ã ixte
akupỹm mẽ ho htĩr nhũm ixte ãm pixire nẽ ho
ixpikunor kêtja na kãm hprãm.

40 —Tã kot ka mẽ atõ ixpê Tĩrtũm Kra hã ixpumu
nẽ amnhĩ kaxyw ixkõt ajamaxpêr nẽ ixkõt amnhĩ
xãm. Hã kot kaj nhỹrmã atyk tã pa akupỹm mẽ atĩr
xà hã arĩgrota ã akupỹm ato atĩr ka wa ixkuri atĩr
tũm nẽ amex nẽ apa ho apa. Ja na Inhiĩpêêxàja kãm
hprãm. Anẽ.

Nhũm pre ã Jejus mẽ kãm amnhĩ jarênh anẽ.

41 Hãmri nhũm Ijaew nhõ pahijaja mẽ kuri mar o
kuhê nẽ tee ri kêp kaxkwa rũm mẽ apkur xà maati
pyrãk ã amnhĩ jarênh ma nhũm ja mẽ kãm mex kêt
nhũm mẽ kamã gryk nẽ.

42 Jakamã axpên mã ri harênh o:

—Tk. Kwa mo na ri ã amnhĩ jarênh anẽ? Kêp mẽ
panhiõ kênã kot kêt ri kêp kaxkwa nhõ xwỳnh ã
amnhĩ jarê. Kêp Juje mẽ Marir wa hkra na. Mẽ
pahte katorxà mẽ hipêêxà wa omunh mex kênã
kot kêt axtem nẽ kêp kaxkwa nhõ xwỳnh ã amnhĩ
jarê. Anẽ.

43 Hãmri nhũm amnhĩ tã mẽ kuma nẽ mẽ kãm:

—Kwa mẽ ã ijarênh anhỹr kêt nẽ.

44 Koja Inhiĩpêêxà kot mẽ awỳr inhmênh xwỳnhnta
tanhmã mẽ hkrã hto nhũm mẽ rĩ kormã amnhĩ tã
ja hã ixpumu nẽ amnhĩ kaxyw ixkõt hamaxpêr. Tã
ã mẽ kot amnhĩ nhĩpêx anhỹr xwỳnhjaja koja mẽ

nhÿrmã htyk tã pa akupÿm mẽ ho mẽ htÿr nhÿm mẽ wa ixri htÿr tÿm nẽ mex kumrẽx nẽ pa ho pa.

⁴⁵ —Amnepêm Tÿrtÿm kapër jarẽnh o mẽ pa xwÿnhjaja na prem ã ja jarẽnh anhÿr o:

Koja Tÿrtÿm mẽ hkrã kaxwÿnh kãm tanhmã mẽ kãm kapër o amnhÿrÿt to ho pa.

Anhÿr o harẽnh. Jakamã mẽ kot Tÿrtÿm kapër mar nẽ hkõt amnhÿ nhÿpêx xwÿnhjaja koja mẽ mãânẽn amnhÿ kaxyw pa ixkõt hamaxpër nẽ ixkõt ri amnhÿ nhÿpêx o pa.

⁴⁶ —Nẽ mẽ apê pika nhõ xwÿnhjê hõ aa mẽ ate ixkÿnhã ano ho Inhÿpêêxà pumunh kêt. ãm papx-
ipix na ixte omunh. Kurÿm na pa pre mẽ awÿr wrÿ.

⁴⁷ Tã kot ka mẽ atõ amnhÿ kaxyw ixkõt ajamaxpër. Hã kot kaj nhÿrmã wa ixkuri atÿr tÿm nẽ amex nẽ apa ho apa. Kwa mẽ jam ajamaxpër tÿx nẽ.

⁴⁸ —Nẽ ixpê mẽ axàpkurxà maati jakamã pa na ixpê akupÿm mẽ ho mẽ htÿr xwÿnh.

⁴⁹ Amnepêm mẽ panhÿgêjtjaja kormã kapôt ã mẽ pa ri mẽ kot “manã” anhÿr xwÿnhhta kur o ri pata ã na prem kukwak ri htÿr tÿm nẽ pa ho pa hkêt nẽ. Na prem ri pa nẽ gaa nẽ rÿ hpigêt nẽ htyk pa.

⁵⁰ Axtem kaxkwa rÿm mẽ apkur xà maati jarẽnh xwÿnhhta pix kukwak ri na htem nhÿrmã htyk tã akupÿm htÿr nẽ wa ixri htÿr tÿm nẽ mex nẽ pa ho pa.

⁵¹ ãm paa. Pa na htem inhÿ hkwy hkrẽ hãmri nẽ wa ixri htÿr tÿm nẽ mex nẽ pa ho pa. Na pa pre ra amnhÿ grõnh kõt mẽ awÿr wrÿ. Jakamã ka mẽ atõ inhÿ hkwy hkrẽ hãmri nẽ nhÿrmã atyk tã pa

akupỹm ato atĩr ka Tĩrtũm mẽ wa ixri atĩr tũm nẽ amex nẽ apa ho apa. Anẽ.

⁵² Nhũm pre ā Jejus Ijaew mã amnhĩ jarẽnh anẽ. No ãm mẽ kãm amnhĩ tã kuxi nẽ amnhĩ jarẽ. Jakamã nhũm mẽ tee ri kuma hãmri nẽ tanhmã hã axpẽn mã kapěr to. Mẽ kot hprĩ hã mar kêt nẽ ãm mẽ kot ĩ hkwỳ hkrěrja pix jarẽnh mar jakamã tee ri hamaxpěr nẽ axpẽn mã:

—Kwa tanhmã kot kêt we amnhĩ to nẽ mẽ pamã amnhĩ nhĩ hkwỳ gõ pu mẽ kuku? Anẽ.

⁵³⁻⁵⁴ Hãmri nhũm amnhĩ tã mẽ kuma nẽ mẽ kãm:

—Nà mẽ kot inhĩ hkwỳ hkrěr nẽ ixkamrô hkwỳ ho hkõm xwỳnh pixjaja koja mẽ nhỹrmã Tĩrtũm mẽ wa ixri htĩr tũm nẽ pa ho pa. Ixte akupỹm mẽ ho mẽ htĩr xà hã arĩgrota ã kot paj mẽ ho mẽ htĩr nhũm mẽ wa ixri htĩr tũm nẽ mex nẽ pa ho pa. No kot kaj mẽ inhĩ hkwỳ hkrěr kêt nẽ ixkamrô hkwỳ ho akõm kêt hãmri nẽ wa ixri atĩr tũm nẽ amex nẽ apa ho apa hkêt nẽ. Kwa mẽ jam ajamaxpěr tỳx rãhã nẽ.

⁵⁵ Kêt inhĩja kęp mẽ apkur xà maati na. Nẽ ixkamrôja kęp mẽ hkõm xà maati na. Jakamã na htem inhĩ hkwỳ hkrẽ nẽ ixkamrô hkwỳ ho ixkõ nẽ ra kęp wa ixri mẽ htĩr tũm nẽ mẽ pa ho mẽ pa mã xwỳnh.

⁵⁶ Jakamã kot ka mẽ atõ inhĩ hkwỳ hkrẽ nẽ ixkamrô hkwỳ ho ixkõ. Hãmri pa amnhĩ tã apumu nẽ akarõ mã axà ka te apê pa pyræk o amnhĩ nhĩpêx o apa.

⁵⁷ Inhĩpêêxà kot mẽ awỳr inhmẽn hta kukwak ri na pa hte ixtĩr tũm nẽ ixpa ho ixpa. Tã ja pyrà nẽ kot kaj mẽ inhĩ hkwỳ hkrẽ hãmri nẽ ixkukwak ri wa ixri atĩr tũm nẽ apa ho apa mã xwỳnh.

58 —Jakamã na pa ã mẽ amã ixpê kaxkwa rûm mẽ axàpkur xà maati hã amnhĩ jarēnh anē. Amnepēm mẽ panhĩgêjtjaja na pre htem kapôt ã mẽõta kur o pa hãmri nē gaa nē hpigêt nē htyk pa. No kêt pa koja mẽ inhĩ hkwỳ hkrē hãmri nē mẽ kurom wa ixri htĩr tũm nē mex nē pa ho pa. Anē.

59 Nhũm pre ã Jejus mẽ kãm amnhĩ jarēnh anē. Kormã Kapanaũ kamã Tĩrtũm kapēr o mẽ ahkre xà hã ixkre kamã ã mẽ ahkre anhỹr o xa.

*Mẽ ohtô nē mẽ kot Jejus kaga hã mẽ harēnh
Sikũn Korĩt 3.6; Sikũn Pêtre 3.16*

60 Hãmri nhũm mẽ kot Jejus kôt mar o mẽ pa xwỳnhjaja ohtô nē ã kapēr anhỹrja ma nē tee ri amnhĩ kukamã hamaxpēr nē hã axpēn mã:

—Tk. Kwa pēr kapērja ãm ri katii. Mēhõ koja we kuma nē hkôt hamaxpēr nē hkamrô nē ĩ kur o ri hkôt pa? Nà mẽ piitã mẽ kãm ja mexti hã. Anē.

61 Hãmri nhũm amnhĩ tã mẽ kuma nē mẽ kãm:

—Kwa xà ixkapērja mẽ apê omnuj?

62 Nà kot paj nhỹrmã ma akupỹm kaxkwa hwỳr api. Ixpê Tĩrtũm kot mẽ akaxyw ixãm xwỳnh ã ma akupỹm hwỳr api. Hãmri ka mẽ ã ixte amnhĩ nhĩpêx anhỹr ã ixpumu nē rĩ kormã ixkôt amnhĩ xunhwỳr japêr.

63 Na htem mẽmoj kur kukwak ri kêp Tĩrtũm mẽ wa ixri htĩr tũm nē pa ho pa xwỳnh kêt nē. Rỳ amnhĩ krã hkôt tanhmã amnhĩ nhĩpêx to ho kêp wa ixri htĩr tũm nē pa ho pa mã xwỳnh kêt nē. Tĩrtũm mẽ wa Ixkarõ tãm na hte mẽ hkarõ mã agjê nē mẽ ho Tĩrtũm wa ixkuri mẽ htĩr tũm nē mẽ pa ho mẽ pa mã xwỳnh. Tã ỹ hã na pa ã mẽ amã ixkapēr anē. Nom mẽ amã amnhĩ tã kuxi nē amnhĩ jarē.

Tā kot kaj mẽ ixkapēr ma nē ixkôt amnhĩ nhĩpêx. Hã kot kaj mẽ nhỹrmã wa ixri atĩr tũm nē amex nē apa ho apa.

⁶⁴⁻⁶⁵ No mẽ akwỳjaja na ka mẽ ixkapēr ma nē ãm ama nē ixkôt ajamaxpēr kêt nē. Jakamã na pa ã mẽ amã ixkapēr anē nē mẽ amã: “Koja Inhĩpêêxàja tanhmã mẽ akrã hto ka mẽ rĩ kormã amnhĩ tã ixpumu nē amnhĩ kaxyw ixkôt ajamaxpēr.” Anhỹr o mẽ amã ixkapēr. Anē.

Nhũm ã Jejus mẽ kãm kapēr anē. Ra kot mẽ hkukamã mẽ omunh mex. Ra kot amnhĩ kaxyw mẽ kot hkôt hamaxpēr mã xwỳnhjê pumunh nē mããnēn mẽ kamã kot mẽõ pahi nhĩhkram haxàr mã xwỳnhja nhũm mããnēn ra kot amnhĩ kukamã omunh mex. Jakamã nhũm ã mẽ kãm kapēr anē.

⁶⁶ Hãmri nhũm mẽ kot hkôt kapēr mar o mẽ pa xwỳnh kwỳjaja tee ri kuma hãmri nē hkaga nē axte hkôt pa hkêt nē.

⁶⁷ Hãmri nhũm tee ri mẽ kot hkaga nē ma mẽ mrar ã mẽ omu nē mẽ ixpê hkôt ixpa ho ixpa xwỳnh pê 12jê mã kapēr nē mẽ inhmã:

—Pa? No mẽ kajaja. Xà kot kaj mẽ uràk nē ixkaga nē ma akupỹm mra nà? Anē.

⁶⁸ Hãmri nhũm Simãw Pêtre kãm:

—Nà kot paj mẽ akaga hkêt nē. Kapxipix na htem amnhĩ kaxyw akôt hamaxpēr jao kêp Tĩrtũm mẽ war akuri htĩr tũm nē pa ho pa mã xwỳnh.

⁶⁹ Ka na pre Tĩrtũm mẽ ixwỳr amē. Jakamã na pa mẽ amnhĩ kaxyw akôt ijamaxpēr o ri ixpa. Nà kot paj mẽ aa akaga hkêt nē. Anē.

⁷⁰ Hãmri nhũm kuma nē kãm:

—Nà ixte amnhĩ kaxyw mẽ apê 12jê rênh tã na ka mẽ atõ akwỳjê hkĩnhã axtem nê Satanasti hkõt amnhĩ xãm. Anê.

⁷¹Nhũm pre ã finat Jut Kariot kot mẽ inhõ pahijê nhĩhkram haxàrja kukamã mẽ inhmã harênh anê. Mẽ inhĩ õ na pre. Nê kêp Simãw Kariot kra na pre. Tã ra kot mẽ ãhkram haxàr kaxyw nhũm Jejus kot amnhĩ kukamã omunh jakamã ã mẽ inhmã harênh anê.

7

Jejus tøjaja kot mẽ hkĩnh wỳr amnhĩ kõt hwỳr ã mẽ harênh

Matêwre 10.36, 13.57-58

¹Tã nhũm Jejus arĩ Garirej kamã ri pa nê kormã akupỳm Jutej wỳr mõi kêt nê. Jutej kamã Ijaew nhõ pahijaja ra kot hã àmnênh nhũm mẽ kot hpĩr ã harênh jakamã nhũm mẽ umaj kormã hwỳr mõi kêt nê.

²Tã mẽ ixpê Ijaew mẽ ixte ixkre hkryre nhĩpêx nê hã ixkĩnh ã arĩgroja ra ahtêp o mõi. Mẽ ixkĩnh ta ã na pa pre htem ixpiitã Jutej wỳr axpên wỳr akuprõ nê ahpỳnhã ri amnhĩm ixkre hkryre nhĩpêx nê kamã ixkrĩ.

³Jakamã nhũm Jejus tøjaja hwỳr mra nê kãm nojarêt nê amnhĩ kõt kuwỳ nê kãm:

—E kwa tokyx pu mẽ pahkwỳjê hkõt. Ka mẽ kãm aa mẽ kot mẽmoj pumunh kêt kwỳ ho anhỳr o ri mẽ hkõt apa kê mẽ kãm akapêr mar prãm xwỳnhjaja ja hã apumu.

⁴Na ka hte jar te apimxur pyræk o amnhĩ nhĩpêx. E kwa tokyx ma pu mẽ hkõt. Anê.

⁵ Katorxà hkôt mẽ kêp Jejus tō htã kormã amnhĩ kaxyw hkôt hamaxpêr kêt jakamã na prem ã kãm kapêr anê.

⁶ Hãmri nhũm mẽ kãm:

—Nà kormã. Kormã ixte mẽ kãm amnhĩ to amnhĩrīt xà hã arĩgro kormã kator kêt. Jakamã kot ka mẽ amã mẽ hkôt amrar prãm nê mãmri ma mẽ hkôt mra.

⁷ Kojã mẽ apumu nê kãm mẽ akurê hkêt nê. Nê mẽ akamã gryk kêt ka mẽ ri tanhmã amnhĩ nhĩpêx to ho mẽ hkôt apa. No pa kot paj mẽ hwỳr mō nê mẽ kãm mẽ kot amnhĩ tomnuj o pa hã mẽ harênh o ri mẽ hkôt ixpa nhũm mẽ tee ri amnhĩ tã inhma nê ixkamã gryk nê.

⁸ Jakamã mẽ mãmri ma mẽ hkôt mō. Kot paj kormã. Kormã ixte mẽ kãm amnhĩ to amnhĩrīt xà hã arĩgroja kormã kator kêt.

⁹ Anê nhũm mẽ tee ri kuma hãmri nê kure nê ma mẽ hkwyjê hkôt Jutej wỳr mō. Nhũm Jejus kormã Garirej kamã ri pa hã apkati grêre.

¹⁰ Hãmri nê kormã ma hapu hã mẽ hkôt mō. Pa mẽ hkôt ri ixpa ho ixpa xwỳnhjaja ma hkôt ixpa.

Mẽ kot ahpỳnhã tanhmã Jejus jarênh to hã mẽ harênh

Juāw 7.37-44, 9.22, 10.19-21, 12.42-43

¹¹ Rôm nhũm ra mẽ ixpê Ijaew nhõ pahijaja mẽ hkĩnhja kamã mẽ pikuprõnh xwỳnhjê kaêx ã Jejus japêr o ri mra. Nê hã axpên kukjêr o mra nê axpên mã:

—Kwa nok? Nhỹri măn we? Anê.

¹² Nhũm Ijaew piitã tanhmã axpên mã Jejus jarênh to ho pa. Nê kamã mẽ hkwyjaja harênh o:

—Nà kot amnhĩ to mex o pa xwỳnh na.

Anhÿr o harēnh o pa. Nē kamã mẽ hkwyjaja axtem nē harē nē harēnh o:

—Tk. Kot mẽ no kupyrr o pa xwÿnh kēnã. Anē.

¹³ Nom mẽ õ pahi pymaj mẽ piitã mẽ nom tanhmã harēnh to hkêt nē. Âm axpēn mã pix mã tanhmã harēnh to ho pa.

*Jejus kot mẽ hkĩnh xwÿnhjê jahkre hã harēnh
Makre 3.22; Juāw 5.16*

¹⁴ Tã pa mẽ mẽ hwÿr pøj. Jejus mẽ pa mẽ hkôt ixpa ho ixpa xwÿnhjaja mẽ hwÿr pøj. Kormã mẽ hkĩnhja hapêx kêt ri. Hãmri pa mẽ Jejus kôt Tĩrtũm mã amnhĩ jarēnh xà hã ixkreja wÿr mra nē agjê nhũm Jejus mẽ ahkre ho nhÿ.

¹⁵ Hãmri nhũm mẽ inhõ pahijaja tee ri kot tanhmã mẽ ahkre hto hã kuma nē hã axpēn kukja nē axpēn mã:

—Kwa mẽ pahkĩnhã kot Tĩrtũm kapēr o istuda hkêt tã ã mẽ ahkre anē. Anē.

¹⁶ Hãmri nhũm amnhĩ tã mẽ kuma nē mẽ kãm:

—Nà na pa hte amnhĩ krã hkôt tanhmã ri mẽ ajahkre hto hkêt nē. Âm kot mẽ awÿr inhmēnh xwÿnhnta nhÿ hã na pa hte ã mẽ ajahkre anhÿr o ri mẽ akôt ixpa.

¹⁷ Tã kot kaj mẽ amã Tĩrtũm kãm hprãm xà hkôt amnhĩ nhĩpêx prãm hã kot kaj mẽ ixte ÿ hã ixkapēr ã xpumunh kurê kumrêx.

¹⁸ Amnhĩ krã hkôt mẽ kãm kapēr o ri mẽ pa xwÿnhjaja na htem mẽ kot mẽ mar nē mẽ hã hpijaàm pix kaxyw tanhmã mẽ kãm kapēr to ho ri pa. No kêt pa na mẽ ate ixkapēr mar nē kot mẽ awÿr inhmēnh xwÿnhnta ã apijaàm pix kaxyw na pa hte

tanhmã mẽ amã ixkapēr to ho ri ixpa. Jakamã ãm hãmri na pa hte mẽ amã ixkapēr o ri ixpa.

19 –Finat Mojes na pre mẽ panhîgêjtaja kot tanhmã amnhî nhîpêx to ho pa nhũm Tirtũm kot mẽ kãm hã karõ jarênh o ri mẽ hkõt pa htã ka mẽ hkõt amnhî nhîpêx kêt nê. Tã ixte hkõt amnhî nhîpêx kêt ã ixto axêx nê mẽ ate ixpîr kaxyw ixtã amnhî jarênh ri apa. Anê.

20 Hãmri nhũm mẽ ã Jejus kot mẽ kãm kapēr anhÿrja ma nê hêx rom kãm:

–Kwa mẽ ixtõ na pa apîr mã ka ri ã mẽ ijarênh anê? Amrakati kênã. Kwa mãn ka akrã xppã nà? Hã na ka ã ri akapēr anê. Anê.

21 Hãmri nhũm mẽ kãm:

–Nà ixte mẽ pahkõt xà hã arîgro hã akupÿm mēhõ myta ho mex jakamã na ka prem ja hã ixpumu nhũm ja mẽ apê omnuj nê. Nê te ixte mẽ pahkõt xà hã arîgro hã ixpijaàm kêt xwÿnh pyrãk ã ijarê.

22 Nom na ka htem ixpyrà nê mẽ panhõ arîgromnu hã mẽmoj tã axàpênh o ri apa. E pa mẽ amã mẽmoj jarê ka mẽ inhma. Na pre finat Mojes mẽ pamã mẽ pahte mẽ pahkra myre pê my kwryt kà jakà ã mẽ pamã karõ. Kukamã higêjtaja kot kãm ja hã karõ xà hkõt. Jakamã na htem mẽ hkra myre hapôj nê hã semãn pyxi nê hapêx nhũm mẽ kêp mẽmy hkwrÿt kà jakà.

23 Mẽ pahkõt xà hã arîgro hã hõ kator tãã nhũm mẽ hã semãn pyxi nê mẽ panhõ arîgromnu hõ hã kêp my kwryt kà hkwy krãhta. Mojes kot Tirtũm nhÿ hã ja hã mẽ pamã karõ xà hkõt. Jao mẽ panhõ arîgromnu hã apê. Tã pa pre mẽ apyrà nê arîgromnu hã ixàpênh pê akupÿm mēhõ myta ho mex ka mẽ

ja hã ixpumu nẽ axtem nẽ ixtỳx ri ixte amnhĩ nhĩpêx o ixpa xwỳnh ã ijarẽ nẽ mẽ ate ixpĩr kaxyw ã amnhĩ jarẽ.

²⁴ Kwa mẽ amnhĩ krã hkôt tanhmã mẽ harẽnh to ho ri apa hkêt nẽ. Âm mẽ kot tanhmã amnhĩ nhĩpêx to ho pa hã mẽ omu nẽ ajamaxpêr o: “Kwa xà we Tĩrtũm kãm ja mex nà?” Anhỳr o mãn kêt mẽ ajamaxpêr nẽ rĩ kormã tanhmã mẽ harẽnh to. Anẽ.

²⁵ Hãmri nhũm Jerujarẽ nhõ xwỳnh kwỳjaja ja hã kuma nẽ tee ri hkukamã hamaxpêr. Hãmri nẽ hã axpẽn kukja nẽ axpẽn mã:

—Kwa xà tãm na mẽ panhõ pahijaja mẽ kot hpĩr kaxyw hã amỹnê?

²⁶ Ota jar mẽ pakamã ri pa htã nhũm mẽ âm omu nẽ kãm tanhmã nẽ hkêt nẽ. Mãn mẽ âm hãmri kêp Kris ã hkamnhĩx jakamã kapêr ma nẽ âm kuma nẽ kêp Kris ã tanhmã ho hkêt nẽ. Anẽ.

²⁷ Hãmri nhũm mẽhõja kuma nẽ kãm:

—Tk. Nà kêp Tĩrtũm kot mẽ pahwỳr mẽn h xwỳnhre hã. Kêp Najare nhõ xwỳnh kênã. Mẽ pahte hipêêxà mẽ katorxà wa omunh mex. No kêt Tĩrtũm kot mẽ pahwỳr mẽn mã xwỳnhhta koja xep mẽ pahwỳr kato pu mẽ nhỹhỹnh htẽm xà hkôt omunh kêt nẽ. Anẽ.

²⁸ Rôm nhũm Jejus arĩ Tĩrtũm mã amnhĩ jarẽnh xà hã ixkreja kamã mẽ ahkre ho nhỹ. Jakamã mẽ kot axpẽn mã harẽnh ã amnhĩ tã mẽ kuma nẽ mẽ kãm:

—Xà mẽ ate aprĩ hã ixpumunh nẽ nhỹhỹnh ixtẽm xà hkôt ixpumunh? Nà mẽ ate ja hã ixpumunh kêt. Na pa pre amnhĩ hkrã hkôt mẽ awỳr inhmõr kêt nẽ. Na pre mẽhõ mẽ awỳr inhmẽ. Nom kot mẽ awỳr inhmẽn h xwỳnhja kormã mẽ ate omunh kêt.

29 ãm papxipix na ixte omunh. Kurũm ixwryk xwýnh na pa. Kot mẽ awýr inhmẽnh nhũm kurũm ixwryk jakamã ixte ixprĩ hã omunh par. Anẽ.

30 Hãmri nhũm mẽ hkwýjaja tee ri ã kot amnhĩ jarẽnh anhýrja ma nẽ ri axpẽn mã harẽnh o:

—Kwa Tĩrtũm kot mẽ pahwýr mẽnh ã kot amnhĩ to hêx kênã. E kwa pu mẽ ã kot amnhĩ to hêx anhýr ja ã unê nẽ haxà nà?

Anhýr o axpẽn mã hã amýnê. Nom kormã mẽ kot unênh nẽ haxàr xà hã arĩgroja kormã kator kêt jakamã nhũm Tĩrtũmja nê mẽ omunh mex nẽ nhũm mẽ ãm kãm unênh prãm kaprý.

31 No nhũm mẽ hkwýja mẽ kurom kuma nẽ kêp Tĩrtũm kot mẽ pakaxyw ãm xwýnh ã omunh kurê kumrêx nẽ amnhĩ kaxyw hkôt hamaxpêr. Hãmri nẽ axpẽn mã harẽnh o:

—Kwa mãn kêp Tĩrtũm kot mẽ pahwýr mẽnh mã xwýnhhta mãn nà? Mẽ pahtõ kot pu uràk nẽ aa mẽ kãm mẽ kot mẽmoj pumunh kêt o anhýr rax o ri papa? Amrakati kumrêx. Nà pêr tãm kênã. Anẽ.

Pôristi hkwý kot Jejus pynênh kaxyw ã mẽ harẽnh

32 Nhũm prem ã axpẽn mã Jejus jarẽnh anhýr o kuhê hãmri nhũm Parijew nhõ xwýnhjaja hã mẽ kuma. Hãmri nẽ patre krãhtũmjê mẽ mẽ ma Jejus wýr mẽõ pôristi hkwý rê nẽ mẽ kãm:

—E mẽ ma Jejus wýr mra nẽ unê nẽ man akupýn o tẽ. Anẽ.

33 Hãmri nhũm mẽ kuma nẽ ma hwýr mra nẽ omu nom tokyx unênh kêt nẽ. Kormã kapêr ã mar o kuhê. Nhũm Jejus arĩ mẽ kãm kapêr o xa nẽ mẽ kãm:

—Nà kot paj jar mẽ akôt ri ixpa hã mytwrÿ grêre hãmri nẽ ma akupÿm kot mẽ awÿr inhmẽnh xwÿnhhta wÿr api.

³⁴ Ka mẽ tee ri jar ijapêr o ri apa nom nhÿri ixpumunh kêt nẽ. Nẽ ma inhmôr xàta wÿr kot kaj mẽ atõ ma ixkôt amôr kêt nẽ. Anẽ.

³⁵ Hãmri nhũm mẽ tee ri ã kot amnhĩ jarẽnh anhÿrja ma nẽ axpẽn mã:

—Kwa nhÿhÿm koja we ma mõi pu mẽ hkôt papa hkêt nẽ? Mãn mẽ pahkwÿjaja kot Gresjê kamã mẽ pa xwÿnhjê hwÿr koja ma mõi nẽ hpãnhã mẽ hkôt mẽ ahkre ho pa nà? Hã na ã mẽ pamã amnhĩ jarẽnh anẽ?

³⁶ Mo na ri mẽ pahte tee ri hapêr o papa hã mẽ pajarẽ nẽ mẽ pahte hkôt pamrar kêt ã mẽ pajarẽ? Anẽ.

Tĩrtũm Karõ te kêp gô nyw pyræk ã harẽnh

Juāw 4.13-14; Apokarip 22.1, 22.17

³⁷ Tã nhũm ra mẽ hkĩnhja hapêx kaxyw hitep xà hã arĩgro maatija kato. Jakamã nhũm Jejus kãnhmã xa nẽ kÿxpê mẽ hpikuprõnh xwÿnhjê mã kapêr nẽ mẽ kãm:

—E te mẽ amã kôr o apa pyræk xwÿnhjaja. Mẽ amnẽ ixwÿr akuprõ. Kot kaj mẽ amnhĩ kaxyw ixkôt ajamaxpêr pa tanhmã mẽ ato ka mẽ apê Tĩrtũm mẽ wa ixri atĩr tũm nẽ apa ho apa mã xwÿnh.

³⁸ —Kot kaj mẽ ja hã amnhĩ pumu hãmri nẽ ma mẽ kãm ixkapêr jarẽnh o ri mẽ hkôt apa. Te mẽ kãm kôr nhũm mẽ ate mẽ kãm gô hkwy nhũm mẽ kot ho hkõm pyræk o mẽ hipêx o ri mẽ hkôt apa. Hãmri nhũm mẽ ama nẽ mẽ apyrà nẽ amnhĩ kaxyw ixkôt hamaxpêr. Pa ixte tanhmã mẽ atoja

pyrà nê tanhmã mẽ ho nhũm mẽ apyrà nê kêp wa ixri htĩr tũm nê pa ho pa mã xwỳnh. Anê.

³⁹ Nhũm pre ã Jejus mẽ kãm kapêr anê. No ãm hã kuxi nê mẽ kãm kapêr nê hprĩ hã harênh kêt nê. Tĩrtũm Karõ kot nhỹrmã mẽ kot amnhĩ kaxyw Jejus mã hamaxpêr xwỳnhjê karõ mã gjêxja nhũm ã mẽ kãm hã kuxi nê harênh anê. No kormã akupỹm kaxkwa hwỳr àpir nê mex o mex nê hkrĩ hkêt jakamã kormã mẽ hwỳr Karõ rênh kêt nê.

Mẽ kot ahpỳnhã tanhmã Jejus jarênh to hã mẽ harênh

Juāw 7.11-13, 7.25, 10.19-21

⁴⁰ Hãmri nhũm mẽ kot Jejus mar o hkrĩ xwỳnhjaja ã kapêr anhỹrja ã kuma nê ahpỳnhã tanhmã harênh to nê harênh o:

—Kwa finat Mojes pyrà nê kêp Tĩrtũm nhỹ hã kapêr jarênh o pa xwỳnh na nà? Anê.

⁴¹ Nhũm kamã mẽ hkwỳjaja mẽ kãm:

—Nà Tĩrtũm kot mẽ pakaxyw ãm xwỳnhhta na. Anê.

Nhũm kamã mẽ hkwỳjaja ja hã mẽ kuma nê mẽ kãm:

—Tk. Nà kêp Garirej nhõ xwỳnh kênã kot kêt Tĩrtũm mẽ pakaxyw ãm.

⁴² Tĩrtũm kapêr ã kagà htũm kot kêp Garirej nhõ xwỳnh ã harênh kêt. Kêp Pahi Tawi hkanrêhã hkagrõt nyw jakamã koja uràk nê Jutej kamã krĩ pê Perěj kamã kato. Jao koja uràk nê kêp Jutej nhõ xwỳnh.

Anhỹr o ri axpên mã harê. Mẽ kot htỳx Jejus pika pê Garirej kamã kator ã hkamnhĩx jakamã ã axpên mã harênh anê. Nom pika pê Jutej kamã na pre kato. Krĩ pê Perěj kamã. Tã no nhũm mẽ hkwỳjaja

ja hã mar kêt jakamã kêp Tirtũm kot mẽ pahwỳr mẽnh xwỳnh kêt ã hkamnhĩx.

⁴³ Jakamã nhũm mẽ ã ahpỳnhã xepẽn mã harẽnh anẽ.

⁴⁴ Nhũm mẽ hkwỳjaja ra kot unẽnh kaxyw tã tokyx unẽnh kêt nẽ.

Pôristi kot Jejus pynẽnh kêt ã mẽ harẽnh

Matêwre 7.28-29

⁴⁵ Tã nhũm patre nhõ pôristijaja. Mẽ kot Jejus pynẽnh mã hwỳr mrar tã hãmri ã kapěr anhỳrja ã kuma nẽ tee ri hamaxpěr nẽ unẽnh kêt nẽ. Nẽ aw-janã nẽ ahte ý kamã ma akupỳm patre krãhtũmjê mẽ Parijew nhõ xwỳnhjê hwỳr mra. Hãmri nhũm mẽ omu nẽ mẽ kãm:

—Pa nok? Tanhmã na ka mẽ amnhĩ to nẽ unẽnh nẽ ho amõr kêt nẽ? Anẽ.

⁴⁶ Hãmri nhũm mẽ kãm:

—Nà na pa mẽ unẽnh kêt nẽ. Kapěr mex kẽnã. Te kot mẽ pakapěr pyrãk kêt jakamã pa mẽ tee ri kapěr ã kuma nẽ unẽnh kêt nẽ. Anẽ.

⁴⁷ Hãmri nhũm Parijew nhõ xwỳnhjaja mẽ kuma nẽ mẽ kãm:

—Tk. Kwa mãn ka mẽ ra mẽ urãk nẽ tanhmã kot amnhĩ to hêx toja ma nẽ hkõt ajamaxpěr nà?

⁴⁸ Mẽ ixpê Parijew nhõ xwỳnhjaja nẽ mẽ panhõ pahijaja na pa htem hkõt ijamaxpěr kêt nẽ.

⁴⁹ No kêt mẽ kot mar nẽ hkõt hamaxpěr xwỳnhtijaja na htem mẽ ixkĩnhã finat Mojes kapěr mar kêt nẽ. ãm Jejus kapěr pix na htem kuma nẽ hkõt hamaxpěr. Mỳrapê koja Tirtũm tanhmã mẽ homnuj tỳx to nhũm mẽ rĩ amnhĩ pumu. Anẽ.

Nĩkotê kot Jejus xyr pê kapěr ã harẽnh

Juãw 3.1-21

⁵⁰ HãMRI nhũM NĪkotēja mẽ mar o xa. Mẽ uràk nẽ kệp Parijew nhõ xwỳnh tã na pre ra kamàt ò hã Jejus wỳr tẽ nẽ kãm kapêr. Jakamã tee ri hã mẽ kapêr ma hãMRI nẽ yr pê mẽ kãm kapêr nẽ mẽ kãm:

⁵¹ —Tk. Kwa kormã mẽ pahte pahprĩ hã kapêr mar nẽ tanhmã kot amnhĩ nhĩpêx to hã omunhre hã. Na pre finat Mojesja Tĩrtũm nhỹ hã mẽ panhĩgêjtjẽ mã ja jarênh o:

Kêr ka mẽ aprĩ hã mẽ kapêr ã mẽ ama nẽ mẽ kot amnhĩ nhĩpêx ã mẽ omu nẽ rĩ kormã tanhmã mẽ harênh to.

Anhỹr tã ka mẽ kormã aprĩ hã Jejus kot amnhĩ nhĩpêx ã omunh kêt tã ra kot amnhĩ tomnuj xwỳnh ã harê. Anẽ.

⁵² HãMRI nhũM mẽ tee ri kuma nẽ kãm:

—Tk. Kwa xà we uràk nẽ apê Garirej nhõ xwỳnh hã na ka ã yr pê akapêr anê? Xà Tĩrtũm kapêr ã kagà htũm kot Garirej nhõ xwỳnhjê hõ kệp ỹ hã kapêr jarênh o pa xwỳnh ã harênh? Nà ã kot harênh anhỹr kêt. Anẽ.

⁵³ NhũM mẽ ã NĪkotẽ mã kapêr anẽ hãMRI nẽ angrà nẽ Tĩrtũm nhõrkwỹ rũm hapôj nẽ ma akupỹm òrkwỹ hwỳr àhkurê ho mra.

8

Mẽhõ ni kot nhãm mẽ mjên o amnhĩkati hã harênh Xiakre 2.10-13

¹ Tã nhũM Jejus Tĩrtũm nhõrkwỹ kamã mẽ ahkre hpa hãMRI nẽ kato nẽ ma hixêt prêk pê Oriwêhti hwỳr tẽ. HãMRI nẽ hã api nẽ nhỹri nõ nẽ ra gõr.

² Tã nhũM apkati nẽ myt kator o mõi mẽ nhũM kànhmã nhỹ nẽ akupỹm wrỳ nẽ Tĩrtũm mã amnhĩ jarênh xà hã ixkre hwỳr tẽ. No ãm kormã ixkre pu

hã kahê hkre kamã nhỹ. Nhũm krĩ nhõ xwỳnhjaja omu nẽ hã htu rax nẽ nhũm tanhmã mẽ ahkre hto ho nhỹ.

³ Hãmri nhũm Parijew nhõ xwỳnhjê mẽ Tĩrtũm kapêr tũm o mẽ ahkre ho mẽ pa xwỳnhjaja hwỳr mẽhõ nija o tẽ. Na ra ham mẽhõ pê mjên o amnhĩkati ho nõ nhũm mẽ ja hã omu nẽ unê nẽ hpa hã kupy nẽ ma Jejus wỳr hkjênh o mõi. Hãmri nẽ mẽ kot mar o kuhê xwỳnhjê kutã ãm nhũm xa.

⁴ Hãmri nhũm mẽ Jejus mã:

—E ot pa mẽ awỳr jahti ho tẽ ka omu. Na ham mẽhõ pê mjên o amnhĩkati ho nõ. Pa mẽ ja hã omu nẽ unê nẽ man awỳr o tẽ.

⁵ E tanhmã kot puj mẽ hipêx to? Na pre finat Mojes Tĩrtũm nhỹ hã mẽ panhĩgêjtjê mã ja jarênh o:

Koja mênijê hõ axtem nẽ nhãm mẽhõ pê mjên o amnhĩkati ho nõ ka mẽ ja hã omu nẽ apiitã ahpỳnhã kên rũnh jamý nẽ ho htak o apĩ.

Anhỹr o kot harênh. No ka? Tanhmã kot kaj mẽ inhmã ja jarênh to? Tanhmã kot paj mẽ hipêx to nhũm amã mex nẽ? E mẽ inhmã tanhmã mẽ ixte hipêx to jarê. Anẽ.

⁶ Nhũm mẽ ã hêx rom nija ã Jejus kukjêr anẽ. Kot mẽ kot hpĩr nê mẽ kãm kapêr nhũm mẽ kot hã mar nẽ mẽ hkrãhtũmjê hwỳr mõi nẽ kãm kot Mojes kapêr kwỳm ri mẽ ahkre hã harênh kaxyw nhũm mẽ hêx rom ã hkukjêr anẽ. Hãmri nhũm mẽ kuma nẽ tanhmã hã mẽ kãm nẽ hkêt nẽ. ãm htỳx hikõt nẽ ãhkrakrã ho pyka kagà ho nhỹ.

⁷ Nhũm mẽ tee ri omu nẽ axte hã hkukja nhũm kãnhmã xa nẽ mẽ kãm:

—Tôe. Nà kot ka mẽ atõ aa tanhmã amnhĩ tomnuj to hkêt kumrêx ã amnhĩ pumu hãmri nê kam nê rĩ kaxyw kên õ py nê akumrêx ho hkura. Kê akwỳjaja rĩ kormã akôt hkwy jamy nê ho htak. Anê.

⁸ Hãmri nê akupỹm hikôt nê pyka kagà ho nhỹ.

⁹ Hãmri nhũm mẽ tee ri kapêrja kôt kuma hãmri nê mẽ kot mar o kuhê xwỳnhjê rũm anhrà nê ma mra. Mẽ piitã mẽ kot amnhĩ tomnuj xwỳnh ã amnhĩ pumunh mex jakamã tee ri ã kot mẽ kãm kapêr anhỹrja ma nê anhrà nê ma akupỹm hpỹnh nê axpên kôt mrar o xa. Mêhpigêt kumrêx nê hpãnhã mẽ nywjaja nhũm mẽ hpỹnh nê ma axpên kôt mrar o ãm kãm hapêx. Nhũm Jejus mênija pix wa ahte mẽ kot mar xwỳnhjê kutã wa arĩk.

¹⁰ Hãmri nhũm Jejus kãnhmã xa nê nita mã kapêr nê kãm:

—Pa? No mẽ kot ato kapêr xwỳnhnta mẽ? Xà na mēhõ kên o akuranh kêt nê? Anê.

¹¹ Nhũm kãm: “Ma amrakati.” Anê nhũm kãm:

—Tôe. Nà kot paj ijaxwỳja tanhmã ato hkêt nê. E mamrĩ ma akupỹm anhõrkwỹ hwỳr tẽ. No ãm kêr ka axte ã amnhĩ nhĩpêx anhỹr kêt nê. ãm kwarĩ ho kwarĩ. Anê.

Jejus kot hprĩ hã amnhĩ jarênh

Juãw 1.4; Rõmãn 13.12-14; Epes 5.8-14; Wam Tesarõn 5.5-8

¹² Tã nhũm arĩgro hõ hã nhũm Jejus axte Tĩrtũm nhõrkwỹ hwỳr tẽ nê kamã mẽ ahkre ho nhỹ nê mẽ kãm:

—Nà te ixpê mẽ piitã mẽ õ kanê pyræk. Na hte kanêja mẽ kãm hirã mex nê nhũm mẽ kamã rĩt mex o pa. Jao kamàt kô kamã ri pa hkêt nê. Ja pyrà

nē na pa hte Tīrtūm kot amnhĩ nhĩpêx o amnhĩrīt mex o ri ixpa. Kot ka mẽ atō amnhĩ kaxyw inhmã ajamaxpêr nē ixkôt amnhĩ xãm hãmri nē tanhmã amnhĩ tomnuj to ho apa hkêt nē. Ām Tīrtūm kām hprãm xà kôt pix mã tanhmã ri amnhĩ nhĩpêx to ho ri apa. Jao te ate kanê hpôk nhĩrã kamã arīt mex pyrà nē apê wa ixri atīr tūm nē apa ho apa mã xwýnh. Anē.

¹³ Hãmri nhũm Parijew nhõ xwýnhjaja tee ri ã kapêr anhỹr ã kuma nē kām:

—Tk. Kapxipix na ka ã amnhĩ jarēnh anē. Mēhõ kot ã ate amnhĩ jarēnh anhỹrja kôt kot mẽ inhmã ajarēnhre hã. Jakamã kot paj mẽ ama nē ãm ama. Anē.

¹⁴ Hãmri nhũm mẽ kām:

—Nà mēhõ kot ã ijarēnh anhỹr kêt tã no ãm hãmri na pa mẽ amã amnhĩ jarē. Ixêx kêt. Mē arom ixte nhỹhỹnh ixwryk xà hã amnhĩ pumunh mex. Nē mẽ arom ma akupỹm nhỹhỹm ixàpir xà hã amnhĩ pumunh mex. Jakamã ãm hãmri na pa ã mẽ amã amnhĩ jarēnh anē.

¹⁵ Na ka htem amnhĩ krã hkôt tanhmã ri ijarēnh to. No pa na pa kormã amnhĩ xwar tanhmã mẽ ajarēnh to hkêt nē.

¹⁶ Ixte tanhmã mẽ ajarēnh to ronhỹx pa ãm hãmri mẽ ajarē. Nhỹx pa ãm papxipix amnhĩ krã hkôt tanhmã mẽ ajarēnh to hkêt nē. Nhỹx mãänēn Inhĩpêxà pê kot mẽ awȳr inhmēnh xwýnhhta inhĩhkô hã pa wa ãm hãmri axpēn kôt tanhmã mẽ ajarēnh to. Mē ate amnhĩ to mex ã mẽ ajarē rý mẽ ate amnhĩ tomnuj ã mẽ ajarē.

¹⁷ Tīrtūm kapêr ã kagà htūm kot ja jarēnh kot:

Koja mēhō wa hamēxkrut nē tanhmā mēmoj jarēnh to nē ām axpēn kôt harēnh o htipxi. Hã kot kaj mē wa ama nē ām hāmri wa kot harēnh kôt ajamaxpēr kurê kumrēx.

18 Anhÿr o kot harēnh. Tã pa ã amnhĩ jarēnh anē nhũm Inhĩpêêxà kot mē awÿr inhmēnh xwÿnhta mãânēn ã ijarēnh anē. Wa ixpijakrut tã ã wa ixte axpēn kôt amnhĩ jarēnh anhÿr jakamã kwa mē ixte tanhmã amnhĩ jarēnh toja ma nē ixkôt ajamaxpēr kêt wehe. Anē.

19 Nhũm pre ã Jejus mē kãm kapēr anē. Hāmri nhũm mē kuma nē kãm:

—No nhÿri na we anhĩpêêxà ja? Anē.

Hāmri nhũm mē kãm:

—Nà mē ate Inhĩpêêxà pumunhre hã. Mē ate aprĩ hã ixpumunh ronhÿx ka mē mãânēn aprĩ hã Inhĩpêêxà pumunh mex kurê kumrēx. Nom mē ate ixpumunh mex kêt jakamã na ka mē mãânēn omunh mex kêt nē. Anē.

20 Nhũm pre ã Jejus mē kãm kapēr anē. Arĩ Tĩrtũm mã amnhĩ jarēnh xà hã ixkreja kamã mē ahkre ho xa. Mē kot kàxpore gjēnh xà kuri mē ahkre ho xa. Nhũm mē kãm hkurê xwÿnhjaja tee ri kot tanhmã mē ahkre htoja ma nē kãm unēnh nē haxàr prãm nē. Nom kormã mē kot ã hipêx anhÿr ã arĩgro kormã kator kêt jakamã nhũm Tĩrtũmja nē mē omunh mex nē nhũm mē ām kãm unēnh prãm kaprÿ.

21 Hāmri nhũm Jejus arĩ mē kãm kapēr o xa nē mē kãm:

—Nà kot paj nhÿrmã mē arũm ixkato nē ma akupÿm api. Ka mē tee ri ijapêr nom nhÿri ix-

pumunh kêt nê. Hāmri nê mẽ ate amnhĩ tomnuj o apa rāhã ty nê mẽ atõ ixwỳr axàpir kêt nê. Anê.

²² Hāmri nhũm Ijaew nhõ pahijaja tee ri ã kapêr anhỹrja ã kuma nê axpên mã hã hpêr o pikênh o kuhê nê axpên mã:

—Kwa mãn ra kot amnhĩ pĩr kaxyw ã na ri hkôt mẽ paxàpir kêt ã mẽ pajarênh anê nà? Anê.

²³ Hāmri nhũm amnhĩ tã mẽ kuma nê mẽ kãm:

—Nà mẽ kajaja mẽ apê pyka nhõ xwỳnh na ka mẽ. No pa na mẽ arom ixpê kaxkwa nhõ xwỳnh jakamã mẽ pajamaxpêr kot axpên pyràk kêt.

²⁴ Kot kaj mẽ ixpê kaxkwa rũm ixwrỳk xwỳnh ã ixpumu nê amnhĩ kaxyw inhmã ajamaxpêr nê ixkôt amnhĩ xunhwỳr kêt hã kot kaj mẽ ate amnhĩ tomnuj o apa rāhã nhỹrmã atyk o mẽ kamjaja Tĩrtũm mã amnhĩ pānhã amnhĩre. Anê.

²⁵ Nhũm Jejus ã mẽ inhõ pahijê hkukamã mẽ kot amnhĩ nhĩpêx jarênh anê nhũm mẽ tee ri amnhĩ tã kuma nê kãm:

—Kwa mẽ atõ na ka we ri ã mẽ inhmã akapêr anê? Anê.

Hāmri nhũm mẽ kãm:

—Nà ra ixte mẽ amã amnhĩ jarênh kênã. Xàn ka mẽ kormã aprĩ hã inhmar kêt nê?

²⁶ Kot paj nhỹrmã mẽ amã mẽ ate amnhĩ tomnuj piitã ho amnhĩrit pa. Na pa kot mẽ awỳr inhmênh xwỳnhnta pix xô ri tanhmã mẽ amã ixkapêr to ho ri ixpa. ãm hāmri na hte tanhmã mẽmoj jarênh to. Na hte hêx kêt nê. Anê.

²⁷ Nhũm pre ã Jejus mẽ kãm Hipêêxà kot mẽ hwỳr mẽnh ã harênh anhỹr tã no nhũm mẽ Hipêêxà kêp Tĩrtũm ã hkôt hamaxpêr kêt nê.

²⁸ Jakamã nhũm mẽ kãm:

—Nà koja mẽ nhỹrmã pĩ kahpa hã inhô ka mẽ rĩ kormã aprĩ hã ixpê Tĩrtũm rũm mẽ awỳr ixwryk xwỳnh ã ixpumu. Nẽ ixte amnhĩ krã hkôt ixkapěr o ri ixpa hkêt ã ixpumu. Nẽ ãm Inhĩpêêxà xô ri ixprĩ hã ixkapěr o ri ixpa hã ixpumu.

²⁹ Ixte kãm hprãm xà hkôt pix mã tanhmã ri amnhĩ nhĩpêx to ho ri ixpa jakamã na hte ixtãnopxar mex o ixkôt pa ho pa. Koja aa ixkaga hkêt nẽ. Anẽ.

³⁰ Hãmri nhũm mẽ hkwỳja kuma nẽ hkwỳjê rom kapěr kôt hamaxpěr

³¹ nhũm amnhĩ tã mẽ omu nẽ mẽ kãm:

—Nà ãm hãmri na ka mẽ tã ixkôt ajamaxpěr. Tã kêr ka mẽ ixkôt amnhĩ xunhwỳ nẽ ixkapěr kôt pix mã ri amnhĩ nhĩpêx mex o ri apa. Hãmri pa ja hã mẽ apumu nẽ mẽ apê ixkwỳ kumrêx ã mẽ ajarê.

³² ãm hãmri na pa hte ã ixkapěr anhỹr o ri ixpa. Tã kot kaj mẽ ixkôt ri amnhĩ nhĩpêx o ri apa hãmri nẽ aprĩ hã inhmar tỳx nẽ. Nom na hte kormã mẽmoj kot amnhĩ tã mẽ ato htỳx pyràk o mẽ anhĩpêx ka mẽ tee ri amnhĩ krã hkôt kãm anhũrer prãm kaprỳ. Tã kot kaj mẽ ixkôt amnhĩ xunhwỳ nẽ ixkôt ri amnhĩ nhĩpêx hãmri nẽ Tĩrtũm nhỹ hã tãm amnhĩ nhĩpêx. Jao ý hã ate amnhĩ tomnuj mã anhũre. Anẽ.

³³ Nhũm pre ã Jejus mẽ kãm kapěr anẽ hãmri nhũm mẽ tee ri kuma nẽ kãm:

—Kwa mẽ ixpê mẽ pahpàr krax finat Apraãw kanrêhã htàmnhwỳ kênã. Na pre mẽmoj te kot amnhĩ tã ho htỳx pyràk o hipêx kêt nẽ. Jakamã mẽmo kot we mẽ ixpê hkanrêhã htàmnhwỳjê ho htỳx ka we ri ã mẽ ijarênh anẽ? Nà amrakati kênã. Tã kwa mon ka ã mẽ ijarênh anẽ? Anẽ.

³⁴ Hãmri nhũm Jejus hprĩ hã mẽ kãm awjarẽ nẽ mẽ kãm:

—Kwa mẽ ixkapěr ma nẽ amnhĩ krãm haxàr tỳx nẽ. Nà mẽ kot amnhĩ tomnuj o mẽ pa xwỳnhjaja te mẽ kot amnhĩ tomnuj tãm ri kot amnhĩ tã mẽ ho htỳx pyràk o mẽ hipêx. Jakamã nhũm mẽ urer kêt rãhã nẽ pa ho pa. Nẽ ã amnhĩ nhĩpêx anhỹr rãhã ho pa.

³⁵ Jakamã ixkĩnhã mẽ kêp Tĩrtũm kwỳ hkêt. No pa na ixpê Tĩrtũm Kra jakamã mãânên ixpê hkwỳ ãa pa.

³⁶ Tã mẽ kajaja. Kot kaj mẽ ixpê Tĩrtũm Kra hã ixkôt amnhĩ xunhwỳ hã kot pa tanhmã mẽ ato ka mẽ ixpyrà nẽ apê wa ixkwỳy. Hãmri nhũm mẽ ate amnhĩ tomnuj te kot mẽ amã urer pyràk o mẽ anhĩpêx ka mẽ ra wa ixkôt amnhĩ nhĩpêx o ri apa. Anẽ.

Mẽ kêp Tĩrtũm kra hkêt xwỳnhjê jarênh

³⁷ Nhũm Jejus arĩ mẽ kãm kapěr nẽ mẽ kãm:

—Nà ãm hãmri na ka mẽ apê finat Apraãw kanrêhã htàmnhwỳ hã amnhĩ jarẽ. Nom mẽ apê hkanrêhã htàmnhwỳ htã uràk nẽ amnhĩ kaxyw Tĩrtũm kôt ajamaxpěr kêt nẽ. Jakamã na ka htem ixkapěr ma nẽ ãm ama nẽ ixkaga. Nẽ axtem nẽ ixpĩr mã. Kop apu Apraãw arĩ mẽ akamã pa ronhỹx ã inhĩpêx anhỹr kêt nẽ.

³⁸ Na pa hte Inhĩpêêxà hkôt pix mã ri amnhĩ nhĩpêx o ri ixpa. No mẽ kajaja axtem nẽ mẽ ate nhãm mẽ kapěr kôt amnhĩ nhĩpêx jakamã na ka htem ixkĩnhã Inhĩpêêxà hkôt amnhĩ nhĩpêx kêt nẽ. Anẽ.

³⁹ Hãmri nhũm mẽ tee ri amnhĩ tã kuma nẽ kãm:

—Tk. Kwa mon ka ã mẽ ijarēnh anē? Mẽ ixte Apraāw kôt amnhĩ nhĩpêx o ri ixpa kênã. Anē.

Hãmri nhũm mẽ kãm:

—Nà. Mẽ ate hkôt ri amnhĩ nhĩpêx o apa ronhỹx ka mẽ uràk nē Inhĩpêxà kapêr kôt amnhĩ nhĩpêx.

⁴⁰ No na ka mẽ ra axtem nē xipr mã. ãm hãmri na pre Tĩrtũm inhmã awjarē pa ô ri tanhmã mẽ amã mẽmoj jarēnh to ho ri ixpa htã ka mẽ ra axtem nē xipr mã. Kwa xà na pre Apraāwja ã mẽ hipêx anhỹr o pa? Nà na pre ã mẽ hipêx anhỹr kêt nē.

⁴¹ Mẽ ate hkôt amnhĩ nhĩpêx xwỳnhata axtem na. Kêp Apraāw kêt. Nē mãñnēn kêp Tĩrtũm kêt. Anē.

Hãmri nhũm mẽ tee ri kuma nē kãm:

—Tk. Kwa nà ã mẽ ijarēnh anhỹr kêt nē. Mẽ ixte Apraāw kôt amnhĩ nhĩpêx xwỳnh kênã. Tã ka ri axtem nē ã mẽ ijarēnh anē. Mẽhõ hkôt kot pa kêt wem ri axtem amnhĩ nhĩpêx o ri ixpa? Anē.

⁴² Hãmri nhũm mẽ kãm:

—Nà mẽ ate Apraāw kôt amnhĩ nhĩpêx ronhỹx ka mẽ xipumu nē uràk nē amã ixprãm nē. Apraāw kot hkôt amnhĩ nhĩpêx o pa xwỳnhata tãm kot mẽ awỳr inhmēnh nhũm mẽ awỳr ixwryk kênã. Na pa pre amnhĩ krã hkôt man mẽ awỳr ixwryk kêt nē. Tãm na pre mẽ awỳr inhmē pa wrỳ.

⁴³ Kwa mon ka mẽ aprĩ hã ixkapêr mar mex kêt nē? Nà mẽ amã ixkôt amnhĩ nhĩpêx prãm kêt jakamã na ka mẽ tee ri ixkapêr ma nē aprĩ hã mar mex kêt nē.

⁴⁴ Mẽ ate hkôt amnhĩ nhĩpêx xwỳnhata Satanasti na. Aa tãm kot amnhĩ nhĩpêx kêt kumrêx. Kêp mẽ hpar o pa xwỳnhjê hpãm maati na. Nē kêp mẽ kãm hêx o pa xwỳnhjê pãm maati na. ã kot amnhĩ nhĩpêx kot anhỹr. Nē kãm mẽ kapêr mex mar prãm

kêt o pa. Nê ãm hêx pix o pa jakamã kêp mẽ hêx xwỳnhjê pãm. ã kot amnhĩ nhĩpêx anhỹr xwỳnh tã ka htem hkôt amnhĩ nhĩpêx o ri apa.

⁴⁵ —Na pa hte kurom ãm hãmri ixkapêr o ri ixpa. No mẽ kajaja mẽ apê hêx nhi xwỳnh maatija hkra jakamã mẽ amã ixkapêr mar prãm kêt.

⁴⁶ Xà na ka pre mẽ atõ ixte tanhmã amnhĩ tomnuj to hã ixpumu? Nà amrakati. Ixte amnhĩ to mex o ri ixpa xwỳnh na pa. Nê tãm ixkapêr o ri ixpa xwỳnh tã ka mẽ inhma nê ãm inhma nê ixkôt ajamaxpêr kêt nê. Kwa mon ka mẽ ja hã ixpumunh nê ixkôt ajamaxpêr nê ixkôt amnhĩ xunhwỳr kêt nê?

⁴⁷ Tĩrtũm krajaja na htem kapêr mar tỳx nê hkôt amnhĩ nhĩpêx o pa. No mẽ apê hkra hkêt jakamã mẽ amã kapêr mar prãm kêt. Anê.

Mẽ kot Jejus kêp Satanasti hkwỳ hã harênh

⁴⁸ Hãmri nhũm mẽ ã Jejus kot mẽ harênh anhỹrja ma nê kamã gryk tỳx kumrêx. Hãmri nê kãm:

—Tk. Kwa ate amnhĩ tomnuj o apa xwỳnhhti kênã. Ra Satanasti hkwỳ pê mẽkarõmnuti tanhmã kot akrà hto jakamã na ka ã mẽ inhmã akapêr anê. Anê.

⁴⁹ Hãmri nhũm mẽ kãm:

—Nà mẽkarõmnuti kot tanhmã ixto hkêt. Na pa hte Inhĩpêxà hã ixpijaàm pix o ri ixpa. Tã mẽ ate ixkĩnhã hã apijaàm kêt jakamã mããnên pa ixtã apijaàm kêt nê.

⁵⁰ Na pa hte amnhĩ krã hkôt mẽ piitã mẽ kot ixtã hpijaàm prãm xàj tanhmã mẽ kãm ixkapêr to hkêt nê. No mẽ piitã mẽ kot ixtã hpijaàm o paja na Inhĩpêxà kãm hprãm. Tã koja nhỹrmã amnhĩ

nê ixtã mẽ hpijaàm kêt xwýnhjaja mẽ kot amnhĩ xà htỳx kamã hamak tũm xàta wỳr mẽ rẻnh pa.

⁵¹ —Nẻ kot ka mẽ atõ wa ixkapẻr ma nẻ ixkõt amnhĩ nhĩpẻx. Hã kot kaj wa ixri atửr tũm nẻ apa ho apa. Kwa mẽ ixkapẻr ma nẻ amnhĩ krãm haxàr tỳx nẻ. Anẻ.

Nhũm pre ã Jejus Ijaew nhõ pahijẻ mẽ kapẻr anẻ.

⁵² Nhũm mẽ kuma nẻ kãm:

—Kwa pẻr ãm hãmri na ka hte Satanasti nhỹ hã ã mẽ htửr tũm nẻ mẽ pa ho pa hã mẽ harẻnh anhửr o ri axẻx o ri apa. Finat Apraãw na pre ri paa nẻ ty. Tã mẽ kot Tửrtũm nhỹ hã kapẻr jarẻnh o mẽ pa xwýnhjaja na prem uràk nẻ ri paa nẻ mãnẻn htyk pa. Tã ka axtem nẻ mẽ kot akapẻr kõt amnhĩ nhĩpẻx o mẽ pa xwýnhjaja ari htửr tũm nẻ pa ho pa hã mẽ harẻ. Nà na ka ãm mẽ inhmã mẽ ho axẻx o xa.

⁵³ Na pre mẽ pahpãm Apraãwja kot amnhĩ to rax tã ty nẻ hapẻx. Nhũm mẽ kot Tửrtũm nhỹ hã kapẻr jarẻnh xwýnhjaja mãnẻn mẽ kot amnhĩ to rửnh tã htyk pa nẻ hapẻx. Mẻ kot amnhĩ to rửnh tã htyk pa nẻ hapẻx kẻnã kot kêt mẽ tanhmã amnhĩ to nẻ ari htửr tũm nẻ pa. ãm mẽ ixte akapẻr mar nẻ atã ixpijaàm pix prãm xàj na ka ã mẽ inhmã mẽ htửr tũm nẻ pa hã mẽ harẻnh anẻ. Nom na ka ã mẽ harẻnh anhửr kaprỳ. Kot paj mẽ ri akapẻr mar kêt nẻ. Anẻ.

⁵⁴ Hãmri nhũm mẽ kuma nẻ mẽ kãm:

—Nà na pa hte amnhĩ krã hkõt mẽ ate ixtã apijaàm hprãm xàj tanhmã mẽ amã ixkapẻr to hkết nẻ. Kot paj anẻ nẻ ãm ixtỳx ã amnhĩ nhĩpẻx anhửr kaprỳ. No Inhĩpẻẻxà tãm kãm mẽ apiitã mẽ ate

ixtã apijaàm o apaja nhũm kãm hprãm. Mẽ ate Tĩrtũm kôt amnhĩ nhĩpêx o apa hã amnhĩ to axêx xwỳnhta tãm na kãm mẽ ate ixtã apijaàmja nhũm kãm hprãm. Tã ka htem ã amnhĩ nhĩpêx anhỹr kêt nẽ. Na ka htem ixkuk pumu nẽ axtem nẽ ixte Satanasti nhỹ hã mẽ amã ixêx o ri ixpa hã ijarẽ.

⁵⁵ Mẽ ate Inhĩpêxà hkôt amnhĩ nhĩpêx ã amnhĩ jarẽnh tã ãm amnhĩ to axêx o ri apa. No pa na pa hte mẽ arom ãm hãmri hkôt amnhĩ nhĩpêx mex o ri ixpa.

⁵⁶ Amnepêem mẽ pahpàr krax Apraãwja na pre mẽ awỳr ixwryk kukamã ijarẽnh ma nẽ mẽ arom inhỹ hã hkĩnh tỳx nẽ pa. Anẽ.

Nhũm pre ã Jejus mẽ kãm amnhĩ jarẽnh anẽ.

⁵⁷ Hãmri nhũm mẽ kuma nẽ tee ri kot mẽ kãm tanhmã Apraãw jarẽnh toja ma nẽ kãm:

—Tk. Xà na ka pre finat Apraãwja ano ho omu? Nà kormã anyw kênã. Apraãw amnepêem htyk nẽ hapêx kênã kot ka kêt kot akukamã ajarẽnh mar nẽ hkĩnh tỳx ã harẽ. Xàn ka pre ano ho omu? Kormã akator kêt ri na pre amnepêem htyk nhũm mẽ haxàr kênã. Nà na ka ãm mẽ inhmã amnhĩ to axêx. Te amnepêem mẽ hkukamã apa nẽ ate mẽ omunh nẽ mẽ harẽnh pyràk. Kwa akatàt kôt mẽ inhmã awjarẽ. Anẽ.

Jejus kêp rãhã ho rãhã xwỳnh ã harẽnh

⁵⁸ Hãmri nhũm Jejus mẽ kãm:

—Nà ixêx kêt. ãm hãmri na pa ã mẽ amã amnhĩ jarẽnh anẽ. Amnepêem kormã Apraãw kator kêt ri na pa pre ixrãhã ho ixrãhã ixpa na pa. Ixrãhã ho ixrãhã ixpa xwỳnh jakamã na pa pre hte inhno ho

Apraãw pumunh mex o ri ixpa. Kwa mẽ ixkapêr ma nê amnhĩ krã him haxàr tỳx nê. Anê.

⁵⁹ Hãmri nhũm mẽ tee ri kot ã amnhĩ jarênh anhỹrja ã kuma nê kamã gryk tỳx nê. Nê axpên mã:

—Kwa tanhmã kot we amnhĩ to nê amnepêm rãhã nê pa ho pa xwỳnh ã amnhĩ jarê? Tĩrtũm pix na rãhã ho rãhã pa xwỳnh. Anê.

Hãmri nê kamã gryk xàj kên rũnh kwỳ kawrà ho ri hprôt nê kot ho htak o hpĩr kaxyw. Nom nhũm ra amnhĩ tã mẽ omu nê mẽ kêp akunok nê Tĩrtũm mã amnhĩ jarênh xà hã ixkreja rũm kato nê ma tẽ.

9

Jejus kot no hkre xwỳnh o mex ã harênh

Makre 8.22-26

¹ Hãmri nhũm Jejus ma tẽ pa mẽ hkôt ri mẽ ixpa ho mẽ ixpa xwỳnhjaja ma hkôt mra. Hãmri nê nhỹri no hkre xwỳnh pumu. Katorxà nhõxà hkre rũm na pre no hkre nê kato. Hãmri nê ra hprêk nê hpriy kamã àhwỳr o hkrĩ.

² Tã hãmri pa mẽ mra nê omu nê hã Jejus kukja nê kãm:

—Kwa mẽmoj mỳrapê na pre we myti nêj no hkre nê kato? Xà tãm kot tanhmã amnhĩ tomnuj to mỳrapê nà? Xà katorxà rỳ hipêêxà kot amnhĩ tomnuj mỳrapê na pre ã no hkre nê kator anê? Anê.

³ Hãmri nhũm mẽ inhmã:

—Nà mẽhõ kot tanhmã amnhĩ tomnuj to mỳrapê no hkre nê kator kêt. ãm Tĩrtũm kot ho mex nhũm mẽ kot ja hã omunh kaxyw na pre ã no hkren kator anê. Tã kot paj Tĩrtũm nhỹ hã no ho mex ka mẽ ja hã ixpumu. Na pa hte kormã jar pikap ri

ixpa ri Tirtũm mã tanhmã amnhĩ nhĩpêx mex to ho ri ixpa.

⁴ Na htem arĩgro hã mẽmoj tã apê nhũm kamàt nhũm mẽ kãm ure nê àpênh kêt nê. Ja pyrà nê na pu htem kormã pahtĩr ri jar pikap ri papa ri Tirtũm mã tanhmã amnhĩ nhĩpêx to ho ri papa. Tã kot puj mẽ nhỹrmã ty hãmri nê axte jar ã amnhĩ nhĩpêx anhỹr kêt nê. Jakamã kwa kêr pu mẽ ri jar pikap ri papa ri kãm tanhmã amnhĩ nhĩpêx mex to ho ri papa.

⁵ Na pa hte ã kãm amnhĩ nhĩpêx anhỹr jao te kanê hirã mex pyrà nê ixprĩ hã mẽ kãm Tirtũm kot amnhĩ nhĩpêx o amnhĩrĩt mex o ri ixpa. Anê.

⁶ Nhũm pre ã Jejus mẽ inhmã amnhĩ jarênh anê. Hãmri nê kot nohkre xwỳnh̄ta no o mex kaxyw hikôt nê argôx mẽ nê ho gyw kwỳ nhĩpêx nê kànhmã xa nê ho no kukõ.

⁷ Hãmri nê kãm:

—E ma gô gjênh xà pê Siroe hwỳr tẽ nê kamã amnhĩ no kuhõ. Anê.

Mẽ pakapêr kãm Siroeja mẽ kot kãm: “Nhỹhỹm mẽnh xwỳnh̄” anhỹr jarênh pyræk. Tã nhũm Jejus hwỳr kumẽ nhũm ma hwỳr tẽ. Hãmri nê kamã amnhĩ no hã gyw kuhõnh pa jao rĩt mex kurê kumrêx. Hãmri nê rĩt mex ã amnhĩ pumu nê hkĩnh tỳx nê ma akupỹm òrkwỹ hwỳr tẽ.

⁸ Hãmri nhũm òrkwỹ kuri mẽ òrkwỹ xwỳnh̄jaja nê mẽ kot pry kamã ahwỳr o hkrĩ hã omunh xwỳnh̄jaja amnhĩ jaêr pê ra rĩt mex ã omu nê tee ri hã axpên kukja nê axpên mã:

—Kwa pêr pry kamã àhwỳr o hkrĩ xwỳnh̄ta na nà? Anê.

⁹ Hãmri nhũm kamã mẽ hkwyjaja mẽ kãm:

—Tỳ. Tãm na. Anẽ.

Nhũm kamã mẽ hkwyjaja mẽ kãm:

—Nà tãm kêt. Axtem mēhõ na. Te kot uràk nom tãm kêt. Anẽ.

Anhỹr o ri axpẽn mã harẽ. Tã nhũm tãm mẽ kãm amnhĩ jarẽ nẽ mẽ kãm:

—Tỳ pa kênã. Pa na pa pre hte inhno hkre nẽ ri ixpa htã ra ixrĩt mex. Anẽ.

¹⁰ Hãmri nhũm mẽ tee ri kuma nẽ kãm:

—Kwa no tanhmã na ka we amnhĩ to nẽ ra arĩt mex?

¹¹ Anẽ nhũm mẽ kãm:

—Nà mẽ kot kãm “Jejus” anhỹr xwỳnhta na ixwỳr tẽ nẽ ixkaxyw gyw kwỳ kagõ nẽ ho inhno kukõ. Hãmri nẽ mẽ kot gô mã: “Siroe” anhỹr xwỳnhta kamã ixte amnhĩ no kuhõnh kaxyw hwỳr inhmã anẽ pa ma hwỳr tẽ nẽ kamã amnhĩ no kuhõ nẽ ixrĩt mex kurê kumrẽx. Anẽ.

¹² Hãmri nhũm mẽ kuma nẽ kãm:

—No nhỹhỹm na ato mex xwỳnhja ma tẽ? Anẽ.

Hãmri nhũm mẽ kãm:

—Konẽn. Ixte nhỹhỹm htẽm xà hkôt omunhre hã. Anẽ.

¹³ Hãmri nhũm mẽ kuma nẽ ma Parijew nhõ xwỳnhjê hwỳr o mō nẽ mẽ kãm harẽ.

¹⁴ Nẽ mẽ kãm:

—E ot pa mẽ awỳr jahti ho tẽ. Na xep Jėjusja jarãhã akupỹm kãm no ho mex. Mẽ panhõ arĩgromnu htã nhũm hã no ho mex. Anẽ.

¹⁵ Hãmri nhũm mẽ tee ri mẽ kuma nẽ myta pumu nẽ kãm:

—E mẽ inhmã amnhĩ jarẽ. Tanhmã na ka pre we amnhĩ to nẽ anohkre nẽ akrĩ htã ra ano mex nẽ? Anẽ.

Hãmri nhũm mẽ kãm:

—Nà na pre Jejus gyw o inhno kukõ nẽ inhmã anẽ pa gô ho amnhĩ no kuhõ nẽ ixrĩt kurê kumrêx. Anẽ.

¹⁶ Hãmri nhũm mẽ kuma nẽ tee ri Jejus ã axpẽn kukjêr o kuhê nẽ axpẽn mã harênh o:

—Kwa mẽ panhõ arĩgromnu hã kot ho mex jakamã kêp Tĩrtũm rũm mẽ pahwỳr wrỳk xwỳnh kêt. ãm kot amnhĩ tomnuj xwỳnh kênã. Anẽ.

Nhũm mẽ hkwyjaja harênh o:

—Kwa nà. Kot amnhĩ tomnuj xwỳnh ronhỹx àhpumunh tỳx kôt no ho mex kêt nẽ. Anẽ.

¹⁷ Hãmri nẽ hpãnhã no mex xwỳnhhta mã kãm:

—No ka? Ate kot ano ho mex xwỳnh ã amnhĩ tã harênh jakamã mēhõ hã na ka hkamnhĩx? Mēhõ na wehe? Anẽ.

Hãmri nhũm mẽ kãm:

—Konẽn. Mãn kêp Tĩrtũm kapêr jarênh o ri mẽ pa xwỳnh mãn. Hã na ã inhno ho mex anẽ. Anẽ.

¹⁸ Hãmri nhũm mẽ tee ri kuma nẽ axpẽn mã:

—Kwa pêr aa nohkre hkêt kênã. Na pre ãm amnhĩ to hêx o pa. E kwa pu mẽ amnhĩ wỳr katorxà nẽ hipêêxà wa hã karõ kê wa man tẽ nẽ tanhmã mẽ pamã harênh to. Anẽ.

Hãmri nẽ wa hã karõ

¹⁹ nhũm wa mẽ hwỳr tẽn axà nhũm mẽ wa kãm:

—Pa. E mẽ inhmã mẽmoj jarẽ. Xà we wa akрата na ãm ja nà? Xà tãm na ka hte wa nohkre nẽ kator ã harê? Kwa tanhmã na we amnhĩ to nẽ ra rĩt mex? Anẽ.

²⁰ Hãmri nhũm wa mẽ kãm:

—Ỗỹ wa ixkra kênã. Na pre wa ixpê nohkre nẽ kato.

²¹ Tã ra tanhmã amnhĩ to nẽ ra rĩt mex. No wa ixte kot ho mex xwỳnhhta pumunh kêt. Kwa mẽ tãm

mãn hkukja nẽ ama. Ra àptàr kênã. Kê tãm mãn mẽ amã tanhmã amnhĩ jarẽnh to ka mẽ ama.

²² Anhỹr o mẽ kãm wa hkrata jarẽ. No âm wa kãm mẽ uma nẽ ã mẽ kãm kapêr anẽ nẽ mẽ kãm Jejus nhĩxi jarẽnh kêt nẽ. Na pre Parijew nhõ xwỳnhjaja ra Jejus nê mẽ kãm kapêr nẽ mẽ kãm:

—Ka mẽ atõ Tĩrtũm kot mẽ pakaxyw Jejus xãm ã harẽ hãmri nẽ axte Tĩrtũm kapêr o mẽ ahkre xà hã ixkreja wỳr agjêx kêt kumrêx nẽ rĩ amnhĩ pumu.

²³ Anhỹr o nê mẽ hkurê jakamã nhũm wa mẽ umaj ã mẽ kãm hkra jarẽnh anẽ nẽ kot ho mex xwỳnh nhĩxi jarẽnh kêt nẽ.

²⁴ Hãmri nhũm mẽ axte amnhĩ wỳr no mex xwỳnhta ã karõ nẽ kãm:

—Kwa akatàt kôt mẽ inhmã amnhĩ jarẽ. Ate kot ano ho mex ã harẽnh xwỳnhta na kot amnhĩ tomnuj pix o pa xwỳnh kênã kot kêt ano ho mex. Jakamã kwa Tĩrtũm noo mã akatàt kôt mẽ inhmã amnhĩ jarẽ nẽ axêx kêt nẽ. Anẽ.

²⁵ Hãmri nhũm mẽ kãm:

—Ko ixte ja hã omunh kêt. Âm ja pix na ixte omunh. Na pa pre inhno hkre nẽ ri ixpa htã ra ixrĩt mex nẽ. Anẽ.

²⁶ Hãmri nhũm mẽ tee ri kot amnhĩ jarẽnhja ã kuma nẽ kãm:

—No tanhmã na we mytita amnhĩ to nẽ amã ano ho mex? Anẽ.

²⁷ Hãmri nhũm tee ri axte mẽ kot hã hkukjêr ã mẽ kuma nẽ mẽ kãm:

—Kwa ra ixte mẽ amã âm hãmri amnhĩ jarẽnh griã. Tã ka mẽ inhma nẽ âm inhma nẽ arĩ hã ixkukja. Mãn ka mẽ amã hkôt amnhĩ xunhwỳr prãm hã na ka mẽ aprĩ hã ixkukja nà? Mẽ ate kot

amnhĩ nhĩpêx ã aprĩ hã harênh mar nê hkôt amnhĩ xunhwÿr prãm xaj na ka mẽ aprĩ hã amã harênh prãm nê. Anê.

²⁸ Hãmri nhũm mẽ tee ri kuma nê kamã gryk nê. Nê hã kãm akir nê kãm:

—Tk. Ka na ka hte kapêr kôt amnhĩ nhĩpêx. No kêt mẽ pajaja na pa htem finat Mojes kapêr kôt pix mã amnhĩ nhĩpêx.

²⁹ Mojes mã na pre hte Tĩrtũm kapêr o pa. Jakamã pa htem ãm hkôt pix mã amnhĩ nhĩpêx o ri ixpa. No ate kot ano ho mex ã harênh xwÿnhhta mẽ ixte omunh kêt. Nê mẽhõ nhÿ hã kot tanhmã amnhĩ nhĩpêx to ho pa xwÿnhja mẽ ixte omunh kêt. Anê.

³⁰ Hãmri nhũm tee ri mẽ kuma nê mẽ kãm:

—Kwa kot inhmã inhno ho mex nhũm ra ixrĩt mex tã ka mẽ tee ri hkukamã ajamaxpêr nê mẽhõ nhÿ hã kot ã amnhĩ nhĩpêx anhÿr o pa hã omunh kêt ã amnhĩ jarê.

³¹ Mẽ pahte Tĩrtũm kot amnhĩ nhĩpêx ã omunh mex. Koja mẽhõ kot amnhĩ tomnuj xwÿnh mẽmoj tã kuwÿ nhũm kuma nê ãm kuma. No kêt mẽ kot hkôt ri amnhĩ nhĩpêx xwÿnhjaja. Nê mẽ kot kãm mex o mex ã harênh xwÿnhjaja na htem mẽmoj tã kuwÿ nhũm mẽ kuma nê mẽ kãm tanhmã mẽmoj nhĩpêx to rÿ mẽ kãm mẽmoj gõ.

³² Tã aa mẽ pahte mẽhõ kot mẽ no ho mex ã harênh mar kêt tã nhũm ã Jesus inhmã inhno ho mex anê.

³³ Kêp Tĩrtũm kwÿ hkêt ronhÿx pre inhno ho mex kêt nê. Anê.

³⁴ Hãmri nhũm mẽ kuma hãmri nê kãm:

—Tk. Kwa pēr ãm akator kôt ate amnhĩ tomnuj o ri apa htã na ka ã mẽ inhmã akapēr anē. Kwa ixkreja rŭm akato nē ma atēm kurê kumrêx.

Anhÿr o kãm kapēr hãmri nē mẽ amnhĩ nē hano nhũm kato nē ma tē.

³⁵ Tã nhũm Jejus ra mẽ kot amnhĩ nē hanor ã harēnh ma nē ma hapēr o tē nē nhÿri omu. Hãmri nē amnhĩ tã hkukja nom te nhãm mēhõ hã hkukjêr pyrã nē kãm:

—Pa? Xàn ka ra Tĩrtũm kot mẽ awÿr mēnh xwÿnhhta amnhĩ kaxyw hkôt ajamaxpēr nà? Anē.

³⁶ Hãmri nhũm kormã kot no ho omunh kêt jakamã kêp Jejus ã omunh kêt nē. Na pre kormã no hkre nē ãm kapēr pix ma. Tã ra akupÿm rĩt mex nom kormã no ho omunh kêt nē. Jakamã nhũm Jejus hwÿr tē nē ã kãm kapēr anē nhũm omu nē kormã kêp Jejus ã omunh kêt nē kãm:

—Tÿ kot kaj inhmã ahkre pa omu nē hkôt amnhĩ xãm kurê kumrêx. Anē.

³⁷ Hãmri nhũm kãm:

—Kwa paa. Ixte amã ixkapēr xwÿnhhta pa na pa. Anē.

³⁸ Hãmri nhũm kãm:

—Kwa xõwehe Pahihti? Nà kot paj amnhĩ kaxyw akôt pix mã ijamaxpēr nē akôt pix mã amnhĩ nhĩpêx o ri ixpa. Anē.

Hãmri nē kutã hkõn krã ho tēm nē nhÿ nē kãm mex o mex ã harēnh o nhÿ.

³⁹ Hãmri nhũm Jejus kãm:

—Nà ixte mẽ apiitã tanhmã mẽ ajarēnh to kaxyw na pa pre kaxkwa rŭm man mẽ awÿr wrÿ. Ahpÿnhã mẽ amã ixprãm xwÿnhjê jarēnh nē ahpÿnhã mẽ kãm ixprãm kêt xwÿnhjê jarēnh kaxyw. Mẽ kãm ixprãm kêt xwÿnhjaja kot hprĩ

hã Tĩrtũm kapēr mar mex kêt tã na htem htỳx ri kot mar mex ã amnhĩ jarēnh o pa. Jakamã te mẽ nohkre xwỳnhjaja kot amnhĩ nhĩpêx pyràk. Nom koja mẽ Tĩrtũm kapēr ma nē ixkôt amnhĩ xunhwỳr japēr. Hãmri nē te ra rĩt mex pyràk o amnhĩ nhĩpêx. Jao ra hprĩ hã Tĩrtũm kapēr mar mex o pa. Anē.

⁴⁰ Nhũm pre ã Jejus kãm kapēr anē. Nhũm Parijew nhõ xwỳnh kwỳjaja kot kuri mar o kuhê xwỳnhjaja ã kapēr anhỹr ã kuma nē amnhĩ tã kãm:

—Kwa nà. Xà we mẽ pajaja na ka ã mẽ inhnokre hã mẽ ijarēnh anē? Xà mẽ ixte ixprĩ hã Tĩrtũm kapēr mar mex kêt ã na ka mẽ ijarē nà? Anē.

⁴¹ Hãmri nhũm mẽ kãm:

—Ỗỹ kop apu mẽ ate aprĩ hã kapēr mar mex kêt ã amnhĩ jarēnh ronhỹx ja mẽ amã mex nē. Tã mẽ ate aprĩ hã mar mex ã amnhĩ to axêx o apa jakamã na ka mẽ ra amnhĩ tomnuj tỳx nē. Na hte Tĩrtũm ja hã mẽ apumu nē amnhĩm mẽ ate amnhĩ tomnuj xwỳnh ã mẽ ajarē. Anē.

10

ôwêhti jarēnh

Matêwre 9.36, 12.11-12; Rukre 15.3-7

¹ Nhũm Jejus arĩ Ijaew mã kapēr nē mẽ kãm:

—E pa mẽ amã awjarē ka mẽ inhma nē amnhĩ krã him haxàr tỳx nē ho apa. Mẽ hkrit ôwêhti kot paj mẽ amã harē ka mẽ inhma. Na hte ôwêhti jamâr o pa xwỳnhjaja ôwêhti apkur kaxyw mẽ o pa hãmri nhũm kamât nhũm akupỹm kahê hwỳr mẽ o pa. Kahê jakwakreja ãm pixii. Tã koja mẽhõ kahê xà hkôt hwỳr àr kêt nē axtem nē tẽ nē nhỹhỹnh

kahê hã api nê ôwêhti hwÿr àr japêr nhũm mẽ omu nê kot hkwỹ ho àhkĩnh ã omunh kurê kumrêx.

² —No ôwêhti jamãr o pa xwÿnhja na hte mẽ kurom katàt kôt kahê jakwakre rũm ôwêhti hwÿr agjê.

³ Nhũm kahê xà jamãr xwÿnhja amnhĩ wÿr omu nê kãm kahê xà rênh kurê kumrêx nhũm axà. Na hte apkati mẽ ma nhÿhÿm apkur kaxyw mẽ o pa. Nê nojarêt nê mẽ kãm akir. Ahpÿnhã tanhmã mẽ hixi kute hã mẽ omunh xà hkôt mẽ kãm àkjêr o pa. Hãmri nhũm mẽ kuma nê hwÿr mra nê hã pikuprõnh pa nhũm mẽ ho hapôj nê ma nhÿhÿm ri mẽ apkur kaxyw mẽ o pa.

⁴ Ma mẽ apkur kaxyw nhÿhÿm mẽ o pa. Nhũm ôwêhti ra kot kapêr mar mex jakamã ma àmnhĩx ri hkôt apkur o pa.

⁵ —Na hte hamãr o pa xwÿnh pix kapêr ma nê hkôt pa nê nhãm mēhō hkôt ri pa hkêt nê. Kot kapêr mar kêt jakamã tee ri kuma nê umaj axkakhũm nê hprõt nê ma mra. Na hte ôwêhti ã amnhĩ nhĩpêx anê. Anê.

Jejus te kêp ôwêhti gjênh xà hã hakwakre pyràk

⁶ Nhũm pre ã Jejus mẽ kãm ujarênh anê. Nê ujarênhja kamã amnhĩ kwÿjê jarê nê mãânên tãm amnhĩ jarê. Nom mẽ amnhĩ tã kuxi nê mẽ kãm amnhĩ jarênh o te ho ôwêhti jarênh pyràk nhũm mẽ tee ri kuma nê mar mex kêt nê.

⁷ Jakamã nhũm axte mẽ kãm awjarê nê mẽ kãm: —E pa ixprĩ hã mẽ amã ixujarênhhta jarê ka mẽ inhma. Te ixpê ôwêhti jagjênh xà hã hakwakre pyràk. Kwa mẽ ja ma nê amnhĩ krã him haxàr tÿx nê.

8 Na pre ra ixkukamã mẽ ohtô nê te ãm hãmri mẽ amã Tĩrtũm kapêr jarênh pyrãk o mẽ akôt ri pa. Nom mẽ amã hêx o pa. Te mẽ kot ôwêhti o àhkĩnh xwỳnhhta kot amnhĩ nhĩpêx pyrãk. Nom na hte ôwêhtija ãm hamãr xwỳnh pix kapêr ma nê nhãm mễhỗ kapêr mar kêt nê. Ja pyrã nê mẽ kot ixkôt amnhĩ xunhwỳr xwỳnhjaja na htem Tĩrtũm kapêr o hêx o mẽ pa xwỳnhjê ma nê ãm mẽ kuma nê mẽ hkôt amnhĩ nhĩpêx kêt nê. Na htem ãm ixkapêr pix ma nê ixkôt pix mã amnhĩ nhĩpêx o pa.

9-10 –Te ixpê ôwêhti gjênh xà hã hakwakre pyrãk. Na hte ôwêhti mẽmoj punuj pymaj kahê hwỳr agjê nê kamã mex nê kuhê. Nê kurũm hapôj nê ma apkur o pa. Ja pyrã nê mẽ kot ixkôt amnhĩ xunhwỳr xwỳnhjaja koja mẽ ixkukwak ri hkĩnh nê mex nê hamakêtkati nê pa ho pa. Nê nhỹrmã Tĩrtũm mẽ wa ixri htĩr tũm nê pa ho pa. Ja kaxyw na pa pre man mẽ awỳr pika hwỳr wrỳ.

–No ôwêhti ho àhkĩnh xwỳnhjaja na htem amnhĩm ho ahkĩ nê kupa nê ma amnhĩm o pa. Tã mẽ kot Tĩrtũm kapêr o hêx o mẽ pa xwỳnhjaja te mẽ kot jajaja kot amnhĩ nhĩpêx pyrãk. Anê.

*Jejus te kêp ôwêhti jamãr xwỳnh pyrãk
Eprêw 13.20; Apokarip 7.17*

11 –Nê ôwêhti jamãr mex xwỳnhja koja nhỹri mễhỗ kêp ôwêhti hõxpĩr kaxyw hwỳr htêm ã omu nê wa hã axpu. Nhũm ho àhkĩnh mã xwỳnhhta ôwêhti jamãr xwỳnh pĩ nhũm ôwêhti nê ty. Tã ixkwỳjaja hamakêtkati nê mex nê pa kaxyw na pa pre amnhĩ grõnh kôt mẽ hwỳr wrỳ. Jakamã kot paj te ôwêhti jamãr xwỳnh kot amnhĩ nhĩpêx pyrãk o amnhĩ nhĩpêx.

12-13 —Ně na htem tōhã ôwêhti jamãr xwỳnh nhỹhỹm pa kaxyw ně mēhõ mã amnhĩre nhũm wakre kamã kãm hkrit jamãr o pa. Kàxpore pix prãm xàj kãm hamãr o pa. Jakamã koja nhỹhỹnh mry xoprê ra hwỳr kato nhũm amnhĩ wỳr omu ně umaj ôwêhti re ně ma hprõt ně tẽ. Kãm ôwêhti japê hkêt ãm kãm htĩr pix prãm xàj ôwêhti mã hamaxpěr kêt ně rer pa ně ma tẽ. Nhũm mry xoprêta ôwêhti hwỳr hprõt ně hkwỳ pynê nhũm hkwỳ umaj axkahkũm ně hprõt ně ma mra. No kêt pa na te ixte ôwêhti mã hamaxpěr kêt ně kot rer ně ma hprõt ně htẽm xwỳnhhta pyræk kêt. Kot paj aa ixkwỳjê rer kêt ně. Kot paj mẽ hkôt ixpa ho ixpa rãhã ně.

14-15 —Te ixte ôwêhti jamãr xwỳnh mex pyræk jakamã na pa hte uræk ně ahpỹnhã mẽ kot ixkôt amnhĩ xunhwỳr xwỳnhjê pumunh mex o ri mẽ hkôt ixpa. Te mẽ kêp ixkrit ôwêhti pyræk nhũm te ixpê mẽ hamãr mex o ri mẽ hkôt ixpa ně aa mẽ rer kêt xwỳnhhta pyræk.

—Ně mẽ kot ixkôt amnhĩ xunhwỳr xwỳnhjaja ra mẽ ixte amnhĩ nhĩpêx kôt axpẽn pumunh mex. Ně mẽ inhmã axpẽn japêê. Te Inhĩpêêxà mẽ wa inhmã axpẽn japê pyræk. Tã kot paj nhỹrmã mẽ nê tanhmã amnhĩ nhĩpêx to.

16 —Mẽ kot ixkôt amnhĩ xunhwỳr xwỳnhjaja piitã kêp Ijaew pix kêt. Koja Ijaew kêt xwỳnh kwỳjaja mããnẽn ixkapěr ma ně ixkôt amnhĩ xunhwỳ ně ixkôt amnhĩ nhĩpêx. Jao ra te kêp ixkrit ôwêhti pyræk. Tã kot paj mẽ ho ixpimràa tã mẽ ho tipxi ně mẽ hamãr o ri mẽ hkôt ixpa.

17 —Ně mẽ kot ixkôt amnhĩ nhĩpêx o mẽ pa xwỳnhjaja mẽ mex kaxyw na pa pre amnhĩ grõnh

kôt mẽ hwỳr wrỳ. Jakamã kot paj nhỹrmã mẽ nê ty. Tã inhmã mẽ nê ixtyk puma hkêt jakamã na Inhĩpêêxà kãm ijapêê. Koja akupỹm ixto ixtĩr.

¹⁸ Kop apu inhmã mẽ nê ixtyk prãm kêt ronhỹx mẽ kãm ixkurê xwỳnhjaja tee ri kãm ixpĩr prãm kaprỳ. Nom ixte mẽ kot ixkôt amnhĩ nhĩpêx xwỳnhjê nê amnhĩ grônh kôt mẽ hwỳr ixwrỳk kênã. Jakamã kot paj arĩ mẽ kãm amnhĩ grônh kôt amnhĩ gô nê arĩ mẽ kãm xa nhũm mẽ ixpĩ. Nom kot paj akupỹm ixtĩr. Mẽhõ koja tanhmã ixto nê ixpĩr o ixpĩ? Nà koja mẽhõ ixpĩr o ixpĩr kêt nê. Inhĩpêêxà nhỹ hã kot paj nhỹrmã ã amnhĩ nhĩpêx anê nê akupỹm ixtĩr. Anê.

Nhũm pre ã Jesus mẽ kãm amnhĩ jarênh anê.

¹⁹ Hãmri nhũm Ijaew tee ri ã kot amnhĩ jarênh anhỹr ã kuma nê kê axte axpên kwỳm ri tanhmã harênh to ho kuhê.

²⁰ Nê kamã mẽ hkwỳjaja harênh o:

—Tk. Kwa mẽ mar kêt nê. Satanasti nhỹ hã na hte htỳx ri ã mẽ pamã amnhĩ jarênh anhỹr o pa. Anê.

²¹ Hãmri nhũm mẽ hkwỳjaja mẽ kuma nê mẽ kãm:

—Nà kot anhỹr kêt. Xà na htem Satanasti nhỹ hã ã kapêr mex anê nê ã mẽ no hkre xwỳnhjê ho mex anê? Nà kot anhỹr kêt. Satanastija ukapĩre hã. Anê.

*Ijaew nhõ pahijaja kot Jesus kaga hã mẽ harênh
Juãw 5.18, 8.59*

²² Tã nhũm ra amgrà hapêx pa mẽ ixpê Ijaew akupỹm krĩ pê Jerujarê kamã axpên wỳr akuprô. Axte mẽ ixte mẽ ixkĩnh kaxyw axpên wỳr akuprô. Amnepêm mẽ inhĩgêjtaja kot akupỹm Tĩrtũm mã

amnhĩ jarēnh xà hã ixkre ho mex pa nẽ ho Tĩrtũm wỳr mã hamaxpěr nẽ hã ixkĩnh ã arĩgroja ã pa mẽ hwỳr akuprõ.

²³ Hãmri nhũm Jejus ma mẽ ixkõt Tĩrtũm mã amnhĩ jarēnh xà hã ixkreta wỳr tẽ no ãm hwỳr àr kêt nẽ. ãm ixkre hpu hã kahê xà kape hã ri pa. Mẽ kot kãm: “Pahi finat Sarumāw pa xà” anhỹr xwỳnhhta kamã ri pa.

²⁴ Hãmri nhũm kê ra mẽ inhõ pahijaja omu nẽ hã akuprõ nẽ hêx rom kãm kapěr nẽ kãm:

—Kwa tokyx aprĩ hã mẽ inhmã amnhĩ jarẽ. Xà apê Tĩrtũm Kra na ka nà? Xà ka na pre Tĩrtũm mẽ ixkaxyw axãm? Kwa aprĩ hã mẽ inhmã amnhĩ jarẽ pa mẽ ama. Mon ka hte aprĩ hã mẽ inhmã amnhĩ jarēnh kêt nẽ? Na pa mẽ tee ri ate amnhĩ nhĩpêx ã apumu nẽ akukamã ijamaxpěr rũnh kumrêx o ri ixpa. Xà ãm hãmri apê Tĩrtũm kot mẽ ixkaxyw axãm xwỳnhhta na ka? Anẽ.

²⁵ Hãmri nhũm mẽ kãm:

—Tk. Ra ixte mẽ amã amnhĩ jarēnh xohtô htã ka mẽ inhma nẽ ãm inhma. Na pa hte xatã Inhĩpêxà nhỹ hã mẽ amã mẽ ate aa mẽmoj pumunh kêt kwỳ ho anhỹr o ri ixpa ka mẽ ja hã ixpumu nẽ ãm ixpumu nẽ ixkõt ajamaxpěr kêt nẽ.

²⁶ Mẽ apê ixkwỳ hkêt jakamã na ka mẽ ixkõt ajamaxpěr kêt nẽ. Te mẽ apê ixkrit ôwêhti pyræk kêt.

²⁷ Ixkwỳjaja na te ho ôwêhti kot hamār xwỳnh kapěr mar nẽ hkõt ri pata pyrà nẽ ixkapěr ma nẽ ixkõt amnhĩ nhĩpêx o pa. Ixpê mẽ õ pahĩhti hã mẽ kot ixpumunh mex jakamã na htem ixkõt amnhĩ nhĩpêx mex o pa. Ixte ja hã mẽ omunh mex nẽ.

28 Koja mẽ nhỹrmã htyk tã no ãm ixkukwak ri akupỹm htĩr hãmri nẽ Tĩrtũm mẽ wa ixri htĩr tũm nẽ pa ho pa nẽ aa hapêx kêt nhũm mẽhõ ixpê mẽ utàr kêt nẽ. Te inhĩhkra hpo nhĩpôk ri mẽ hkrĩ nhũm te mẽ hã inhĩhkra pikamỳr pyràk nhũm mẽmoj tee ri ixpê tanhmã mẽ ho hprãm kaprỳ.

29-30 Inhĩpêêxà tãm kot inhmã mẽ òr kênã. Hi-htỳx o kot mẽ piitã mẽ hakrenh par jakamã koja mẽ inhĩhkra po nhĩpôk ri hkrĩ nẽ mãânẽn Inhĩpêêxà nhĩhkra hpo nhĩpôk ri hkrĩ. Te ixpê Inhĩpêêxà Tĩrtũm pyràk jakamã mẽhõ kot wa ixpê wa inhĩhkra rũm mẽ utà? Nà amrakati kumrêx.

Anhỹr o mẽ kãm amnhĩ jarẽ.

31 Hãmri nhũm mẽ te kêp Tĩrtũm pyràk ã amnhĩ jarênh ã kuma nẽ kamã gryk tỳx nẽ. Hãmri nẽ kot kên o htak kaxyw ra kaxyw hkwy kawrà ho ri hprôt.

32 Hãmri nhũm amnhĩ tã mẽ omu nẽ mẽ kãm:

—Kwa ra ixte Inhĩpêêxà nhỹ hã mẽ amã aa mẽ ate mẽmoj pumunh kêt kwỳ ho anhỹr rax o ixpa. Jao tanhmã mẽ ho mex to pix o ri ixpa. Tã ka mẽ axtem nẽ ã inhĩpêx anhỹr kaxyw. Anẽ.

33 Hãmri nhũm mẽ kãm:

—Nà ã ate amnhĩ nhĩpêx anhỹr ja mỳrapê hkêt. Kêt apê mẽ inhĩõ htã ri axtem nẽ te apê Tĩrtũm pyràk ã amnhĩ jarênhja mỳrapê na pa mẽ kên o atak kaxyw. Na pu htem ã amnhĩ jarênh anhỹr o papa hkêt nẽ. Anẽ

34 Hãmri nhũm mẽ kãm:

—No ãm hãmri ixte ã amnhĩ jarênh anhỹr kênã. Tanhmã na Tĩrtũm kapêr ã kagà htũm kot ja jarênh to wehe? Na pre Tĩrtũm Ijaew nhõ pahijê mã kapêr nẽ mẽ kãm:

E mẽ ate inhỹ hã mẽ ho amnhĩptàr jakamã te mẽ apê pa ixpê Tĩrtũm pyràk.

Anhỹr o kot mẽ harẽnh.

³⁵ Ām hãmri na Tĩrtũm kapêrja. Tãm kot ã mẽ harẽnh kot anhỹr. Mẽ kot ỹ hã mẽ kãm kapêr jakamã te mẽ kêp uràk ã mẽ harẽnh anhỹr kênã.

³⁶ Tã tãm kot ã mẽ harẽnh anhỹr tã hpãnhã mẽ akaxyw pa ixpê Kra hã ixãm nẽ mẽ awỹr inhmẽnh nhũm ixwryk nẽ ixpê Kra hã amnhĩ jarẽnh tã ka mẽ ja hã inhma nẽ ãm inhma nẽ ixkôt ajamaxpêr kêt nẽ. Kwa mon ka mẽ ja hã ixpumunh nẽ ixkôt ajamaxpêr kêt nẽ?

³⁷ Kot paj Inhĩpêêxà mẽ wa ixàhpumunh kôt mẽ amã aa mẽ ate mẽmoj pumunh kêt kwỳ ho anhỹr kêt ka mẽ ja hã ixpumu nẽ mẽ rĩ kam nẽ mãmri ixkôt ajamaxpêr kêt nẽ.

³⁸ Mẽ amã ixkapêr mar prãm kêt tã kwa ixte Tĩrtũm pyrà nẽ aa mẽ ate mẽmoj pumunh kêt kwỳ ho anhỹr ã ixpumu nẽ Inhĩpêêxà mẽ wa ixte amnhĩ nhĩpêx tipxi hkôt ajamaxpêr. Anẽ.

³⁹ Hãmri nhũm mẽ kuma nhũm ja mẽ kêp omnuj tỳx nẽ. Te kot Tĩrtũm pyràk ã amnhĩ jarẽnhja nhũm mẽ kêp omnuj nẽ. Jakamã nhũm mẽ ra kot unênh nẽ ixkre rũm ho kator nẽ kapôt ã mẽnẽ nẽ kên ho htak kaxyw nhũm kê axte mẽ kêp akunok nẽ ma nhỹhỹm tẽ.

Jejus kot Jotãw nhĩhkjê hã ri pa hã harẽnh

⁴⁰ Tã nhũm Jejus ma tẽ nẽ pyhti pê Jotãw ã rê. Pa mẽ hkôt ri ixpa ho ixpa xwỳnhjaja ma hkôt mỗ. Finat Juāw Paxis kot Tĩrtũm mã wam mẽ hkrã kumrãr o pa xàta wỳr.

⁴¹ Hãmri nhũm mẽ ohtô nẽ mẽ ixwỳr mra nẽ Jejus kapěr ma nẽ kot tanhmã amnhĩ nhĩpêx to hã omunh o kuhê. Hãmri nẽ hã tanhmã axpẽn mã kapěr to nẽ axpẽn mã:

—Kwa âm hãmri na pre finat Juãw Paxisja mẽ pamã Jejus jarênh o pa. Aa kot mẽ pamã mẽ pahte mẽmoj pumunh kêt kwỳ ho anhỹr kêt tã âm xatã hkukamã mẽ pamã harênh o pa. Kêp Tĩrtũm Kra hã Juãw rom hihtỳx o hihtỳx ã harênh o pa. Nẽ Tĩrtũm kot mẽ pakaxyw âm xwỳnh ã nhũm mẽ pamã harênh o pa. Nà âm hãmri na pre ã mẽ pamã harênh anẽ. Anẽ.

⁴² Hãmri nhũm mẽ ohtô nẽ amnhĩ kaxyw Jejus kôt hamaxpěr nẽ hkôt amnhĩ xunhwỳ.

11

Rajare htyk jarênh

Juãw 5.21-29, 6.40

¹ Rôm nhũm krĩ pê Petãn kamã mễhõ my pê Rajareja ra à htỳx nẽ nõ. Na pre htõx wa hamẽxkrut. Hõ kêp Matre nhũm hõ kêp Marir.

² Marir na pre kormã arĩgro hõ hã kot Jejus o mex kaxyw mẽ hkuxwaxà ho hkuxwa nẽ amnhĩ kĩ ho hpar põnh kaxyw. Nom kormã. Jakamã nhũm wa hkamyja wa kêp à htỳx nẽ nõ.

³ Hãmri nhũm wa tee ri hkukamã hamaxpěr nẽ ma krĩ hõ hwỳr Jejus wỳr mễhõ mẽ nhũm mã hwỳr tẽ. Nẽ hwỳr pỏj nẽ omu nẽ kãm:

—Pa Pahihti. E ot pa awỳr tẽ. Na ra amã akràmnhwỳ japê htỳx xwỳnhta à htỳx nẽ nõ nhũm htõx wa tee ri hkukamã hamaxpěr nẽ awỳr inhmẽ pa tẽ. Kwa tokyx pu ma hwỳr tẽ ka akupỹm wa kãm ho mex nà? Anẽ.

⁴ Hãmri nhũm kuma nẽ kãm:

—Nà à htỳx nẽ nõr tã koja akupỹm mex. Mẽ kot akupỹm mex ã harẽnh mar hãmri nẽ Tirtũm mẽ wa ixtã hpijaàm nẽ wa ixihtỳx o wa ixihtỳx ã wa ixpumunh kaxyw na ã à htỳx nẽ nõr anẽ. Nẽ pa ixpê Tirtũm Kra hã akupỹm ho mex ã ixpumunh nẽ ixkôt hamaxpêr kaxyw na ã à htỳx nẽ nõr anẽ. Anẽ.

⁵ Na pre Jejus kãm Rajare mẽ htõx wa mẽ hapê nẽ.

⁶ Tã à htỳx ã harẽnh ma nẽ hwỳr mõi tokyx anhỳr kêt nẽ. Pa mẽ arĩ amnhĩm hikranh xà kamã ri ixpaja o ixtã axte apkati axkrut.

⁷ Hãmri nhũm rĩ kormã hwỳr nojarêt nẽ mẽ inhmã:

—E ma pu mẽ jarãhã akupỹm Jutej kamã Rajare hwỳr mõi nẽ omu. Anẽ.

⁸ Hãmri pa mẽ tee ri ja hã kuma nẽ kãm:

—Kwa ham mẽ panhõ pahijaja kot kẽn o atak o apĩr mã tã ka ra akupỹm mẽ hwỳr akrà. Kwa pu mẽ hwỳr pamõi kêt nẽ nà? Anẽ.

⁹ Hãmri nhũm mẽ inhmã:

—Nà koja mẽ kormã tanhmã ixto hkêt nẽ. Kormã ixte Tirtũm mã tanhmã amnhĩ nhĩpêx to jatur xàm mẽnhre hã. Te ixte kormã arĩgro hã ixrĩt mex nẽ ixpa pyrà nẽ kormã Tirtũm kot mẽmoj tã inhmã karõ xà hkôt pix mã tanhmã amnhĩ nhĩpêx to ho ri ixpa.

¹⁰ Tã kot paj hatur xàm kumẽ nhũm te myt àr nhũm ra kamàt kô pyràk nhũm mẽ rĩ kormã tanhmã ixto nẽ ixpĩ. Jakamã e ma pu mẽ hwỳr. Koja mẽ tokyx tanhmã ixto hkêt nẽ. Anẽ.

¹¹ Hãmri nẽ mẽ inhmã Rajare jarẽnh o:

—Na mẽ pahkràmnhwỳ Rajareta ra gōr nễ nễ. Tã kot puj mẽ ma hwỳr mỗ pa kumra. Anễ.

¹²⁻¹³ Ra htyk ã omunh tã ã mẽ inhmã harēnh anễ. Pa mẽ kuma nễ ixtỳx ho ãm ốt nễ nễ ã hkamnhĩx nễ kãm:

—Kwa măn ra akupỹm amnhĩ kãm hamak o mōr jakamã na ra amnhĩ krit nễ gōr nễ nễ. Kwa pu mẽ awjanã nễ hwỳr pamōr kêt nễ nà? Anễ.

¹⁴ Hãmri nhũm mẽ inhma nễ hprĩ hã mẽ inhmã harē nễ mẽ inhmã:

—Nà na pre ty.

¹⁵ Nom kormã à nễ hikwỹta ã na pa hwỳr inhmōr kêt nễ. Tã kot paj ma hwỳr mỗ nễ hã mẽ amã ixàhpumunh tỳx ã amnhĩ to amnhĩrĩt. Ka mẽ ja hã ixpumu nễ amnhĩ kaxyw ixkôt ajamaxpēr tỳx o ri apa. ã mẽ ate amnhĩ nhĩpêx anhỹr kaxyw na pa kormã à nễ nễ ã hwỳr inhmōr kêt nễ. E ma pu mẽ hwỳr. Anễ.

¹⁶ Hãmri nhũm mẽ inhĩo pê Tomas pihpohti tee ri ã kapēr anhỹrja ã kuma nễ mẽ inhmã:

—Tõe ma pu mẽ hkôt. Kê mẽ mamrĩ hkôt mẽ pahto hpimràatã mẽ panhĩmex pa ri. Anễ.

¹⁷ Tã pa mẽ ma hkôt mẽ hwỳr mỗ nễ ra Rajare nhõ krĩ hwỳr ixpôx o mỗ hãmri nễ harēnh ma. Ra htyk nhũm mẽ kot haxàr ã arĩgro pê kwat ã harēnh ma.

¹⁸⁻¹⁹ Nhũm Matre mẽ Marir wa hkamy ho hamak xàj arĩ mỳr o hkrĩ. Jakamã nhũm Ijaew kwỳjaja Jerujarē rùm ma wa hwỳr mra. Mễ kot wa kãm kapēr nhũm tokyx akupỹm tãm wa hkrã kaxyw nhũm mẽ wa hwỳr mra. Wa õ krĩ pê Petãnja Jerujarē hwỳr ãm 3 kirõm pix jakamã nhũm mẽ ma wa hwỳr mra nễ wa kuri wa kãm kapēr o hkrĩ.

20 Rôm nhũm Matre Jejus hpôx o mõi ã harẽnh ma nẽ kànhmã xa nẽ man mẽ ixkutã tẽ. No nhũm Marir arĩ mỳr o nhỹ nẽ hkôt htẽm kêt nẽ.

21 Hãmri nhũm Matre mẽ ixkutã tẽ nẽ mẽ ixkaxpa nẽ Jejus pumu nẽ mỳr kamã kãm kapẽr nẽ kãm:

—Hêxta gài nẽ Pahihti. Na pre ra wa ixkamy wa ixpê ty. Kop apu jar mẽ ixkôt ri apa ronhỹx pre htyk kêt nẽ. Xê mon ka pre we tokyx mẽ ixwỳr atẽmre hkêt nẽ?

22 Tã na pa arĩ akôt ijamaxpẽr tỳx nẽ. Kot kaj mẽmoj tã tanhmã Tĩrtũm wỳr to nhũm ama nẽ tanhmã amã mẽmoj to. Ra ixte ja hã apumunh mex kênã. Anẽ.

23 Hãmri nhũm Jejus kuma nẽ kãm:

—Kwa tee ri ajamaxpẽr nẽ akaprĩ hkêt nẽ. Koja akamy akupỹm war amã htĩr kãm ga. Anẽ.

24 Hãmri nhũm kuma nẽ kãm:

—Ma koja anẽ. Nhỹrmã Tĩrtũm kot mẽ piitã akupỹm mẽ ho htĩr xà hã arĩgrota ã koja akupỹm htĩr. Anẽ.

Kamy akupỹm htĩr ã harẽnh mar tã Jejus kot akupỹm ho htĩr tokyx anhỹr ã hkamnhĩx kêt nẽ ã kãm kapẽr anẽ.

25-26 Jakamã nhũm kãm:

—Nà pa na ixpê akupỹm mẽ ho mẽ htĩr xwỳnh. Jakamã mẽ kot amnhĩ kaxyw ixkôt hamaxpẽr nẽ ixkôt amnhĩ xunhwỳr xwỳnhjaja koja mẽ htyk tã koja mẽ hkarõ Tĩrtũm mẽ wa ixri htĩr tũm nẽ mex nẽ pa ho pa. Xà ate ja kaxyw ixkôt ajamaxpẽr tỳx nà? Anẽ.

27 Hãmri nhũm Matre kuma nẽ kãm:

—Xê nhũm. Apê Tĩrtũm Kra hã na pre mẽ ixkaxyw axãm. Ka na pa htem amnhĩ wỳr akãm ijamak o ixpa. Anẽ.

Hãmri nhũm Jejus kãm:

—Nà ãm hãmri na ka ã ijarẽnh anẽ. E ma akupỹm tẽ nẽ atõx mã anẽ kê tokyx man ixwỳr tẽ pa omu. Anẽ.

²⁸ Hãmri nhũm kuma nẽ ma akupỹm tẽ. Hãmri nẽ Marir wỳr axà nẽ kãm Jejus jarẽ. Kõt mẽ hkrĩ xwỳnhjẽ hkàx ã kãm harẽ nẽ kãm:

—An xê hãmri amỳr kêt nẽ. Na ra mẽ pajahkre xwỳnhta hpõx o mõi nẽ mũtar nhỹ nẽ atã karõ. Anẽ.

²⁹ Hãmri nhũm kuma nẽ kànhmã xa nẽ ma mẽ ixwỳr htẽm kurê kumrẽx.

³⁰ Hãmri pa mẽ kormã krĩm ixpõx kêt nẽ. Arĩ Matreja Jejus wỳr htẽm xà kamã arĩ ixkrĩ.

³¹ Jakamã nhũm Matre ma tẽ nẽ Marir mã Jejus jarẽ nhũm kato nẽ man mẽ ixwỳr tẽ. Hãmri nhũm Jerujarẽ rũm wa hwỳr mẽ mrrar xwỳnhjaja omu nẽ htỳx kot hkamy hã pika pumunh nẽ mỳr kaxyw htẽm ã hkamnhĩx nẽ man hkõt mra.

³² Hãmri nhũm Marir mẽ hkukamã mẽ ixwỳr tẽ nẽ Jejus pumu nẽ hpar pẽ tẽm nẽ kãm kapẽr pẽ hipõ nẽ mỳr o nhỹ. Nẽ kãm:

—Hêxta gàà nẽ Pahihti. Na pre ra wa ixkamy wa ixpê ty. Kop apu jar mẽ ixkõt ri apa ronhỹx pre htyk kêt nẽ. Hõ mon ka pre we tokyx man mẽ ixwỳr atẽmre hkêt nẽ? Anẽ.

³³ Hãmri nhũm Jejus kuma nẽ mỳr ã omu. Nẽ hkõt mẽ mrrar xwỳnhjaja mẽ mỳr ã mẽ omu nẽ kãm mẽ hkaprĩ nẽ.

³⁴ Hãmri nẽ mẽ kãm:

—Nhỹri na ka prem haxà? E mẽ hwỳr ixto tẽ pa omu. Anẽ.

Hãmri nhũm mẽ kuma nẽ ma hã pyka hwỳr mẽ ixto mỗ

³⁵ nhũm Jejus mẽ uràk nẽ hwỳr mỳr o tẽ

³⁶ nhũm mẽ ja hã omu nẽ axpẽn mã:

—Kwa mãn kãm hapê htỳx. Hã na ho ama nẽ hwỳr mỳr o tẽ. Anẽ.

³⁷ Nom nhũm mẽ hkwỳjaja axtem nẽ mẽ kãm:

—Tk. Ra kot no hkre xwỳnhta o mex tã mo na we tokyx man kormã htĩr ri hwỳr htẽm nẽ omunh nẽ akupỹm ho mex kêt nẽ? Anẽ.

Jejus kot akupỹm Rajare ho htĩr ã harẽn

³⁸ Tã pa mẽ ra kẽn kre kamã mẽ kot Rajare jaxàr xàta wỳr ixpôx o mỗ nhũm Jejus hkaprĩ nẽ hwỳr tẽ nẽ omu. Nhũm prem ra kẽn rax o hitom

³⁹ nhũm omu nẽ mẽ kãm:

—E mẽ akwỳjaja nhãm inhmã nê kahê xà mẽ. Anẽ.

Hãmri nhũm Matre kuma nẽ tee ri hamaxpěr nẽ kãm:

—Xê ma Jejus. Mẽ ri ã anhỹr kêt nẽ. Ra htyk ã arĩgro kệp 4 kẽnã. Mãn ra hkatøk nẽ hkro htỳx kumrêx. Anẽ.

⁴⁰ Hãmri nhũm kuma nẽ kãm:

—Kwa ri ã ajamaxpěr anhỹr kêt nẽ Matre. Na pa ra amã ixkapěr nẽ amã ixkapěr o: “Kot kaj amnhĩ kaxyw ixkôt ajamaxpěr tỳx nẽ. Hã kot kaj Tĩrtũm mẽ wa ixihtỳx o wa ixihtỳx xàja pumu.” Anhỹr o amã ixkapěr. Jakamã kwa ja kaxyw Tĩrtũm mẽ wa ixkôt mãn ajamaxpěr tỳx nẽ hkêt wehe. Anẽ.

Hãmri nhũm kuma nẽ kãm:

—Ma ãm hãmri na ka inhmã akapêr. Ma kot paj kaxyw war amã ijamaxpêr tỳx nê. Anê.

⁴¹ Rôm nhũm mẽ kãm nhãm kên jakwa kre kahê xà mẽ. Hãmri nhũm Jejus Tĩrtũm mã amnhĩ jarênh kaxyw kànhmã kaxkwa hwỳr rĩt nê kãm:

—Pa Papaj. Nà na pa hte tanhmã mẽmoj tã awỳr to ka inhma nê tanhmã inhmã mẽmoj nhĩpêx to. Amex o amex Papaj.

⁴² Na ka hte ã inhmã amnhĩ nhĩpêx anê. Tã pa jajê noo mã ã amã ixkapêr anê. Ate inhmar nê tanhmã Rajare hto nhũm mẽ kot ja hã ixpumunh nê ixte anhỹ hã pix mã tanhmã amnhĩ nhĩpêx to ho ri ixpa hã ixpumunh kaxyw. Nê ka ate mẽ hwỳr inhmênh ã apumunh kaxyw. Anê.

⁴³ Nhũm pre ã Tĩrtũm mã kapêr anê. Hãmri nê kỳx pê Rajare mã kapêr nê kãm:

—Pa Rajare. Kwa tokyx kànhmã nhỹ nê amnê mẽ ixwỳr tẽ nê akato. Anê.

⁴⁴ Puh nhũm akupỹm htĩr nê hkupu xà rãhã tẽ nê mẽ ixwỳr kato nê xa. Arĩ hkuk nê ãhkra nê hpar kupu rãhã mẽ ixwỳr kato nê xa. Hãmri nhũm Jejus mẽ kãm:

—Kwa mẽ atõ nê kupu xà hpôt kê ma akupỹm òrkwỹ hwỳr tẽ. Anê.

⁴⁵ Hãmri nhũm mẽ kot Marir mẽ Matre wa hwỳr mrrar xwỳnh kwỳjaja ã Jejus kot Rajare nhĩpêx anhỹr ã omu nê amnhĩ kaxyw hkôt hamaxpêr nê hkôt amnhĩ xunhwỳr kurê kumrêx.

⁴⁶ Nom nhũm mẽ hkwỳjaja axtem nê omu nhũm ja mẽ kêp omnuj nê. Jakamã nhũm mẽ ma Parijew nhõ xwỳnhjê hwỳr mra nê mẽ kãm harê.

Mẽ kot Jejus pĩr ã amnhĩ grônh

Matêwre 26.1-5; Makre 14.1-2; Rukre 22.1-2

⁴⁷ Hãmri nhũm Parijew nhõ xwýnhjaja tee ri Jejus kot akupým Rajare ho htĩr ã harẽnh ma hãmri nẽ patre krãhtũmjê mẽ amnhĩ wýr mẽ inhõ juisti ho akuprõ nẽ axpẽn mã Jejus o kapẽr punuj pê hã axpẽn mar o hkrĩ. Hãmri nhũm mẽhõ mẽ kãm:

—Kwa tanhmã kot puj mẽ ho? Na ra mẽ kãm mẽmoj pumunh kêt kwý ho anhýr rax o pa.

⁴⁸ Kot puj mẽ ãm omu nẽ tanhmã ho hkêt nhũm mẽ pahkwýjaja kot ã amnhĩ nhĩpêx anhýr ã omu nẽ htýx ãm hãmri ã kot amnhĩ nhĩpêx anhýr ã hkamnhĩx. Hãmri nẽ amnhĩ kaxyw hkôt hamaxpẽr nẽ hkôt amnhĩ xunhwý. Jao ra amnhĩ kaxyw kêp mẽ õ pahĩti hã ãm. Kojã mẽ ã amnhĩ nhĩpêx anẽ nhũm Rõm kamã pahĩtija mẽ kot kator nẽ hpãnhã Jejus xãm ã harẽnh ma. Hãmri nẽ gryk xàj mẽ pahwýr õ pôristi hkwy rẽ nhũm mẽ pahwýr mra nẽ mẽ panhĩmex pa nẽ Tĩrtũm nhõrkwý grãnh pa. Kwa tanhmã kot puj wem tokyx amnhĩ nẽ ho? Anẽ.

⁴⁹ Hãmri nhũm Kajpas mẽ kãm kapẽr. Kajpasja na pre amgràja kamã kêp mẽõ patre nhõ pahi maati. Jakamã mẽ kãm:

—Nà na pa ra ijamaxpẽr. Kwa mẽ inhma.

⁵⁰ Nà kot puj mẽ hpĩr tokyx anẽ kê tapxipix ty pu mẽ arĩ mýrpê pahpiitã pajamakêtkati nẽ ri papa. Anẽ.

⁵¹ Nhũm pre ã mẽ kãm kapẽr anẽ. Nom amnhĩ krã hkôt ã mẽ kãm kapẽr anhýr kêt nẽ. Arĩ kêp mẽõ patre krãhtũmjê nhõ pahi maati jakamã Tĩrtũm nhỹ hã Jejus kot Ijaew nẽ tykja kukamã ã harẽnh anẽ. Nom ja hã amnhĩ pumunh kêt nẽ.

⁵² Na pre Jejus mẽ ixpê Ijaew pix nê htyk kêt nê. Krĩ piitã hkôt Tĩrtũm krajê nê na pre ty. Mẽ piitã mẽ kot axpẽn to hkwỳ nê ri axpẽn to pa kaxyw na pre mẽ nê ty.

⁵³ Hãmri nhũm ã Kajpas mẽ kãm kapêr anê nhũm mẽ inhõ pahijaja kuma nhũm ja mẽ kãm mex nê. Jakamã nhũm mẽ kot tanhmã Jejus ã àmnênh to nhũm mẽ kot mẽ kãm tanhmã hpĩr to kaxyw ã axpẽn mar anhỹr o pa.

⁵⁴ Jakamã nhũm Jejus axte mẽ noo mã ri pa hkêt nê. Hãmri ma krĩ pê Epraĩ hwỳr ma mỗ. Pa mẽ hkôt ixpa ho ixpa xwỳnhjaja ma hkôt ixpa. Epraĩja kapôt ã krĩ na pre. Jakamã pa mẽ ma hwỳr mỗ hãmri nê kamã ri ixpa.

⁵⁵ Tã nhũm arĩgro pê Pasja ra ahtêp o mỗ. Amnepêm finat Mojes kot Ejit rũm mẽ panhĩgêjtjê kator mã hamaxpêr kaxyw na pa pre htem hã ixkĩnh kaxyw Pas ã Jerujarê hwỳr akuprỗ. Na pa pre htem hwỳr pỏj nê kamã Tĩrtũm noo mã mẽ inhmex kaxyw tanhmã amnhĩ nhĩpêx to.

⁵⁶⁻⁵⁷ Jakamã nhũm ra Ijaew ohtô nê ma Jerujarê hwỳr pa. Nê kãm Jejus pumunh prãm xaj Tĩrtũm mã amnhĩ jarênh xà hã ixkre wỳr mra nê hwỳr agjê nê kamã hapêr nê axpẽn mã:

—Kwa nok? Xà koja mẽ hpakĩnh wỳr mỗr kêt nê nà? Anê.

Nhũm Parijew nhõ xwỳnhjê mẽ mẽ inhõ patre krãhtũmjaja haxwỳja hapêr o kuhê. Nom mẽ kot axtem nê unê nê haxàr kaxyw. Jakamã mẽ kãm hã karõ nê mẽ kãm:

—E kêt ka mẽ nhỹri Jejus pumu nê man mẽ ixwỳr mra nê mẽ inhmã harênh kurê kumrêx. Anê.

12

Marir kot Jejus kuxwa hã harênh

Matêwre 26.6-13; Makre 14.3-9; Rukre 7.36-50

¹ Tã nhũm ra Pas wỳr apkati grêre. Ra hwỳr apkati kêp 6. Jakamã pa mẽ ma akupỳm krĩ pê Petãn wỳr Jejus kôt mỗ. Jejus kot akupỳm Rajare ho htĩr xwỳnhnta mẽ õ krĩ hwỳr pa mẽ akupỳm mỗ nê Rajare nhõrkwỹ hwỳr pỏj nê mẽ hwỳr agjê.

² Hãmri nhũm mẽ Jejus pumu nê hkĩnh nê. Nê mẽ inhmã mẽmoj mex nhĩpêx pa mẽ ixàpkur o ixkrĩ. Nhũm Rajare haxwỳja mẽ ixkutã apkur o nhỹ. Nhũm htõx Matre mẽ inhmã mẽõ ho pa nê mẽsti hã unhwỳr o xa.

³ Hãmri nhũm wa htõx Marir Jejus kukamã tanhmã hamaxpêr to nê hamaxpêr o:

—Ma kot paj tokyx mẽ kot mẽ ixpê hpĩr kukamã mẽ hkuxwaxà ho hkuxwa. Anê.

Hãmri nê kàx rax kãm mẽ hkuxwaxàja py nê o tẽ. Ra rit kahti hkôt hitep xà nhũm kupy nê hwỳr o tẽ. Mẽ kot mẽmo htwỳm o mẽ hkuxwaxà mex nhĩpêxja na pre hã kàxpore xohtỏ rax kumrêx. Jakamã nhũm kupy nê Jejus wỳr o tẽ nê hpar ã hkapĩr pa nê amnhĩ krã hkĩ ho hpar grà ho nhỹ nhũm ra ixkre kuxwa htỳx kumrêx.

⁴ Hãmri nhũm mẽ inhĩỏ pê Jut Kariotja. Kot kormã mẽ ìhkram Jejus nhõr mã xwỳnhnta tee ri ã kot amnhĩ nhĩpêx anhỹr ã omu nhũm ja kêp omnuj nê

⁵ nhũm mẽ inhmã:

—Tk. Kwa pêr mẽ hkuxwaxà hã kàxpore xohtỏ rax kumrêx tã nhũm ri axtem nê Jejus par ã hkapĩr pa. Mo na ma o htẽm nê ho wẽnê nê hpãnã kàxpore ho rax nê hpyr nê ho mẽ kêp amrakati

xwýnhjê nhĩpêx kêt nê? Kot ho wênê ronhỹx hpãnhã kàxpore ho rax kumrêx nê kupy nê ho mẽmoj japrôr rax o rax. Tã axtem nê amarĩ Jejus par ã hkapĩr pa. Anê.

⁶ Te kãm mẽ kêp amrakati xwýnhjê japê pyræk tã kãm mẽ hapê hkêt. ãm hêx rom ã kapêr anê. Na pre hte mẽ inhmã mẽ ixkàxpore jamý nê mẽ ixkôt mẽ inhmã hamãr o pa. Nom tãhã axtem nê mẽ ixpê hkwy ho ahkĩ nê ho amnhĩm mẽmoj japrô. Jakamã Marir kot mẽ hkuxwaxà ho hapêx par ã omu nê tee ri hpãnhã kàxpore rax mã hamaxpêr nê kamã gryk nê ã mẽ inhmã kapêr anê.

⁷ Hãmri nhũm Jejus amnhĩ tã hamaxpêr ã omu nê kãm:

—Tk. Kwa tanhmã kãm akapêr to hkêt nê. Ixtyk nhũm mẽ kot ixkuxwa hkukamã na ã inhĩpêx anê.

⁸ Na hte mẽ kêp amrakati xwýnhjaja mẽ akôt pa rãhã nê. Ka mẽ amã mẽmo arĩgro hã tanhmã mẽ ho ajuta hto hprãm nê rĩ mẽ ho ajuta nê mẽ kãm mẽmoj gõ. No kêt pa kot paj ri mẽ akôt ixpa ka mẽ ixto mex ry ho apa hkêt nê. Kot paj tokyx mẽ apiitã mẽ are. Jakamã ãm hãmri na ã inhĩpêx anê. Anê.

Patre krãhtũmjaja kot Rajare hã àmnênh ã harênh

⁹ Rôm nhũm Jerujarê nhõ xwýnhjaja ra Jejus Petãn wýr hpôx ã harênh ma nê kot omunh mã ma hwýr mra. No ãm tapxipix pumunh mã hwýr mrrar kêt nê. Mããnênh kot akupým ho htĩr xwýnhhta pumunh mã nhũm mẽ ma hwýr mra.

¹⁰⁻¹¹ Na pre ra Ijaew ohtô nê Jejus kot akupým Rajare ho htĩr ã harênh ma hãmri nê mẽ inhõ patre kaga nê Jejus kôt amnhĩ xunhwý. Jakamã nhũm patre krãhtũmjaja tee ri ja hã mẽ omu nê axpên mã:

—Nà kot puj mẽ Jejus pix pĩr kêt nê. Kot puj mẽ mãñnên hkôt Rajare pĩ hãmri nhũm wa hixi hamẽ mẽ kêp hapêx japêr. Anê.

Jejus kot Jerujarẽ hwỳr àr ã harênh

Matêwre 21.1-11; Makre 11.1-11; Rukre 19.28-40

¹² Tã nhũm apkati nhũm Ijaew Jerujarẽ kamã mẽ hkĩnhja kryx nê Jejus ra mẽ hwỳr àhtêp o mõi ã harênh ma.

¹³ Hãmri nê axpên mã:

—Kwa ma pu mẽ mõi nê pô hkwỳ jakà nê kutã ho mra. Anê.

Hãmri nê hkwỳ jakà nê hamỳ nê ma kutã ho mra. Hãmri nê ra hkaxpa nê omu nê hkĩnh nê. Nê kãm:

Pa. Nà ãm hãmri na ka mẽ ixwỳr mõi. Tĩrtũm na pre mẽ ixwỳr amẽ ka ã amõi anê.

Tĩrtũmja mex o mex. ãm hãmri na pre mẽ ixwỳr amẽ.

Kot kaj mẽ inhõ pahi hpãnhã mẽ ixto amnhĩptàr o ri apa. Anê.

¹⁴ Hãmri nhũm Jejus nhỹri jumênre pumu nê hwỳr tẽ nê hã nhỹ nhũm mẽ pimràatã ma akupỹm Jerujarẽ hwỳr mõi. Tĩrtũm kapêr ã kagà htũm ra kot ja jarênh kot:

¹⁵ Pa Jerujarẽ nhõ xwỳnhjaja. Kwa mẽ tee ri amnhĩ kukamã ajamaxpêr ho amã ma hkêt nê.

Ota mẽ anhõ pahi nyw ra mẽ awỳr jumênre hã nhỹ nê hpôx o tẽ. Anê.

¹⁶ No Jejus kôt mẽ ixpa ho mẽ ixpa xwỳnhjaja pa mẽ ã kot amnhĩ nhĩpêx anhỹrja ã omu nê tee ri hkukamã ijamaxpêr nê axpên mã:

—Kwa mo na ri ã amnhĩ nhĩpêx anê nê jumênre hã nhỹ nê mẽ hkôt mõi? Anê.

Tã nhũm arĩgro hõ hã ty nẽ akupỹm kaxkwa hwỳr api pa prem hã omu hãmri nẽ kormã Tĩrtũm kapẽr ã kagà htũm kot hkukamã ã harẽnh kot anhỹrja mã ijamaxpẽr kurê kumrêx. Hãmri nẽ axpẽn mã harẽnh o:

—Kwa ãm hãmri na Tĩrtũm kapẽr ã kagà htũm kot ra ã Kraja jumẽnre hã ỹr nẽ mẽ hkôt mõi ã hkukamã kot harẽnh anhỹrta. Anẽ.

¹⁷ Hãmri nhũm Jejus kot Rajare mã kapẽr pẽ akupỹm ho htĩr ã omunh xwỳnhjaja arĩ nhãm mẽ hkwỳjê mã ujarẽnh o pa.

¹⁸ Nhũm mẽ kuma nẽ ma Jejus wỳr omunh mã mra.

¹⁹ Hãmri nhũm Parijew nhõ xwỳnhjaja tee ri ja hã mẽ omu nẽ axpẽn mã:

—Kwa na pu mẽ tee ri Jejus nẽ mẽ kãm pakapẽr kaprỳ nhũm mẽ pamar kêt nẽ ra piitã hkôt amnhĩ nhĩpêx o pa. Kwa nà. Anẽ.

Ijaew kêt xwỳnhjê jarẽnh

²⁰ Tã nhũm ra Gres kwỳjaja Ijaew kôt hkĩnh kaxyw ma Jerujarẽ hwỳr mẽ hkôt mra nẽ mẽ ãhkô hã Tĩrtũm mã mex o mex ã harẽnh o hkôt mra.

²¹ Jakamã nhũm mẽ nhỹri mẽ inhĩõ pẽ Firipti pumu nẽ hwỳr mra. Firipti kêp pyka pẽ Garirej kamã krĩ pẽ Pesêj nhõ xwỳnh nhũm Gres nhõ xwỳnhjaja omu nẽ hwỳr mra nẽ kãm:

—Pa. Kwa na pa mẽ inhmã Jejus pumunh prãm nẽ. Tanhmã kot pa wem amnhĩ to nẽ omu nẽ kãm ixkapẽr? Anẽ.

²² Hãmri nhũm mẽ kuma nẽ ma Andre hwỳr mẽ o mra nẽ kãm mẽ harẽ. Hãmri nẽ wa ma Jejus wỳr mẽ o mra nẽ kãm mẽ harẽ nẽ kãm:

—Pa Pahihti. Ota Gres nhõ xwỳnhjaja kām apumunh prām nẽ awỳr mō. Mẽ pahkĩnhã mẽ kệp Ijaew kêt tã mẽ kām apumunh prām nẽ. Anẽ.

Jejus kot amnhĩ kukamã amnhĩ jarẽnh

Matêwre 16.24-28; mããnẽn Apokarip 2.10, 12.11

²³ Hāmri nhũm Jejus mẽ omu nẽ mẽ kām tanhmã amnhĩ jarẽnh to. Kot mẽ ohtô nẽ mẽ nê htyk nhũm mẽ kukwak ri Tĩrtũm wa kuri htĩr tũm nẽ pa ho pa hã mẽ kām amnhĩ jarẽ nẽ mẽ kām:

—Nà na ra ixyk ã arĩgro hwỳr apkati grêre. Ixpê Tĩrtũm kot mẽ akaxyw ixãm xwỳnh jakamã kot paj mẽ apiitã mẽ anê ty hāmri nẽ akupỹm ixtĩr nẽ ma kaxkwa hwỳr akupỹm api.

²⁴ Mẽ axohtô nẽ nhỹrmã Tĩrtũm mẽ wa ixri atĩr tũm nẽ apa ho apa kaxyw kot paj ã amnhĩ nhĩpêx anẽ. Kwa mẽ ã ixte amnhĩ jarẽnh anhỹrja ma nẽ mẽ amnhĩ krãm haxàr tỳx nẽ ri hã apa. Te ixte mẽmo hy kot amnhĩ nhĩpêx pyræk. Na htem pikap hagjê nhũm te htyk pyrà nẽ pika kaxwỳnh kãm hikwỹ. Tã gaa nẽ higrõt nẽ hprêk nẽ ô. Nẽ ô rax kumrêx. Hyja pyxire nẽ hikwỹ htã kamã ô rax kumrêx. Nom koja mẽ hkre hkêt nẽ nhũm ô hkêt nẽ. Na hte ã mẽmo hyja amnhĩ nhĩpêx anẽ. Ja pyrà nẽ kot paj mẽ anê ixyk kêt nẽ te mẽ kot mẽmo hy hkre hkêt nhũm hprêk nẽ ô hkêeta pyræk ka mẽ ixkukwak ri Tĩrtũm mẽ wa ixri atĩr tũm nẽ apa hkêt nẽ. Jakamã kot paj mẽ anê ty nhũm mẽ ijaxà. Hāmri pa akupỹm ixtĩr ka mẽ axohtô nẽ ixkukwak ri wa ixri atĩr tũm nẽ apa ho apa.

²⁵ —Nẽ koja mẽ ixpĩ pa mẽ anê ty. Tã mẽ ate ixkôt amnhĩ nhĩpêx o apa xwỳnhjaja. Koja mẽ ixtã mẽ apar mã tã kwa kêr ka mẽ atyk pymaj ixkaga

hkêt nê. Kwār mẽ māmri tanhmã ixtã mẽ ato ka mẽ nhỹrmã Tĩrtũm mẽ wa ixri axte amnhĩ xà kamã ajamak kêt kumrêx nê atĩr tũm nê amex nê apa ho apa. No kot kaj mẽ ixkĩnhã jar amã amex pix prãm hãmri nê nhỹrmã wa ixri atĩr tũm nê apa hkêt nê.

²⁶ Kot kaj mẽ ã ixkôt amnhĩ nhĩpêx anhỹr o ri apa hãmri nhũm mẽ kot inhĩpêx pyræk o mẽ anhĩpêx. Hãmri ka mẽ nhỹrmã ma ixkôt kaxkwa hwỳr api nê kamã ixri atĩr tũm nê apa ho apa. Hãmri nhũm Inhĩpêxà ixtã mẽ apumu nê mẽ ato mex kumrêx. Anê.

Tĩrtũm kot Jejus mã kapêr ã harênh

Matêwre 3.17, 17.5

²⁷ Tã nhũm Jejus tee ri amnhĩ kukamã htyk mã hamaxpêr nê hkaprĩ htỳx nê. Nê hkôt mẽ ixpa ho mẽ ixpa xwỳnhjê mã amnhĩ jarê nê mẽ inhmã:

—Hêxta waa nê. Na pa tee ri amnhĩ kukamã ijamaxpêr. Nê tee ri amnhĩ xà htỳx kamã ijamak kukamã ijamaxpêr pê ra amnhĩ kamã ixkahak nê. Nom ixte pika piitã hkôt mẽ kot ixkôt amnhĩ xunhwỳr xwỳnhjê nê ixtyk kaxyw ixwryk kênã. Jakamã kot paj Inhĩpêxà kot mẽ kêp ixpytâr kaxyw tanhmã amnhĩ to hwỳr to hkêt nê. Anê.

²⁸ Hãmri nê hpãnhã Hipêxà mã kapêr nê kãm:

—Pa Papaj. ãm mẽmoj pixi na inhmã hprãm. Kê mẽ piitã ixkukwak ri amex o amex ã apumu. Ja na kêt inhmã hprãm tỳx kumrêx.

Anhỹr o Tĩrtũm mã amnhĩ jarê. Hãmri nhũm kuma nê kaxkwa rũm kãm kapêr. Kỳxpê kãm kapêr nê kãm:

—Nà na pa pre ra ã mẽ kãm amnhĩ to amnhĩrĩt anê nhũm mẽ ja hã ixpumu. Tã kot paj axte

akukwak ri amnhĩ to amnhĩrĩt nhũm mẽ piitã axte inhmex o inhmex ã ixpumu. Anẽ.

²⁹ Nhũm pre ã Tĩrtũm Jejus mã kapër anẽ. Hãmri nhũm mẽ kot mẽ ixkuri mar o kuhê xwỳnhjaja kuma no ãm hprĩ hã kot kãm tanhmã kapër toja mar mex kêt nẽ. Nẽ htỳx ho ãm mẽmoj tã hkamnhĩx. Jakamã nhũm mẽ hkwyjaja xpẽn mã:

—Kwa mo na wehe? Na mãn katõtõk nà? Anẽ.

Nhũm mẽ hkwyjaja mẽ kãm:

—Nà na katõtõk kêt. Tĩrtũm kapër o wryk xwỳnh mãn tanhmã kãm kapër to. Anẽ.

³⁰ Hãmri nhũm Jejus mẽ kãm:

—Nà Tĩrtũm tãm na inhmã kapër. Nom pa ixte mar kaxyw inhmã kapër kêt nẽ. Mẽ kajaja mẽ ate ixtã mar kaxyw na kỳx pê ã inhmã kapër anẽ. Anẽ.

Hãmri nẽ mẽ kãm:

³¹ —E hãmri. Kot paj tokyx mẽ apiitã mẽ ate amnhĩ tomnuj pãnhã amnhĩrer kaxyw tanhmã amnhĩ nhĩpêx to. Jao mããnẽn Satanasti pê hihtỳx xà ho ijapêx.

³² Koja mẽ pĩ kahpa hã inhô pa kỳxpê ajêt. Tĩrtũm kot mẽ awỳr inhmẽn hã nhũm mẽ ã inhĩpêx anẽ pa ty. Jakamã koja pika piitã hkôt mẽ ohtô nẽ ixkôt amnhĩ xunhwỳ nẽ amnhĩ kaxyw inhmã hamaxpër rãhã ho pa. Anẽ.

³³ Mẽ ixte tanhmã htyk to hã harẽn hã mar kaxyw nhũm pre ã mẽ inhmã amnhĩ jarẽn hã anẽ.

³⁴ Hãmri nhũm mẽ kot mẽ ixkuri mar o kuhê xwỳnhjaja tee ri kot htyk ã amnhĩ jarẽn hã ma nẽ kãm:

—Kwa mẽ ixte amnhĩ wỳr kamã ijamak o ixpa xwỳnhja htĩr tũm nẽ pa ho pa xwỳnh na. Tĩrtũm kapër ã kagà htũm kot ã harẽn hã kot anhỳr tã ka ã

ri mẽ kot apĩr nhũm atyk ã amnhĩ jarẽnh anẽ. Ate Tĩrtũm kot mẽ ixwỳr amẽnh xwỳnh ã amnhĩ jarẽnh tã ã ri atyk ã amnhĩ jarẽnh anẽ. Kwa xà apê mẽ ixte amnhĩ wỳr kamã ijamak o ixpa xwỳnh kêt? Anẽ.

³⁵ Hãmri nhũm mẽ kuma nẽ amnhĩ tã mẽ kãm:
 –Tỳ ixpê tãm kênã. Tã kot paj tokyx mẽ are. Jakamã kêt ka mẽ ixte arĩ mẽ akamã ixpa ri ixkôt amnhĩ xunhwỳ nẽ amnhĩ kaxyw ixkôt ajamaxpěr o ri apa. Te ixpê kanê hpôk pyræk jakamã na pa hte mẽ kãm Tĩrtũm kapěr o mẽ ahkre o ri ixpa. Nom kot paj kritpêm mẽ akôt ixpa ry hkêt nẽ. Jakamã kwa kêt ka mẽ tokyx te mẽ kot kanê hpôk nhĩrã kamã ri mẽ pa xwỳnh kot amnhĩ nhĩpêx pyrã nẽ Tĩrtũm kôt amnhĩ nhĩpêx o ri apa. Kormã mẽ akôt ixpa ri. Kot paj tokyx ma mỗ nhũm te ra kamàt kô pyræk. Na hte kamàt kô kamã mẽ pa xwỳnhjaja tee ri rĩt mex mã nom rĩt mex kêt nẽ. Nẽ mẽmoj pumunh mex kêt nẽ.

³⁶ Jakamã kwa mẽ tokyx ixte arĩ mẽ akamã ixpa ri amnhĩ kaxyw inhmã ajamaxpěr nẽ ixkôt amnhĩ xunhwỳ. Te ixpê kanê hpôk nhũm kamã mẽ arĩt mex pyræk. Jao ixpyrà nẽ te mẽ apê kanê hpôk nhĩrã mex pyræk o amnhĩ nhĩpêx. Nẽ ixpyrà nẽ tãm ri amnhĩ nhĩpêx o apa. Anẽ.

Nhũm pre ã mẽ kãm kapěr anẽ hãmri pa mẽ kệp ixkato nẽ ma nhãm mỗ.

Mẽ hkwỳjaja kot Jejus kôt hamaxpěr kêt ã mẽ harẽnh

³⁷ Na pre hte Jejus mẽ noo mã mẽ kot aa mẽmoj pumunh kêt kwỳ ho anhỳr rax o pa. Tã nom nhũm mẽ ohtô nẽ hã omu nẽ ãm hã omu nẽ kệp Tĩrtũm kot mẽ pahwỳr mẽnh xwỳnh ã hkôt hamaxpěr kêt nẽ.

38 Nom ra mẽ hkukamã Tĩrtũm nhỹ hã kapẽr jarẽnh o pa xwỳnh pẽ finat Ijaisja mẽ hkukamã ja hã mẽ harẽ nẽ hã kagà. Nẽ hã kagàja o:

Pa Pahi Maati. Nà ra ixte mẽ kãm ajarẽnh o ixpa ryy htã no nhũm mẽ inhma nẽ ãm inhma.

Nẽ mẽ kot axihtỳx o axihtỳx ã ajarẽnh mar tã no ãm ajarẽnh ma nẽ amnhĩ kaxyw akõt hamaxpẽr kêt nẽ. Anẽ.

39 Mẽ kãm Tĩrtũm kapẽr mar prãm kêt jakamã na prem mãânẽn Jejus kệp Tĩrtũm kot mẽ pahwỳr mẽnh xwỳnh hkõt hamaxpẽr kêt nẽ. Nhũm pre finat Ijaisja axte mẽ hkukamã ja hã mẽ harẽ nẽ mẽ hã kagà. Nẽ hã kagà ho:

40 Na pre Tĩrtũmja tanhmã amnhĩ nê mẽ hkrã hto nhũm mẽ hkõt hamaxpẽr kêt nẽ.

Ra mẽ kot hihtỳx o hihtỳx ã omunh tã omu nẽ ãm omu.

Nẽ mẽ kot kapẽr mar tã amnhĩ tomnuj kaga hkêt nẽ.

Nẽ Tĩrtũm kot mẽ nê mẽ kot amnhĩ tomnuj o hapêx prãm xàj hkõt amnhĩ xunhwỳr kêt nẽ. Anẽ.

41 Kormã Jejus mẽ hwỳr wrỳk kêt ri nhũm finat Ijaisja hpimtir kãm kot amnhĩ to rax kumrẽx ã omu nẽ hkukamã ã harẽnh nẽ hã kagà anẽ.

42 Hãmri nhũm Ijaew krãhtũm kwỳjaja hkwyjê rom amnhĩ kaxyw Jejus kõt hamaxpẽr nẽ hkõt amnhĩ xunhwỳ. Tã Parijew nhõ xwỳnhjaja kot ã mẽ kot amnhĩ nhĩpêx anhỹr ã mẽ harẽnh mar pymaj ja hã amnhĩ to amnhĩrĩt kêt nẽ. Mẽ kot Tĩrtũm kapẽr o mẽ ahkre xà hã ixkreja nê mẽ kator pymaj nhũm mẽ kãm amnhĩ to amnhĩrĩt kêt nẽ.

43 Na prem hamaxpẽr o:

—Nà kot paj ja hã amnhĩ to amnhĩrĩt nhũm mẽ amnhĩ nê ixtomnuj nê. Hãmri nê amnhĩ pyrà nê axpẽn mã inhmex ã ijarẽnh kêt nê.

Anhỹr o mẽ umaj amnhĩ kukamã hamaxpêr o pa. Nom Tĩrtũm tãm kot amnhĩm mẽ mex ã mẽ harẽnhja nhũm mẽ hkukamã hamaxpêr kêt nê.

Jejus kot Hipêêxà nhỹ hã kapêr ã harẽnh

⁴⁴ Nhũm Jejus axte mẽ kãm kapêr nê kýt pê kapêr nê mẽ kãm:

—Nà koja mẽhõ amnhĩ kaxyw ixkôt hamaxpêr hãmri nê ixkôt pix mã hamaxpêr kêt nê. Mããnẽn amnhĩ kaxyw kot mẽ awỳr inhmẽnh xwỳnhja kôt hamaxpêr.

⁴⁵ Wa ixte amnhĩ nhĩpêxja te tipxi pyràk jakamã koja mẽ tanhmã ixte amnhĩ nhĩpêx to hã ixpumu nê te kot Tĩrtũm kot amnhĩ nhĩpêx ã omunh pyràk.

⁴⁶ —Nê te ixpê kanê hpôk nhũm inhĩrã kamã mẽ apa pyràk kaxyw na pre Inhĩpêêxà mẽ awỳr inhmẽ pa mẽ awỳr wrỳ. Ixte kapêr o mẽ ajahkre ho ri mẽ akôt ixpa kaxyw. Jakamã koja mẽhõ amnhĩ kaxyw ixkôt hamaxpêr nê ixkôt amnhĩ xãm hãmri nê te kanê hpôk nhĩrã kamã rĩt mex o pa pyràk o amnhĩ nhĩpêx. Jao amnhĩ nhĩpêx nyw o amnhĩ nhĩpêx o pa.

⁴⁷⁻⁴⁸ No mẽ kot ixkapêr mar nê ãm mar xwỳnhjaja te mããnẽn Inhĩpêêxà kapêr mar nê ãm mar pyràk. Mỳrapê koja mẽ nhỹrmã ma kuwy hwỳr pa nê mẽ kot amnhĩ tomnuj mỳrapê kamã pa ho pa. Tã no ã mẽ ate amnhĩ nhĩpêx anhỹr o ri mẽ apa kaxyw na pa pre mẽ awỳr ixwrỳk kêt nê. Ixte mẽ ate amnhĩ tomnuj pãnhã amnhĩrer par kaxyw na pa pre mẽ awỳr wrỳ.

49 —Nē na pa hte amnhĩ krā hkôt tanhmā ri mẽ amā ixkapēr to ho ri ixpa hkêt nē. Ām kot mẽ awỳr inhmēnh xwỳnhja nhỹ hā na pa hte tanhmā mẽ amā ixkapēr to ho ri mẽ akôt ixpa.

50 Tā mẽ kot Tĩrtũm kapēr mar nē amnhĩ kaxyw hkôt hamaxpēr xwỳnhjaja koja mẽ nhỹrmā wa ixri htĩr tũm nē mex nē pa ho pa. Jakamā na pa hte tanhmā kot inhmā karō hto xà hkôt pix mā tanhmā mẽ amā ixkapēr to ho ri ixpa. Anē.

13

Jejus kot hkwỳjê hpar kuhõnh ã harēnh

Rukre 22.24-27

¹ Tā nhũm ra Pas ã mẽ ixkĩnhta ahtêp. Pas ã na hte mẽ ixpê Ijaewjaja axpēn wỳr akuprō nē hā ôwêhti hkra nyw pa nē ho anē nē hkur o ixkrĩ. Amnepēm Tĩrtũm kot pika pē Ejit rũm mẽ inhĩgêxjê kator kaxyw nhũm mẽ nojarêt nē ã hkwỳ hpar nē ho anhỹr nē hkwỳ hkurta pyrāk. Na prem nojarêt nē mẽ hkra my kot wa mẽ kēp htyk pumaj ôwêhti hkra nyw kwỳ hpa nē ho anē nē ĩ hku. Jakamā nhũm arĩ mẽ ixpê mẽ hkanrēhã mẽ htàmnhwỳjaja ã mẽ kot amnhĩ nhĩpêx anhỹrja mã ijamaxpēr nē hā ixkĩnh kaxyw mẽ urāk nē hkwỳ hpa nē kuku. Jakamā nhũm ra Pas ahtêp nhũm Jejus amnhĩ kukamā tanhmā hamaxpēr to kurê kumrêx. Ra ma akupỹm Hipêêxà hwỳr àpir xà hā arĩgro hwỳr apkati grêre. Jakamā nhũm akupỹm nojarêt ã amnhĩ pumu nē kām mẽ pahte hkôt amnhĩ xunhwỳr xwỳnhjê japê jakamā kām mẽ pajapê rāhã mẽ panê htyk mã.

² Tā nhũm myt axà pa mẽ Pas ã ixàpkur o ixkrĩ. Nhũm Simāw Kariot kra Jut Kariotja mãănēn mẽ

ixkutã apkur o nhỹ. Kêp mẽ ixkwỳ htã nhũm pre Satanasti tanhmã hkrã hto nhũm ra axtem nẽ kot mẽ kãm Jejus kurê xwỳnhjê nhĩhkram haxàr kaxyw.

³⁻⁴ Tã pa mẽ kormã axpẽn kutã ixàpkur kaxyw ixkrĩ hpa nhũm Jejus kãnhmã xa nẽ hinôkã kapa nẽ toajti py nẽ ho amnhĩ krax pre. Kot amnhĩ to rax ã amnhĩ pumunh tã ja hã amnhĩ to jarkrar pê tanhmã ri mẽ inhnoo mã amnhĩ nhĩpêx to ho pa hkêt. Kêp mẽ inhõ pahi htã te kêp mẽ inhmã àpênh xwỳnh pyrãk o amnhĩ nhĩpêx o pa.

⁵ Jakamã toajti py nẽ ho amnhĩ krax pre nẽ pasiiti hõ py nẽ kamã gô hkwy ru nẽ ho mẽ ixpar kuhõ nẽ toajti o mẽ ixpar grã ho mõ.

⁶ ã mẽ inhĩpêx anhỹr o mõ. Pê ra hpãnhã Simãw Pêtre hpar kuhõnh kaxyw nhũm tee ri amnhĩ tã omu nẽ kãm:

—Tk. Kwa apê inhmã axàpênh xwỳnh kêt kênã kot ka kêt ri axtem nẽ ixpar kuhõ Pahihti. Apê mẽ inhõ Pahi kênã kot ka kêt ã mẽ inhĩpêx anẽ. Anẽ.

⁷ Hãmri nhũm kãm:

—Kwa nà. Kormã ate ja hã amnhĩ tã ixpumunh mex kêt. Nom kot kaj nhỹrmã aprĩ hã amnhĩ tã ixpumu. Anẽ.

⁸ Hãmri nhũm kãm:

—Nà nom kot kaj ãm ixpar kuhõnh kêt nẽ. Kwarĩ. Anẽ.

Hãmri nhũm Jejus kãm:

—Tôe. Kot paj apar kuhõnh kêt nẽ ka te apê ixkwỳ hkêt pyrãk. Anẽ.

⁹ Hãmri nhũm tee ri kuma nẽ kãm:

—Tôe mamrĩ ixpar kuhõ. Nom ixpar pix kuhõnh kêt nê. Mããnên inhĩkra kuhõ nê ixkuk kuhõ. Inhmã ixte apyràk prãm tỳx kumrêx kênã. Anê.

¹⁰ Hãmri nhũm Jejus kãm:

—Nà amỹkry hkôt mẽ wỳr xwỳnhjaja na htem mex nê axte wỳr kêt rãhã hikwỹ. Na htem ãm amnhĩ par pix kuhõ nê hikwỹ. Ja pyrà nê Tĩrtũm kot mẽ anê mẽ ate amnhĩ tomnuj ho hapêx par xwỳnhjaja te amỹkry hwỳr mẽ axwỳr nê amex pyràk. Ka mẽ te mẽ kot amnhĩ par pix kuhõnh ta pyrà nê axte tanhmã amnhĩ tomnuj to hãmri nê Tĩrtũm mã amnhĩ jarênh kurê kumrêx kê anê amnhĩ katut kôt ate amnhĩ tomnujta mẽ nê ho hapêx. Na pre ra mẽ anê mẽ ate amnhĩ tomnuj o hapêx. No ãm mẽ apiitã hkêt. Ota arĩ mẽ anhĩõja pyxire nê arĩ amnhĩ tomnuj rãhã ri pa. Jakamã te wỳr kêt nê arĩ grã htyk rax kãm ri pa pyràk. Anê.

¹¹ Nhũm pre ã Jejus mẽ inhmã kapêr anê. Ra kot hprĩ hã mẽ kot kãm hkurê xwỳnhjê mã õr mã xwỳnhja pumunh jakamã te wỳr kêt nê arĩ grã htyk rax kãm ri pa pyràk ã ã harênh anê.

¹² Tã mẽ ixpar kuhõnh pa nê akupỹm hinôkà py nê haxà nê nhỹ hãmri nê mẽ inhmã:

—E mẽmo kaxyw na pa we ã mẽ apar kuhõnh anê? Kot paj ixprĩ hã mẽ amã amnhĩ jarê ka mẽ inhma.

¹³⁻¹⁴ Na ka htem ixto “mẽ ijahkre xwỳnh” nê ixto “pahihti” anhỹr o ijarênh o ri apa. ãm hãmri na ka htem ã axpên mã ijarênh anê. Ixpê mẽ ajahkre xwỳnh nê mããnên ixpê mẽ anhõ pahihiti htã inhmã mẽ ate tanhmã axpên nhĩpêx to ho apa hprãm xàj na pa ã mẽ apar kuhõnh anê. Tã kêr ka mẽ ixpyrà nê tanhmã axpên to mex to ho ri apa.

15 Jao amnhĩ kuxwar axpẽn to mex pê mẽmoj to axpẽn kutã anojarêt rãhã ho ri apa.

16 Kwa mẽ ixkapěr ma nẽ kãm amnhĩ krãm haxàr tỳx rãhã ho ri apa. Mẽ ate amnhĩ to rax o ijakrenh kêt. Te ixpê mẽ anhõ patrãw nhũm mẽ ate inhmã tanhmã amnhĩ nhĩpêx to ho apa xwỳnh pyràk. Nẽ te ixte mẽmoj tã mẽ amã karõ nhũm mẽ ate inhmar nẽ inhmã tanhmã mẽmoj nhĩpêx to pyràk. Tã te ixpê mẽ anhõ patrãw pyràk tã pa ã mẽ apar kuhõnh anẽ. Ka mẽ amnhĩ tã ixpumu hãmri nẽ amnhĩ xwar tanhmã axpẽn to ajuta hto ho ri apa. No ri axpẽn pumu nẽ ajamaxpěr o: “Tk. Nà ixte amnhĩ to rax o hakrenh kênã kot pa kêt ri tanhmã ho ajuta hto. Kê tãm mãn pa ixto ajuta.” Anhỹr o ajamaxpěr o ri apa hkêt nẽ.

17 —E na pa ã mẽ amã ixujarẽn anẽ. Kot kaj mẽ inhma nẽ ixujarẽn kôt ã axpẽn nhĩpêx anhỹr o ri apa. Hã kot kaj mẽ akĩnh nẽ ri apa. Anẽ.

Jejus kot amnhĩ tã hã àmnênh xwỳnh o amnhĩrĩt ã harẽn

Matêwre 26.20-25; Makre 14.17-21; Rukre 22.21-23

18 Nhũm Jejus arĩ mẽ inhmã kapěr nẽ mẽ inhmã: —Kot kaj mẽ apiitã mẽ akĩnh nẽ apa hkêt nẽ. Ixte mẽ arênh xwỳnhjaja mẽ apiitã mẽ apumunh mex. Jakamã na pa Tĩrtũm kot mẽ apiitã mẽ ate amnhĩ tomnuj o hapêx par kêt ã mẽ anhĩõja jarẽ. Tĩrtũm kapěr ã kagà htũm kot harẽn kot:

Ixkutã apkur o ỹr xwỳnhjê hõ koja axtem nẽ mẽ kot kãm ixkurê xwỳnhjê nhĩhkram ijaxà. Kêp ixkôt pa ho pa xwỳnh tã koja axtem nẽ ã inhĩpêx anẽ.

Anhỹr o kot harẽn. Tã koja tokyx ã inhĩpêx anẽ.

19 Nom kormã kot ã inhĩpêx anhÿr kêt ri na pa hkukamã mẽ amã harẽ. Jakamã koja ã inhĩpêx anẽ ka mẽ ja hã ixpumu nẽ ra ixte amnhĩ kukamã mẽ amã amnhĩ jarênhta mã ajamaxpêr nẽ ixpê Tĩrtũm rũm mẽ awÿr ixwrÿk xwÿnh kôt ajamaxpêr tÿx kurê kumrêx.

20 –Kwa mẽ ixkapêr ma nẽ amnhĩ krã kamã kãm ajamaxpêr tÿx o ri apa. Koja mẽhõ ixte mẽ hwÿr mẽ arênh xwÿnhjê hã tanhmã mẽ ato mex to. Hãmri nẽ te pa kot tanhmã ixto mex to pyrãk. Nẽ koja mẽhõ tanhmã pa ixto mex to nẽ mãânẽn te kot mẽ awÿr inhmẽnh xwÿnhhta tanhmã ho mex to pyrãk. Anẽ.

21 Nhũm pre ã Jejus mẽ inhmã kapêr anẽ. Hãmri nẽ tee ri amnhĩ kukamã hamaxpêr nẽ hkaprĩ nẽ mẽ inhmã:

–Hêxta waa nẽ. Nà kot kaj mẽ atõ mẽ kot kãm ixkurê xwÿnhjê nhĩhkram ijaxà. Kwa mẽ amnhĩ krã kamã ixkapêrja mã ajamaxpêr tÿx nẽ. Anẽ.

22 Hãmri pa mẽ amnhĩ tã kuma nẽ tee ri axpẽn pumunh o ixkrĩ.

23 Ixpê Juãw na pa pre ixpê Jejus kràmnhwÿ mex ã ãhkô hã ixàpkur o inhÿr

24 nhũm Simãw Pêtreja ixpumu nẽ inhmã nomgõr nẽ kawax pê inhmã:

–Kwa mẽ pahtõ nhĩxi hã hkukja nà? Anẽ.

25 Hãmri pa kuma nẽ Jejus mã kãm:

–Kwa Pahшти. Mẽ ixtõ koja we ã anhĩpêx anẽ? Anẽ.

26 Hãmri nhũm mẽ inhmã:

–Nà kot paj pãwti hõ py nẽ guhkrax kãm ho mry kagô nhek nẽ kot mẽ ãhkram ijaxàr mã xwÿnhhta mã kugõ ka mẽ hkôt omu. Anẽ.

Hãmri nê kupy nê ho mry kagô nhek nê Simãw Kariot kra Jut Kariotja mã kugô nhũm kupy.

²⁷ Pyrja kôt nhũm Satanasti tanhmã hkrã hto. Hãmri nhũm Jejus te kot kãm amnhĩ to nojarêt pyrãk o amnhĩ tã kãm kapêr nê kãm:

—E kwa tokyx nà. Anê.

²⁸⁻³⁰ Hãmri nhũm kuma nê kato nê ma kamàt kô kamã htêm kurê kumrêx. Hãmri pa mẽ ixàpkur o ixkrĩ xwýnhjaja Jejus kot ã kãm kapêr anhÿrja ã kuma nê tee ri hkukamã ijamaxpêr. Hãmri nê kot ma mẽ hkĩnh ã mẽõ hkwy japrôr kaxyw ma htêm ã hkamnhĩx. Nhũm mẽ ixkwýjaja axtem Jejus kot mẽ kêp amrakati xwýnhjê mã mẽmoj nhôr ã kãm karô nhũm ma mẽ hwÿr htêm ã hkamnhĩx. Kêp mẽ inhmã mẽ ixkàxpore jamãr o pa xwýnh jakamã pa mẽ ã ixtÿx mẽmoj tã hkamnhĩx anê.

Jejus akupÿm nojarêt nê mẽ kãm mẽmoj tã karô hã harênh

Matêwre 22.39-40; mããnêñ Wam Juãw 3.11-24

³¹⁻³² Hãmri nhũm Jejus mẽ inhmã:

—Nà kot kaj mẽ tokyx mẽmoj pumu nê Tĩrtũm mã mex o mex ã harê nê ijaxwÿja inhmã inhmex o inhmex ã ijarê. Kot kaj mẽ tokyx mẽmojta pumu kãm ga.

³³ —Te mẽ apê ixkra pyrãk tã kot paj arĩ ri mẽ akôt ixpa grire hãmri nê ma akupÿm api. Kot kaj mẽ tee ri jar ijapêr o ri apa nom nhÿri ixpumunh kêt nê. Nê kormã tokyx ma ixkôt apa hkêt nê.

³⁴ —E kot paj axte mẽ amã mẽmoj tã karô. Kormã ixte mẽ amã ja hã karô hkêt. Kêr ka mẽ amã axpên kĩnh o ri apa. Te pa inhmã mẽ ajapê pyrãk o axpên nhĩpêx rãhã ho ri apa.

³⁵ Kot kaj mẽ ã amnhĩ nhĩpêx anê nhũm mẽ akwỳjaja ja hã mẽ apumu nẽ mẽ apê ixkwỳ hã mẽ apumunh kurê kumrêx. Anê.

Simāw Pêtre kot Jejus ã amnhĩ to hêx kukamã harênh

Matêwre 26.31-35; Makre 14.27-31; Rukre 22.31-34

³⁶ Nhũm Jejus ã kot mẽ ixrer nẽ ma nhỹhỹm mōr ã amnhĩ jarênh anê hãmri nhũm Simāw Pêtre tee ri kot amnhĩ jarênh ma nẽ kãm:

–Kwa Pahihti. Nhỹhỹm kot kaj kêt mō pa mẽ akôt ixpa hkêt nẽ? Anê.

Hãmri nhũm kãm:

–Nà ma inhmōr xàta wỳr kot kaj mẽ kormã ma ixkôt apa hkêt nẽ. Nom kot kaj mẽ nhỹrmã ma ixkôt apa. Anê.

³⁷ Hãmri nhũm Simāw Pêtre kãm:

–Kwa mo kot pa mẽ omu nẽ tokyx ma akôt inhm̄rar kêt nẽ? Inhmã akôt ixtyk pyma hkêt kênã. Kwãr mẽ mãmri atã xpi. Inhmã ajapê htỳx kumrêx kênã. Anê.

³⁸ Hãmri nhũm Jejus kãm:

–Xà ãm hãmri na ka ã inhmã amnhĩ jarênh anê Simāw Pêtre? Xà amã ixkôt atyk pyma hkêt? Kwa o kora. Koja apkati hkôt krãhyre hkàr kêt ri ka ra mẽ umaj ate ixkôt apa hkêt ã amnhĩ tã axàprãr o axkrunêpxi kãm ga. Kwa amnhĩ krã kamã ixkapêrja mã ajamaxpêr tỳx nẽ. Anê.

14

Jejus kot Tĩrtũm nhõ krĩ jarênh

Eprêw 11.16

¹ Nhũm Jejus arĩ mẽ inhmã kapêr nẽ mẽ inhmã:

—Kwa ã ixte mẽ amã amnhĩ jarēnh anhỹrja ma nẽ tee ri amnhĩ kukamã ajamaxpēr nẽ akaprĩ hkêt nẽ. Arĩ amnhĩ kaxyw Tĩrtũm mẽ wa inhmã ajamaxpēr tỳx rãhã ho ri apa.

² Inhĩpêêxà nhõ krĩ kamã ixkre xohtôô. ãm hãmri na pa ã mẽ amã harēnh anẽ. Tã kot paj ma akupỹm hwỳr api nẽ mẽ akutêp mã amã mẽ anhõrkwỹ ho mex.

³ Hãmri nẽ ho mex pa nẽ rĩ man akupỹn mẽ awỳr wrỳ. Hãmri nẽ ma akupỹm amnhĩ kôt mẽ ato ixàpir pa ka mẽ Tĩrtũm mẽ wa ixkôt apa rãhã apa ho apa. Jakamã kwa mẽ ri akaprĩ nẽ apa hkêt nẽ. Anẽ.

Jejus te kêp Tĩrtũm wỳr pry pyràk
Epes 2.18

⁴—Nẽ ma nhỹhỹm inhmõr xàta ra mẽ ate harēnh mar mex. Nẽ hwỳr pryja mããnẽn mẽ ate harēnh mar mex. Anẽ.

⁵ Hãmri nhũm Tomas tee ri kuma nẽ kãm:

—Kwa mẽ ixte nhỹhỹm amõr xàta pumunhre hã kot pa kêt mẽ hwỳr pryja pumu. Anẽ.

⁶ Hãmri nhũm kãm:

—Kwa paa. Te ixpê Inhĩpêêxà hwỳr pry pyràk. Na htem amnhĩ kaxyw inhmã hamaxpēr nẽ ixkôt amnhĩ xunhwỳ hãmri nẽ nhỹrmã ixkukwak ri pix mã ma Inhĩpêêxà mẽ wa inhõ krĩ hwỳr api. Ixkukwak ri pix mã na htem hprĩ hã Tĩrtũm kapēr ma. Nẽ ixkukwak ri pix mã na htem wa ixri htĩr tũm nẽ pa ho pa.

⁷ Kot kaj mẽ aprĩ hã ixpumu nẽ mããnẽn te aprĩ hã Inhĩpêêxà pumunh pyràk. Tã ra mẽ ate tanhmã ixte amnhĩ nhĩpêx to hã ixpumunh mex jakamã mããnẽn te ra mẽ ate Inhĩpêêxà kot amnhĩ nhĩpêx ã omunh mex pyràk. Anẽ.

Jejus mē Tirtūm wa kot amnhĩ nhĩpêx tipxi hã wa harēnh

Juãw 1.1, 10.30; Piripos 2.6; Korosē 2.9

⁸Nhũm Jejus ã mē inhmã kapēr anē nhũm Firipti kuma nē kãm:

—Kwa nom mē inhmã inhno ho Anhĩpêêxà pumunh prãm. Kot pa mē omu nē ixkĩnh tỳx kumrêx. Anē.

⁹Hãmri nhũm Jejus kãm:

—Kwa na pa pre ra mē akôt ri ixpa ryy nē. Ka mē aprĩ hã ixpumunh mex nē. Kêt ra mē kot ixpumunh mex xwýnhjaja te mē kot mãânēn Inhĩpêêxàja no ho omunh mex pyræk.

¹⁰Wa ixte amnhĩ nhĩpêxja ãm tipxi. Xà ate kormã amnhĩ krã hi mã ixkapēr jaxàr tỳx kêt? Inhĩpêêxà mē wa ixte amnhĩ nhĩpêxja ãm tipxi. Nē kot axpēn pyræk. Jakamã na pa hte amnhĩ krã hkôt ri tanhmã amnhĩ nhĩpêx to ho ri ixpa hkêt nē. ãm Inhĩpêêxà nhỹ hã na pa hte ri tanhmã mē amã ixkapēr to ho ri ixpa. Nē hihtỳx xà ho tanhmã amnhĩ nhĩpêx to ho ri ixpa. Ka mē ja hã ixpumu nē te ano ho Inhĩpêêxà pumunh pyræk.

¹¹Kwa mē ixkapēr ma nē hkôt ajamaxpēr tỳx nē. Inhĩpêêxà mē wa ixte amnhĩ nhĩpêxja ãm tipxi. Nē kot axpēn pyræk. Rỳ ka mē tee ri ja kukamã ajamaxpēr japēr hãmri nē ixte aa mē ate mēmoj pumunh kêt kwỳ ho anhỹr ã mãn ixpumu nē ja hã wa ixte amnhĩ nhĩpêx tipxi kôt ajamaxpēr.

¹²—Kwa mē ixkapēr ma nē amnhĩ krã kamã amnhĩ krãm haxàr tỳx nē. Mē ate amnhĩ kaxyw ixkôt ajamaxpēr xwýnhjaja kot kaj mē ixte tanhmã amnhĩ nhĩpêx to ho ixpa hã ixpumu nē ixkôt ã amnhĩ nhĩpêx anhỹr o ri apa. Kot paj akupỹm

Inhĩpêxà hwỳr api nẽ kuri ixpa ho ixpa. Ka mẽ ixwakre kamã ixihýt̃x xà ho tanhmã mẽ akwỳjê mã amnhĩ nhĩpêx to ho ri apa.

¹³ —Nẽ kot kaj mẽ apê ixkwỳ hã tanhmã mẽmoj tã ixwỳr to pa mẽ ama nẽ mẽ amã tanhmã mẽmoj nhĩpêx to. Mẽ kot omunh nẽ Inhĩpêxà mex o mex ã omunh kurê kumrêx kaxyw.

¹⁴ Nà kot kaj mẽ apê ixkwỳ hã mẽmoj tã ixwỳ pa mẽ ama nẽ mẽ amã tanhmã mẽmoj to. Anẽ.

Jejus kot mẽ pahwỳr Tĩrtũm mẽ wa Karõ rẽn̄h ã kot amnhĩ jarẽn̄h

Juāw 7.37-39, 16.7-17; Atre 2.1-4; mããnēn Rõmãn 5.5; Wam Korĩt 12.7-11; Epes 3.16; Wam Juāw 2.27

¹⁵ Nhũm Jejus arĩ mẽ inhmã kapêr nẽ mẽ inhmã: —Nà kot kaj mẽ amã ixkĩnh hã kot kaj mẽ ixkapêr kôt pix mã ri amnhĩ nhĩpêx rãhã ho ri apa.

¹⁶ —Kot paj akupỹm kaxkwa hwỳr api hãmri nẽ mẽ ato Inhĩpêxà wỳ nhũm inhma nẽ mẽ awỳr kot mẽ ato ajuta xwỳnh maatita rẽ nhũm man mẽ awỳr wrỳ nẽ mẽ akaxwỳnh mã agjê. Hãmri nẽ mẽ akôt tanhmã mẽ ato ajuta hto ho pa rãhã ho pa.

¹⁷ Wa Ixkarõ koja mẽ awỳr kurê nhũm mẽ amã agjê. Hãmri nẽ hprĩ hã mẽ amã Tĩrtũm kapêr o amnhĩrĩt o mẽ akôt pa ka mẽ aprĩ hã mar mex nẽ. No mẽ kêp Tĩrtũm kra hkêt xwỳnhjaja koja hprĩ hã wa Ixkarõ jarẽn̄h mar kêt nẽ. Mẽ kot wa ixkôt amnhĩ xunhwỳr kêt jakamã koja mẽ hkarõ mã gjêx kêt nẽ. ãm mẽ ate ixkôt amnhĩ nhĩpêx o apa xwỳnhjê pix wỳr koja wrỳ nẽ mẽ awỳr agjê nẽ mẽ akamã pa ho pa.

¹⁸ —Nẽ ixte mẽ arer nẽ ma inhmõr mã tã kot kaj mẽ te mẽ hã awrãre pyrã nẽ ahte atỳx ri apa pyrãk

kêt nê. Kot paj te pa akupÿn mẽ awÿr ixwÿrk pyrà nê mẽ awÿr wa Ixkarõ rê nhũm mẽ akãm agjê nê mẽ akamã pa ho pa.

19 –Nê koja tokyx mẽ kot amnhĩ kaxyw Tĩrtũm mã hamaxpêr kêt xwÿnhjaja axte ixpumunh kêt nê. No mẽ papajaja kot puj mẽ tokyx axte nhÿri axpên pumu.

–Nê kot paj akupÿm ixtĩr hãmri nê ixtĩr tũm nê ixpa ho ixpa ka mẽ ixkukwak ri ajaxwÿja nhÿrmã Tĩrtũm mẽ wa ixri atĩr tũm nê apa ho apa.

20 –Tã koja wa Ixkarõ mẽ awÿr wrÿ nê mẽ akarõ mã agjê ka mẽ aprĩ hã Tĩrtũm mẽ wa ixte amnhĩ nhĩpêx ã wa ixpumunh mex kurê kumrêx. Te wa ixte amnhĩ nhĩpêx tipxi pyræk o ka mẽ hã wa ixpumu. Nê mããnên mẽ papajaja te ra mẽ pahtipxi nê ri mẽ papa pyræk ka mẽ hã amnhĩ pumunh mex kurê kumrêx.

21 –Nê mẽ kãm ixkĩnh xwÿnhjaja na htem ixkapêr ma nê hkôt amnhĩ nhĩpêx o pa. Jakamã nhũm Tĩrtũm ixtã mẽ omu nê kãm mẽ hapê htÿx nê. Pa mããnên amnhĩ tã mẽ omu nê inhmã mẽ hapê htÿx nê. Jakamã kot paj mẽ kãm amnhĩ to amnhĩrĩt nhũm te mẽ kot no ho ixpumunh pyræk. Anê.

Nhũm pre ã Jejus hkôt mẽ ixpa ho mẽ ixpa xwÿnhjê mã amnhĩ jarênh anê.

22 Hãmri nhũm Jutre hõja. Jut Kariot kêt axtem Jutre hõja Jejus axte kot mẽ inhmã pix mã kot amnhĩ to amnhĩrĩt ã harênhja ma nê kãm:

–Kwa aprĩ hã mẽ inhmã mẽmoj jarê mẽ ijahkre xwÿnh. Mon ka mẽ kêp akwÿ hkêt xwÿnhjê mã axte amnhĩ to amnhĩrĩt kêt ã amnhĩ jarê? Nê ãm mẽ papxipix mã amnhĩ to amnhĩrĩt ã amnhĩ jarê? Anê.

23 Hāmri nhũm kām:

—Nà mẽ amã ixkĩnh xwỳnhjaja na ka htem ixkapēr ma nẽ hkôt amnhĩ nhĩpêx. Nhũm Inhĩpêxà ja hã mẽ apumu nẽ ixtã kãm mẽ ajapê htỳx nẽ. Hāmri pa wa mẽ akôt ixpa ho ixpa. Jao mẽ amã amnhĩ to amnhĩrit mex o ixpa.

24 Na pa hte amnhĩ krã hkôt ri mẽ kãm ixkapēr o ixpa hkêt nẽ. Âm Inhĩpêxà nhỹ hã na pa hte mẽ kãm ixkapēr o ri ixpa. Kot mẽ awỳr inhmẽnh xwỳnhhta nhỹ hã. Tã nhũm mẽ kãm inhmar prãm kêt jakamã na pa hte wa mẽ kãm mẽ apyrà nẽ amnhĩ to amnhĩrit o ixpa hkêt nẽ.

25 —E na pa kormã ixte mẽ akôt ri ixpa ri ã mẽ amã amnhĩ jarẽnh anẽ.

26 Tã koja Inhĩpêxà ixpãnhã mẽ awỳr wa Ixkarõ rẽ. Ixte hã mẽ amã ixàhwỳr xà hkôt. Hāmri nhũm man mẽ awỳr wrỳ nẽ mẽ akaxwỳnh mã agjê nẽ mẽ akôt ri tanhmã mẽ ato ajuta hto ho pa. Nẽ ra ixte ã mẽ amã ixkapēr anhỹrja koja hprĩ hã mẽ amã ho amnhĩrit mex nẽ. Ka mẽ amnhĩ krã kamã kãm ajamaxpēr nẽ hã ano htỳx nẽ ho apa. Anẽ.

Jejus kêp mẽ pajamakêtkati nhõr xwỳnh

Rômãn 5.1; Karatas 5.22; Piripos 4.7; Korosẽ

3.15

27 Nhũm Jejus arĩ mẽ inhmã kapēr nẽ mẽ inhmã:

—Nẽ mẽ kêp ixkwỳ hkêt xwỳnhjaja na htem tee ri amnhĩ kukamã hamaxpēr o ri pa. Jao hkaprĩ nẽ pa. No pa na pa hte mẽ kurom ijamakêtkati nẽ ixkĩnh nẽ ri ixpa ho ixpa. Tã kot paj tanhmã mẽ ato ka mẽ ixpyrà nẽ ajamakêtkati nẽ axàmnhĩx akĩnh nẽ ri apa. Jakamã kwa mẽ ixte amnhĩ jarẽnh ma nẽ tee ri amnhĩ kukamã ajamaxpēr o amã ma ho ri apa hkêt nẽ.

28 —Na pa pre ra mẽ amã ma ixàpir nẽ nhỹrmã man akupỹn mẽ awỳr ixwỳk ã mẽ amã amnhĩ jarẽ. Tã na pa ra ma akupỹm Inhĩpêêxà hwỳr ixàpir mã. Kot amnhĩ to rax o kot ijakrenh. Kot paj akupỹm hwỳr api nẽ kuri inhmex nẽ ixpa ho ixpa. Tã ka mẽ amã ixkĩnh hã kot kaj mẽ ma akupỹm hwỳr ixàpir ã ijarẽnh ma nẽ inhỹ hã akĩnh nẽ.

29 —Kormã ma akupỹm ixàpir kêt ri na pa ã mẽ amã amnhĩ kukamã amnhĩ jarẽnh anẽ. Kêr pa mẽmo arĩgro hã ma akupỹm api ka mẽ ja hã ixpumu nẽ ajamaxpêr o: “Nà ãm hãmri na pre mẽ inhmã amnhĩ kukamã akupỹm Hipêêxà hwỳr àpir ã amnhĩ jarẽ.” Anhỹr o ajamaxpêr. Jao ixkôt ajamaxpêr tỳx rãhã ho ri apa.

30 —Kot paj tokyx axte tanhmã mẽ amã ixkapêr to hkêt nẽ. Mẽ kêp ixkwỳ hkêt xwỳnhjê nhõ pahĩti Satanastija na ra kot tanhmã ixto kaxyw. Nom koja tee ri tanhmã kãm ixto hprãm kaprỳ. Kurom ixihỳx o ixihỳx o ixte hakrenh par jakamã koja tanhmã ixto hkêt nẽ.

31 Kwãr kãm tanhmã ixto hprãm xà hkôt tanhmã ixto pa omu. Inhmã Inhĩpêêxà hkôt ixte amnhĩ nhĩpêx prãm jakamã kot paj jahti mã arĩ xa nhũm te tanhmã kot ixto pyràk o inhĩpêx nom tanhmã ixto hkêt nẽ. Mẽ ate inhmã Inhĩpêêxà japê htỳx ã ixpumunh kaxyw kot paj ã mẽ anoo mã amnhĩ nhĩpêx anẽ. Nẽ mẽ ate ixte kãm tanhmã amnhĩ nhĩpêx to ho ri ixpa rãhã mẽ kot ixpĩr ã ixpumunh kaxyw. E hãmri. Ma pu mẽ mō nẽ amnhĩ to Tĩrtũm wỳ. Anẽ.

Nhũm pre ã Jejus hkôt mẽ ixpa ho mẽ ixpa xwỳnhjê mã kapêr anẽ. Pa mẽ kuma nẽ kãnhmã

ixkuhê nê inhnojarêť nhũm axte mẽ inhmã aw-
jarê.

15

Jejus te kêp mẽmo krô pyràk
Karatas 2.20; Wam Juãw 2.28

¹ Nhũm Jejus arĩ mẽ inhmã kapêr nê mẽ inhmã:

—Nà te ixpê mẽmo pĩ pê “uwa” anhÿr xwÿnhta kakhô maati pyràk. Nê Inhĩpêêxàja te kot uwa hkre nê hamãr o pa xwÿnhta pyràk.

² Nê mẽ kot ixkôt amnhĩ xunhwÿr xwÿnhjaja te mẽ kot uwa kakhô rũm krô pyràk. Na hte mẽ hkwyjaja htÿx ri kêp ixkwÿ hã amnhĩ jarênh ã amnhĩ to hêx. Jao te kot krôja rã htã ô hkêť pyràk. Koja rã htã ô hkêť nê nhũm kot hamãr xwÿnhja tee ri omu nê kakhô nê krãhta nê kumê. No koja ô mex nê nhũm omu nê hkĩnh nê. Hãmri nê rã nê ô rax kaxyw tanhmã ho mex to. Tã na hte Tĩrtũm uwa krô jamãr xwÿnhta pyrà nê ã mẽ ate ixkôt amnhĩ xunhwÿr xwÿnhjê nhĩpêx anê.

³ No mẽ kajaja na ka prem mẽ kot ixkwÿ hã amnhĩ to hêx xwÿnhjê rom ixkapêr mar tÿx nê. Nê amnhĩ kaxyw inhmã ajamaxpêr nê ixkôt amnhĩ nhĩpêx mex o apa. Jao te mẽ ate krô rã nê ô rũnh pyràk o amnhĩ nhĩpêx.

⁴ —Na hte krôja amnhĩ krã hkôt ô hkêť nê. ãm kakhô pix kukwak ri na hte rã nê ô. Ja pyrà nê kot kaj mẽ ixkukwak ri pix mã inhmã hprãm xà hkôt ri tanhmã amnhĩ nhĩpêx to ho apa. Jakamã kwa kêr ka mẽ ixkapêr pix mãn mar o apa pa mẽ akôt ixpa ho ixpa.

5 Te ixpê kakhô nhũm te mẽ apê krô pyràk jakamã kot kaj mẽ inhmã hprãm xà hkôt tanhmã amnhĩ nhĩpêx to ho ri apa nê te krô rã nê ô rũnh pyràk o amnhĩ nhĩpêx. No kot kaj mẽ amnhĩ krã hkôt ri amnhĩ nhĩpêx o ri apa nê te krô grà nê ô hkêt pyràk o amnhĩ nhĩpêx.

6 Na hte uwa krô nhõ dõnja nhỹri hã krô grà pumu hãmri nê kakhô nê hakà nê ma o mra nê kuwy kamã kurẽ nê ho hxêt pa. Ja pyrà nê mẽ kot htỳx ri ixkôt amnhĩ xunhwỳr ã amnhĩ jarẽnh xwỳnhjaja koja mẽ nhỹrmã amnhĩ xà htỳx kamã hamak rãhã ho pa.

7 —Tã no mẽ kajaja. Kêr ka mẽ ixkapêr kôt pix mã amnhĩ nhĩpêx rãhã ho ri apa. Te mẽ pahtipxi nê ri papa pyràk o amnhĩ nhĩpêx. Hãmri nê mãmrĩ amã hprãm xà hkôt mẽmoj tã Tĩrtũm wỳ nhũm ama nê amã mẽmoj tã ate hwỳr xàta kôt kugõ.

8 Kot kaj mẽ Inhĩpêêxà mẽ wa ixkapêr kôt amnhĩ nhĩpêx o ri apa nhũm mẽ piitã ja hã mẽ apumu nê hamaxpêr o: “Hêxta waa nê. Jajaja na htem Tĩrtũm kot amnhĩ nhĩpêx o amnhĩ nhĩpêx o pa. Mãn Tĩrtũmja mex o mex.” Anhỹr o hamaxpêr.

9 —Nê na pa hte Inhĩpêêxà kãm ijapê pyràk o inhmã mẽ ajapê nê. Tã kêr ka mẽ amarĩ inhmã mẽ ajapê hã ri ixkôt amnhĩ nhĩpêx mex o apa.

10 Na pa hte ãm Inhĩpêêxà kapêr kôt pix mã ri amnhĩ nhĩpêx o ri ixpa. Jakamã na pa hte kãm ijapê hã ixkĩnh nê ri ixpa. Tã kêr ka mẽ ixpyrà nê ixkapêr kôt pix mã tanhmã amnhĩ nhĩpêx to ho ri apa. Nê ixpyrà nê inhmã mẽ ajapê hã amnhĩ pumu nê akĩnh nê ri apa.

11 —E na pa ã mẽ amã ixkapêr anê. Mẽ ate

inhmar nê ixpyrà nê axàmnhĩx ajamakêtkati nê akĩnh nê ri apa kaxyw. Tã kêr ka mẽ ã amnhĩ nhĩpêx anê nê te pa ixte ã amnhĩ nhĩpêx anhỹr pyràk. Anê.

Jejus kot mẽ pamã axpên kĩnh tỳx ã mẽ pamã karõ

¹² Nhũm Jejus arĩ mẽ inhmã kapêr nê mẽ inhmã:

—E kêr ka mẽ te inhmã mẽ ajapê pyràk o mẽ amã axpên japê ho mẽ amã axpên kĩnh o ri apa. Jao axpên to mex o ri axpên kôt apa.

¹³ Koja mēhō kām hkràmnhwỳ japê htỳx nê nhũm ra mēhō mēmo mỳrapê kot kêp hpĩr mã nhũm tee ri hã omu nê nê kām amnhĩ mẽ nhũm kupĩ. Hãmri nhũm mẽ ja hã omu nê kām hkràmnhwỳ japê htỳx ã nê htyk ã axpên mã harê.

¹⁴⁻¹⁵ —E kot paj axte mẽ apê inhmã mẽ axàpênh xwỳnh ã mẽ ajarênh kêt nê. Na hte mẽ õ pa-trãwjaja hprĩ hã kām mẽ apênh xwỳnhjê mã amnhĩ jarênh kêt nê. Na htem ãm mẽ apênh pix ã mẽ kurê. Nom mẽ kajaja mẽ ate ixkapêr mar nê hkôt pix mã amnhĩ nhĩpêx jakamã kot paj hpãnhã mẽ apê ixkràmnhwỳ hã mẽ ajarê. Na htem axpên to hkràmnhwỳ nê ma nhỹhỹm pa kaxyw nê tanhmã amnhĩ kukamã hkràmnhwỳ mã amnhĩ jarênh to. Tã mẽ apê ixkràmnhwỳ jakamã na pa hte ã amnhĩ kukamã mẽ amã amnhĩ jarênh anê. Nom ja pix jarênh kêt nê. Na pa hte mããnên Inhĩpêxà xô ri mẽ amã mēmoj piitã ho amnhĩrĩt o mẽ akôt ixpa.

¹⁶ —Nê mẽ kajaja na ka prem ixpê mẽ akràmnhwỳ kaxyw ixãm kêt nê. Pa na pa pre amnhĩ kaxyw inhmã mẽ aprãm. Ixkapêr kôt pix mã ri mẽ ate tanhmã amnhĩ nhĩpêx to ho apa kaxyw. Te uwa krô ô rũnh nê aa grà hkêeta pyràk.

Jakamã kot kaj mẽ mẽmoj tã Inhĩpêêxà wỳ nhũm mẽ ama nẽ mẽ ate mẽmoj tã hwỳr xà hkôt amã kugõ.

17 —E. Kwa kêr ka mẽ amã axpẽn kĩnh nẽ tanhmã axpẽn to ajuta hto ho axpẽn mã mẽmoj kutã ano-jarêt pix o mãn kêt ri apa. Nà ja na kêt inhmã hprãm. Anẽ.

*Mẽ kot Jejus kwỳjê kamã gryk xwỳnhjê jarênh
Matêwre 10.22; mããnẽn Juãw 7.7, 17.14; Wam
Juãw 3.13*

18 —Nẽ koja ixkwỳ hkêt xwỳnhjaja kãm mẽ aprãm nõkati. Tã kêr ka mẽ amnhĩ tã mẽ omu nẽ tee ri amnhĩ kukamã ajamaxpêr kêt nẽ. Ixkumrêx na prem kãm ixprãm nõkati. Tã koja mẽ mã ixtã mẽ ato anẽ nẽ kãm mẽ aprãm kêt nẽ.

19 Mẽ apê mẽ hkwỳ ronhỹx mẽ amnhĩ tã mẽ apumu nẽ kãm mẽ ajapê nẽ. Nom apê mẽ hkwỳ hkêt. Ra ixte amnhĩ kaxyw mẽ arênh jakamã na htem tee ixtã mẽ apumu nẽ kãm mẽ akĩnh kêt o kãm mẽ akurê nẽ.

20 Koja mẽ ixtã hpijaàm kêt nẽ nẽ mããnẽn mẽ atã hpijaàm kêt nẽ. Nẽ mẽ anhĩpêx o te mẽ kot pa ixpê mẽ anhõ patrãw nhĩpêx pyræk. Ka mẽ ixpyrà nẽ amnhĩ xà htỹx kãm ajamak o ri apa. Na pa pre ra mẽ amã ja jarẽ. Nom koja mẽ akwỳjaja jajê rom te ra mẽ kot ixkapêr mar nẽ hkôt amnhĩ nhĩpêxta pyrà nẽ mããnẽn mẽ akapêr ma nẽ hkôt amnhĩ nhĩpêx o pa. Kwa kêr ka mẽ ixkapêrja mã mãn ajamaxpêr tỹx rãhã ho ri apa.

21 —Koja mẽ ixtã tanhmã mẽ anhĩpêx to. Mẽ kot Tĩrtũm kapêr kôt amnhĩ nhĩpêx kêt jakamã koja

mê ã ixtã mê anhĩpêx anê. Tĩrtũm kot mê awỳr inhmênh kôt hamaxpêr kêt nê ã mê anhĩpêx anê.

²² Ixwryk nê mê kãm Tĩrtũm kapêr jarênh o ri ixpa htã nhũm mê inhma nê ãm inhma nê ixkôt amnhĩ nhĩpêx kêt nê. Jakamã koja mê kot amnhĩ tomnuj xwỳnh ã amnhĩ to hpimxur kêt nê.

²³ —Nê koja mêhõ kêp ixprãm nõkati nê mãânênte kêp Inhĩpêêxà prãm nõkati pyrak.

²⁴ Na pa pre mê piitã mê hkôt aa mê kot mêmoj pumunh kêt kwỳ ho anhỹr o ri mê hkôt ixpa nhũm mê hã ixpumu. ãm papxipix na pa pre ã amnhĩ nhĩpêx anhỹr o ri mê hkôt ixpa nhũm mê hã ixpumu. Kêp ãm mê kot ja hã ixpumunh kêt ronhỹx prem axpên mã ijarênh o: “Tk. Mê pahte mêhõja nhỹhỹnh mê pahwỳr hpôx ã omunhre hã kot puj kêt mê ri hã pahpijaàm o ri papa.” Anhỹr o nhỹx prem axpên mã ijarê. Tã ra mê kot ja hã ixpumunh mex tã axtem nê Inhĩpêêxà mê wa mê kãm wa ixkurê nê. Jao mê kot amnhĩ tomnuj xwỳnh ã amnhĩ to hpimxur kêt nê.

²⁵ No Tĩrtũm kapêr ã kagà htũm kot mê hkukamã mê harênh nê mê hã kagà nê kot mê hã kagà kot: Mêmemo tanhmã kute mỳrapê na htem kãm ixkurê?

Nà ãm amarĩ na htem kãm ixkurê ho pa. Anê.

Tã ã ixtã kagà kot anhỹr xà hkôt na htem ã kãm ixkurê anê. Jakamã koja mê mãânênte ixtã kãm mê akurê nê. Nom kêr ka mê arĩ mê kãm ixkapêr jarênh o ri mê hkôt apa nê tee ri amnhĩ kukamã ajamaxpêr kêt nê.

²⁶ —Nê tokyx ma akupỹm Inhĩpêêxà hwỳr ixàpir mã tã kot paj hwỳr pøj nê aa mê ato ijamakêtkati hkêt nê. Kot paj amnhĩ pãnhã mê awỳr wa

Ixkarō rē. Mē kot kām: “Mē kutā nojarēt xwỳnh maati” anhỳr xwỳnhhta kot paj mē awỳr kurē nhũm ixpānhā mē awỳr wrỳ nē mē amā agjē nē hprī hā mē amā Tĩrtũm mē wa ixto amnhĩrīt o ri mē akõt pa.

²⁷ Kot kaj mē ama hāmri nē ma mē piitā mē hkõt ri mē kām ixkapēr jarēnh o ri apa. Na pa pre ra mē kām Tĩrtũm kapēr jarēnh ryy ho mē hkõt ri ixpa ka mē ixkõt ri inhmar o apa ry nē. Jakamā kēr ka mē ixwakre kamā arĩ mē kām ixkapēr jarēnh o ri mē hkõt ri apa. Anē.

16

¹ Nhũm Jejus arĩ mē inhmā kapēr nē mē inhmā:

—Nē mē kot nhỹrmā ixtā tanhmā mē anhĩpêx to nhũm mē ate tee ri amnhĩ kukamā ajamexpēr nē mē umaj ixkaga pymaj na pa hte ã mē amā ixprĩ hā mēmoj jarēnh ry anē.

² Kot kaj mē kām ixkapēr jarēnh o ri apa nhũm mē hkwỳjaja tee ri mē ama nhũm ja mē kêp omnuj nē. Nhũm mē Tĩrtũm kapēr o mē ahkre xà hā ixkreja rũm amnhĩ nē mē ajano nē mē akwỳjê hpar o pa. Hāmri nē hamaxpēr o: “E pu mē axte mē hkwỳjê pynê nē mē kupa. Tĩrtũm kām ja mex kênã.” Anhỳr o htỳx hamaxpēr o pa.

³ Mē kot hprĩ hā Inhĩpêxà mē wa ixkapēr mar mex kêt nē ã htỳx wa inhmā ja mex ã wa ijarēnh anē.

⁴ Nom mē ate ixkõt amnhĩ xunhwỳrta krax kām na pa pre ã mē amā mē harēnh anhỳr kêt nē. Arĩ mē akõt ixpa kênã. Kot ka mē ixkõt apa rāhā amā mē uma hkêt nē. Tã pa ra akupỹm inhnojarēt nē ã mē amā mē harēnh anē. Jakamā koja mē nhỹrmā ã

mē anhīpêx anē ka mē amnhī tā mē omu nē ra ixte mē akukamā ā mē harēnh anhūrja mā ajamaxpēr kurē kumrēx nē tee ri amnhī kukamā ajamaxpēr kêt nē. E kwa ixkapērja măn mē amnhī krā him haxàr tỳx nē ri hā apa. Anē.

Jejus mē Tirtūm wa hkarō jarēnh

⁵⁻⁶ Nhūm Jezus arī mē inhmā kapēr nē mē inhmā:

—E na pa ra kot mē awyr inhmēnh xwỳnhhta wỳr ra akupỳm inhnojarēt ka mē ixte amnhī jarēnh ā inhma nē akaprī nē. Nē tee ri amnhī kukamā ajamaxpēr tā mē atō aprī hā ma inhmōr xà ā ixkukjēr kêt nē. Rỳ inhmā: “Kwa mo kaxyw kot kaj kêt mē ixre nē ma akupỳm mō? Xà we ja amā mex?” Anhūr o mē atō ixkukjēr kêt nē.

⁷ Kêt ma akupỳm ixàpirja mē amā mex kumrēx. Kop am akupỳm ixàpir kêt ronhỳx mē amā mēmoj kutā nojarēt xwỳnhhta ixpānhā mē awyr wrỳk kêt nē. Tā kot paj ma akupỳm api nē amnhī pānhā mē awyr kurē. Jakamā kwa mē ja ma nē tām ajamaxpēr o ri apa.

⁸ Koja ixpānhā mē awyr wrỳ hāmri nē mē kēp ixkwỳ hkêt xwỳnhjê mā mēmoj to axkrunēpxi nē ho amnhīrīt. Koja mē kām mē kot tanhmā amnhī tomnuj to xà ho amnhīrīt. Nē mǎānēn mē kām tanhmā mē kot amnhī to mex to xà ho amnhīrīt. Nē mǎānēn Tirtūm kot nhỹrmā mē kot amnhī tomnuj mỳrapê tanhmā mē homnuj to xàta nhūm mǎānēn mē kām ho amnhīrīt. Koja mē kām ja piitā ho amnhīrīt.

⁹ —Jakamā koja mē ja kukamā tanhmā hamaxpēr to nē hamaxpēr o: “Kwa kot paj xep amnhī tomnuj kaga nē amnhī kaxyw Tirtūm Kra

Jejus mã ijamaxpêr nê hkôt amnhĩ xãm kêt nhũm Tĩrtũm nhỹrmã ixte amnhĩ tomnuj mỳrapê tanhmã ixto.

¹⁰ Nà kot paj hkôt amnhĩ xãm hãmri nê ra uràk nê Tĩrtũm kapêr kôt tãm ri amnhĩ nhĩpêx o ixpa. Na pre Jejus tãm ri amnhĩ nhĩpêx o pa nhũm Tĩrtũm amnhĩ wỳr ho api pa mẽ axte jar nhỹri omunh kêt nê.

¹¹ Na xep Tĩrtũm nhỹrmã kot ma kuwy hwỳr mẽ kêp Jejus kwỳ hkêt xwỳnhjê nhõ pahi maatiya mênh ã ra amnhĩ kukamã hã amnhĩ jarê. Jakamã kwa arĩ ixpê hkwỳ jakamã kot paj tokyx Jejus kôt amnhĩ xãm kêt nhũm hkôt kuwy hwỳr inhmê.” Anhỹr o hamaxpêr. Kojã ã wa Ixkarõja mẽ kêp ixkwỳ hkêt xwỳnhjê mã mẽmoj to amnhĩrĩt mex anê.

¹² —Nê na pa kormã mẽ amã mẽmoj piitã ho amnhĩrĩt kêt nê. Kormã mẽ ate aprĩ hã mẽmoj pumunh nê mar mã tãm kêt.

¹³ Tã koja ixpãnhã wa Ixkarõ mẽ awỳr wrỳ nê mẽ akarõ mã agjê hãmri nê hprĩ hã mẽ amã Tĩrtũm kot amnhĩ nhĩpêx o amnhĩrĩt o mẽ akôt pa ho pa. Nom koja amnhĩ krã hkôt tanhmã mẽ amã ho amnhĩrĩt to hkêt nê. Kojã ãm Tĩrtũm pix xô ri mẽ amã ho amnhĩrĩt o mẽ akôt pa. Jao hprĩ hã mẽ amã ixkôt mẽ ate amnhĩ nhĩpêx nyw o mẽ amã amnhĩrĩt o mẽ akôt pa. ã koja hprĩ hã ra ixte mẽ amã ixujarênh xà hkôt axte mẽ amã mẽmoj to amnhĩrĩt mex o pa anê.

¹⁴ —Nê koja hprĩ hã mẽ amã pa ixto amnhĩrĩt o pa. Jao mẽ amã inhmex o inhmex ã ixto amnhĩrĩt o mẽ akôt pa.

¹⁵ Inhipeêxà mẽ wa ixkapêrja ãm htipxi. Tã koja wa Ixkarõ ixkapêr xô ri ã mẽ amã mẽmoj

to amnhĩrĩt anẽ. Jao ra wa ijamẽ wa ixkapẽr o amnhĩrĩt mex o pa. Koja ã wa mẽ apê ixkwỳ hã mẽ ato mex o pa anẽ. Anẽ.

Mẽ kot akupỹm Jejus tĩr ã omunh ã mẽ harẽnh

¹⁶ Nhũm Jejus arĩ mẽ inhmã kapẽr nẽ mẽ inhmã:

—Nẽ kot paj tokyx mẽ ano pê akunok ka mẽ axte amnhĩ kaêx ã ixpumunh kêt nẽ. Nom kwa kêr ka mẽ tee ri ixkapẽrja kukamã ajamaxpẽr kêt nẽ. Kot paj ixtã apkati grêre ka mẽ axte ixpumu. Anẽ.

¹⁷⁻¹⁸ Nhũm pre ã Jejus hkôt mẽ ixpa ho mẽ ixpa xwỳnhjê mã kapẽr anẽ. Pa mẽ tee ri ã kapẽr anhỹr ã kuma nẽ axpẽn mã:

—Kwa mo na ri ã amnhĩ jarẽnh anẽ? Nẽ tokyx mẽ pano pê pikunor tã hã apkati grêre nhũm axte mẽ pahte omunh ã amnhĩ jarẽ nẽ akupỹm Hipêêxà hwỳr àpir ã amnhĩ jarẽ. Pẽr kapẽrja ãm ri katii. Anẽ.

¹⁹ Nhũm amnhĩ tã mẽ inhma nẽ mẽ inhmã:

—Kwa xà na ka mẽ kormã aprĩ hã ixkapẽr ã inhmar kêt nẽ?

²⁰ Kot paj ty nhũm mẽ kêp ixkwỳ hkêt xwỳnhjaja ijarẽnh ma nẽ hkĩnh nẽ. No mẽ kajaja kot kaj mẽ akapĩ nẽ amỳr o apa. Nẽ gaa nẽ akupỹm akĩnh nẽ. Kwa mẽ ixkapẽrja ma nẽ kãm ajamaxpẽr tỳx o apa.

²¹ Te mẽ ate mẽ hpijagri xwỳnh kot amnhĩ nhĩpêx pyræk. Na htem õhy xà nẽ gaa nẽ ra õhy xà htỳx nẽ. Nẽ hkĩnh kêt nẽ tee ri amnhĩ nhĩpêx o hikwỳ. Tã gaa nẽ hpijagri nhũm hkrare kato nhũm omu nẽ akupỹm hkĩnh nẽ axte õhy xà htỳx mã hamaxpẽr kêt nẽ.

²² Tã ã mẽ ate amnhĩ nhĩpêx anhỹr kaxyw. Kot kaj mẽ akĩnh kêt nẽ ri apa. Tã kot paj akupỹm tokyx ixtĩr nẽ axte mẽ awỳr ixkato ka mẽ ixpumu

ně akĩnh ně. Hãmri ně akĩnh rãhã ri apa ho apa. Nhũm mēhõ mē apumu ně tee ri tanhmã mē akĩnh ně mē ato kaprý ka mē arĩ akĩnh rãhã ri apa ho apa.

²³ —Ně ixte akupým kaxkwa hwýr ixàpir ně amnhĩ pãnhã mē awýr wa Ixkarõ rēnh nhũm mē awýr wrýk ně hprĩ hã mē amã mēmoj piitã ho amnhĩrĩt jakamã kot kaj mē axte amã mēmoj tã ixkukjêr prãm kêt ně. Aně.

*Jejus kwýjaja kot àmnhĩx mēmoj tã Tĩrtũm wýr
Matêwre 18.19-20; Juãw 14.13-14*

Nhũm Jejus arĩ mē inhmã kapêr ně mē inhmã:

—E kwa mē ã ixkapêr anhýrja ma ně amnhĩ krã kamã kãm ajamaxpêr týt ně ho apa. Kot kaj mē apê ixkwý hã mēmoj tã Inhĩpêêxã wý nhũm mē ama ně mē ate hã axàhwýr xà hkôt mē amã mēmoj tanhmã ho rý mē amã mēmoj gõ.

²⁴ Na ka mē kormã apê ixkwý hã mēmoj tã axàhwýr kêt ně. Tã kêt ka mē amã mēmoj tã hwýr prãm ně mãmri mēmoj tã hwýr o apa. Kê mē ama hãmri ně tanhmã mē amã mēmoj nhĩpêx to ka mē amnhĩ tã omu ně akĩnh ně.

²⁵ —Ně na pa pre mē amã mēmoj jarēnh kaxyw ně mēmoj tã haxwý ně mē amã ixujarēnh rax ně. Nom kot paj axte ã mē amã ri ixujarēnh anhýr kêt ně. Kot paj tã ixprĩ hã mē amã tanhmã Inhĩpêêxã jarēnh to ka mē aprĩ hã mar mex kurê kumrêx.

²⁶ Hãmri ně mē kamjaja mē apê ixkwý hã tanhmã amnhĩ to hwýr to ho apa. Jakamã mo kaxyw kot pa kêt axte tanhmã mē ato hwýr to? Kot kaj mē kamjaja amnhĩ to hwýr jakamã arĩ ixte mē ato hwýr kaxyw ixto presija hkêt ně.

27 —Na ka mẽ ra amã ijapê nẽ. Nẽ ixte Inhĩpêêxà rũm mẽ awỳr ixwryk ã ixpumu. Jakamã nhũm Inhĩpêêxàja ixtã mãânẽn kãm mẽ ajapê nẽ. Tã kot kaj mẽ kamjaja mẽmoj tã amnhĩ to hwỳr o apa nhũm mẽ ama nẽ kãm mẽ ajapê htỳx kãm mẽ amã mẽmoj gõ.

28 —Na pa pre Inhĩpêêxà rũm amnẽ mẽ awỳr wry. Hãmri nẽ kãm hprãm xà hkôt tanhmã amnhĩ nhĩpêx to hpar o mō nẽ ra akupỹm hwỳr inhnojarêt kaxyw. Anẽ.

Nhũm pre ã Jesus mẽ inhmã amnhĩ jarẽn anẽ.

29 Pa mẽ tã ixprĩ hã mar mex nẽ. Hãmri nẽ kãm:

—Tỳ. Nà na pa mẽ tã ixprĩ hã ate amnhĩ jarẽn ma. Ka amnhĩ tã haxwỳr nẽ axujarẽn kêt jakamã pa mẽ tã ixprĩ hã amar mex nẽ.

30 Pěr ãm ate mẽmoj piitã omunh par xwỳnh na ka. Jakamã ate mẽ ijamaxpěr piitã hkôt aprĩ hã mẽ ixpumunh par kumrêx kênã kot ka tanhmã mẽ ijamaxpěr to hã mẽ ixkukja. ãm hãmri na ka Tĩrtũm rũm awryk ã amnhĩ jarẽ. Anẽ.

31 Hãmri nhũm mẽ inhma nẽ mẽ inhmã:

—Xà ãm hãmri na ka mẽ ixkôt ajamaxpěr tỳx nẽ?

32 Kwa mẽ o kora. Kot kaj mẽ tokyx mẽ umaj ixre nẽ angrà nẽ ma ahpỹnhã mẽ anhõ krĩ hwỳr mra. Mẽ kot ixkôt tanhmã mẽ anhĩmex to pymaj kot kaj mẽ ã amnhĩ nhĩpêx anẽ kãm ga. Kot paj ahte mẽ kãm ixãm pyrak o amnhĩ nhĩpêx nom ahte ixãm kêt nẽ. Inhĩpêêxà aa kot ixrere hã.

33 —E ixkukwak ri mẽ ajamakêtkati nẽ axãmnhĩx mẽ apa kaxyw na pa ã mẽ amã ixkapěr anẽ. Nom mẽ kêp ixkwỳ hkêt xwỳnhjaja koja nhỹrmã ixtã mẽ atomnuj tỳx o pa. Tã kê ka mẽ amã mẽ uma nẽ tee ri amnhĩ kukamã ajamaxpěr o ri apa hkêt nẽ.

Nhỹrmã ixte mẽmoj punuj piitã ho ijapêx par ã arĩgrota ã kot paj mẽ atã mẽ ho ijapêx par kumrêx. Anê.

17

*Jejus kot amnhĩ to Tĩrtũm wỳr ã harênh
Rômãn 8.34; Eprêw 7.25*

¹ Tã nhũm Jejus mẽ inhmã kapêr pa nê hpãnhã kaxkwa hwỳr rĩt nê Tĩrtũm mã amnhĩ jarê nê kãm:

“Pa Papaj. E na pa ra amã hprãm xà hkôt tanhmã amã amnhĩ nhĩpêx to hpar o mỗ nê akupỳm awỳr inhnojarêt kaxyw. Jakamã kot kaj ixpê Akra hã ma akupỳm amnhĩ wỳr ixto api. Mẽ kot ja hã ixpumunh nê amã amex o amex ã ajarênh o pa kaxyw.

² Na ra pyka piitã hkôt ri mẽ pa xwỳnh kwỳjaja amnhĩ kaxyw ixkôt hamaxpêr nê ixkôt amnhĩ xunhwỳ nom ka na ka pre inhmã mẽ agõ. Ixte mẽ htĩr tũm nê mẽ pa mã xwỳnh ã mẽ harênh kaxyw. Jakamã koja mẽ nhỹrmã ixkukwak ri pakuri htĩr tũm nê pa ho pa.

³ Na mẽ ra ixkapêr mar mex nê. Nê ixpê Jejus Kris pê ate mẽ hwỳr inhmênh xwỳnhja kôt hamaxpêr mex nê. Nê apê Tĩrtũm ã ãm apyxi mex ã mããnênh akôt hamaxpêr mex nê. Nê amex o amex ã akôt hamaxpêr nê kãm akĩnh nê. Jakamã koja mẽ nhỹrmã pakuri htĩr tũm nê pa ho pa. Nà koja mẽ anê.

⁴ Amnepêm amnê pyka ja hwỳr inhnojarêt nhũm ate tanhmã ixte amnhĩ nhĩpêx to hã inhmã karõta na pa ra hatur xãm mẽnh kaxyw. Na pa xatã mẽ kãm akapêr jarênh o ri mẽ hkôt ixpa. Jao ra mẽ kãm apê Pahi Maati hã apixi

mex ã ajarẽ nẽ amex o amex nẽ axàhpumunh o axàhpumunh ã mẽ kãm ajarẽnh o ri ixpa.

⁵ Jakamã e Papaj. Kêr ka tokyx ixpê akra hã ma akupÿm amnhĩ wÿr ixto api. Pa akupÿm awÿr pøj nẽ te amnepê m akuri ixpaja pyrã nẽ axte akuri ixpa ho ixpa.” Anẽ.

Jejus kot hkwÿjê ho Tirtũm wÿr ã harẽnh

Nhũm Jejus arĩ Tirtũm mã kapêr nẽ kãm:

⁶ “E Papaj. Nà ra ate pyka hkôt inhmã mẽ òr xwÿnhjaja na pa ra mẽ kãm akapêr jarẽnh ryy ho ri mẽ hkôt ixpa nhũm mẽ akapêr kôt pix mã amnhĩ nhĩpêx o pa.

⁷ Tã ixte anhÿ hã tanhmã amnhĩ nhĩpêx to ho ri ixpaja ra mẽ kot ja hã ixpumunh mex.

⁸ Na pa pre hte axô ri mẽ ahkre ho ri ixpa nhũm mẽ amnhĩ kaxyw ixkôt hamaxpêr mex nẽ. Nẽ ate mẽ hwÿr inhmẽnh nhũm mẽ hwÿr ixwrÿkja ã mẽ kot ixpumunh mex.

⁹⁻¹⁰ Tã ot pa mẽ ho awÿr o xa. Nom na pa mẽ kêp ixkwÿ hkêt xwÿnhjê ho awÿr kêt nẽ. ãm ate inhmã mẽ òr xwÿnhjê pix o na pa awÿ. Mẽ kêp akra jakamã mããnẽn mẽ kêp ixkraa. Jakamã na htem pamã pamex o pamex ã pajarẽnh o ri pa.

¹¹ Axihtÿx o axihtÿx jakamã na ka pre amnhĩ xwar inhmã axihtÿx xà hkwÿ gõ pa te ixte axihtÿx pyrãk. Tã na pa ra akupÿm awÿr inhnojarêt kaxyw. Kot paj jar pyka hkôt ri ixpa ry hkêt nẽ. Nom ixkwÿjaja koja mẽ arĩ kamã pa jakamã kwa Papaj. Kêr ka inhmã mẽ omunh mex nẽ kê mẽ inhÿ hã tãm ri amnhĩ nhĩpêx o pa. Nẽ pahpyrã nẽ te ixkre tipxi kamã mẽ htipxi nẽ mẽ pa pyrãk o axpẽn kôt pa.

12 Kormã mẽ kamã ixpata ã ate inhmã axihtỳx xà hkwy nhõrta o pa mẽ htãnopxar mex o ri mẽ hkõt ixpa. Jakamã nhũm mẽ ri ixkõt amnhĩ nhĩpêx o pa. ãm Jut Kariot pix koja mẽ hkĩnhã tanhmã amnhĩ tomnuj to nẽ hapêx. No ãm ra akapêr ã kagà kot hkukamã ã kot amnhĩ nhĩpêx anhỹr ã harênh xàja kõt koja ã amnhĩ nhĩpêx anẽ nẽ hapêx.

13 Tã na pa ra akupỹm awỳr inhnojarêr kaxyw jakamã na pa ixte tokyx mẽ rer mã xwỳnhjê ho awỳr o xa. Kormã mẽ hkõt ri ixpa ri. Mẽ kot inhmar nẽ ixpyrà nẽ hkĩnh nẽ hamakêtkati nẽ ri pa kaxyw.

14 Na pa pre ra mẽ kãm akapêr jarênh ry nẽ nhũm mẽ ixpyrà nẽ akõt pix mã amnhĩ nhĩpêx o ri pa. Jakamã nhũm hte mẽ kêp ixkwỳ hkêt xwỳnhjaja tee ri ja hã mẽ omu nẽ axtem nẽ kãm mẽ hkurê nẽ. Nom mẽ kêp mẽ hkwy hkêt jakamã na htem ã mẽ kamã gryk anẽ.

15 Tã na pa ã mẽ ho awỳr anhỹr o xa. Nom mẽ kot amnhĩ tomnuj xwỳnhjê hkàx ã mẽ pa kaxyw na pa mẽ ho awỳr kêt nẽ. Koja mẽ arĩ mẽ hkõt ri pa. Nom mẽ uràk nẽ amnhĩ tomnuj o pa pumaj na pa ã mẽ ho awỳr anẽ.

16 Mẽ kêp mẽ hkwy hkêt. Axtem mẽ kot amnhĩ nhĩpêx. Te mẽ kot mẽ pahte amnhĩ nhĩpêx pyràk jakamã kê mẽ amarĩ mẽ hkõt pa htã mẽ kot amnhĩ nhĩpêx kõt amnhĩ nhĩpêx o pa hkêt nẽ. ãm pahkõt pix mã amnhĩ nhĩpêx o pa.

17 Akapêr pix na mex o mex jakamã koja mẽ hkõt amnhĩ nhĩpêx o pa nẽ gaa nẽ te pahte amnhĩ nhĩpêx pyràk o amnhĩ nhĩpêx.

18 Na ka pre amnê mẽ hwÿr inhmẽ pa pre ixte mẽ kãm akapêr jarênh o ri ixpa kaxyw mẽ hwÿr wrÿ. Nê amnhĩ pyrà nê mẽ kot akapêr jarênh o mẽ hkôt pa kaxyw pa mẽ kurê nê ma mẽ hwÿr mẽ kurê.

19 Inhmã mẽ hapê jakamã kot paj amnhĩ grônh kôt nhãm mẽ kot axpên mã ri inhgrônh o pa xwÿnhjê mã amnhĩ gô. Amã hprãm xà hkôt. Ixkwÿjaja kot ja hã ixpumunh nê ixpyrà nê amã hprãm xà hkôt pix mã tanhmã amnhĩ nhĩpêx to ho pa kaxyw.” Anê.

Jejus kot hkrajê piitã ho Tĩrtũm wÿr

20 Nhũm Jejus arĩ Tĩrtũm mã amnhĩ jarê nê kãm:

“Tã na pa ã jajê ho awÿr anê Papaj. Nom ixkôt mẽ pa ho mẽ pa xwÿnhjê pix o na pa awÿr kêt nê. Mããnên mẽ ô ri nhÿrmã mẽ kot ixkôt amnhĩ xunhwÿr mã xwÿnhjaja na pa mẽ ho ixpimràà tã mẽ ho awÿr.

21 Kê mẽ pahpyrà nê te hamaxpêr tipxi pyrà nê ri axpên to pa. Nê pahte amnhĩ nhĩpêx kôt pix mã amnhĩ nhĩpêx o pa. Kojã mẽ ã amnhĩ nhĩpêx anhÿr o pa nhũm mẽ kêp pahkwÿ hkêt xwÿnhjaja pahtã mẽ omu nê ate mẽ hwÿr inhmênh ã apumunh kurê kumrêx.

22 Nê kojã mẽ ixkukwak ri panhÿ hã te pahpyrà nê hamaxpêr tipxi nê ri pa pyræk o amnhĩ nhĩpêx o pa.

23 Na pa htem te ixkre tipxi kamã mẽ ixtipxi pyræk o axpên nhĩpêx o ri ixpa. Te pahte axpên nhĩpêxta pyræk. Tã kojã mẽ ixwakre kamã ã axpên nhĩpêx anhÿr o pa nhũm mẽ kêp pahkwÿ hkêt xwÿnhjaja ja hã mẽ omu nê hamaxpêr o: ‘Nà pêr

ãm hãmri na pre Tirtũm tãm mẽ pahwỳr Jejus mẽ. Kãm hapê htỳx tã mẽ pahwỳr kumẽ nhũm wrỳ nẽ amnhĩ xwar kãm hkwỳjê japê nẽ. Anhỳr o koja axpẽn mã pajarẽnh o pa.

²⁴ Amnepêm amrakati ri pa pre amã ijapê hã ri ixpa. Tã ot pa jajê ho awỳ. Ka na ka pre inhmã mẽ agõ. Tã ma awỳr inhmõr mã xàta wỳr na pa inhmã mẽ àpir prãm nẽ. Koja mẽ nhỹrmã ma pahwỳr api pu mẽ pahpiitã pahpimràatã pamã axpẽn japê hã ri papa ho papa.

²⁵ E Papaj. Amex o amex tã mẽ kệp ixkwỳ hkêt xwỳnhjaja na kormã ate mẽ hwỳr inhmẽn h xwỳnh ã ixkõt hamaxpěr kêt nẽ. Nom mẽ kot ixkõt amnhĩ xunhwỳr xwỳnhjaja na mẽ kurom ja hã ixkõt hamaxpěr mex nẽ.

²⁶ Na pa ra ixprĩ hã mẽ kãm akapěr o amnhĩrĩt o ri ixpa. Tã kot paj axte mẽ kãm akapěr kwỳ jarẽ. Amã ijapêta pyrà nẽ mẽ kãm axpẽn kĩnh ã axpẽn to pa kaxyw na pa mẽ kãm hã karõ. Kot paj inhĩ hã mẽ hkõt ixpa hkêt tã koja Pahkarõja mẽ hwỳr wrỳ nẽ mẽ hkarõ mã agjê nẽ te pa mẽ hkõt ixpa pyræk o mẽ hipêx. Ja na pa inhmã hprãm. Tã koja anẽ. Jakamã na pa ã mẽ ho awỳr anẽ. Tã ãm ja pix Papaj.” Anẽ.
Nhũm pre ã Jejus õ Papaj mã mẽ inhnoo mã amnhĩ jarẽnh anẽ pa mẽ ixpiitã hã kuma.

18

Mẽ kot Jejus pynênh ã mẽ harênh

Matêwre 26.47-56; Makre 14.43-50; Rukre 22.47-

53

¹ Tã nhũm Jejus mẽ ixto Hipêêxà hwỳr pa. Hãmri nẽ ixkreja rũm ma tẽ nẽ Jerujarẽ rũm kato nẽ

ma gô pê Kirõ hwÿr tẽ pa mẽ hkôt ixpa ho ixpa xwÿnhjaja ma hkôt mra. Nẽ gô hã rê nẽ hikjê hã mẽ kot mẽmo pĩ hkô hkre xwÿnhja wÿr mra nẽ parpê ixkrĩ hpa.

² Na pre hte Jejus xatã hwÿr amnhĩ kôt mẽ ixto pa ho kuhê. Jakamã nhũm Jut Kariot kot mẽ kãm òr mã xwÿnhhta ra kot hwÿr mẽ ixpa ho ixkuhê xàta pumunh mex.

³ Jakamã pa mẽ hwÿr pôj nẽ ixkrĩ hpa nhũm mẽ mẽ ixwÿr mra. Jut Kariot mẽ pôristijaja. Rõm nhõ xwÿnhjê nhõ pôristijê mẽ patre nhõ pôristijaja nhũm mẽ mẽ ixwÿr Jut Kariot kôt mra. Ijaew nhõ pahijê nhỹ hã mẽ ixwÿr mra. Piitã wapohti jamÿ nẽ pô hpôk nẽ kanê jamÿ nẽ mẽ ixwÿr hpôk o kato.

⁴⁻⁵ Hãmri nhũm Jejus amnhĩ wÿr mẽ omu nẽ kànhmã xa nẽ ma mẽ kutã tẽ. Jut Kariot kot mẽ kãm òr kaxyw nhũm amnhĩ tã omunh mex jakamã amnhĩ wÿr mẽ omu nẽ ma mẽ kutã tẽ. Hãmri nẽ mẽ hkaxpa nẽ mẽ omunh o xa nhũm Jut Kariot mẽ kuri xa nhũm Jejus mẽ omu nẽ mẽ kãm:

—Pa. Mẽmoj japêr na ka mẽ pô hpôk o ri apa? Anẽ.

Hãmri nhũm mẽ kãm:

—Nà Jejus pê Najare nhõ xwÿnh japêr o na pa mẽ ri ixpa. Anẽ.

Hãmri nhũm mẽ kãm:

—Tÿ ot pa xa. Pa na ixpê Jejus. Anẽ.

⁶ Hãmri nhũm mẽ kuma nẽ tee ri axpên pumu nẽ umaj katê ho axkamẽ nẽ kuhê. Nom katê ho pikamênh o ra rôrôk pa nẽ hikwÿ.

⁷ Hãmri nẽ kànhmã kuhê hpa nhũm Jejus axte mẽ kãm:

—Kwa mẽ inhmã amnhĩ jarẽ. Mẽhõ japêr o na ka mẽ apa? Anẽ.

Hãmri nhũm mẽ kãm:

—Jejus pê Najare nhõ xwỳnhta japêr o na mẽ ri ixpa kênã. Anẽ.

⁸ Hãmri nhũm mẽ kãm:

—Kwa ra ixte mẽ amã amnhĩ jarẽnh kênã. Paa. Ijapêr o na ka mẽ ri apa. Jakamã kwa kêr ka mẽ ixkôt ri mẽ pa xwỳnhtaja tanhmã mẽ ho hkêt nẽ. Kê mẽ mãmri anhgrà nẽ ma mra.

⁹ Anhỹr o mẽ inhnê mẽ kãm kapêr. Na pre ra ham Hipêêxà mã mẽ ixtã kãm amnhĩ jarẽ nẽ kãm:

—Kormã mẽ kamã ixpa ri ate inhmã ixihỳx xà nhõrta o na pa mẽ htãnopxar mex o ri mẽ hkôt ixpa.

Anhỹr o mẽ ixtã kãm amnhĩ jarẽnh jakamã nhũm ã mẽ inhnê mẽ kot unênh mã xwỳnhjê mã kapêr anẽ.

Simãw Pêtre kot mẽhõ pê hamak krãhyr ã harẽnh Matêwre 26.51-54; Makre 14.47; Rukre 22.49-51

¹⁰ Hãmri nhũm Simãw Pêtre tee ri Jejus ã mẽ omu hãmri nẽ õ wapo kapa nẽ jam ho apê nẽ ho hamak nhĩkjê krãhta. Mawti jamak krãhta. Mawtija mẽõ patre mã apênh xwỳnhjê hõ na pre nhũm Simãw Pêtre hamak krãhta.

¹¹ Hãmri nhũm Jejus ja hã omu nẽ nê kãm kapêr nẽ kãm:

—Tk. Kwa nà amarĩ xa nẽ akupỹm awapota hkàm haxà. Ixte mẽ anê amnhĩ xà htỳx kamã ijamak kaxyw na pa pre Inhĩpêêxà rũm amnẽ mẽ awỳr pika hwỳr wrỳ. Kêt inhmã kãm hprãm xà hkôt pix mã na inhmã tanhmã amnhĩ nhĩpêx to ho ixpa hprãm. Jakamã kwãr mẽ mãmri tanhmã kãm ixto hprãm xà hkôt mãmri tanhmã ixto. Anẽ.

Mẽ kot Anas wỳr Jejus o htẽm ã mẽ harẽnh

Matêwre 26.57-58; Makre 14.53-54; Rukre 22.54

¹²Tã nhũm pôristi mẽ mẽ hkrãhtũm nẽ mẽõ patre nhõ pôristijaja Jejus pynê nẽ hpa hpre hpa

¹³nẽ ma Anas wỳr o tẽ. Anasja Kajpas piinhõ na pre. Nhũm Kajpas kormã amgràja ã Anas pyrà nẽ kêp mẽõ patre maati.

¹⁴Jakamã na pre ra Ijaew nhõ pahijê mã Jejus jarẽnh o:

—Nà kot puj mẽ Jejus pĩr tokyx anẽ. Kê tapxipix ty pu mẽ arĩ mỳrpê pahpiitã pajamakêtkati nẽ ri papa. Anẽ.

Jakamã nhũm mẽ Jejus pynê nẽ kormã ma patre maati hwỳr o tẽ.

Simãw Pêtre kot Jejus kôt pa hkêt ã kot amnhĩ jarẽnh

Matêwre 26.69-75; Makre 14.66-72; Rukre 22.54-62

¹⁵Hãmri pa ixpê Juãw mẽ ixkràmnhwỳ Simãw Pêtre mẽ pa wa ma mẽ hkôt wa tẽ. Nhũm mẽ ra mẽ inhõ patre maati nhõrkwỹ hwỳr Jejus o axà. Nhũm patre maati kot ixpumunh jakamã nhũm kãm àpênh xwỳnhja ixpumu nẽ inhmã anẽ pa mẽ hkôt axà.

¹⁶Nom nhũm Simãw Pêtre arĩ kapôt ã hakwa krem xa. Hãmri pa omu nẽ akupỹm hwỳr tẽ nẽ mẽhõ niti kot hakwa kre jamãr o ãm xwỳnhja mã anẽ nhũm kãm kahê xà mẽ nhũm mẽ ixkôt axà.

¹⁷Hãmri nhũm nita hprĩ hã omu nẽ kãm:

—Xêê. Pêr apê mẽ kot unênh nẽ o mõi mũj kôt ri mẽ pa xwỳnhjê hõ na ka mê? Anẽ.

Hãmri nhũm kuma nẽ kãm:

—Tk. Nà ixte mẽhõ myti ata pumunhre hã. Anẽ.

18 Hãmri nhũm ra kôt ã kamàt nẽ ra kryy nẽ nhũm mẽ àpênh xwýnh kwý mẽ mẽõ patre nhõ pôristi hkwyjaja amnhĩm kuto nẽ hã ànhunh o kuhê. Nhũm Simãw Pêtre mẽ omu nẽ mẽ hwýr tẽ nẽ mẽ ìhkô hã ànhunh o xa.

Patre maati kot Jejus kukjêr ã harênh

Matêwre 26.59-66; Makre 14.55-64; Rukre 22.66-71

19 Rôm nhũm Anasja hêx rom tanhmã Jejus kukjêr to nẽ kãm:

—E kwa inhmã amnhĩ jarê. Tanhmã na ka hte we akôt mẽ pa ho mẽ pa xwýnhjê jahkre hto ho apa wehe? Anê.

20 Hãmri nhũm amnhĩ tã kãm:

—Nà na pa hte mẽ piitã mẽ noo mã ri mẽ kãm ixkapêr o ixpa. Tĩrtũm kapêr o mẽ ahkre xà hã ixkre kamã nẽ Tĩrtũm mã amnhĩ jarênh xà hã ixkre kamã pa hte mẽ piitã mẽ noo mã ri mẽ kãm tanhmã ixkapêr to ho ri ixpa. Na pa hte nhýri ixpimxur pê ri mẽ kãm tanhmã ixkapêr to ho ri ixpa hkêt nẽ.

21 Tã ka ixtã mẽ kot inhmar o kuhê xwýnhjaja tanhmã ixtã mẽ hkukjêr to hkêt nẽ. ãm papxipix ri ixkukja. Kwa ixtã mẽ hkukja kê mẽ kot tanhmã ixkapêr mar to xà hkôt tanhmã amã ijarênh to nà? Anê.

22 Hãmri nhũm patre nhõ pôristi hõja kuma nẽ hwýr tẽ nẽ kãm:

—Tk. Kwa na htem ã patre maati mã kapêr anhýr kêt nẽ. Na htem hã hpijaam o kãm kapêr. Tã na ka axtem nẽ ri ã kãm akapêr anê. Anê.

Hãmri nẽ hinep hkura.

23 Hãmri nhũm Jejus amnhĩ tã omu nẽ kãm:

–Kwa kot pa tanhmã mẽ amã amnhĩ to ixêx to ka mẽ hã inhma nẽ rĩ kormã tanhmã axpẽn mã ixto akapêr to rỳ hã ixtak. Nom ãm hãmri ixte mẽ amã amnhĩ jarênh tâ ka axtem nẽ ri inhĩnep ixtak. Anẽ.

²⁴ Hãmri nhũm Anas tanhmã mar to hpa hãmri nẽ umre Kajpas wỳr kumẽ. Na pre Kajpasja kormã hitom kãm ri tanhmã amnhĩ nhĩpêx to ho nhỹ nhũm Anas mẽ kãm anẽ nhũm mẽ kuma nẽ hwỳr Jejus o tẽ nẽ ho axà. Arĩ hpa hpre rãhã hwỳr o tẽ nẽ ho axà nhũm xa nẽ kãm amnhĩ jarẽ.

Simãw Pêtre kot axte Jejus kôt pa hkêt ã amnhĩ tâ aprãr ã harênh

Matêwre 26.71-75; Makre 14.69-72; Rukre 22.58-62

²⁵ Nhũm Simãw Pêtre arĩ mẽ ìhkô hã ànhunh o xa nhũm mễhõja kãm kapêr nẽ kãm:

–Kwa pêr apê Jejus kôt ri mẽ pa xwỳnhjê hõ na ka. Anẽ.

Hãmri nhũm kuma nẽ kãm:

–Tk. Kokỹ ixte mễhõ něj pumunhre hã. Anẽ.

²⁶ Hãmri nhũm hpãnhã mẽõ patre maati mã àpênh xwỳnhja mãănẽn omu. Simãw Pêtre kot kêp hamak krãhyr xwỳnhhta kwỳ na pre. Jakamã nhũm hprĩ hã omunh mex kurê kumrêx nẽ kãm:

–Kwa nà ka na ka mũtar pĩ hkôta kamã mẽ ìhkô hã xa pa apumu. Anẽ.

²⁷ Hãmri nhũm tee ri kuma nẽ axte mẽ kãm amnhĩ tâ aprãr kãm hihtỳx nẽ. Jao ra mẽ kãm amnhĩ tâ aprãr o axkrunêpxija mẽ nhũm krãhyre hkàr kurê kumrêx. Ra Jejus kot hkukamã harênh xà hkôt kêp hkwỳ hkêt ã amnhĩ tâ aprãr o axkrunêpxi.

Jejus kot Pirat mã amnhĩ jarẽnh

Matêwre 27.1-2, 27.11-31; Makre 15.1-20; Rukre 23.1-5, 23.13-25

²⁸ Hãmri nhũm mẽ ixpê Ijaew hkrãhtũmjaja ra Kajpas rũm Jejus o kato nẽ ma Pirat wỳr o tẽ. Piratja na pre te Rõmjê nhõ pahi pẽ Sesti mã mẽ ixpê Ijaew jamãr o pa nhũm mẽ ma hwỳr o tẽ. Nhũm ra myt kator grire nhũm mẽ hwỳr o tẽ nẽ òrkwỹ kapem o xa. Pirat kệp Ijaew kêt jakamã nhũm mẽ òrkwỹ hwỳr gjêx kêt nẽ kapôt ã kuhê. Na hte Ijaew kormã Pas ã hkĩnh hãmri nẽ nhãm mẽ kệp Ijaew kêt xwỳnhjê nhõrkwỹ hwỳr gjêx kêt nẽ. Koja mẽ hwỳr agjê nẽ amnhĩ tomnu nẽ Pas ã apkur kêt nẽ. Jakamã nhũm mẽ Pirat wỳr Jejus o tẽ no ãm hwỳr o àr kêt nẽ. ãm ixkre kapem o xa.

²⁹ Hãmri nhũm Pirat mẽ hwỳr kato nẽ omu nẽ hã mẽ hkukja nẽ mẽ kãm:

—Kwa tanhmã na we amnhĩ tomnuj to ka mẽ ixwỳr o tẽ? Anẽ.

³⁰ Hãmri nhũm mẽ kãm:

—Nà kot amnhĩ tomnuj o pa xwỳnh kênã. Jakamã na pa mẽ awỳr o tẽ. Ate tanhmã kot amnhĩ tomnuj to hã harẽnh mar nẽ mỳrapê tanhmã ho kaxyw. Anẽ.

³¹ Hãmri nhũm mẽ kuma nẽ mẽ kãm:

—Tk. Kwa mẽ kamjaja ma amnhĩ kôt o tẽ nẽ amnhĩ krã hkôt tanhmã ho. Mẽ ate tanhmã kot amnhĩ nhĩpêx to hã omunh xà hkôt. Anẽ.

Hãmri nhũm mẽ tee ri kuma nẽ mẽ kãm:

—Kwa amnepêm mẽ ixpê Ijaewjaja na pa pre htem kên o mẽ kot amnhĩ tomnuj xwỳnhjê tak o mẽ kupa. Tã na ra Rõm nhõ pahihtija mẽ pamjaja mẽ ixte mẽ hpar nê mẽ ixkurê. Tapxipix kãm mẽ hpar

ã àmnênh prãm. Jakamã kot kaj ÿ hã mẽ inhmã tanhmã hã axàmnh to kê mẽ kupĩ. Ra ja kaxyw mẽ kot mẽ ixkaxyw axãm kênã. Anẽ.

³² Rõm nhõ xwýnhjaja na htem mẽ kot amnhĩ tomnuj xwýnhjê hpar kaxyw nẽ pĩ kahpa hã mẽ hanhõ nẽ mẽ kupa. Nhũm Jejus amnhĩ kukamã tanhmã mẽ kot hpĩr to hã mẽ omunh mex jakamã ra hprĩ hã mẽ inhmã mẽ kot tanhmã hipêx to hã mẽ harẽ. Jakamã nhũm pre ã Ijaew Pirat kot mẽ kãm hpĩr prãm xà ã kãm kapêr kãm xihtỳx anẽ.

³³ Hãmri nhũm mẽ kuma nẽ akupỳm òrkwỹ hwỳr axà nẽ amnhĩ wỳr Jejus ã karõ nhũm hwỳr axà nhũm kãm:

—E kwa inhmã amnhĩ jarẽ. Xà apê Ijaew nhõ pahi na ka? Xà ka na htem amnhĩ wỳr akãm hamak o pa? Anẽ.

³⁴⁻³⁶ Hãmri nhũm kãm:

—Tỳ ãm hãmri na ka ã ijarênh anẽ. Nom jar pika ja kamã ixpê mẽõ pahi hkêt. Axtem ixpê mẽõ pahi na pa. Mo kaxyw na ka ã ixkukjêr anẽ? Xà na pre mẽhõ ixte mẽ anhõ pahi Sesti kutã ixãm ã amã ijarẽ ka ama nẽ tee ri ixkukamã ajamaxpêr? Nà xà ãm hãmri amã Tĩrtũm kot Ijaew wỳr inhmênh ã ixpumunh prãm? Mo kaxyw na ka ã ixkukjêr anẽ? Anẽ.

Hãmri nhũm tee ri kuma nẽ kãm:

—Tk. Mo kot pa kêt ri axtem nẽ Tĩrtũm kot Ijaew wỳr amênh ã akukja? Mẽ apyrà nẽ ixpê Ijaew kêt kênã. Mẽ kot ixwỳr ato htêm xwýnhjaja na mẽ ã ate amnhĩ jarênh anhỹr ã ajarênh anẽ. Nà mẽ akwỳjê mẽ mẽ anhõ patre krãhtũmjaja na mẽ ã inhmã ajarênh anẽ. Jakamã e aprĩ hã inhmã

amnhĩ jarẽ. Tanhmã na ka we amnhĩ tomnuj to nhũm mẽ ixwỳr ato tẽ? Anẽ.

Hãmri nhũm kuma nẽ kê axte kãm:

—Nà ixpê pyka ja kamã mẽ õ pahi hkêt. Kop ãm ixpê pyka ja kôt mẽ õ pahi ronhỹx ra ixkôt ri mẽ pa xwỳnhjaja tanhmã ixtã mẽ ato. Nom jar ixpê mẽ õ pahi hkêt. ãm axtem ixpê mẽ õ pahi na pa. ãm hãmri na pa ã amã amnhĩ jarẽnh anẽ. Anẽ.

³⁷ Nhũm ã kãm amnhĩ jarẽnh anẽ hãmri nhũm tee ri kuma nẽ kãm:

—Xà apê mẽ õ pahi hõ na ka? Anẽ.

Hãmri nhũm kãm:

—Tỳ. Nà ãm hãmri na ka ã ijarẽnh anẽ. Na pa pre amnẽ pikaja wỳr wrỳ nẽ jar mẽ akamã ixkato nẽ mẽ akamã ixaptàr. Ixte tanhmã mẽ kãm ixkapër to ho ri ixpa kaxyw na pa pre wrỳ nẽ mẽ akamã ixpa nẽ ãm hãmri mẽ kãm ixkapër o ri ixpa. Na pa hte tãm ixkapër o ri ixpa. Tã mẽ kot ixkapër mar nẽ ixkôt ri amnhĩ nhĩpêx o mẽ pa xwỳnhjaja na htem ixpê mẽ õ pahiti hã ijarẽnh o pa. Anẽ.

³⁸ Hãmri nhũm Pirat kot tãm kãm kapër ã amnhĩ jarẽnhja ã kuma nẽ kãm:

—Tk. Aa ixte pika ja kamã mẽhõ pumunh nhũm tãm kapër o pare hã. Anẽ.

Hãmri nẽ kapër ã kuma nẽ tee ri hkukamã hamaxpër. Hãmri nẽ akupỹm Ijaew wỳr ho kato nẽ mẽ kutã o xa nẽ mẽ kãm:

—Kwa tanhmã kot amnhĩ tomnuj tore hã.

³⁹ E mẽ inhma. Na pa hte amgrà mẽ arĩgro pẽ Pas kãm mẽ amã mẽ hãgjẽnh xà rũm mẽ akwỳjê ho hpỹnh nẽ mẽ hapôj nhũm mẽ hamakêtkati nẽ amnhĩx ri pa. Ka mẽ ja hã omu nẽ Pas ã akĩnh nẽ.

Jakamã e. Pa mẽ amã mẽ anhõ “pahihti” jarënhja mã inhũre. E na pa ra kãm inhũre. Anẽ.

⁴⁰ Hãmri nhũm mẽ tee ri ã kapër anhÿr ã kuma nhũm ja mẽ kêp omnuj tÿx nẽ. Nhũm mẽ hã kàx pê gryk kamã kãm kapër kãm hihtÿx nẽ kãm:

—Tk. Kwa nà kãm anhũrer kêt nẽ. Kêt Parapas mã mãn anhũre. Anẽ.

Parapasja na pre hte tanhmã amnhĩ tomnuj tÿx to ho ri pa nhũm prem mÿrapê unê nẽ haxà. Tã nhũm mẽ axtem nẽ Pirat kot kãm urer prãm xaj Jejus kaga.

19

Mẽ kot Jejus tak ã mẽ harënh

Matêwre 27.27-31; Makre 15.16-21; Rukre 23.20-25

¹ Tã nhũm Pirat akupÿm òrkwÿ hwÿr Jejus o axà nẽ ò pòristijê mã hã amÿnê nhũm mẽ hwÿr mra nẽ htak o kuhê.

² Hãmri nẽ kêp pahi hã hpër o pikënh kaxyw kãm pahi hã mẽ ahkà nhĩpêx nẽ hkrãm haxà. Nom axtem mẽmo mrônhĩ te kot ronh kanêre pyræk xwÿnhja nhũm mẽ hikãx nẽ hkrãm haxà. Nẽ kêp pahi hã mẽ ê kamrêk py nẽ kãm haxà.

³ Hãmri nẽ xatã hwÿr mra nẽ hinep htak nẽ hã hpër o pikënh o xa nẽ kãm:

—E apê Ijaew nhõ pahi punuti na ka. Anẽ.

⁴ Hãmri nhũm Piratja akupÿm Ijaew wÿr kato nẽ mẽ kãm:

—E koja inhõ pòristi akupÿm mẽ awÿr ho kato ka mẽ omu. Na pa tee ri kot tanhmã amnhĩ tomnuj to hã hkukja. Për tanhmã kot amnhĩ tomnuj to hkêt kênã. Anẽ.

⁵ Hãmri nhũm Jejus kato nẽ arĩ pahi hã àhkà tu nẽ ê kamrêk jaxà nẽ o xa nhũm Pirat mẽ kãm:

—E kwa mẽ omu nẽ kamã axukapri hkêt wehe. Anẽ.

⁶ Hãmri nhũm patre krãhtũmjê mẽ mẽõ pôristijaja tee ri ja hã kuma nhũm ja mẽ kêp omnuj nẽ. Hãmri nẽ hã kãm kapêr kãm hihtỳx nẽ kãm:

—Tk. Kwa nà pĩ kahpa hã mãn anhô. Kê pĩ kahpa hã mãn ajêt nẽ ty. Anẽ.

Hãmri nhũm tee ri hã mẽ kuma nẽ mẽ kãm:

—Nà mẽ kam nẽ ma amnhĩm o tẽ nẽ mẽ kam amnhĩm ho anẽ. No pa kot paj ho anhỳr kêt nẽ. Mo mỳrapê kot pa kêt hã amỳnê nhũm mẽ kupĩ? Nà kwarĩ kot pa ho anhỳr kêt nẽ. Anẽ.

⁷ Hãmri nhũm mẽ tee ri kuma nẽ kãm:

—Kwa kêp Tĩrtũm Kra hã amnhĩ jarênh kênã. Mẽ inhĩgêjtaja na prem ã mẽ ixte amnhĩ jarênh anhỳrja nê mẽ inhmã kapêr pa htem ã amnhĩ jarênh anhỳr kêt nẽ. Kojã mễhõ ã ri amnhĩ jarênh anê nhũm mẽ ja mỳrapê kupĩ. Anẽ.

⁸ Hãmri nhũm Pirat tee ri Jejus kêp Tĩrtũm Kra hã amnhĩ jarênhja ma nẽ kãm uma nẽ kãm tanhmã ho hprãm kêt nẽ.

⁹ Hãmri nẽ akupỹm òrkwỹ hwỳr ho axà nẽ axte hkukja nẽ kãm:

—Kwa aprĩ hã inhmã amnhĩ jarê. Nhỹhỹnh na ka pre mẽ ixwỳr mỗ? Anẽ.

Nom nhũm axte tanhmã kãm nẽ hkêt nẽ. Ấm arĩ akryk mar o xa.

¹⁰ Nhũm tee ri omu hãmri nẽ kãm:

—Kwa xà ate ixpumunh kêt? Inhỹ hã na htem mẽ kupa nẽ inhỹ hã akupỹm mẽ hapôj. Tã ka pêr

apri hã inhmã tanhmã amnhĩ jarẽnh to hkêt nẽ ri akryk akuhê. Anê.

¹¹ Hãmri nhũm Jejus kãm:

—Nom Tirtũm nhỹ hã pix mã na ka hte ã amnhĩ nhĩpêx anê. Kêp ãm Tirtũm kãm ja prãm kêt ronhỹx ka tee ri tanhmã amã ixto hprãm hkapyrỹ. Tãm kot mẽ ixkaxyw axãm kênã. Tã mẽ kot awỹr inhmẽnh nẽ ri ixtyk ã ijarẽnh xwỳnh pê Ijaew nhõ pahijaja. Ra mẽ kot ixkaga jakamã na mẽ ã amã ijarẽnh anê. Jakamã mẽ kot amnhĩ tomnuj tỳx o ajakrenh. Anê.

¹² Hãmri nhũm Piratja tee ri ã kapêr anhỹr ã kuma nẽ kot kãm urer prãm nẽ. Hãmri nẽ akupỹm Ijaew wỳr kato nẽ hã mẽ kãm kapêr nhũm mẽ tee ri kot kãm urer kaxyw ã amnhĩ jarẽnhja ma nẽ kãm ja prãm kêt kumrêx. Jakamã kàxpê nẽ kãm kapêr nẽ kãm:

—Kwa nà ra kêp mẽ inhõ pahi hã kot amnhĩ to hêx kênã. Kot mẽhõ ã ri amnhĩ jarẽnh anê nhũm Rõm kamã mẽ panhõ pahi Sestija ja hã harẽnh ma nẽ kamã gryk tỳx nẽ. Tã kot kaj kãm anhũre nhũm ajarẽnh ma nẽ akamã gryk nẽ. Anê.

¹³ Hãmri nhũm tee ri mẽ kuma hãmri nẽ ma pahi kot tanhmã mẽ harẽnh to xà hã kên pota wỳr ma tẽ nẽ hã nhỹ. Mẽ ixpê Ijaew kapêr kãm mẽ ixte kãm: “Kapata” jarẽnh xwỳnhnta wỳr kot tanhmã Jejus jarẽnh to kaxyw ma hwỳr tẽ nẽ hã nhỹ nhũm mẽ hwỳr o tẽ.

¹⁴ Hãmri nhũm ra arĩgro pê sêsta. Mẽ ixpê Ijaew-jaja mẽ ixte Pas ã amnhĩ tomnuj mỳrapê mry hkwỹ hpar nẽ Tirtũm kôt pix mã amnhĩ nhĩpêx ã amnhĩ jarẽnh xà hã arĩgroja kato. Jakamã nhũm kaxkwa nhĩpôk ri myt nhỹ nhũm Piratja mẽ kot Jejus kator

ã harënh prãm xàj arĩ mẽ kãm ho mẽ õ pahi hã harë nẽ mẽ kãm:

—E ota mẽ anhõ Pahitita. Anë.

¹⁵ Hãmri nhũm mẽ tee ri ã harënh anhÿrja ã kuma nẽ mẽ kãm:

—Kwa apĩ ri. Ma o tẽ nẽ pĩ kahpa hã anhõ kê tokyx ty.

Anë nhũm tee ri mẽ kuma nẽ mẽ kãm:

—Kwa nà. Kêp mẽ anhõ pahi kênã kot paj kêt ri axtem nẽ mẽ apê kupĩ. Anë.

Hãmri nhũm mẽ kãm:

—Nà kêp mẽ inhõ pahi hkêt. Pahi Sesti pix na kêp mẽ inhõ pahi. Anë.

Mẽ kãm Sesti hkĩnh kêt tã ã kãm Jejus htyk prãm xàj ri harënh anë.

¹⁶ Hãmri nhũm Pirat tee ri ja hã mẽ kuma nẽ tã Jejus ã pôristi mã karõ nẽ mẽ kãm:

—E mẽ mãmrĩ ma o tẽ nẽ pĩ kahpa hã anhõ kê ty. Anë.

Hãmri nhũm mẽ kuma nẽ ma o tẽ.

Mẽ kot pĩ kahpa hã Jejus nhô ã mẽ harënh

Matêwre 27.32-44; Makre 15.21-32; Rukre 23.26-

43

¹⁷ Hãmri nhũm pôristija Jejus mã õ pĩ kahpa gõ nhũm kutu nẽ ma mẽ hkôt hkjênh o mỗ. Nhũm mẽ krĩ rùm ho kato nẽ ma hixêt prêk wÿr o tẽ. Hixêt prêkja mẽ kot harënh o: “Korkot” anë. No mẽ ixpê Ijaewjê kapër kãm na pa pre htem harënh o “Mẽ hkrã hi xà” anhÿr xwÿnhnta wÿr nhũm mẽ ma o tẽ nẽ hã ho api.

¹⁸ Hãmri nẽ pikap pĩ kahpa xi nẽ hã Jejus xi nhũm hã nõ nhũm mẽ prek o ãhkra ho htÿx nẽ hpar o htÿx. Hãmri nẽ kaxyw hkakwÿ nẽ hkakwÿnh pa nẽ kamã pĩ kahpata xãm nẽ hity hpa nhũm Jejus kÿx

pê ajêt. Hãmri nhũm mẽ mãănên wa ho hamëxkrut nê pĩ kahpa hã wa kunhò nhũm wa kuri ajêt. Wa kot tanhmã amnhĩ tomnuj to xwýnhja wa ho akutã Jejus nhĩjê nhũm wa uràk nê kýxpê ajêt.

¹⁹ Hãmri nhũm Piratja ò pòristi mã anê nhũm mẽ tap ò py nê hã tanhmã kagà hto nê kagà ho:

IJAEW NHÕ PAHI JEJUS NA JA
KÊP NAJARE NHÕ XWÝNH

²⁰ Nom mẽ ixpê Ijaew kapër pix kãm hã kagà hkêt nê. Mãănên Gresjê kapër kãm nê Raxijê kapër kãm nhũm mẽ mãănên hã kagà nê Jejus mýri kunhò. Hãmri nhũm Ijaew kwýjaja Jerujarê rùm hwýr mra nê mẽ kot ã hã kagà nhĩpêx anhýrta pumu nê kamã harê. Jerujarêja hixêt prêeta wýr jawý jakamã nhũm mẽ kurùm ohtô nê hwýr mra nê omunh o kuhê.

²¹ Hãmri nhũm patre hkrãhtũmjaja tee ri ã Jejus jarênh anhýr ã kagàta pumu nhũm ja mẽ kêp omnuj nê. Jakamã nhũm mẽ ma Pirat wýr mra nê kãm:

—Kwa mon ka ri hã mẽ kãm anê nhũm mẽ axtem nê ã ri kagà nhĩpêx anê? Kwa nà kêp mẽ inhò pahi hkêt. ãm htýx ri kot ã kot amnhĩ jarênh anhýr o pa kênã. Kwa hã kagàja o anhĩpa nê hpãnhã hã kagà ho: “Kêp Ijaew nhõ pahi hã kot amnhĩ to hêx xwýnh.” Anhýr o hpãnhã hã hipêx nê anhô nà? Anê.

²² Hãmri nhũm mẽ kuma nê mẽ kãm:

—Tk. Nà pa ho ixpinphanh kêt nê. Ra ixte hã kagà hpar kênã. Anê.

*Pôristijaja kot axpên mã Jejus xê ho pigràn
Matêwre 27.35-36, 27.55-56; Makre 15.24; Rukre
23.34*

²³ Hãmri nhũm pôristijaja kot axpẽn mã Jejus xê o pigràn h kaxyw amnhĩ tã haxwÿr o tẽ. Mẽ kệp 4 no nhũm Jejus xê kệp 5 jakamã nhũm mẽ amnhĩ kôt ho 4 nẽ haxwÿ nhũm pyxi nẽ hprã. ê rytita. Na pre hipêx muxre. Nhÿhÿnh hkayr xà pumunh kêt kumrẽx.

²⁴ Jakamã nhũm mẽ omu nẽ kãm hkĩnh nẽ. Hãmri nhũm hõ kot amnhĩm hpyr nẽ ho arĩk kaxyw nhũm mẽ hã kẽnre ho jôka. Na pre ra Tĩrtũm kapêr ã kagà htũm kot mẽ hkukamã ja hã mẽ harẽn h nẽ mẽ harẽn h kot:

Na prem axpẽn mã ixê o anghrà nẽ hã kẽnre ho jôka
ho hkrĩ.

Anhÿr o kot mẽ hkukamã mẽ harẽn h. Tã nhũm mẽ ra hkôt ã amnhĩ nhĩpêx anhÿr o hkrĩ.

Jejus kot Juãw nhĩhkram katorxà jaxàr ã harẽn h

²⁵ Nhũm Jejus par pê katorxà xa. Nẽ htõx nẽ Kropti hprõ Marir nẽ Marir Matarẽn mẽ nhũm mẽ Jejus katorxà nhĩhkô hã Jejus pumunh o kuhê. Nhũm amnhĩ tã mẽ omu

²⁶ nẽ mẽ kuri pa ixpê Juãw pumu. Hãmri nẽ kệp ixkràmnhwÿ mex ã ixtã katorxà mã kapêr nẽ kãm:

—E ota Juãwta. Kojaxpãnhã te kệp akra pyrãk o anhĩpêx nẽ tanhmã ato ajuta hto ho pa. Anẽ.

²⁷ Hãmri nẽ hpãnhã pa inhmã kapêr nẽ inhmã:

—E Juãw. Kêr ka te kệp akatorxà pyrãk o inhmã hipêx mex o ri apa.

Anhÿr jakamã pa kuma nẽ kot inhmã hã karõ xà hkôt inhõrkwÿ hwÿr haxà nẽ amnhĩ kôt ri ho ixpa.

Jejus htyk ã harẽn h

Matêwre 27.45-56; Makre 15.33-41; Rukre 23.44-49

28 Tã nhũm Jejus ra amnhĩ pumu hãmri nẽ hamaxpêr o:

—Nà Inhĩpêêxà kot mẽmoj tã inhmã karõta na pa ra kãm ho anhỹr o hitep xà xir kaxyw. Anẽ.

Hãmri nẽ kãm kôr ã amnhĩ jarẽ. Nom ra hkukamã Tĩrtũm kapêr ã kagà htũm kot htyk kaxyw nẽ kãm kôr kukamã harênh jakamã nhũm ã amnhĩ jarênh anẽ nẽ kapêr o:

Nà na pa ra inhmã kôr nẽ. Anẽ.

29 Nhũm hpar pê guhkrax kãm wĩhti punureta ãm jakamã nhũm mẽ ã kot amnhĩ jarênh anhỹrja ma nẽ kaxyw mẽmo rerek py nẽ o tẽ nẽ kaxyw pĩ ryti hõ py nẽ ho hkanhwỳ. Nẽ akupỹn o tẽ nẽ ho wĩhti mã haxà nẽ kãm kupê.

30 Nhũm hkaô nẽ hkaôr pa hãmri nẽ kapêr o:

E nà hãmri na pa ra mẽ piitã mẽ kot amnhĩ tomnuj pãnhã amnhĩrer pa. Jao ra Inhĩpêêxà kãm hprãm xà hkôt kãm tanhmã amnhĩ nhĩpêx to jatur xàm kumẽ.

Anhỹr o amnhĩ jarênhja kôt ahpar mã hkrã nẽ ty.

*Mẽ kot kô xwa ho Jejus kamnhwỳr ã harênh
Wam Juãw 5.6-8*

31 Nhũm ra sêsta nhũm apkati nhũm mẽ inhõ arĩgromnu pê sap kaxyw. Sapja ã na hte mẽ ixpê Ijaew mẽ ixkĩnh pê Pas ã ixkĩnh rũnh o ixpa. Nhũm mẽ kãm sap ã arĩ mẽ htyk nẽ mẽ harir xwỳnhjê pumunh prãm kêt jakamã nhũm Ijaew krãhtũmjaja ma Pirat wỳr mra nẽ kãm:

—Kwa pôristi mã anẽ kê mẽ tokyx mẽ hte hi kukê kê mẽ htyk tokyx anẽ. Kê mẽ tokyx mẽ o wrỳ nẽ ma mẽ o mra nẽ mẽ hagjê. Kormã sap kêt ri. Anẽ.

³² Hāmri nhũm mẽ kuma nẽ õ pôristijê mã anẽ nhũm mẽ ma mẽ hwỳr mra nẽ akutã wa kot Jejus nhĩjê nẽ jêt xwỳnhta wa kumrẽx wa hte hi hkwỳr.

³³ Hāmri nẽ hpãnhã Jejus wỳr tẽ nẽ omu nhũm ra htyk mex nẽ ajêt nhũm mẽ ja hã omu nẽ kêp hte hi hkwỳnh kêt nẽ.

³⁴ Nhũm pôristi hõja kô xwa py nẽ ho ihkjê rũm hkanhwỳ nhũm hkamrô mẽ ĩ kagô ahkà nẽ hprôt nhũm mẽ hkwỳja omunh o kuhê.

³⁵ Nẽ ixpê Juāw na pa pre ijaxwỳja mẽ ĩhkô hã xa nẽ ja hã omunh jakamã pa ã mẽ amã hã kagà anẽ. ãm hāmri na pa mẽ amã harẽ nẽ hã kagà. Mẽ ate kamã harẽnh nẽ harẽnh mar nẽ hkôt ajamaxpěr kaxyw.

³⁶ Na pre ra Tĩrtũm kapěr ã kagà htũm kamã ra hkukamã tanhmã kot mẽ pahwỳr mẽnh xwỳnhta jarẽnh to nẽ hã kagà. Nẽ hã kagà kot:

Koja mẽ nhỹhỹnh hi hkwỳnh kêt nẽ. Anẽ.

Tã nhũm mẽ ra hã kagàja kôt ã hipêx anẽ nẽ kêp hi hkwỳnh kêt nẽ.

³⁷ Nẽ Tĩrtũm kapěr ã kagà htũmja mããnẽn ja hã harẽnh kot:

Mẽ kot hpĩr nẽ hkanhwỳr xwỳnhja koja mẽ hpar pẽ omunh o kuhê. Anẽ.

Tĩrtũm kapěr ã kagà htũm kamã ã Jejus tyk kukamã harẽnh kot anhỹr.

Mẽ kot Jejus jaxàr ã mẽ harẽnh

Matêwre 27.57-61; Makre 15.42-47; Rukre 23.50-56

³⁸ Tã nhũm Juje pẽ Arimatej nhõ xwỳnhja Jejus ra htyk ã omu nẽ ma Pirat wỳr tẽ nẽ hã kãm kapěr. Kot ma o mõi nẽ tokyx haxàr kaxyw. Na pre ra Jejus kôt amnhĩ xãm nom Ijaew krãhtũmjê pymaj

mě kãm amnhĩ to amnhĩrĩt kêt nẽ. Jakamã nhũm ma Pirat wỳr tẽ nẽ hã kãm kapěr nẽ kãm:

—Pa e ot pa awỳr tẽ. Ixte mẽmoj tã amã ixkapěr kaxyw. Kot kaj apu inhmã “ỳ” anhỹr japêr. Kwa xà kot pa ma Jejus o mỗ nẽ haxà? Anẽ.

Hãmri nhũm kuma nẽ kãm: “Nà mãmri ho anẽ.” Anẽ hãmri nhũm ma hwỳr tẽ nẽ ho wry nẽ kumỳ nẽ ma haxàr mã o mỗ.

³⁹ Nhũm Nĩkotẽja ma hkôt tẽ. Amnepê mã kot kamàt kãm Jejus wỳr htẽm nẽ wa axpẽn mã kapěr o ỳr xwỳnhta. Jakamã ma Juje hkôt tẽ. Nẽ amnhĩ kôt mẽ hkuxwa xà hkwy ho mỗ. ãm ho mỗr rax kumrẽx. Ho 34 kir nẽ kutu nẽ o mỗ. Mẽ hkuxwa xàja na pre mẽ kot mẽmo kuxwa xà mã “mĩra” nẽ “aroe” anhỹr jarẽnhja nhũm kaxyw hkwy jakà nẽ ho ahkà nẽ ho mẽ hkuxwa xà nhĩpêx. Hãmri nẽ kutu nẽ ma Juje kot Jejus jaxàr nhũm kot ho hkuxwa kaxyw hkôt o mỗ.

⁴⁰ Hãmri nhũm wa ho kupêxê kukõnh pa nẽ ho Jejus kupu. Mẽ ixpê Ijaew mẽ ixte mẽ htykjê jagjênh kaxyw ã mẽ hipêx anhỹr xà hkôt nhũm wa ã hipêx anẽ nẽ haxà.

⁴¹ Nhũm ra mẽ kot pĩ kahpa hã nhôr xà tã mẽ kot mẽmo pĩ ho pa nẽ hkre xwỳnh kwỳ kuhê. Nẽ kamã kẽn kre nyw. Kormã mẽ kot kamã mẽ htykjê hõ jaxàr kêt xwỳnhta.

⁴² Jakamã nhũm wa omu nẽ axpẽn mã:

—E kwa pu hwỳr Jejus o tẽ nẽ kamã mãn tokyx haxà. Kêr pu kormã sap kêt ri ra tanhmã amnhĩ to hpa. Anẽ.

Hãmri nẽ hwỳr kumỳ nẽ o tẽ nẽ kamã haxà nẽ hã hitom pa hãmri nẽ ma akupỹm krĩm wa tẽ.

20

Jejus akupÿm htĩr ã harẽnh

Matêwre 28.1-10; Makre 16.1-8; Rukre 24.1-12

¹ Tã nhũm sap tẽ nẽ hapêx nẽ hpãnhã semãn nyw krax xà pê tômk. Hãmri nhũm Marir Matarẽn kwÿhtã kãnhmã nhÿ. Kormã myt kator kêt ri kãnhmã nhÿ nẽ ma kẽn kreta wÿr tẽ. Nẽ hwÿr pøj nẽ tee ri hitom xà hã kẽn rax pumu. Nhũm ra nhãm hakwa kre kuhpa hã ri hikwÿ nhũm omu nẽ tee ri hkukamã hamaxpêr pê omunh o xa.

² Hãmri nẽ awjanã nẽ ma akupÿm hprõt nẽ nhÿri Simãw Pêtre nẽ pa ixpê Jejus krãmnhwÿ mex ã wa ixpumu nẽ hkaprĩ kamã wa inhmã harẽ nẽ wa inhmã:

—Xê na pêr mẽ pahpê mẽ panhõ Pahihti kapa nẽ nhÿhÿm ma o tẽ. Xê nhÿhÿm mãn pre wem o tẽ? Anẽ.

³ Hãmri pa wa kuma nẽ hwÿr ixprõt kurê kumrẽx.

⁴ Hãmri pa Simãw Pêtre mã wa nẽ ixkumrẽx hwÿr pøj.

⁵ Nom kormã kẽn kre hwÿr ixàr kêt ri kormã hakwa krem inhĩkôt nẽ kaxwÿnh kãm nõi xà kamã Jejus japêr ixrĩt o xa. Nhũm kupêxê nhĩrê pix nõ pa omu.

⁶ Hãmri nhũm Simãw Pêtre ixkôt tẽ nẽ ixrom krem àr kurê kumrẽx nẽ kupêxê nhĩrêta pumu.

⁷ Nẽ hkrã kupu xà pumu nhũm axtem hkrã muxre nẽ ahte nõ.

⁸ Hãmri pa hkôt axà nẽ nõi xà kaprÿ pumu nẽ ijamaxpêr o:

—Hêxta waa nẽ. Nà mãn akupÿm htĩr. Hã na nõi xà hkaprÿ mex nẽ. Nà mãn akupÿm htĩr kãm ga. Anẽ.

⁹ Ra Tirtũm kapēr ã kagà htũm kot ja kukamã akupỹm htĩr ã harēnh tã pa wa kormã ixprĩ hã ja hã omunh kêt nē. Tã kēn kre kaprỹ pumu nē kãm ijamaxpēr kurê kumrēx.

¹⁰ Hãmri nē wa ixkato nē awjanã nē ma akupỹm wa ixkwỳjê hwỳr wa tē.

*Jejus kot Marir Matarēn wỳr kator ã harēnh
Makre 16.9-11*

¹¹ No nhũm Marir Matarēnja arĩ kēn kre kapem hkaprĩ nē mỳr o xa. Nē mỳr pē hikôt nē kēn kre kamu

¹² nē kamã Tirtũm kapēr o wrỳk xwỳnh wa ho axkrut nē wa omu. Nhũm wa ê jakajre kamã wa nhỹ. Nhũm hõja hkrãm nhỹ nhũm hõja htem nhỹ.

¹³ Hãmri nē wa Marir Matarēn mã kapēr nē kãm:
—Kwa mon ka ri omu nē amỳr o xa? Anē.

Nhũm kãm:

—Xê nhũm. Na prem ma nhỹhỹm mẽ ixpê mẽ inhõ Pahihtija mỳ nē ma o tē nē hpãnhã nhỹri kuxi. Anē.

¹⁴ Rôm nhũm Jejus tãm tē nē hkatut kôt xa nhũm Marir Matarēn ho hakēx nē omu nom hprĩ hã omunh kêt nē. Omu nē htỳx ho axtem mẽhõ hã hkamnhĩx.

¹⁵ Hãmri nhũm kãm:

—Kwa mon ka ri amỳr o xa? Mẽhõ na ka ri hapêr arĩt pē amỳr o xa? Anē.

Hãmri nhũm kuma nē htỳx ho pĩ hkre jamãr xwỳnh ã hkamnhĩx nē kãm:

—Xê xà ka na ka mẽ ixpê mẽ inhõ Pahihti ho ahkĩ nē ma o tē nē nhỹri axi mê? Xê ka japêr nē akatàt kôt inhmã harē. Nhỹri inhmã nõi xà jarē pa ma

hwÿr tẽ nẽ kumÿ nẽ man akupÿn o tẽ nẽ akupÿm kën kre kamã kuxi. Anẽ.

¹⁶ Hãmri nhũm Jejus kãm hixi jarẽ nẽ kãm:

—Kwa Marir Matarẽn. Amnẽ ixpumu nẽ arĩ ã akapër anẽ nà. Anẽ.

Hãmri nhũm jatã hprĩ hã kuma nẽ ho hakẽx nẽ amnhĩ jaêr pẽ hprĩ hã omu nẽ kãm:

—Xê Pahiti. Xep ka na ka. Hêxta gàu nẽ. Anẽ.

Nom mẽ ixpẽ Ijaew kapër kãm Pahita jarẽnh o: “Raponĩ” anẽ. Nhũm ã kãm kapër anẽ hãmri nẽ axte ma nhÿhÿm kêp htẽm pymaj hpa hã kupy.

¹⁷ Hãmri nhũm kãm:

—Kwa inhmã anhũre. Na pa kormã ma akupÿm Inhĩpêêxà hwÿr ixàpir kêt nẽ. E tokyx ma akupÿm tẽ nẽ ixtõ nẽ ixtõxjê mã ijarẽ. Na ka prem apê ixkrànnhwÿ pix tã ra mẽ apê ixtõ nẽ ixtõx na ka mẽ. Jakamã ma akupÿm mẽ hwÿr tẽ nẽ mẽ kãm ijarẽ. Nẽ mẽ kãm: “Na Jejus mẽ awÿr pẽr mẽn h o: ‘Kot paj tokyx ma akupÿm Inhĩpêêxà Tĩrtũm wÿr api. Nom kêp pa Inhĩpêêxà pix kêt mããnẽn kêp mẽ Anhĩpêêxà na. Nẽ mããnẽn kêp mẽ anhõ Tĩrtũm na.’ Anhÿr o mẽ awÿr pẽr mẽ.” Anẽ. E ma akupÿm mẽ hwÿr tẽ nẽ tokyx ã mẽ kãm ijarẽnh anẽ. Anẽ.

¹⁸ Hãmri nhũm kuma nẽ ma akupÿm mẽ ixwÿr tẽ nẽ mẽ inhmã awjarẽ nẽ mẽ inhmã:

—Xê na pa ham mẽ panhõ Pahitita pumu. Na akupÿm mẽ pamã htĩr. Anẽ.

Hãmri nẽ mẽ inhmã kot tanhmã kãm kapër to hã harẽ pa mẽ kuma nẽ tee ri hkukamã ijamaxpër.

Jejus kot hkwyjê hwÿr kator ã harẽn

Rukre 24.36-43

¹⁹ Tã nhũm tòmĩk nẽ kamàt pa mẽ Jejus kôt ixpa ho ixpa xwÿnhjaja axpẽn wÿr akuprõ hãmri

nē Ijaew krāhtũmjê pymaj hakwakre kahê hpa nē axpẽn mã ixkapěr o ixkrĩ. Nhũm Jejus mẽ ijaêr pê nhỹhỹnh mẽ ixwỳr axà nē mẽ ixkuri xa nē mẽ inhmã:

—Pa. Xà kormã mẽ anhõt kêt? Anẽ.

²⁰ Hãmri nē mẽ inhmã amnhĩ nhĩhkra kamã prek tatak xà jahkre nē hakỳx kôt mẽ kot hkanhwỳr xàja nhũm mẽ inhmã hahkre. Pa mẽ akupỹm htĩr kãm omu nē ixkĩnh tỳx kumrẽx.

²¹ Hãmri nhũm mẽ inhmã:

—E kwa kêr ka mẽ tee ri amnhĩ kukamã ajamaxpěr o amã ma ho ri apa hkêt nē. Na pre Inhĩpêêxàja mẽ awỳr inhmẽ pa pre wrỳ. Tã kot paj amnhĩ pyrà nē mẽ piitã mẽ hwỳr mẽ arẽ. Anẽ.

²² Hãmri nē mẽ ixkaxyw htyyxà mẽ nē mẽ inhmã Tĩrtũm mẽ wa Karõ jarẽ nē mẽ inhmã:

—E koja Tĩrtũm mẽ wa Ixkarõja wrỳ nē mẽ akarõ mã gjêx pa.

²³ Ka mẽ ỹ hã ma mẽ piitã mẽ hwỳr apa nē mẽ kãm Tĩrtũm kapěr jarẽnh o ri mẽ hkôt apa. Nē nhỹri mēhõ pumu nē inhỹ hã kãm: “Kot kaj Tĩrtũm kôt amnhĩ xãm nhũm amnhĩ tã apumu nē anê ate amnhĩ tomnuj rênh pa.” Anẽ. Ka mẽ ã kãm akapěr anẽ nhũm mẽ ama nē hkôt amnhĩ xãm nhũm Tĩrtũm amnhĩ tã omu nē nê kot amnhĩ tomnuj rênh pa. Nom koja mẽ ama nē ãm mẽ ama nē hkôt amnhĩ xãm kêt japêr ka mẽ inhỹ hã kãm: “Nà kot kaj Tĩrtũm kôt amnhĩ xãm kêt nē nhũm anê ate amnhĩ tomnuj rênh kêt nē.” Anhỹr o kãm akapěr nhũm Tĩrtũm ho anẽ nē nê rênh kêt nē. E kêr ka mẽ ã inhỹ hã amnhĩ nhĩpêx anhỹr o ri apa. Anẽ.

Nhũm pre ã Jejus mẽ inhmã kapêr anê hãmri nê kato nê ma nhỹhỹm tẽ.

Jejus kot Tomas mã kapêr ã harênh

Matêwre 28.17

²⁴ No nhũm mẽ inhĩõ pê Tomas pihpohtita kormã mẽ ixkĩnhã akupỹm Jejus htĩr kãm omunh kêt nê. Na pre ma kape hã tẽ nhũm wakre kamã mẽ ixwỳr axà nê mẽ inhmã kapêr hãmri nê ma nhỹhỹm tẽ. Jakamã nhũm Tomas akupỹn mẽ ixwỳr tẽ nê axà pa mẽ kãm harê nhũm tee ri mẽ inhma nê mẽ ixkõt hamaxpêr kêt nê.

²⁵ Nê mẽ inhmã:

—Nà kot pa ìhkra kamã prek tatak xà pumu nê kamã inhĩhkra hkrã jaxà. Nê hakỳx kõt hkanhwỳr xàta pa mã ho anê nê omu nê kamã inhĩhkra hkrã jaxà nê rĩ kormã akupỹm htĩr kõt ijamaxpêr. Anê.

²⁶ Tã nhũm semãn pyxi nê hapêx pa mẽ axte axpêh wỳr akuprõ nê axte Ijaew krãhtũmjê pymaj amnhĩ tã kahê htỳx nê ixkrĩ. Nhũm Tomas tã mẽ ixkuri nhỹ. Hãmri nhũm Jejus axte nhỹhỹnh mẽ ixwỳr axà nê mẽ inhmã:

—Pa. Na ka mẽ rĩ akrĩ. Anê.

²⁷ Hãmri nê Tomas pumu nê hwỳr tẽ nê kãm ìhkra pẽ nê kãm:

—E ota inhĩhkra kamã prek tatak xàta. Mãmri kamã anhĩhkra hkrã jaxà. Nê hpãnã ijakỳx kõt mẽ kot ixkanhwỳr xà kamã mã ho anê nê haxà nê akupỹm ixtĩr kõt ixpumunh kurê kumrêx. Anê.

²⁸ Hãmri nhũm kuma nê kãm:

—Nà pêr ãm hãmri apê inhõ Pahшти Tĩrtũm na ka. Anê.

²⁹ Hãmri nhũm kãm:

—Tỳ. ãm ano ho ixpumunh kôt pix mã na ka ixkôt ajamaxpêr. Tã no ãm koja mẽ nhỹrmã mẽ amỳr pê mẽ pa xwỳnhjaja mẽ akĩnhã mẽ no ho ixpumunh kêt tã akupỹm ixtĩr ã ijarênh mar pix tã ixkôt hamaxpêr. Ja na mex kumrêx. Anê.

*Juãw kot tanhmã amnhĩ jarênh to hã harênh
Rômãn 15.4; Wam Juãw 5.13*

³⁰ Na pre Jejus kormã mẽ ixto pa ri mẽ inhnoo mã mẽmoj tanhmã hipêx to rax nê nom kot paj kagàja kamã piitã hã kagà hpar kêt nê.

³¹ ãm hkwỳ pix na pa mẽ amã hã kagà. Mẽ ate mẽ ixpyrà nê omunh nê kêp Tĩrtũm Kra hã kot mẽ pakaxyw ãm xwỳnh ã omunh nê hkôt amnhĩ xunhwỳr kaxyw na pa ã mẽ amã harênh nê hã kagà anê. Tã kot kaj mẽ amnhĩ kaxyw hkôt ajamaxpêr nê hkôt amnhĩ xunhwỳr hãmri nê nhỹrmã atyk tã nhũm akupỹm mẽ ato mẽ atĩr ka mẽ ixpyrà nê kuri amex nê atĩr tũm nê apa ho apa. Tã pa ã mẽ amã mẽmoj piitã harênh nê hã kagà anê.

21

*Jejus kot hkwỳjê hwỳr kator ã harênh
Matêwre 26.32, 28.7, 28.10*

¹ Tã nhũm Jejus axte hkôt mẽ ixpa ho mẽ ixpa xwỳnh kwỳjê hwỳr kato. Himô pê Tipeja mỳri.

² Pa mẽ ixpê 7 nê axpên wỳr akuprô. Na pre Simãw Pêtre nê Tomas pihpohti nê Natãnaew. Natãnaewja Garirej kamã krĩ pê Kanã nhõ xwỳnh na pre. Nê wa pa wa ixpê Jepetew krata wa nê wa inhĩõ wa pijakruuta wa. Pa prem wa mẽ nhỹri axpên wỳr akuprô.

³ Hãmri nhũm Simãw Pêtre mẽ inhmã:

—E pa jarāhã ma tep wỳr tẽ nẽ hkwỳmnê. Anẽ.

Pa mẽ kuma nẽ kãm:

—Tôe. Nà pa mẽ ijaxwỳja ma akôt mỗ. Anẽ.

Hãmri nẽ mẽ ma himô rax pê Tipeja wỳr mỗ nẽ kanôre mã agjê nẽ gôx kãm kryhti rênh o ixkuhê. Nom tee ri ho tep ômnênh kaxyw rênh o ixkuhê nẽ hõmnênh kêt nẽ ixtã apkati nhũm tep amrakati kumrẽx.

⁴ Tã nhũm myt kato nhũm Jejus gô mỳri xa. Pa mẽ ixpiitã omu no ãm ixprĩ hã kêp Jejus ã omunh kêt nẽ. Tã no nhũm tãm xa.

⁵ Hãmri nẽ mẽ inhmã kapêr nẽ mẽ inhmã:

—Pa. E măn ka mẽ ra tep kwỳmnênh rax nẽ nà? Anẽ.

Hãmri pa mẽ kãm:

—Tk. Nà mo tep? Amrakati kumrẽx kênã. Anẽ.

⁶ Hãmri nhũm mẽ inhmã;

—Xô wehe? Tôe. Axte mẽ axupôk rũm kryhti mẽ nẽ omu. Anẽ.

Hãmri pa mẽ mar xà hkôt ho anẽ nẽ kumê. Hãmri nhũm kamã tep hipu rax kumrẽx nhũm utĩ rax nẽ. Pa mẽ tee ri ixte ho ixàpir kaxyw ri hkukjê.

⁷ Hãmri pa kêp Jejus ã omunh kurê kumrẽx nẽ Simãw Pêtre mã kãm:

—Kwa pêr mẽ panhõ Pahihtita na. Anẽ.

Hãmri nhũm inhma nẽ hkĩnh tỳx nẽ akupỳm hinôkà jaxà nẽ gôx kãm mrỗ nẽ ma hwỳr ho nana ho tẽ.

⁸ Hãmri pa mẽ hkôt kanôre kamã kryhti kjênh o mỗ. Ra amgrà hwỳr amgrire. Wỳr 100 met pix jakamã pa mẽ hwỳr ixpôx tokyx anẽ.

⁹ Nẽ pàr o hkre kura nẽ kuxi nẽ ijapôx pa nẽ Jejus wỳr ixprôt nẽ mra. Nhũm ra mẽ ixkutêp kuto nẽ par nhĩpêx nẽ nhỹhỹnh tep kwỳ par kãm haxwỳ nẽ

ho àr o nhỹ. Nẽ kaxyw pãwti nẽ amnhĩ ri haxwỳ nẽ o nhỹ.

¹⁰ Hãmri nẽ mẽ ixpumu nẽ mẽ inhmã:

—E mẽ amnẽ anhõ tep o mra pu mẽ hkuxôt nẽ kuku. Anẽ.

¹¹ Hãmri nhũm Simãw Pêtre akupỹm pàr wỳr tẽ nẽ kryhti ho htỳx xà hpôt nẽ amgrà hwỳr hkjênh o mỗ. Kamã tep rũnh pix. Nẽ ohtô nẽ. Kamã kêp 153 nẽ hikwỹ htã nhũm nhỹhỹnh kryhti hkwy pikaxôn h kêt nẽ.

¹² Hãmri nhũm Jejus mẽ inhmã:

—E kwa mẽ tokyx mra pu mẽ apku. Anẽ.

Hãmri pa mẽ kuma nẽ hwỳr mra nẽ ixkrĩ pa. Hãmri nẽ tee ri omunh o ixkrĩ. Mẽ ixprĩ hã omunh mex kêt tã kot ã mẽ inhmã amnhĩ nhĩpêx anhỹr ã omu nẽ kêp mẽ inhõ Pahihti hkôt omunh kurê kumrêx jakamã hixi hã hkukjêr kêt nẽ. ãm akryk omunh o ixkrĩ.

¹³ Hãmri nhũm mẽ inhmã pãwti ho hkry pa. Nẽ hpãnhã tep jamỳ nẽ mã ho anẽ nẽ ho hkry pa nẽ ho mẽ inhĩpêx pa pa mẽ ixàpkur o ixkrĩ.

¹⁴ Nhũm Jejus akupỹm htĩr kãm ra ahpỹnhã mẽ ixwỳr hapôx o axkrunêpxi.

Jejus kot akupỹm tãm Simãw Pêtre xãm

Atre 20.28-31; Wam Pêtre 5.1-4

¹⁵ Tã pa mẽ ra ixàpkur pa nẽ kànhmã ixkuhê nẽ gô mỳ ri mra. Hãmri nhũm Jejus Juãw hkra Simãw Pêtre mã tanhmã kapêr to. Nom ixpê Juãw nhũm kêp ixkra hkêt axtem Juãw õ hkra na pre. Jakamã nhũm Jejus kãm kapêr nẽ kãm:

—Kwa Simãw. Xà we amã ijapê ho ate pika hkôt mẽmoj piitã hakrenh par nà? Anẽ.

Hãmri nhũm kuma nẽ kãm:

—Tỳ inhmã ajapê htỳx kênã Pahihti. Ra ate ja hã amnhĩ tã ixpumunh mex. Inhmã ajapêê. Anẽ.

Hãmri nhũm kuma nẽ kãm:

—Tôe. Nà kêr ka inhmã mẽ kot ixkôt amnhĩ xunhwỳr xwỳnhjê jahkre mex o ri mẽ hkôt apa. Te ho ôwêhti hkrare jamãr xwỳnh kot hamãr mex o ri hkôt pata pyràk. Anẽ.

Hãmri nhũm kãm:

—Tôe. Nà kot paj amã mẽ ho anẽ. Anẽ.

¹⁶ Tã nhũm hã ahtũmre nhũm kê axte kãm:

—Kwa Simãw. Xà we ãm hãmri na ka inhmã amnhĩ jarê. Xà we amã ijapêê nà? Anẽ.

Hãmri nhũm kãm:

—Tỳ. Ra ate inhmã ajapê hã ixpumunh kênã. Anẽ.

Hãmri nhũm kê axte kãm:

—Tôe. Kêr ka inhmã mẽ kot ixkôt amnhĩ xunhwỳr mã xwỳnhjê jahkre mex o ri mẽ hkôt apa. Te ho ôwêhti jamãr xwỳnh kot ôwêhti jamãr mex o hkôt pa xwỳnh kot amnhĩ nhĩpêx pyràk. Anẽ.

Hãmri nhũm kãm:

—Nà kot paj amã mẽ ahkre mex o ri mẽ hkôt ixa. Anẽ.

¹⁷ Tã hãmri nhũm hã ahtũmre nhũm kê axte kãm:

—Kwa Simãw. Xà we ãm hãmri na ka inhmã amnhĩ jarê? Xà we amã ijapê htỳx kumrêx nà? Anẽ.

Hãmri nhũm tee ri amnhĩ tã kuma nẽ hkaprĩ nẽ. Ra kot amnhĩ tã hkukjêr o axkrunêpxi jakamã nhũm hkaprĩ nẽ tee ri hamaxpêr. Hãmri nẽ kãm:

—Kwa Pahihti. Ate mẽmoj piitã omunh par. Nẽ ate inhmã ajapê htỳx ã ixpumunh par kênã. Anẽ.

Hãmri nhũm kê axte kãm:

—Tôe. Kêr ka inhmã mẽ kot ixkôt amnhĩ xunhwÿr mã xwÿnhjê jahkre mex o ri mẽ hkôt apa. Te ho ôwêhti jamãr xwÿnh kot hamãr mex o ri pata pyràk. Anê.

Hãmri nhũm kãm:

—Nà kot paj amã mẽ ho anê Pahihti. Anê.

Simãw Pêtre tanhmã htyk to hkukamã harênh

¹⁸ Nhũm Jejus arĩ Simãw Pêtre mã kapêr nê kãm tanhmã htyk to hkukamã harênh to nê kãm:

—Kwa ixkapêr ma nê amnhĩ krã him haxàr tÿx nê hã apa Simãw Pêtre. Nà kormã anyw ri na ka pre hte ma nhÿhÿm apa kaxyw nê anojarêt hãmri nê anhĩnôhkà mex jagjê nê ma nhÿhÿm amã apa hprãm xà hkôt ri apa. Tã kot kaj apigêt nhũm mẽ apynê nê akahti hpre nê apa hpre nê ma nhÿhÿm ato mō ka mẽ kãm amnhĩ gō nê amnhĩ nê tanhmã mẽ kãm nê hkêt nê. Amã mẽ hkôt amōr prãm kêt tã mãmri mẽ kãm amnhĩ gō kê mẽ ma nhÿhÿm ato mō.

¹⁹ Tã kêr ka arĩ ixkôt amnhĩ xãm tÿx nê atĩr prãm xàj mẽ umaj axte ixkaga hkêt nê. Hãmri nhũm mẽ apĩ nê tanhmã atyk to hã apumu nê amã Tĩrtũm kĩnh ã apumunh mex kurê kumrêx. Hãmri nê atã Pahi Maati Tĩrtũm mex o mex ã harê. Anê.

Nhũm pre ã Jejus Simãw Pêtre tyk kukamã kãm ujarênh anê. Hãmri nê kãm:

—E kêr ka ixte amnhĩ to htÿx nê amarĩ mẽ kãm ixãm nhũm mẽ kot ixpĩrja pyrà nê ã amnhĩ nhĩpêx anê. Anê.

Hãmri nhũm kuma nê kãm:

—Tôe. Nà kot paj hãmri tã ã amnhĩ nhĩpêx anê Pahihti. Anê.

Juãw tyk kukamã tanhmã harënh to hkêt ã harënh

²⁰ Nhũm pre ã Jejus Simãw Pêtre mã tanhmã htyk to hkukamã harënh anë. Hãmri nhũm kuma nẽ ixpê Juãw ã ixto hakëx nẽ ixpê Jejus kràmnhwý mex ã ixpumu. Kormã Jejus htyk kêt ri kamàt kãm mẽ ixàpkur o ixkríta ã na pa pre ìhkô hã ixàpkur o nhỹ nẽ kot mẽ kãm òr mã xwýnhnta nhĩxi hã hkukja.

²¹ Jakamã nhũm Simãw Pêtre ixto hakëx nẽ ixpumu nẽ ixtã Jejus kukja nẽ kãm:

—Kwa no për pahkôt mõi mũj? Tanhmã koja we htyk to? Anë.

Hãmri nhũm kãm:

²² —Nà kot paj amã tanhmã htyk to hkukamã harënh hkêt nẽ. Kot pa inhmã arĩ kritpêm pa rãhã pa akupýn ixwryk prãm nhũm arĩ pa nẽ htyk kêt rãhã pa akupýn wrý. Kêr ka ri htyk kukamã tee ri tanhmã ajamaxpër to hkêt nẽ. ãm ixkôt pix mã ate amnhĩ nhĩpëx tỳx pix kukamã mãn ajamaxpër o ri apa.

²³ Anhỹr o kãm ijarënh jakamã nhũm mẽ ixkwýjaja kot ã ijarënh anhỹrja ã kuma ma nẽ htỳx nhỹrmã ixtyk kêt ã ixkamnhĩx. Nẽ gaa nẽ rĩ piitã axpën mã ã ijarënh anhỹr o pa. Nom na pre ã ijarënh anhỹr kêt nẽ. Na kêt pre ijarënh o:

—Kot pa inhmã arĩ ri kritpêm pa rãhã pa akupýn ixwryk prãm nhũm arĩ pa nẽ htyk kêt rãhã pa akupýn wrý.

Anhỹr o ijarë. Nom ãm hãmri ixtyk kêt rãhã nhũm akupýn wrýk ã ijarënh kêt nẽ.

Juãw kot Jejus kot tanhmã amnhĩ to hã kagà hpar kêt ã kot amnhĩ jarënh

Juãw 20.30-31

²⁴ E na pa mẽ amã Jejus kot tanhmã amnhĩ nhĩpêx to ho pa hã harẽ nẽ hã kagà. Ixpê hkôt ri ixpa ho ixpa xwỳnhjê hõ na pa ãm hãmri ã hã kagà anẽ. Ka mẽ kamã harẽ nẽ ama nẽ ãm hãmri ixte kagà nhĩpêx kôt ixpumunh mex kurê kumrêx.

²⁵ No na pre Jejus ãm ja pix o anhỹr o pa hkêt nẽ. Na pa ãm mẽ amã hkwỳ pix jarẽ nẽ hã kagà. Na pre tanhmã ri mẽmoj to rax kumrêx o ri pa. Nom kêp ãm ixte kot tanhmã ri amnhĩ nhĩpêx to piitã hã kagà hpar ronhỹx hã kagàja katutxô rax kumrêx. Jao te ra kaxkwa htêp o mõi pyræk.

Tã ãm ja pix. Na hapêx.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files
dated 29 Jan 2022

383a4e22-34cd-505f-9cc2-2f9921e7aa9f